
ШУҲРАТ

ТАНЛАНГАН АСАРЛАР

Уч жилдлик ● Биринчи жилд

*Шеърлар
Туркумлар
Түртликлар
Хаҗвлар
Болаларга
Таржималар*

**Fafur Gulom nomidagi
Adabiyot va san'at nashriyoti
Toshkent — 1978**

Ўз
Ш 97

Шуҳрат.

Танланган асарлар. З жилдлик. Сўз боши муаллифи:
М. Қўшжонов. Т. Адабиёт ва санъат нашриёти, 1978.
1- жилд: Шеърлар. Туркумлар. Тўртликлар. Ҳажвлар.
Болаларга. Таржималар. 560 б.

Қўлингиздаги ушбу китобга атоқли адаб ва шоир Шуҳратнинг турли йилларда ёзилган шеърлари жамланди. Муаллифнинг «Жангчи блокноти», «Кавказ дафтари», «Дунай соҳилларида», «Одамлар ва обидалар» туркумлари шоир ижодида алоҳида ижодий босқич бўлди. Бу мажмуудан унинг болаларга аталган шеърлари, ҳажвалари, тўртликлари ва таржималари ўрин олган.

Шуҳрат. Избранные произведения. В 3-х т. Т. I. Стихи. Циклы стихов. Четверостишье. Сат. стихи. Детские стихи. Переводы.

Ўз2

Ш 70403—215
352 (06)—78 139—78

ИЖОДИЙ ЕТУКЛИК

Ўзбек адабиёти кейинги йилларда кучли оқим бўлиб катта йўлга тушиб олди. Бу йўлда у ўзига хос истеъдод әгалари бўлмиш, фақат иттифоқ миқёсида эмас, балки дунё китобхонларига маълум бўлиб бораётган адаб ва шоирларни етказди. Эндиликда ўзбек ёзувчилари ўз миллӣ адабиёт қобигини ёриб чиқиб, кенг кўламли тематикага қўл урадиган, бутун ер курраси ташвишлари билан яшаб, умуминсон тақдиди, келажаги, қисмати хусусида фикр юритадиган бўлиб қолди. Кейинги йилларда адабиёт майдонига кириб қалам тебратадиган ҳар бир ўзбек ёзувчisinинг ижоди бизнинг бу фикримизнинг далили бўла олади. Мен бу ерда шулардан бири — шоир, адаб, драматург Шуҳрат ҳақида икки оғиз сўз айтмоқчиман.

Мана менинг иш столимда Шуҳратнинг ҳар хил — каттакичик, ранг-бараг беzaқларда 30—40 йил давомида ҳар хил шаҳарлар, ҳар хил нашриётларда чоп этилган китоб ва китобчалири. Булар ичida унинг ўнлаб шеърий китоблари ва Йирик учта романи бор. У 1969 йилда асарларини йигиб уч томлик танланган асарларини ҳам нашр қилдирди. Бу китоб ва китобчаларни варақтрайман. Варақлаб бу сермаҳсул адаб ва шоир ижоди хусусида бир зум хаёл сурман: у нималар тўғрисида ёзмаган, нималарни ўзининг поэтик оламидан, адаблик мушоҳадасидан ўтказмаган, ҳаётнинг қайси бир томони билан қизиқмаган, нималарни кўриб, эшитиб изтироб чекмаган, нималарни ҳис қилиб чексиз қувонмаган? Ўзимни кўп уринтирмасдан жавоб томаман.

Ўзи ўсиб-улгайған она-Ватани, унинг ўзига ярашган урф-одатлари, ҳаёт ва меҳнат тарзи, қўлга киритган ютуқлари, ҳусни жамоли — булар ҳаммаси Шуҳратни қизиқтириди. У нималар тўғрисида ёзмасин, ўзининг қандай ҳис ва туйгуларини изҳор қилмасин, унинг асарлари «халқ», «ватан», «эл» тушунчалари билан бошланади, шу тушунчалар билан тугаллади. Зотан, у ўзининг бутун ижодини «элга бир ёдгор» деб билади.

Шуҳрат ижодининг асосий обьекти инсон — унинг ҳис-туйгулари, унинг ҳар хил фаслдаги, унинг ҳар хил босқичдаги сирли кечинималари, дард олами ва изтиробларидир. Ўзининг бу хилдаги ҳис ва туйгуларини айтиши учун шоир ҳар хил йўллар топади. Елдек югуриб, чақмоқдек чақнаб юрган ёшлик пайтларини эслайди; эсдан чиқмайдиган илк муҳаббатини тасаввур қиласиди; ёри билан бирга ўтказган унунтилмас дамларни, ширин сұхбатларни хаёлидан ўтказади; ўз сочига тушган оқ толани кўриб маълум бир босқичга бориб қолган умрига якун ясагандек бўлади... Шу йўллар билан одамларора кўз илгамас, сирли мусносабатларга назар ташлайди, ўзининг поэтик ҳукмини чиқаради. Бу ҳукм доим ҳаёттий, доим обьектив, доим оптимистик оҳангда. Шуҳрат ижодда замон билан бирга қадам ташлайди, у ўзининг поэтик қаҳрини исча йиллар дунёни, инсон ҳаётини таҳликага солган фашизм зулматини қоралашга, янги уруш оловини ёкишга уриниб тўпларни гилофдан чиқаришга жазм қилган кимсаларга қаратади. Жангчи-шоир сифатида ўзининг қарийб ҳар бир шеърида у шеърхонни ўтмишга, фашизм яратган қора кунларга қайтариб бир зумгина бўлса ҳам тарихда мисли йўқ ваҳшийликларни эслатади, шоирона ҳайрат, ғазаб изҳор этади:

Оналар бағридан олинса гўдак,
Келинлар номуси этилса барбод.
Үғирлаб кетилган рус боласига
Лондонда қўйилса инглизча от.

Бу мисраларни ёзиш учун фақат шоир бўлиш етарли эмас. Бундан ташқари ҳаётни чексиз севган инсон, ўз маслагида мустаҳкам турган гражданин бўлиш ҳам керак. Шуҳрат шу хилдаги инсон—шоир, шу хилдаги ўз элининг гражданидир.

Танқидчи ва адабиётшунос Умарали Норматов таъкидллага-нидек, Шуҳрат воқеабанд шеърлар муаллифи, бошқача қилиб айтганда, у «сюжетпараст» шоирdir. Унинг аксарият шеърлари митти сюжетлар асосида яратилган. У айтмоқчи бўлган поэтик фикрини фақат шеърий оҳангга эмас, фақат топилган образли ибораларгагина эмас, балки шоирона топилган сюжетга ҳам юклайди.

Шуҳрат бадиий ижодни анча эрта бошлаган. Шоиринг ўз иқорига қараганда, унинг биринчи шеъри 1935 йили «Ленин учқуни» газетасида эълон қилинган экан. Ўша вақтларни эслаб шоир ёзади:

«Бу маҳалда мен Ўрта Осиё транспорт инженерлари тайёрлаш институтининг биринчи курсида ўқир эдим. Бундоқ юрагимга қулоқ солсан, ундан шеър товуши келётганга ўхшарди,

ҳар нарсада бир шеърий жилва кўринарди. Шеърга бўлган ҳавас шунақа кучайиб кетдики, ўсмирлигимга ярашган транспортчилар формаси ва йилда бир марта бериладиган бепул поезд билети ҳам кўзимга кўринмай қолди. Кунлардан бир куни ўзимни инженер бўлишдан астойдил совиганимни пайғаб, ўқишига бормай қўя қолдим. Бунинг эвазига Ўзбекистон совет ёзувчилари союзининг қатнашувим мумкин бўлган бирор йигилиши ва мунозарасини канда қилмасдим. Бу орада Ёзувчилар союзининг консультация бюросига котиб бўлиб ишга кирдим. Демак, катта қозонга тушдим. Энди ўқиганим ҳам, эштитганим ҳам деярли ёзувчи ва китоб ҳақида бўлиб қолди. Қулогум пиший бошлади. Баъзи бирорлар билан кўй олиб кўришадиган бўлиб қолдим. Тахаллус ҳам танладим, матбуотда кўринишими чакки әмас, унча-мунча оғизга ҳам тушдим».

Унинг уч томлик танланган асарларига киритилган энг дастлабки шеърларидан бири «Кичик саргузашт» 1937 йилда, яъни шоир 18 ёшларда бўлган пайтда ёзилган экан. Кўп ўтмай Шуҳрат «Орзу ва қосос» поэмасини ёзади.

Бу поэманинг умум мазмуни, поэтик структураси шуни кўрсатадики, шоир ўша даврларда адабийтимизда пайдо бўлаётган муҳим бир тенденцияга — меҳнаткаш халқ вакилларининг синфий уйғониш, ўз-ўзини англашини кўрсатишга жўр бўлди. Позманинг қаҳрамони оддий меҳнаткаш йигит Самад Йўлчи, Гофир типидаги шахс. У ҳаётдан ҳақиқат излайди, аммо топа олмайди, инсон ҳақ-ҳуқуқини ҳимоя қилиш йўлига ўтади, ҳимоя қила олмайди, шу йўлда ҳалок бўлади.

Улуг Ватан уруши йиллари... Ҳаётининг бу даврларини шоир шундай эслайди: «Совет Армияси сафига чақирилганимча Улуг Ватан уруши бошланиб кетиб, фақат урушнинг охирги йилидаги на ярадор ва контузия бўлиб уйимга қайтдим. Гарчанд, фронтда мунтазам ижод әтолмаган бўлсан ҳам, қачонлардир бу севимли ҳунаримга қайтиш иштиёқи бир лаҳза ҳам хаёлимдан кетгани йўқ. Баъзан завқ-шавқимни ёки душманга нафратимни қоғозга тушириб қўяр эдим».

Назаримда, мана шу қоғозга туширилган завқ-шавқлар, нафратлари асосида шоир «Фарзанд» номли поэмасини яратди. Бу поэма госпиталда ёзилган. Шуҳрат поэманинг ёзилиш тарихини эслаб шундай дейди: «Мен фронтда ярадор бўлиб госпиталга тушдим. Узоқ вақтлар жангларда юриб китобни соғиниб қолган эканман, ярадорликдан бир оз ўзимни ўнглаб олгач, мактаб кутубхонасидан (госпиталь жойлашган бино илгари мактаб бўлган экан — М. К.) Пушкин асарларини, хусусан, унинг «Евгений Онегин»ини олиб, қайта-қайта мутолаа қилдим. «Фарзанд» мана шу мутолаа натижасида, тўғрироги, А. С. Пушкин таъсирида пайдо бўлди».

Поэмада казаклар эли анъаналарини маҳкам ушлаган, қабрда ётган қаҳрамон отаси учун, униб-ўсган она хутори учун, ҳижронда қолган гўзал ёри учун фашистларга қарши жанг қилиб қаҳрамонона ҳалок бўлган казак фарзанди Волин образи яратилади. Поэма шоирнинг фронт таассуротлари асосида яратилган биринчи асари эди. Кейинчалик тартибга солинган «Жангчи блокноти» туркуми ҳам худди ўша фронт «завқ-шавқлари ва нафратлари» асосида ёзилди. Мана, ўша кезлари шоир кузаттган баъзи лавҳалар тасвири:

Бир лавҳаки, отилган гўдак
Гарчча тишлаб ётар тилини.
Зулм туфайли минглаб келинчак
Тарк этади севтан элини.
Бир лавҳаки, кечаги бўстон
Бугув ўзга — соврилган, хароб...
Минг-минг йиллар севилган достон
Ёвга қолиб саналмиш нобоб!..

Туркумни бошдан охиригача кўздан кечирсангиз кўрасизки, бу кичик-кичик шеърларда Улуг Ватан уруши жангларида бошидан охиригача қатнашиб ўт ва сув кечиб, Ватан учун жон олиб-жон беришга тайёр турган, неча мартараб ажалга чал берган совет жангчисининг ҳис ва туйгулари, яна бошқачароқ қилиб айтганда, жангчи-шоирнинг беш йиллик жанговар биографияси намоён бўлади. Бу «биография»да ҳамма нарса бор — маъюс кузатишлар, орзиқиб кутишлар, тасодифий учрашувлар, қувноқ дийдор кўришувлар, яна кузатишлар ва яна дийдор кўришувлар...

Дафтарнинг охирида Шуҳрат жанговар йиллар өртагининг узунлиги, бироқ ундан кўра истиқбол ҳақида гапириш афзалигини айтади. Шоир ижодда ҳам шунга амал қиласди ва ўз қаламини келажак томон буради. Истиқбол томон буриб, у оғир уруш йилларидан чиқиб, тинч ҳаёт қуришга ўзини бағишилаган меҳнат қаҳрамонлари образини яратишга бел боғлайди ва кўп ўтмасдан «Хотин қалби» номли поэмасини яратади. Бироқ поэма узоқ вақт ёргулик кўрмайди, баъзи сабабларга кўра архивларда қолиб кетади. Поэма биринчи марта ўтган йили шоирнинг тўпламидан жой олди.

«Хотин қалби» қирқинчи йиллар анъаналари асосида ёзилган. Асарнинг марказида Улуг Ватан уруши жангларида умр йўлдошидан ажralиб бева қолган, эндиги ҳаётини коллективга — халқа бағишилаган, шу йўл билан ўзига бир оз таскин излаб, ҳаёлини банд қила олган ўзбек аёли — илғор меҳнаткаш образи туради. Унинг бош қаҳрамони Холдор катта коллективга бош бўлиб халқ хўжалигини қайта тиклаща жонбозлик кўрсатади. Мазмунан асар ишлаб чиқариш тематикасини акс эттиради ва воқеаларнинг қамраб олиш нуқтаси назаридан у Холдор раҳбарлигидаги катта бир коллективининг бир йиллик меҳнати мадҳидан иборатдир. Поэмада бир йиллик меҳнат жараёнида ҳийинчиликларга тик қараб, катта муваффақиятларни қўлга киритган, эл иззат-ҳурматига сазовор бўлган оддий бир жувоннинг ҳис-туйгулари, қувончи, кўнглиниң тўрида ётган изтироблари акс этади.

Шуҳрат кундалик ҳаётдан қай даражада илҳомланмасин, у яқин ўтмишини, бошидан ўтказган жангу жадал йилларини, устида шинель, қўлида ҳурол билан босиб ўтган йўлларини, кўрган-кечиргандарини қайта-қайта эсламасдан иложи йўқ эди. Эслаганда ҳам каттароқ планда, шеърларга нисбатан кенгроқ шаклда эслаш керак эканини сезарди. Бунинг учун кўлами энг қулав жанр проза эканини англади.

«Мени прозага даъват этган омил нима? Ҳозир ҳам аниқ билмайман,— деб ёзади Шуҳрат.— Лекин унга бўлган иштиёқ

шундай бир куч билан туғилдики, йиллар ўтган сари мени яна-да ўз бағриға қамраб ола бошлади. Эҳтимол, бунинг сабаби ёшим улгайб ғорганидан, әхтимол, Улуг Ватан уруши фронтларида «улкан ҳаёт»ни бевосита ўз кўзим билан кўриб келганимданди». «Балки ҳар иккаласи ҳамдир»,— деб қўшиб қўйгимиз келади. Бироқ прозага ҳам тезлик билан йўл топилавермайди. Узоқ-узоқ ўйлар, «уйқусиз тунлар», тинимсиз мутолаа бошланади. Ёзувчи-нинг ўз сўзларига қараганда Лев Толстой, И. С. Тургенев, А. П. Чеховлар унга ёрдам қўлини чўзгандек бўлади, Абдулла Қодирий, Ойбек, Абдулла Қаҳҳорлар эса мадад беради.

Фронт воқелигини акс эттириш «мени шунчалик қамраб олдики, кечалари ухломай қолдим»,— дейди Шуҳрат, ижод дардларини эслаб. Адивнинг тан олишига қараганда, шакл ҳам дарров топилавермайди. «Аввалига бир қисса ёзишга жазм этиб қўлимга қалам олдим. Бир неча бетларни қораладим. Бундоқ қарасам, қисса билан юрагимни бўшатиб ололмайман. Нимадир каттароқ нарса чиқадиганга ўхшайди. Шундан кейин жиддийроқ бош қотириб, образларим устида кенгроқ ўйлаб, ўзбек солдат-офицерларининг Улуг Ватан уруши майдонларидағи жонбозлиги ни кўрсатиши ниятида воқеани уруш арафасидан бошладим. Асосий материал бўлиб ўз биографиям хизмат қилди... Шундай қилиб «Шинелли йиллар» романни дунёга келди!»

«Шинелли йиллар»ни роман-хроника деб аташ мумкин,— деб ёзади Умарали Норматов. Бу гапда жон бор. Сабаб, асарнинг кўпроқ адаб биографиясига алоқадор бўлишида эмас. (Биографик материал ёзувчи учун туртки, иш бошлаш учун асос, холос.) Гап воқеаларнинг сюжет ва композицион жиҳатдан анча «жўн», ёзувчилик санъати билан қайта ташкил қўйиласдан, кўпроқ «ўз бўлишича», яъни табии тартибда берилишидадир. Романинг бальзи бир камчиликлари ҳам, айрим ўринларда воқеалар тафсилотига ортиқча берилиб кетиш ҳоллари ҳам мана шу хронологик принципга боғлиқдир. Адивнинг шу йўлни танлашида ҳам асос борга ўхшайди: тасвирланаётган воқеалар унга шу даражада яқин, шу даражада қадрли әдик, адаб уларнинг «тажини бузмасдан», «оҳорини тўқмасдан» тезроқ китобхонга етказишин ўйлайди.

Ёзувчи танлаган йўл қай даражада «жўн» бўлмасин, асарни ўқиганингизда тинч ҳаётдан узилиб, Ватан учун ўзини жангга урган ўзбек йигитининг беш йиллик «жангдаги ҳаёт йўли кўз олдимиизда намоён бўлади». Бу тарих орқали биз ўзбек ҳалқининг улуг ғалабага қўшган ҳиссасинигина эмас, балки унинг маънавий қиёфасини, куч ва қудратини, ахлоқ принципларини босқичма-босқич кўз олдимиизга келтирамиз. Асар бош қаҳрамони Элмуроднинг жанговар ҳаёт йўли уруш охирларига етказилган. Шундай қараганда, у «омади келган» жангчи сифатида кўринади. Аммо асар билан яқиндан танишган китобкор омаднинг у даражада катта эмаслигини англайди. Беш йиллик уруш даврида Элмурод қанчадан-қанча драматик, қанчадан-қанча фожиавий ҳолатларни бошидан кечиради. Элмурод сафида турган бошқа образлар тақдиррида эса бу хилдаги драматик ва фожиавий ҳолатлар яна ҳам кескинроқ, яна ҳам шиддатлироқ. Бу фожиавий ҳолатлар, улар руҳий дунёсида рўй берган кескин нуқталар орқали биз уруш даҳшатлари хусусида ўйлаб қоламиш ва жамият, умуман, инсон тақдирни устида чуқурроқ мушоҳада қилишга

мажбур бўламиз. «Шинелли йиллар»нинг бутун боблари, унда тасвирланган аксарият образларининг тақдири — уруш қурбонларидан тортиб севги фожиаларигача шу масалага бўйсундирилгандир. Энг муҳими, бу роман ўзбек китобхонига Улуғ Ватан урушининг бевосита иштирокчиси томонидан яратилган солнома, тарихий гувоҳнома сифатида қадрлидир.

50- йилларнинг охирлари, 60- йиллар бошлари шоир ва адаб сифатида Шуҳратнинг тўлиб-тошган даври бўлди. У шеъриятда қалам тебратишни тўхтатмади. Проза синовидан ҳам мудаффақият билан ўтиб олди. Бироқ бу йиллар Шуҳрат учун бошқа бир жанрда ўзини жиддийроқ синаб кўриш йиллари бўлди. Бу балладалар эди. Бу ихчам драматик жанрда яратилган асарлар фақат мазмундагина эмас, балки шакл жиҳатдан ҳам Шуҳрат поэзиясининг гултожи бўлди. Улардан бир нечаси В. И. Ленин образи тасвирига бағишиланган. Шундай қараганда, В. И. Ленин ҳақида дунё адабиётида кўп асарлар ёзилиб, энди у ҳақда бирор янги гап айтиш амримаҳолдек кўринади. Бироқ Шуҳрат ўз ижодий эволюциясининг юқори нуқтага кўтарилиган пайтида бу ишниң ҳам уддасидан чиқа олди. Шоир бу улуғ сиймо образи тасвирига тегишли характерли эпизодлар топди. Булар Улуғ Ватан уруши йилларида төг қоясига ўйилган доҳий портрети тақдири, оддий солдат билан В. И. Ленин ораларидаги муносабатларни таҳлил қилиб кўрсак, шоир доҳиймиз ҳаётига тегишли маънодор воқеаларни топа олганини кўрамиз. Бу балладаларда В. И. Ленин қиёфаси — бор улуғворлиги, олижаноблиги, инсонпарварлиги, ўта оддийлиги билан китобхон кўз олдига намоён бўлади. Балладаларни ўқиган ҳар бир киши биз учун оддий бир ҳақиқат бўлиб колган муҳим бир холосани яна бир бор хаёлидан ўтказади: В. И. Ленин улуғларнинг улуғи, одамларнинг одами!

Ҳаётининг битилмаган бир қонунияти бор: одам ёши улгайган сари орқага назар ташлагиси, ўтмишга қайрилиб қарагиси келиб қоладиган бўлади. Шоир, ёзувчилар ҳам бу дoldан истисно эмас, балки бу кўпроқ адилларга хос нарсага ўхшайди. Улар ўтмишга қайрилиб қараганда кўз олдига фақат ўз умри эмас, балки бутун халқ, жамият ўтмиши келади. Шу боисдан бўлса керак, Шуҳрат ҳам ижодининг етуклик даврларига келиб ўтмишга қайрилиб қараб, фақат В. И. Ленин ҳаётига тегишли эпизодларнига эмас, балки шу билан бошқа улуғ сиймолар ҳаётига тегишли драматик эпизодларни ҳам кўрди. Ўтмишга қайрилиб қараб, у «Қувғинди» номли балладасида Украянанинг «вулқон шоири». Шевченконинг фожиали ҳаётини поэтик назардан ўтказди. «Сўлмас чечаклар» номли балладасида китобхонни партизан қабрига олиб бориб, яна бир марта Улуғ Ватан уруши фожиаларини эслайди. Ўтмишга қайрилиб қараб, «Мардлик афсонаси» номли балладасида яна ҳам узоқларни — узоқ ўтмишда бекиёс қаҳрамонлик кўрсатган Тўмариснинг жасорати манзарасини яратди. Кўхна Хоразм тарихин варажлаб «Гулдурсун» балладасида сотқин муҳаббат фожиасини акс эттирадиган шиддатли воқеани шеърга солди. Бу кескин драматик сюжетларда Шуҳратни шунчаки воқеалар кескинлиги эмас, балки ундан ҳам улуғворроқ ҳис ва туйгулар, эстетик мақсадлар қизиқтириди. Ўтмиш саҳифаларини варажлаб, у халқ ишига садоқат, мард ва мардонаворлик, ватанга муҳаббат сингари ғояларни

улуглади. «Гулдурсун» балладасидаги қуийдаги мисраларга қаранг:

— Икки марта чиқмайди бир кунда қуёш
Икки марта келмайди дунёга бу бош!
Бир бошга бир ўлим бор, яша инсонча!
Кимга керак тутқунлик, оҳ-воҳ, исканжа!
Ев келдими ўлкага босиб, ўғринча,
Евга ёвча қарши тур умринг борича,
Эрксиз ўтган бир йилдан озод он яхши!
Душман тутган ол гулдан тарки жон яхши!
Қачон, ахир, қафасда сайрабди булбул!
Қачон, ахир, зулматда яшнабди бир гул?

Бу ерда поэтик мушоҳададан кўра риторик хитоб, жўн дидактика устундек кўринади, бироқ балладанинг умумконтекстида, кутилаётган кескин драмалар, фожиавий ҳолатлар фонида бу мисралар ҳам поэзия!

Шуҳратнинг «Кавказ дафтари», «Одамлар ва обидалар», «Дунай соҳиллари» сингари туркумлари шоир ижодида алоҳида ижодий босқич бўлди. У кўҳна шаҳар Бухорода туриб чет эл саёдатчиси билан баҳсга киришадими, ўтмишда инсон қалбига даҳшат солған фожиалар гувоҳи бўлган, эндиликда санъат мўъжизасига айланган басавлат минора ҳақида гапирадими, инглиз тамғаси босилган гильзага кўзи тушшадими, Зарафшоннинг охирги томчи суви билан ўслан боғ-роғларни кўрадими—булар ҳам масида шоир ўзи ўсиб-улгайган заминда мустаҳкам турганини сезади, қора ўтмишга чексиз қаҳрини, бугунги кунга беҳад меҳрини изҳор қилади. Худди шу хилдаги ҳис ва туйғулар унинг «Дунай соҳилларида» туркумига кирган шеърларига ҳам хос. Бироқ бу туркумга бошқачароқ бир кайфият — иккинчи жаҳон урушида инсонни даҳшатли оғатдан сақлаб қолган қаҳрамонлар хотирасига бош әгиз, шу муносабат билан ~~оти~~ уруш оловини ёқмоқчи бўлганиларга кескин муносабат билдириш кайфияти ҳам омикта бўлганини кўрамиз. Мана унинг шу туркумдаги «Номаълум солдат қабри» номли шеъридан олинган мисралар:

Тўхта, ҳой, ўткинчи, тўхта бир нафас,
Бу уруш даҳшати! Эслаб тур бир пас!
Тўхта, ҳой, минбарга чиқсан Цицерон,
Мана шу қабрга кўз ташла бир он!
Бармоғи узукли пулдор жаноб, сиз!
Урушда ҳисобсиз олтин санабсиз.
Мана бу солдат-чи? Ҳеч нима! Қуруқ!
Бас энди, сочмангиз урушдан уруг!
Номаълум шу солдат мозори ҳаққи,
Муштипар онасин оҳ-зори ҳаққи,
Дўст-ёр, хепининг озори ҳаққи,
Тилингиз тийинг-да, чиқманг минбарга!
Инсон ўз жонини алишмас зарга!
Шу қабр тошига солингиз қулоқ,

Том битган бўлса ҳам тинглайсиз бироқ:
Урушни лаънаттаб нидо келади!
Ҳар қалбдан жаҳонда садо келади!

Бу мисралар урушга қарши турган бутун инсониятнинг нидоси сифатида эшитилади ва бу нидо китобхон қалбининг тўридан жой олади.

Шуҳрат ижоди ҳамон етуклик сари кўтарила борар эди. «Шинелли йиллар»нинг ёзилиши муносабати билан катта асарга хос изланишилар, балладалардаги митти драматик ситуациялар яратишдаги машақватли уринишлар адабнинг қаламини санъатнинг нозик сирларини эгаллашга чорлай бошлиди. Нихоят, олтмишинчи йилларнинг ўрталарига келиб Шуҳрат каттароқ, кескин драматик, балки фожиавий сюжет устида иш бошлиди. Шу йўсингда унинг «Олтин зангламас» романи майдонга келди.

Роман шундай майдонга келдики, Шуҳрат бу асарнинг яратилишида қарийб ўттиз йиллик машиқлар тажрибасини бир нуқтага йиғди, бор поэтик ҳис ва туйгуларини, прозаик мушоҳадаларини сафарбар қилди. Энг мұхими шуки, адаб бу ерда ҳам асар учун материал терандга яна ўз ҳаёт йўлига, кўрган-билган ва бошидан кечирғанларига мурожаат қилди. Адаб бу роман хусусида гапириб ёзади: «Бунинг мавзуи ҳам, ибора жоиз бўлса, ўз биографиямдан. Лекин биографиям «Шинелли йиллар»даги каби бир восита, холос. Тўғри, «Олтин зангламас»даги ҳаётни мен яхши биламан, улар мен билан бирга бўлган, менга учраган кишиларнинг ҳаёти. Мен бу ҳаётнинг атрофидамас, нақ ичидага бўлгамман. Бу мавзуда бирон нарса яратмасам кўнглим ўрнига тушмас эди. Бу романдаги баъзи образларнинг нусхаси ҳаётда нақд эди, баъзиларини эса ниятимга мослаб ўзим тўқидим».

Роман қаҳрамонларини биз ўттизинчи йилларнинг мураккаб воқеалари, Улуғ Ватан урушининг оғир кунлари фонида кўрамиз. Асарнинг бош қаҳрамони Содиқ ўша даврда бўлиши мумкин бўлган ҳаётнинг ҳамма мураккабликларидан, бошқача қилиб айтганда, «социал чиририқ»дан ўтди. У умрининг олижаноб умид-орзулари билан тўлиб-тошган бир пайтда фисқ-фасод ва туҳматлар ҳоким бўлган мұхитга тушиб қолади. Шу туфайли у ўз бошидан оғир-оғир ҳолатларни ўтказади. Мұхит олижаноб умид-орауларининг амалга ошишига монелик қилса ҳам, унинг инсонийлик хислатларини сўндира олмайди. Ҳар бир қадамда ўз манфатини ўйлайдиган, бу йўлда ҳар қандай қабиҳликлардан ҳам қайтмайдиган гаразгўйлар билан дуч келганда ҳам, эгри хулосалар чиқариш йўлида қилини қирқ айиришга уринадиганлар билан дуч келганда ҳам у ўзлигини сақлай олади. Китобхон шундай хулосага келдики, ҳаёт ўзи олий ҳоким: роман сюжетининг ривожи давомида бошқалар ҳаётига хуруж қилишга одатланган нопоклар босқичма-босқич фош бўла боради. Содикни олтин сингари ўтда куймайдиган, сувда зангламайдиган, ўз қадр-қимматини йўқотмайдиган ҳақиқий инсон әканини англаб оламиз.

Воқеаларни драматик тобда олиб бориш, характерлар тасвири учун воқеаларнинг кескин бурилишларидан фойдалана би-

лиш — умуман, асарни кескин конфликтли қилиб яратиш жиҳатидан «Олтин зангламас»да Шуҳрат тутгаи йўл Абдулла Қодирий услубини эслатади. Шу маънода Шуҳрат, албатта, устоз Абдулла Қодирийдан сабоқ олгани маълум бўлади.

«Олтин зангламас» романини яратса туриб Шуҳрат йирик проза сирларици згаллаб олди. Адабинг ишида энди ўзига ишонч, етарли тажриба пайдо бўлди. 60-йилларнинг охирлари га келиб Шуҳрат янги роман устида ишлай бошлади. Бу «Жаннат қидирғанлар»дир. Умарали Норматов сўзлари билан айтганда, бу роман «Олтин зангламас» романининг мантиқий давоми бўлди. Дарҳақиқат, романда акс эттирилган воқеалар ҳам «Олтин зангламас» романининг табиий давомидек сезилади, асар бош қаҳрамони Умматали ҳам ўзининг асосий хислатлари билан Содиқ образининг бошқа бир муҳитдаги кўрининши сифатида кўзга ташланади. Шуҳрат ижобий қаҳрамонларнинг олижаноб хислатларини очиб бериш, салбий образларни тўла фош қилиш йўлида романбоп, ниҳоятда кескин ва мураккаб вазиятлар яратса олди. Шу боисдан роман жуда жозибали ва ўқимишлидир.

«Ҳар бир гулнинг ўзи иси бор» деганларидек, адабиётда ҳам ҳар бир жанрда ишлашнинг ўз гашти бўлса керак. Шуҳрат болалар ёзувчиси сифатида ҳам ўз истеъодини синовлардан ўтказгач, янги бир жанрга — саҳна асари яратиш ишига қўл урди. Бу ишда ҳам у энг мураккаб жанрни — комедияни танлади. 60-йилларнинг охирларида ҳалигача саҳнадан тушмай келаётган «Беш кунлик куёв», 70-йилларнинг ўталарида «Қўша қаринглар» комедияларини яратди. Бу иккиси асарда ҳам адаб ҳаётнинг ўзидан келиб чиқадиган комик ситуациялар яратди: арзимаган гараз йўлида фарзандининг «келажагини» ўйлаб, кулгили аҳволга тушиб қолган ота-оналарни, ҳаёт йўлдоши талабларини ҳисобга олишга фаҳми етмасдан, осонлик билан бошқа кишилар таъсирига ўтиб кетган әрнинг ўсал ҳолатини акс эттиради. Шу кунларда яратилган ва Муқимий номли музикали драма театранда ва облости театрларида саҳналаштирилган «Она қизим» драмаси жанр эътибори билан бошқачароқ йўналишда яратилган. Унда ҳаётда ўз ўрнини, кишилараро муносабатда ўз мавқеини англай олмаган йигит аҳволига ачинсак, унга акс ҳолда ўзига, ишига ишонч билан қарайдиган, ҳаётда ўз ўрнини тўғри белгилаб олган қаҳрамонларни кўриб руҳимиз кўтарилади, улар танлаган йўлни олишишлагимиз келади.

Шуҳрат етуклик ёшида. У шунга мувофиқ етук ижод соҳиби. Бу етуклик аввало ўзига яқин бўлган ҳаёт материалини иложи борича тўлароқ ва мукаммалроқ ҳамраб олишга ҳаракат қилишда, ўз замондошлари, келажак авлодларга етказмоқчи бўлган ҳис-туйғу ва фикрларини бадий ижоднинг энг яхши анъаналаридан унумли фойдаланган ҳолда адабиётнинг хилма-хил жанрларида талқин қила билишида — умуман, ёзувчилик санъатини жамият хизматига бўйсундира билишидадир.

Тўғри, ижодий етуклик осонлик билан қўлга киравермайди. Бунга эришгунча Шуҳрат бадий ижоднинг қанчадан-қанча эгри-бугри кўчаларига кириб чиқмади, қанчадан-қанча изланишу ижодий экспериментларни бошидан ўтказмади, қанчадан-қанча қийинчилликларни бартараф қилмади дейсиз. Бироқ бу изланиш машақатлари, дуч келган бу қийинчилликлар бир марта катта

тиражда чоп этилган асарнинг тез тарқалиб кетиши, номаълум китобхондан олингани битта илиқ хат, ёхуд ижодкор оқсоқолларнинг битта фикри, одатдагидек партиямиз кўрсатадиган битта гамхўрлиги билан уннутилади ва ижодий дарднинг энг яхши дамлари сифатида эслга тушади.

МАТЕҚУБ ҚЎШЖОНОВ
Ҳамза мукофоти лауреати

ШЕРЛАР



ШЕРИМ ҲАҚИДА ҮЙЛАР

Мен ўтиб кетаман, сен кейин қолиб
Ҳақимда рост сўзни айтаб юр, шеърим!
Дўстимнинг бағрига бошингни олиб,
Рақибга тош қаҳрим отиб тур, шеърим!

Ҳали сен неча уй, неча хонада
Менингсиз бир ўзинг меҳмон бўласан.
Баъзилар талқинлаб турли маънода
Ғашингта тегади, аччиқ куласан.

Сен яхши биласан қалбим сирини,
Бир сенга айтганман бутун дардимни.
Гоҳида уфурдинг чаман атрини,
Гоҳида мадҳ этдинг ошиқ мардимни.

Гоҳида ўт бўлиб, ловиллаб ёндинг,
Гоҳида дарёдек тошдинг қирғоқдан,
Гоҳида тонг бўлиб эрта уйғондинг,
Гоҳида нур олдинг кўкда чақмоқдан.

Гоҳида ер бўлиб майсазор кездинг,
Гоҳида ғиротдек сапчидинг кўкка.
Гоҳида ёлғизлик, сукутдан бездинг,
Гоҳ ошиқ пойига ташладинг мукка.

Гоҳида Кавказга бўлиб маҳлиё,
Пушкиндеқ шаънига тўқидинг қўшиқ.
Гоҳ Дунай бўйлари сочдию зиё,
Бахтини олқипслаб ўқидинг қўшиқ.

Гоҳида жанг қилдинг ёвимга қарши,
Автомат ёнида турдинг ёнма-ён.
Сенга ҳам тааллук ғалаба марши,
Сени ҳам улуғлаб қарс урди жаҳон!

Шунчалик кучлисан, лекин баъзида
Ошиқлар қошида титраб қоласан.
Ё ўзга куч борми улар кўзида,
Ё улар амрини барҳақ кўрасан.

Ноҳақлик жонингдан ўтганда гоҳо
Ўкиниб-ўкиниб атчиқ йигладинг.
Гоҳ заррин қадрингта топмасдан баҳо,
Хуш, ҳалол кунларга умид боғладинг.

Гоҳ мақтов олдингу қувониб юрдинг,
(Мақтовни севмаган шоир бормикин?)
Ўфқдан-уфққа ёғду уфурдинг,
Ҳа, шунда сен билдинг дунё торлигин!

Ижодда илиқ сўз қанот бўлади,
Ош берма, ион берма, ширин сўзлаб тур.
Баъзида туртсанг ҳам, кўпроқ «сиз»лаб тур,
Кўрасан қанақа ижод қиласди!

Шуларнинг барига гувоҳсан, шеърим,
Барининг садоси сенда мужассам.
Баъзида қаҳримсан, кўп маҳал меҳрим,
Меҳримнинг нуридан жам бўлгансан, жам!

Такаббур бўлмадинг, тилёғламадинг,
Ҳасаддан ёнимдинг сочингни юлиб.
Елғондан улуғлаб, гул боғламадинг,
Кимнингдир кўзига боқмадинг кулиб!

Мукофот кутмадинг суқатой бўлиб
Турмадинг ҳамиша минбарни қўалаб.
Дўстларинг бахтидан қувончга тўлиб,
Оқни оқ дегансан доим эъзоалаб!

**Бу ижод шунақа: паст-баланд йўлдан
Юқори чиқмоқда ўхшайди ўзи.
Ё илҳом қуш бўлиб учаркан қўлдан,
Гоҳ сендан бошқани кўрмайди қўзи!**

**Де:— шоир рост сўзнинг гадойи эди,
Елғон сўз айтмади умри борича.
Шу йўлда қоп-қора сочи оқарди,
Кўнгли ҳам оқ эди сочин қорича!**

**Сен ҳалол тугилдинг, ҳалол яшадинг,
Эй, менинг шеърларим — кўнгил қушларим.
Сен менинг қалбимдан ҳаёт бошладинг,
Сен энди кетимда қолар ишларим!**

**Қолурсан умиддек ёниб, пориллаб,
Қолурсан умримдан гувоҳлик бериб.
Замину замонлар не қиласа талаб
Лаббай деб қопшига чиқ кўксинг кериб!**

**Бир коса сув бўлгин чанқоқ қўлида,
Чироқ бўл сафарга чиқса йўлида...
Ҳар шоир баҳтидир ўзидан сўнгра
Дилларга йўл олса шеъри элида!**

1976, декабрь

НИЯТ

Яшаш қонун, яшаш зарурат,
Яшаш менга бўлибди насиб,
Орзум шудир: толе муруват
Қилган элга бўлай муносиб!

Шу ниятда оқарса сочим,
Ажин кирса бетимга майли.
Майли, кетса ёшлигим, кучим,
Ором топмай ният туфайли.

Майли, кезай дашту биёбон,
Майли, берай уйқуга барҳам.
Майли, ичай шароб эмас қон,
Ният учун керак-са бу ҳам.

Ният учун чекилган заҳмат
Бебурд ўтган роҳатдан аъло.
Қалб тубида бўлмаса ният
Яшашликдан бордир не маъно?!

Шу ният деб шеъримдан тортиб,
Рост, тикканман бутун ҳаётим.
Шу ниятдан нолисам, тойсам,
Қора билан ёзилсин отим!

1947

ҚАДАХ

Кел, ичайлик, меҳрибон ҳамдам.

Шу бечора ёшилигим учун!

(A. C. Пушкин)

I

Кўтаринг, дўстларим, олтин қадаҳни,
Яшнатиб, яйратиб оташ нигоҳни,
Жаҳонга танилган ёшлигим учун,
Чаманга кўмилган ёшлигим учун,
Бу кунга етказган устозим учун,
Бу бахтни қуйлаган ёш созим учун,
Ичайлик биринчи қадаҳни қани,
Гулласин янада ёшликнинг шаъни!

II

Кўтаринг, дўстларим, олтин қадаҳни,
Нурлатиб, яйратиб ўтли нигоҳни,
Ватанинг постида шараф иши деб,
Худуддан ўтолмас ҳеч ёт киши деб,
Кўзлари титкилаб тун ридосини,
Ҳаттоқи фаҳмлаб ёл иидосини,
Халқига чин содиқ эр посбонларнинг,
Душманни маҳв этган паҳлавонларнинг
Бир умр соғлиги учун ичайлик!
Дилларин чоғлиги учун ичайлик!

Меҳнатни шарафу шон-шавкат дея,
Меҳнатдан туғилар саодат дея,
Ишласанг қизармас дард-ла юз дея,
Режамиз албатта бўлур юз дея,
Меҳнатни севгучи йигит-қизларнинг,
Шаҳло кўз, қора қош, анор юзларнинг
Ғалаба тонгидида кулиши учун,
Саломат ва ишchan бўлиши учун,
Ичайлик, дўстларим, кулиб, қувониб,
Ҳамиша яшайлик ҳаётга қониб,

IV

Кўтаринг, дўстларим, олтин қадаҳни,
Яшнатиб, ўйнатиб сукли нигоҳни,
Қўёққисдан ёв ҳужум этиб кирганда,
Ватанинг тақдири қилда турганда,
Мағрур от ўйнатиб, чақнатиб чўғ-ўт,
Осмонда самолёт, сувда пароход,
Қуруқда паровоз, оғир танкани,
Бомбани, тўпларни, ўқ-винтовкани,
Бир оддий асбобдек идора қилиб,
Душманнинг қалбини ханжардек тилиб,
Арининг инидек бўлса ҳам тани,
Баҳт берган, куч берган она-Ватанинг
Покиза сутини ҳар чоқ оқлаган,
Юртими, халқини жондек сақлаган,
Устидан чиқувчи ҳар бир онтанинг,
Кўп сонли, пок қонли халқ фарзандининг
Офтобдек парсираб яшапи учун,
Мардона қадамлар ташлаши учун,
Ичайлик мана шу қадаҳни қани!
Шарафлар қопласин мудом ўлкани!

V

Ғалаба келтирган бу Янги йилнинг,
Баҳтга баҳт қўйшувчи бу донгли йилнинг,
Яна зафарга ёр бўлиши учун,
Юртимиз нурларга тўлиши учун,
Қуёшдек порлатиб олов нигоҳи,
Кўтаринг, дўстларим, олтин қадаҳни,

Ичида ой нури акс этиб кетсин,
Садоси ҳаттоки кўкларга етсин!
Яшасин бахтимиз, яшасин ҳаёт!
Яшасин элимиз, яшасин ижод!

1938

КИЧИК САРГУЗАШТ

I

Юлдузларнинг тиниқ кўкда кўзи милтиллар,
Ой юзини дока — булут гоҳ келиб силар.
Кумуш каби япроқларда ярқирав шабнам,
Эл турардан сал эртароқ, худди субҳидам.
Қон ҳиди-ла бузилганди тоғнинг ҳавоси,
Тингланарди йироқлардан қушлар навоси.
Разведкага юборганлар бизни атайлаб,
— «Душман қайда, зарба бериб қўймасин пойлаб,
Хушёр қараб, ҳол-аҳволдан берингиз дарак!»
(Бундай хавфли вақтларда зийраклик керак.)
Юракларда мавж уради буюк бир гоя,
Эркалади ҳавасингни кўк ўпган қоя.
Хаёл — денгиз, орзу эса унда бир елкан,
Бир елканки, енгишлардан бунёдга келган!..
Унгур бўйлаб қуайи томон тушиб борардик,
Дурбин каби кўзлар ўткир, тетик қарапдик,
Соя каби бир тўдани илғади кўзим,
Ихлос билан термиламан индамасдан жим...
Аниқладим тоғ бағирлаб келади душман,
(Фавқулодда босиб келса ана шу ёмон!)

Олдда битта лашкарбоши, қўлида қилич
Ўйнаб келар, йигитлари юлдузлардай зич...
— Юр, чоп! — дедим, — отрядга берайлик хабар,
Тез бормасак қўлдан кетар бу галги зафар!
Мен ўтдиму ортда қолди шеригим бир оз.
Тонг ёришган. Бутун қушлар қиласи парвоз.
Ўйғонишиб келмакдайди оҳулар кам-кам,
Тасодифан бир ўқ чиқди, жаз... этди елкам...

Гўё қушлар тўхтадилар шу дам парвоздан,
Гўё ҳаёт жимиб қолди ушбу овоздан,
Гўё шу тонг ҳаёлимда тунга айланди,
Гўё умид учқунлари қулга айланди.
Кўз олдимни босди қора. Таңда йўқ дармон...
Сапчиб кетди шунда отим. Юракда армон...
Қуш сингари учиб келдим корпусга омон...
Қон оқади сўл елкамдан қасоси бордай...
От ва танам бўлган худди бир лолазордай,
Шафақ ўринақ олар энди юрак қонимдан.
Заҳарли газ қилиб шунда оққан қонимдан
Душманимга соча қолсам, дедим ўшандা,
Ачиш, оғриқ сезар эдим титраб танамда...
Баён этдим кўрганимнинг ҳаммасин бир-бир,
Кураш учун буйруқ берди шу он командир.

II

Тоғлар оша ўз нурини сочади қуёш,
Гўё гарив кўзларидан тирқираган ёш.
Дилда умид, армон билан боради отряд,
«Енгиш!» деган машъал ёнар юракда фақат...
Врач бутун сўл елкамни ўраб ташлаган,
«Борма», деган, юрагимни қолиши ғашлаган.
Деганманки, нега энди курашдан қолай,
Нега энди бунда қолиб ҳаёлга толай.
Йўқ, керакмас, сизлар билан бирга бораман,
Бу ҳеч гапмас, керак бўлса жонни бераман!

Булутларни дўши қилган тоғнинг сойида
Тўқинишдик душман билан. Ҳолат жойида...
Тонгда учган юлдузлардай визиллар ўқлар,
Қўрқув нима бу вақтда, ким уни йўқлар!
Визиллаган ўқлар — ўлим, тўзонлар — фифон,
Ана, ер қон, мурдалар қон, ҳатто уфқ қон!..
Акс этади буюк тоғлар ўқнинг садосин.
Зафар яхши, яшаш яхши, зафар, қайди сен!..
Зафар истаб, та-та-талаб кетди, пулемёт,
Дув тўқилар душман томон, фазо олов-ўт.
Қува кетдик, қочди душман қуён сингари.
Зингиллатдик ҳай-ҳу... ана, ўралди бари...
Сотқин экан разведкага чиққан ҳамроҳим,
Асири тушди мени отган ўша бераҳм.

Бутун сирни англаб биз-ла юрар экан жим,
План тузиб қўйган экан сўнг билсам, ўғлим...
Отряд чалди, жараглатиб енгиш маршини,
Шундай қилиб тор-мор этдик бизга қаршини...
У кунлардан хотира бор танамда ҳали,
Сўнгги кураш ўша бўлди, енгилди бари...
Кўргин, ўғлим, бизнинг душман қандайин маккор,
Гул Ватанда ҳали унинг сарқитлари бор,
Дея отам тамомлади кичик эртагин,
Хулкар оғиб, ой ёйганда оқ нур этагин...

1937

ТАЪНА ҚИЛМА

«Нега мунча сочларинг оппоқ?»
Ҳар кўрганда қиласан таъна,
Ҳар кўрганда термилиб узоқ,
Дейсан яна: — «Қорасин сана!»

Майли, отсанг таъна тошини,
Майли, қилгин истасанг ҳазил,
Майли, сочинг Казбек бошини
Эслатади десанг муттасил.

Тўғри, сочим оппоқ қорсифат,
Ҳар толаси жанглардан ёдгор.
Эл бошига тушганда қулфат
Қилич тутдик қўлларга такрор.

Жанг фурсати хилма-хил, эркам,
Оқ тушираси ҳолатлари бор.
Бопнимда қиши, кўнглимда баҳор,
Шунинг ўзи қандайин кўркам.

26 февраль, 1945

ЎРМОНДАГИ УЙ

Қалин ўрмон,
Қушлар наъмаси
Ер юзини қоплаб тутгудай.
Бир-биридан узун ва силлиқ
Қарағайлар кунга етгудай.
Ости тўла майса, маймунжон,
Кўйка боқсанг осмон кўринмас.
Енгил-елни ёқсан ёмғирдан
Бир томчи ҳам остига томмас.
Қалин ўрмон.
Ўрмона қушлар,
Қушлар сайдар, тотли наъмаси.
Баъзан келар йироқ-йироқдан
Ўрмон кесган ишчилар саси.
Қалин ўрмон.
Қалин ўрмоннинг
Ўртасида бордир бир бино.
Оддий хона,
Деворда карта,
Недир ёзиб карта остида
Ўтиради бир киши: ўрта
Бўйли, қотма, кўк кўз, кўкракдор,
Кўринишдан абжир, тиришқоқ.
Ўттизларга етар-етмасу
Сочларига оралаган оқ.
Кўксида орденлар лентаси:
Сариқ, пушти, қизил, ҳаворанг.
Ўйга чўмган,

Манглайда ажин.
Кўринади сўл кўзи аранг.
Баъзан қоқиб кимгадир телефон,
Жиддий тусда берар фармойиш.
Баъзан қулиб,
Баъзан ҳайқирав,
Манглайда қалашар тириш.
Оддий хона,
Девор соати
Уй тинчлигин бузади баъзан,
Баъзан қулиб қолар ўткинчи —
Ташқарида эркин, қувноқ, шан.
Ҳеч бирини эшитмайди у,
Хаёлида ёлғиз шу нарса:
План ҳозир неча бўлдикан?
Зора бугун уч юзга борса?
У юборган сурх ёғочлардан
Қад кўтарар ишчилар шаҳри.
Лаънатланган уруш йилининг
Тузалади яраси, заҳри!
Қалин ўрмон.
Қалин ўрмоннинг
Үргасида бордир бир бино.
Бу бинонинг ўтмиши шонли,
Ўтмишида бордир зўр маъно!
Сурати бор музейда унинг,
Ёзилгандир бу ҳақда китоб.
Шу хонани у жанг йиллари
Қилган эди отрядга штаб.
Шу хонадан чиққан буйруқдан
Ўлим қучган неча-неча ёв.
Нечаке эшелон қулаб,
Нечаке уйга туташган олов.
Шу хонада неча хоиннинг
Ўлимига тузилган режа,
Шу хонада, карта устида
Жанг ўйналган нечалаб кеча.
Нечаке сирли қогозга,
Шу хонада чекилган имзо.
Шу хонадан чиққан фармондан
Ўлка ва халқ бўлганди ризо!
Ушбу хона ҳали ҳам яшар,
Ҳали ҳам бор деворда карта.

Жанг йиллари қизил байроқча
Қадалганди кунда ўн марта.
Неча марта боқарди кунда,
Үйга чўмиб қоларди, баъзан:
Кўз олдига келарди жангтоҳ,
Кўкни тутган тутун ва тўзон...
Унутилган энди бу карта,
Баъзан боқмас унга ҳафталаб.
Бундан берар ҳали ҳам буйруқ,
Ушбу хона ҳали ҳам штаб.
Ушбу бино ҳали бақувват,
Неча йилга ҳали ярагай.
Энди бундан чиққан фармон-ла
Кесилади минглаб қарагай.
Қад кўтарар бузилган шаҳар,
Барпо бўлар ие-не иншоот.
Ўзгаради буюк ўлканинг
Қиёфаси, ҳаёти албат.
Баъзан ҳатто ўзи портлатган
Кўпприк учун йўллар эшелон.
(Қурбон бўлган ёру дўстлари
Кўз олдига келади шу он.)
Дейди шунда: — Тиклашга қодир
Бузмоқ учун етган иродам.
Муродига етур шубҳасиз,
Ўз юртини севолган одам!

Қалин ўрмон.
Ўрмонда қушлар,
Қушлар сайрар, тотли наъмаси.
Баъзан келар йироқ-йироқдан
Ўрмон кесган кишилар саси.
Қалин ўрмон.
Ҳали унда бор
Партизанлар этигидан из.
Шу ўрмонда туради мағрур
Битта бино ажралиб ёлғиз.

1948

ИККИ ШЕЪР

Ииглаётган қизга

БАЙРОНДАН

Иигла, шоҳлар наслидан, эй қиз!
Иигла, отанг ҳам ўз юртингдан.
Отанг айбин, халқ очлигин сан
Шояд ювсанг ёшинг-ла ёлғиз!..
Иигла...
Дув тўкилсин ватанинг учун
Фамнок, жоду кўзларингдан нур!
Ҳатто қатра ёшингни бутун
У келажак ёруғ кунларда
Табассум-ла халқинг қайтарур!

Кулаётган қизга

БАЙРОНГА ПАРОДИЯ

Кул, қуёшли элда туғилиб,
Доно, олим бўлганинг-чун кул!
Бахтли элинг эркалаб-суюб,
Сенга меҳр қўйгани-чун кул!
Шундай кул-ки, сенинг кулгингдан
Ғунча гуллар очилиб кетсин,
Ҳиди ҳар ён сочилиб кетсин,
Жарангласин кенг, олтин Ватан,
Эй, эрка қиз!
Яйра,
шодлан,
кул,
Келажагинг, тунларинг ойдин,
Йўлларингда пояндоз нур, гул!

1940

СЕВГИ ҚАРИМАС

Мажнунтол сояси илк баҳор,
Севгимизга беланчак бўлди.
Мен севгимни этганда изҳор
Барглар чапак чалди, ой қулди.
Йиллар ўтди... Бизнинг севгимиз
Ҳамон яшар, ҳамон навқирон.
Аммо ўша гувоҳ мажнунтол
Қуриб битмиш беному нишон.

1946

ЕРНИНГ САВОЛИ

Розимисан, ёнингда қолиб
Тонгта қадар эртак сўйласам?
Розимисан, меҳрингта қониб
Ўлгунимча бахтинг куйласам?

Розимисан, қаро кипригим
Сочларингта тароқ айласам?
Розимисан, юрак қонимдан
Қўлларингта хино бойласам?

Розимисан, жанг-майдон аро
Толеингни этсам ҳимоя?
Розимисан, душманни қора
Ер бағрига қилсан жо-бажо?

Мендан рози бўларсанми, айт,
Ҳалок бўлсан Ватан жангига?
Мотам ҳоли бўлармикан қайд,
Сен кияжак кўйлак рангида?!

1945

МЕН ЎЛМАЙМАН!

Мен ўлмайман,
Фақат бир жисмим,
Ўз тусини, шаклин йўқотур.
Мен яшайман,
Менинг менлигим
Атир бўлиб гулларга татир.
Тўлқин бўлиб зўр дарёларда
Қирдан қирга ошиб жўш урар.
Менинг товушим тонг саҳарларда
Шамол бўлиб боғларда юрар.
Мен яшайман тотли мевалар
Лаззатида, ҳусни кўркида.
Мен яшайман улуг' халқимнинг
Ниятида, орзу, эркида.

1948

МАЖНУНТОЛ

Абдулла Қаҳҳорга

— Мунчалар, шунчалик кўркам шохингни
Қуёшга кўтармай пастга эгисан?
Соябон мисоли ерга тегисан,
Ер узра ёзибсан ўз қучогингни!

Е сенинг қуёшдан тилинг қисиқми?
Үзгалар рашидан қўрқасанми ё?
Е кўркам қаддингдан қилдингми ҳаё?
Е қуёш нафаси сенга иссиқми?

Севишган йигит-қиз этсин, деб суҳбат
Е чодир қурдингми уларга атай?
«Уларни бегона кўздан беркитай»,
Дея ё қилдингми ўзингта ният?

Е бошинг эгдими ҳасрат, алам, роз?
Е ерга йиглайсан ўз қисматингдан?
Мунчалар кўп экан ҳасратинг чиндан
Тугамас ўтса ҳам неча қишу ёз!

— На қайғу, на ҳаё, на ўзга нарса
Қаддимни этгандир ер узра чодир.
Мард дердим қаддимни бирор баҳодир
Шу хилда умрбод эгиб туролса!

Тупроқдан ниш уриб ўсдим кундан-кун,
Қуёш нурларида ўрдим кокилим,
Ва тонг елларида яйради дилим,
Охири умримга ясадим якун:

Улғайған тупроқдан йироқлаш уят!
Шу она тупроққа айтай деб раҳмат,
Бу йўлда чексам ҳам минг турли заҳмат,
Ер узра этганиман атайин қомат.

Бу менинг меҳримдир, ташаккуримдир
Камолга етказган она тупроққа.
Қўй энди, эй, дўстим, тутма сўроққа
Дея: — Қоматингни эгганлар кимдир?

1956

ГИЕХ

Асқад Мухторга

Бог йўлини кузакда қилгандим асфальт,
Гўёки тўшалган қора бекасам.
Қуёшда ёнади товланиб ялт-ялт,
Иилтиллаб қалқийди тушиб қолса нам.

Қиши ўтди, баҳорда қарасам мундоқ,
Остидан ниш уриб чиқибди гиёҳ.
Гиёҳки ингичка, нимжон, қўшиқулоқ,
Ажабо, дедиму термилдим узоқ.

Сўнг билсам шу метин асфальтни ёрган
Гиёҳнинг ҳаётга зўр меҳри экан!
О, дўстлар, бу меҳр нақадар улкан!

1958

ДҮСТЛИК ТАРИХИ

Сен дединг бир куни, эй, тожик дўстим:
— Энг қадим халқлармиз қўшни ва сирдош,
Тоғдошмиз, боғдошмиз, сувдошмиз, қирдош,
Бу дўстлик тарихин ким биларкин, ким?

— Бу дўстлик тарихин гар қиласам баён,
Ҳайратда ёқасин тутади жаҳон.
Тарихин ёзмоққа тор келур осмон,
Етмайди гар бўлса Орол сиёҳдон!

Биз ўсиб улгайган бу она тупроқ,
Она-Ер тарихи гар қанча бўлса,
Шунчадир бу дўстлик тарихи, ўртоқ,
Бу дўстлик эртаси яна ҳам порлоқ!

16 ноябрь, 1959, Ленинобод шаҳри

К У Й

Кеч эди.

Сен келдинг.

Үтирдик икков

Энг яхши шеъримни ўқидим сенга.

Сўнг эса роялга ўтириб сен ҳам,

Бир ажиб куй чалиб, завқ бердинг менга.

Ўйлардим: роялнинг ҳар битта тори

Қалбимга туташу ундан куй олур!

Мен дедим: — Бу кимдан?

Дединг: — Глинка!

Бу куйдан руҳимга ёғди гўё нур!

Сен жўнаб кетдингу тун бўйи у куй

Руҳимда яшади тарк этмай бирдам.

О, қандай билиби менинг қалбимни

Глинка юз йиллар бундан муқаддам!

СЕВИБ ҚОЛСАНГ...

Бу кўчадан ўтганман минг бор,
Бошқасидан фарқи йўқ сира.
Йўл бўйида тераклар қатор,
Охирида оқар шаршара.

Чироқлари столбаларнинг
Қулоғида мисоли зирак.
Тураг экан оқ кулбаларнинг
Биттасида шўх қиз Муборак.

Бодомқовоқ, бўйдор ва дуркун...
Кўплар ҳавас қиласкан уни.
Унинг билан танишдим бир кун,
Йўлини пойлар бўлдим ҳар куни...

Энди менга кўринар ажиб,
Кўпдан таниш бу оддий кўча.
Кўнглим истар уйқудан кечиб,
Кезмоқ уни то тонг отгунча.

Севиб қолсанг, дўстлар, юракдан
Ўйларкансан кундуз, кечаси.
Жуда кўркам кўринар экан
Ҳатто ёрнинг оддий кўчаси.

УМР ЙЎЛДОШИМГА

Ёшлиигим тонгида сени учратдим,
Шу,— дедим,— кўкимда ёруғ юлдузим.
Умримни гул каби қўлингта тутдим,
Эй, умр йўлдошим, қуралай кўзим!

То катта тош йўлга чиқиб олгунча
Озмунча сўқмоқлар босиб ўтмадик!
Озмунча бўлмади юлдузсиз кеча!
Барига ишонч-ла боқа олдик тик!

Энди-чи, уч ўғил — фарзандимиз бор,
Сен — она, мен — ота, бахтиёр, магрур,
Умримниг тонгидан бўлиб миннатдор,
Истиқбол уфқига боқаман масрур!

Гар бирор севгидан савол сўрсайди,
Номингни такрорлаб, «шу бахтим», дердим,
Мабодо яна бир умр кўрсайдим,
Ионки, шунда ҳам сени севардим!

1960

МЕН ЙЎЛГА ЧИҚАМАН

Мен йўлга чиқаман, айрилиқ яқин,
Бу ерда қолади дўсту ёр, яқин.
Эҳ, мени кутади Мирзачўл, қирлар,
О, йигит қалбимда орзулар чақин!..

Мен йўлга чиқаман, йўлимда баҳор,
Мен йўлга чиқаман, дилимда баҳор.
Кузатиб қолувчинг бўлса қўл силкиб,
Сафарга чиқмоқнинг ажиб гашти бор!

Бундан ҳам гаштлидир қайтган чоғингда
Қаршилаб олса ёр ташна лаб билан.
Чанқоғинг қондирса ошна лаб билан
Энтикиб-энтикиб кенг қучоғингда,

1959

O, ОНА...

Зулфиляга

Кўз очиб оламга келгандан бери
Неларни кўрмади бу бошим менинг.
Озми-кўп танидим ҳаётнинг сирин,
Қирққа ҳам етибди бу ёшим менинг.

Йилдан-йил орттиридим талай дўсту ёр,
Ҳурматлаб дедилар, «дўстим», «ўртоғим»,
Улгайдим: кўксимга бош қўйиб дилдор,
У деди: «Бахтимсан, суянган тогим!..»

О, она, ҳеч бири эмасдур ширин
«Болам!» деб бир оғиз айтган сўзингдан!
О, она, меҳрингда қуёш яширин,
Не ажаб гул унса ҳар бир изингда!

ҚОРАҚҮМДА

Илк ўтган паровоз зарбидан чўлда
Саксовуд шохидан қўумлар тўкилди.
Минг йиллик саҳронинг қулоги битиб,
Зўр келгач, қомати мангур букилди.

Эҳтимол машинист ўғли улғайиб,
Отага ёрдамчи бўлиб ўтган чоғ,
Бўлажак келини тарвуз узатиб,
«Бўлинг,— дер,— чўлдаги шу боқча қўйноқ».

ФАМХҮРЛИК

Бас, дединг етганда кўча бошига,
Шу ердан қайт дейсан менга ҳар сафар...
Томчилар йилтиллаб йўлка тошида
Бўлажак шарросдан берарди хабар.

Соябон узатиб, тутиб кет, дедим,
Уалиб бўлса ҳам олдинг қўлингга.
Сўнг отдим жадаллаб ёмғирда одим,
Гоҳида кўз ташлаб сенинг йўлингга!

Шу куни ёмғирга тоза ивидим:
Устингдан сув қўйсанг бунчалик бўлмас!
Лекин сен: «Бечора, ивигандир!» деб,
Кўнглингдан ўтказган бўлсанг мени, бас!

1960

ХЕЧ ЭСИМДА ЙҮҚ

Тупроққа беланиб бөг күчасида
Ҳаммомпиш ўйнаган чөгим эсимда.
Эртакқа түймасдан ёз кечасида
Кундузи қўймаган чөгим эсимда.

Еттига етмасдан тушган тишимни
Мўъжиза топғандай сўзлайман ҳамон.
Мактабга илк марта борган қишиимни
Кечаги кун каби эслайман ҳамон.

Ариқда оқизоқ қилиб ионимни
Ивитиб еганим йилни эслайман.
Муҳаббат маст қилиб ўсмир қонимни,
Илк марта узганим гулни эслайман.

Илк бўса мазаси лабда қолғандай
Тамшаниб қўяман баъзан ҳали ҳам...
Жанг қилган йилларим эсимда шундай,
Эсимда тутунга бурканган олам!

Ҳаммаси, ҳаммаси эсимда мутлоқ,
Ҳаммаси юракда мисли ўчмас чўғ!
Ва лекин сочимга оқ оралаган чоғ,
Рост айтсан, дўстларим, ҳеч эсимда йўқ.

Ереван, 1959

ГУЛ УЗМОҚЧИ БЎЛСАМ

Боғ кездим: атрофим чаман-чаман гул,
Ҳидига маст бўлиб бир-бир кузатдим.
Бир қизил раъноси бўлди-ю маъқул,
Узмоқчи бўлдим-да, қўлим узатдим.

Оқ тушган сочимни кўрди-ю боғбон
Одоб-ла қайтарди гулдан қўлимни.
— Қўй, тегма! — деди у, — ҳў... аллақачон
Сен узиб бўлгансан севган гулингни!

1959

ОҚ ҮРИК

Ҳовлида ўсарди бир туп оқ ўрик,
Энг пастки шохга ҳам етмасди қўлим.
Бир сакраб қўярдим қилиб болалик
Шу ўрик тагига гар тушса йўлим.

Болалик ел каби ўтди беармон,
Сочимга оралаб қолибди оқ нур...
Оқ ўрик ҳовлида ўсади ҳамон,
Ҳамон у кўркидан масур ва мағрур.

Қўлларим етади энди шохига,
Шохларин эгаман истаган чоғда.
Ва лекин болалик қувноқ чоғига —
Қўлларим етмасдан ҳайронман доғда.

1959

ЛОЛА ТЕРГАН ҚИЗ

О, жонон, чиқибсан лола тергани,
Лоладай юзинг ҳам гул-гул очилган.
Лабларинг қирмизи гулни қочирган,
Лолалар бағри дөг сени күргани.

Мунча ҳам лолага ўч бўлмасанг, ёр,
Кўксингга дасталаб босмасанг мунча!
Тушингга кирдими лола бу кеча!
Боқ, гуллар кўксингда қилур ифтихор!

Шу даста лоладай менинг ҳам бошим,
Кошкийди, кўксингта босилса бир бор!
Ўзимни санаардим мангу бахтиёр,
Ва сени дер эдим: — Бахтим, қўёшим!

СЕН ТАЬНА ҚИЛАСАН...

**Сен таъна қиласан, ўлканг иссиқ деб,
Онанинг бағри, айт, бўлурми соvuқ?!
Кўрсайдинг навбаҳор ёйганида сеп,
Кўрсайдинг мевалар пишганда тўлиқ.**

**Гар иссиқ бўлмаса, қоп-қора чарос,
Айт ўзинг, рангини қайдан оларди?
Гар иссиқ бўлмаса, чўтири, ананас —
Ширини тилингни қандай ёрарди?**

**Гар иссиқ бўлмаса, яхна кўк чойнинг
Қадрига унчалик етмасдинг сен ҳам.
Гар иссиқ бўлмаса, ўйноқи сойнинг
Бағрига ўзингни отмасдинг сен ҳам!**

**Гар иссиқ бўлмаса, юксак дарахтда
Сен севган лайлак ҳам топмасди ўрин.
Гар иссиқ бўлмаса, пишмасди пахта,
Мевалар унчалик бўлмасди ширин!**

**О, Сибирь гўзали, иқболи порлоқ,
Рост айтдинг: кўп иссиқ ўлкамнинг ёзи.
Ионки, ўлкамдек қалбим ҳам қайноқ,
Ионки, севгимдан бўласан рози!**

1959

САҲРО ЧЕЧАГИНИНГ АРМОНИ

Саҳродан борардим ёлғиз бир ўзим,
Бир гўзал чечакка назарим тушди.
Севинчдан чарақлаб яшнади кўзим
Ва чечак бандидан қўлларим қучди.

Шу маҳал у тилга кирди-да, деди:
— Уз, инсон, тортина, уз, майли, сўлсам!
Саҳрова ўсгандан, оҳ, кошки эди,
Инсонлик боғларда бир гиёҳ бўлсам!

ҚАЛБИМНИ ҚАЙТАР ҮЗИМГА

Сен кетдинг кузда, қолдим кузатиб,
Елғиз бир ўзим.
«Омон қайт!» дедим қўлим узатиб,
Кўзингда кўзим.
Ўзим қолдиму юрагим сенинг
Измингда кетди.
Орзу-умидим, тилагим, сенинг
Кўзингда кетди.
Қайтар чоғингни кутдим интизор,
Кўзим тўрт бўлиб.
Шаҳардан қайтдинг айни навбаҳор,
Қалбинг ёт бўлиб.
Ўзинг ўша-ю, кўзинг ўша-ю,
Юрагинг бошқа.
Кўнглингга аста қўлим солсам, у
Ўхшайди тошга!..
Лекин сен менинг қалбимни қайтар,
Қайтар ўзимга!
Кейин кўринма, эй, севги сстар,
Асло кўзимга!

ҮЙИНЧИ ҚИЗ

Мақоминг мунча ранго-ранг экан
Ҳой, ўйинчи қиз! Ҳой, ўйинчи қиз!
Хишча белларинг хивичдай эгиб,
Чилвир соchlаринг ерларга тегиб,
Камон қошларинг чимириб, сузиб,
Гоҳо ўтириб ва гоҳо кезиб,
Шўх йўргалайсан,

мисли тўрғайсан,
Ҳой, ўйинчи қиз!

Ҳой, ўйинчи қиз!
Йўқ, йўқ, ўйинмас, мен хато қилдим,
Гўё ажойиб эртак сўйлайсан,
Гўё чеки йўқ ўйлар ўйлайсан,
Гўёки тилсиз қўшиқ куйлайсан.
Ҳой, ўйинчи қиз!

Ҳой, ўйинчи қиз!
Рақсингда ҳаёт, муҳаббат бордир,
Рақсингда юрак, матонат бордир,
Рақсингда висол ва нафрат бордир,
Ҳой, ўйинчи қиз!

Ҳой, ўйинчи қиз!
Ўз ҳунарингда сен ҳам шоирсан,
Илҳом боғида эркинсан, ҳурсан,
Ҳой, ўйинчи қиз!

Ҳой ўйинчи қиз!

1959

СЕН ҚУЁШ БЎЛСАНГ...

Сен дединг бир куни бошимга боқиб:
Саратон кезида тóққа ёғмиш қор!
Мунчалар бераҳм бўлмасанг, дилдор,
Мунчалар қийнадинг рашк ўтин ёқиб!

Чиндан ҳам ҳақинг бор тегишсанг, кулсанг,
Чиндан ҳам бошимда соч эмас, оқ қор.
Ҳаммаси бир кунда эриб кетар, ёр,
Сен бахтим қўкида бир қуёш бўлсанг!

1960

ҚУЛУПНАЙ

Боққа чорладинг, эй иқболи ҳур,
Хўп дедим дарров.
Кулиб дедингки, энгашиброк юр,
Кўрмасин бирор.

Бошлаб бординг-да қулупнайзорингта,
Дединг: — Қани, ол!
Кўз ташлаб олиб ўнгу сўлингта,
Дединг: — Бемалол!

Боқар қулупнай чўғ бўлиб ёниб
Барглар оралаб.
Сен турдинг кулиб, мен едим қониб,
Роса саралаб.

Баъзида менга териб тутдинг-да,
Дединг: — Яхшими?
Мен дедим: — Асраб ўз хилватингда
Кўйганинг шуми?

Кўзимдан кўзинг олдинг-да, дарров
Қададинг ерга.
Қизариб кетдинг кўргандек бирор,
Ва ботдинг терга.

Энди англасам бир имо экан
Ўша учрашув.
Сени эсласам кўзим ёнаркан,
Юрак этар «шув!»

Ўша учрашув нақшдир қалбимда,
Эй, гўзал дилдор!
Тутган қулуунайинг таъми лабимда
Ҳали·ҳали бор!

Ундан ширигинин, ўйлаб қарасам,
Емабман кейин.
Ўша боғчани юзга кирсам ҳам
Унутмоқ қийин!

1960

СЕНИ СЕВДИМ

Сени севдим жону дил билан,
Сени севдим, бўлмадинг иқрор.
Сени севдим, ширин тил билан
Қиё боқиб ўтмадинг бир бор!

Йиллар ўтди, ўтди ёшлиқ ҳам,
Тинди қалбда жўшқин урган қон.
Қалбим титрар ҳамон эсласам,
Ҳамон бордир кўнглимда армон!

Сендан олдин умрим тугаса,
Сен борсанки, демак, тирикман.
Ҳеч ишонма у ўлди деса,
Ҳаётингта доим шерикман.

Йўлларингда чечак учраса,
Яшиаб турса, бил, ўша менман.
Боғларингда чаман барқ урса,
Нур уфурса, бил, ўша менман.

Эрта баҳор келиб қалдирғоч
Салом деса, бил, ўша менман.
Баҳор қадаб бошингта гултоҷ,
Еллар эсса, бил, ўша менман.

Чанқовингни қондирса булоқ
Багрин очиб, бил, ўша менман.

Тунлар йўлинг ёритса чироқ
Шуъла сочиб, бил, ўша менман.

Кетолмайман ҳеч сендан йироқ,
Инонма сен менинг қабримга!
Аслида мен севган кунимоқ
Кўмилганман сенинг қалбинига!

Eреван, 1959

ЧИНОР

**Сени кўрсам рашким келади
Асрларнинг гувоҳи, чинор.
Балки бағринг сирга тўладир,
Балки битмас ҳикоятинг бор!**

**Асрлардан асрга салом
Олиб ўтган улкан ёшинг бор.
Булутлардан оқ попоқсимон
Кийиб олган нурли бошинг бор.**

**Баҳор келса атири улашиб,
Яна ҳуснинг очади жамол.
Ҳафта бўйи қолур адашиб
Қучогингта бир кирган шамол.**

**Сен солгандага бошларга соя
Саратонни унутар киши.
Бағринг гўё бир симфония
Ўнда сайран минг ҳаёт қуши!**

**Мунча сахий, мунча кўркамсан,
Мунча савлат тўкиб турмасанг!
Мунча мағрур, мунча улкансан,
Мунча узоқ умр кўрмасанг?!**

**Сендай умр кўрсайдим кошки,
Кошки қилсанг сабабин ошкор...**

**Сени кўрсам келади рашким
Юз йилларнинг сирдоши, чинор!**

**Чинор деди: нега тутай сир,
Тўғри, ёшим уч юздан ўтган.
Менга узоқ умр бахш этган
Она-Ерга бўлган меҳримдир!**

ҚУШНИ ҚИЗ

Мен сени биламан, гўзал, лобар қиз,
Гоҳида чиқасан китоблар сўраб.
Гоҳида учратиб кўчада ёлғиз
Нотаниш кипидек ўтасан қараб.

Таънага ўрин йўқ — кўздай қўшнисан,
Фақат сен «аъзосан» кутубхонамга.
Сен кирсанг нур тўлар азиз хонамга,
Сўнг билсам китобга чиндан ташнасан.

Китоблар танласам магазин кириб,
Кўзларим ўнгида турасан ўзинг.
Гўёки ёнимда ўйнатиб кўзинг
«Шуни ол!» деясан маслаҳат бериб.

Гоҳида чиқасан: қўлингда китоб,
«Бопланти! Чин ҳаёт!» — дейсан қувониб.
Ўзгасин танлашга тушасан ёниб,
Гўёки кўзингда порлайди офтоб.

Бугун ҳам китоб деб чиқдинг, азизим,
Аксига бўлмади сенбоп бир китоб.
Айт гўзал, юзларинг эдими офтоб,
Унга тик боқолмай бошим эгдим жим?

Хонамдан хўрсаниб чиқдинг китобсиз,
Ортингдан мен олдим чуқур бир нафас.
Оҳ, билсанг эди сен, бу гал китобмас,
Бу гал юрагимни олиб кетдинг, қиз!

ЕР КЕТИБ

Ер кетиб, ортидан қараб қолибсан,
Қуралай кўзингда ҳалқа-ҳалқа ёш.
Қалбингта бемаҳал алам солибсан,
Қалбингни ёритмас ҳаттоқи қуёш!

Муҳаббат нур бўлиб қални ювмаса,
Айт, унинг қадрига етарми киши!
Қўй, дўстим, ўксима, агар севмаса
Ортига қайтмасдан кетгани яхши!

1960

ҚАЙЛАРДА ЮРИБСАН, ДУСТИМ!

Жанг бўлган ерлардан ўтиб борардим,
На битта окоп бор, на битта хандоқ.
На тешик бир каска, на бир ўрам сим,
На гильза, на патрон, на синиқ қўндоқ!

Бу ердан йилларнинг ижодкор қўли
Йўқотган урушнинг қонли изини.
Бу ерда барқ ураг тинч ҳаёт гули,
Бу ерда ҳур сезар ҳамма ўзини...

Жанг бўлган ерлардан ўтиб борардим,
Баданим зирқираб кетди ногаҳон:
Медальон!

Бир зумга беҳушдек қолдим,
Ўйимда жонланди томчи иссиқ қон!

Қўлимга олдиму қўлимни лекин
Куйдириб олгудек иссиқ туюлди,
У қонли йилларнинг даҳшати секин
Фикримга қўргошин бўлиб қуюлди.

О, уни танидим: окопдош эди,
Үт бўлиб ёнарди жангу жадалда!
Энг оғир дамларда у сафдош эди,
Энг оғир дамларда берарди далда.

У қўйиб ўз жонин ўлимга гаров
Ўлимдан қутқарган бир куни мени!

**Номини эшитса титрар эди ёв,
Жонидан севарди туққан элини!**

**Қайларда юрибсан, бормисан омон?
Наҳотки, бағрига олган совуқ ер?
«Йўқ! Йўқ! Йўқ! Утирик!
Тирикдир ҳамон,
Яшами шарт унинг!» — қалбим шундай дер.**

**«Утирик! Медальон тушиб қолган, бас!
Жанг чоги энг олдда борганисимон
Илк сафда ҳозир ҳам борур бегумон!
Бошқача яшами сира мумкинмас!»**

**Шу қирда, шу элда сенинг нафасинг,
Қайларда юрибсан, о, дўстим, ўзинг!**

САДАҚАЙРАФОЧ

**О, менга отма, қўй, таъна тошини,
Мунчалик япасқи бўлиб ўсдинг, деб.
Мунчалик ёшлиқдан кериб тўшингни,
Атрофга саноқсиз қўлинг чўздинг, деб.**

**Нимамга кеккайи кўкка бўй чўзиб,
Қоматим бўлмаса кўз-кўз қилгудай!
Мевалар қилмасам, болалар узиб
Хомакдан талашиб, севиб егудай!**

**На менинг баргларим кўм-кўк ва кўркам,
На баҳор чоғлари хушбўй гуллайман.
На мени тараашлар севиб бир одам,
Шу сабаб шохларим ёнга йўллайман.**

**Шу сабаб ёйилиб ўсанман роса,
Унгандир кўп қалин шохлар поямдан.
Баҳр олсин кишилар, жилла бўлмаса,
Саратон кезлари қуюқ соямдан.**

МЕВАЛИ ДАРАХТ

(Диалог)

— О, дўстим, қайгуга гарқ бўлгансимон
Мунчалар қуйида бошинг ҳамиша?
Сен учун бегона бўлганми осмон!
Бошингни кўтариб юрсанг-чи, пича!

— О, дўстим, кеккайсанг ким яхши деяр,
Мағрурлик кўчасин, бил, боши беркдир.
Бил, дўстим, мевасиз дараҳт кеккайр,
Мевали дараҳтнинг боши эгикдир.

ГОМЕРНИ ЎҚИБ...

Сен дединг бир оқшом Гомерни ўқиб:
— Айт, шоир, чинданми Гомер кўр бўлган?
Мен дедим ҳайратли кўзингта боқиб:
— Ҳа! Аммо қалбида минг кўз, нур бўлган!

1960

БЕТОН

Сен бетон қуярдинг, мен назар солдим:
Мехринг ҳам қоришиб кетарди бирга!
Зўр бино тушади худди шу ерга...
О, сенинг касбингта кўп қойил қолдим.

«Тўрт қават бўлади», дединг очиб лаб,
Юзингда кезарди ишонч ва викор.
Бешни ҳам кўтарар ушбу пойдевор,
Сифатин кузатиб, кўрсам чамалаб.

О, шоир! Сенинг ҳам ёзган шеъринг
Шу бетон сингари қўйма, пухтами?
Ҳар сатр, ҳар бандда қалб омухтами?
Ҳар бетга томганми пешона теринг?

1960

ШОИР ОРЗУСИ

Шеърим тугаган замон қошимга
Келдинг-да, сен дединг: — Кўнглинг тўлдими?
Салқин ел теккандек бўлди тўшимга,
Ҳамон сал титрарди торимнинг сими?

Қувондинг кўзимда мамнунлик кўриб,
Ва дединг: — Айт, яна қандай орзунг бор?
— Кошкийди бир байтин севиб кўчириб,
Қиз севган ёрига этсайкан ёдгор!

1959

КЕЛ, ЖОНИМ, БЎСТОНИМГА!

Кел, кел, жоним, бўстонимга,
Бўстон эмас, ўз ёнимга.
Ишқинг мени мафтун этмиш,
Жабр қилима ёш жонимга.

Ишқинг сенинг ошу ноним,
Умид орзу ва армоним.
Йўлларингга кўзим муштоқ,
Кел, азизим, кел, кел, жоним!

Гул очилган баҳорда кел,
Шом бўлмаса, наҳорда кел.
Майли, ёзда вақт тоимасанг,
Чана ҳайдаб қиши-қорда кел!

Сенинг келган кунинг, эркам,
Менинг учун бўлур кўклам.
Мирзачўлнинг фаслларин
Ёмони йўқ, бари кўркам.

Кел, кел, жоним, бўстонимга,
Бўстон эмас, ўз ёнимга.
Боғ тўрида шоҳсупам бор
Йўқлаб келган меҳмонимга.

С О Ф И Н Г А Н Д А

(Кўшик)

Хў кўринган у тогмикан,
Ўртаси гул-гул боғмикан,
Чўлга кетган ёргинамнинг
Тани жони, оҳ, соғмикан?

Тоғ ёқалаб борсаммикин?
Боғ ёқалаб борсаммикан?
Қучоқ очиб қарши олса,
Қошларида қолсаммикин?

Қошларида қолар бўлсан,
Боқиб-боқиб толар бўлсан,
«Кел, ортиқча қийнама, ёр,
Севар бўлсанг тўй қил!» десам.

Бўз ер очсак бирга-бирга,
Қора сочим тегиб ерга.
Манглайини артиб қўйсам
Ботганида қора терга.

Кут, ботиrim, чиқдим йўлга,
Умид-орзум туғиб дилга.
Севгимни ҳам олиб кетдим,
Сен яшнатган бўстон чўлга.

ИХТИЁРИМ ҚЎЛИНГДА

**Анжир пишган боғларингта олма отсам майлими?
Рўпарамдан ўтиб қолсанг, сўзлар қотсам майлими?
Олма отмоқ баҳонадир, муддаойим сен ўзинг,
Юрагимга ўт ташлаган ўтган баҳор шўх кўзинг!**

**Чигитингни экиб бердим ўшанда, ёр, дўндириб,
Ишлов бердим, ўнг чаккамга чуст дўппимни қўндириб.
Куз келганда бункеримни бўшатгансан ўзгинанг,
Қулогимда: «Яшанг, ака!» деган ширин сўзгинанг!**

**Шундан бери қайга борсанг, кўзим бўлар йўлингда,
Утга ташла, сувга оқиз—ихтиёрим қўлингда!
Не сабабдан севдинг дея сўроқ этма, эй жонон,
Юрагингда баҳор кўрдим, кўзларингда саратон.**

ЮРАГИМНИНГ КЎЗИ БОР

Юрагимнинг кўзи бор, эркам,
Сени тоиди минг қиз тўпидан.
Рост! Рост, дея тасдиқласанг ҳам,
Йўқ! Йўқ, дейсан қалбинг тубидан.

Сени қандай танлаб олди, айт,
Юрагимнинг кўзи бўлмаса!
Сени қандай севиб қолди, айт,
Агар айтар сўзи бўлмаса!

ГУЛНИНГ ИЗОХИ

**О, менинг тиканим ўткирдир чиндан,
Чиндан ҳам бетикан бўлмайман сира.
Фақат бир илтимос қиласайин сендан,
Дўстларга шу сўзим етказсанг зора.**

**Тиканим қаҳримдир, айшини чоғлаб,
Қадримга етмасдан узган кишига.
Тиканим ботмайди севиб, ардоқлаб,
Ҳурматлаб ким мени тақса қўксига!**

Ким кўрмиш севганга бир тикан раво!

ҚУШНИМНИНГ МУШУТИГА

(С. Есенинга ўхшатма)

О, мушук, нақадар думларинг бароқ,
Бир шарпа сездими дарров бўлар динг.
Кўзларинг тунлари гёё қўшчироқ,
Ўзингта ярашар ўсиқ мўйловинг.

Меҳмонлар келганда қошига бориб
Эркалик қиласан «миёв»инг чўзиб.
Юнгингни силаса қўлига олиб,
Хуррагинг отасан кўзларинг сузиб.

Меҳмонлар ичида бир жонони бор,
Шу жонон ишқида кўпдан бедорман.
Бир оғиз сўзига муштоқман, зорман.

Умрбод бўлардим сендан миннатдор
Шу жонон келганда мен учун, эй, Мош,
Бир марта, оҳ, қўйсанг тиззасига бош!

МЕН ЭНДИ ИҚРОРМАН...

Мен сени мақтамоқ бўлдим-да, гўзал,
Минг турли сўзларни олдим қаламга.
Ўзимча тасвиринг чиздим муфассал,
Гўёки ҳайкалинг қўйдим оламга!

На кўзинг қолди-ю, на хипча белинг,
На чилвир соchlаринг шивир-шивири...
Кўзларим тўрт бўлиб кутади йўлинг
Жамолинг тасвири битгандан бери.

Бир маҳал кўриндинг қуёшдай болқиб,
Нақадар ҳаётбахш ҳар битта сўзинг!
Мен энди иқрорман ҳуснингта боқиб,
Шеъримдан мин марта гўзалсан ўзинг!

ЙИГИТИМ АЗАМАТ ДЕБ

«Севганинг ким ўзи?» — беришса сўроқ,
Мақтаниб дебсанки: «Азамат йигит,
Қарашда лочину, қудратда бургут,
Елкаси кўтарар қулаб кетса тоғ!
Чўлларда яратган чаман боғлар у!»
— О! Мунча кўкларга кўтардинг, эркам!..
Азамат, деб мени қийнама кўп ҳам,
Юз тоғдан оғирдир бир кичик қайғу!

БИРОҚ

Гул, дединг, йўлингда яратдим бўстон,
Сув, дединг, чўлларда оқиздим дарё.
Сев, дединг, ишқингда фидо дедим жон,
Боқ, дединг, кўзимдан нур олди дунё.

Ёр, севгинг ҳамиша йўлимда чироқ,
Мафтунинг юрагин ўртама кўп ҳам!
Бошқалар тош отса билинмас, бироқ
Мен учун оғирдир сен отган чўп ҳам!

СЕВГИМГА ИШОНСАНГ БАС!

**Севгимдан гумонинг бордир, биламан,
Бу балки бир марта тилинг куйгандан.
Бог десанг йўлингда яратай чаман,
Бу бари мен сени жондан суйгандан.**

**Илонки, гар сени севмасам жондан
Сен босган ҳар тошни бир ўпармидим!
Мен сени ардоқлаб ғубордан, чангдан
Йўлингга ҳар куни сув сепармидим!**

**Гар жондан севмасам ҳар шому сабо
Йўлингга интизор боқарми кўзим?
Ўл, десанг, ўлимга тайёрман,**
аммо
Севгимга ишонсанг басдир, азизим!

ИККИМИЗ КЕЗАРДИК

Иккимиз кезардик боғни ёнма-ён,
Ҳар ғунча боқарди бизга кўз сузиб.
Ажойиб бир гулни кўрганим замон
Мен дедим: — Шу гулни берайми узиб!

«Увол!» деб рад этдинг.
Мен қолдим ҳайрон.
Мунчалик раҳмдил бўлмасанг, киши!
Бу ерда чараклаб тургандан, инон,
Кўксингда қовжираб сўлгани яхши!

ИЛК СЕВГИНИНГ ЯРАСИ

Илк марта мен сени севганлигим рост!
Қалбимда жўш уриб севги, эҳтирос
Йўлингни кутардим кунда интизор.
Аммо бу кутишим бергандек озор
Сен ўтиб кетардинг, ёр, чимириб қош,
Менинг-чи, кўзимдан тирқиради ёш...
На чора! Тақдирнинг ҳукми шу экан!
Қалбимга ботганча қолди у тикан.
Ёнидан жой олди ўзга бир жонон,
Аммо сен яшайсан кўнглимда ҳамон.
Ҳамон бор дилимда жароҳат изи,
У сени эслатар келганда кези...
«Қани, шу яранинг изини кўрсат!»
Деб мендан сўрасанг топиб бир фурсат,
Кўрсатиш, албатта, менга оғирдир...
Боқ бунга,
 буларда ўхшашлик бордир:
Бу яра фронтдан, илк жангдан ёдгор
Бу яра изи ҳам ўчмайди зинҳор.
Фарқ шуки, бу жангда чиққанман ғолиб!
Сен берган ярадан қолганман нолиб...

ЕР-ЕР

Бахт етаклаб келди ёринг останангга, ёр-ёр,
Бахт қуёши шуъла сочган пешонангга, ёр-ёр,
Бахтли ёшлик тантанаси — тўй кечаси, ёр-ёр,
Байрам руҳи билан яшнар ёр кўчаси, ёр-ёр.

Қанча қўшиқ, ялла айтсак тўйингда оз, ёр-ёр,
Йўлларингда нур пояндоз, гул пояндоз, ёр-ёр.
Севги билан қовушганлар умри баҳо, ёр-ёр,
Бизнинг юртда инсон азиз, ҳур, бебаҳо, ёр-ёр.

Озод инсон меҳнатидан юрт ободон, ёр-ёр,
Ер козида энг кўркам юрт бизнинг Ватан, ёр-ёр.
Ватанимиз шарафига жонлар фидо, ёр-ёр,
Шуҳратини йиллар куйлар бўлмас адо, ёр-ёр.

МАЙЛИ, БАХТИЁР БҮЛ

Сувга боқдим, олиб кетди ўйларимни,
Шамол келиб юлқиб кетди куйларимни.
Рўпарамдан бир қиз ўтди — қирқ кокилли,
Деган каби: «Кўриб қўйгин бўйларимни!»

Қадди расо, ўзин эса ғунча дейсан,
Истарасин иссиқлиги кунча дейсан.
Кўзларининг порлашини кундуз десанг,
Қошларининг қоралигин кечадейсан.

Мехр қўйиб, шу жононни севсаммикан?
Деса агар: «Тенгиммассан, бўлма тикан»,
Ўтиб кетган қирчиллама ёшлигимнинг
Орқасидан йўрга миниб қувсаммикан?

Йўрга миниб қуввардиму етолмайман,
Йўллар олис, тоғлар баланд — ўтолмайман.
Майли, соғ бўл, бахтиёр бўл, эй жонона,
Зўрлаб севгинг этагидан тутолмайман!

1959

ШЕЪРЛАР КИТОБИМ ҲАҚИДА

Мен шоирман. Истайманки,
Шеърларим бўлсин китоб.
Ҳар ўқувчи йўлларини
Ёритсин у мисли офтоб.

Майли, ишчи қора мойли
Қўлларида тутсин уни;
Майли, сувчи тўлин ойли
Кечалари титсин уни;

Майли, чўпон тизма тогли
Ййловларга олиб кетсин;
Майли, сапёр поход чоғи
Тўрвасига солиб кетсин;

Майли, ҳали ҳарф танимаган
Бола бузиб ўқиса ҳам;
Майли, уни манман деган
Зўр танқидчи бўш деса ҳам;

Лекин сатанг эрмак қилиб
Ўқишига розимасман.
Мехнат севмас ёдлаб келиб,
Гар мақтаса, рост демасман!

5 декабрь, 1960

ЯШАСИН ТИНЧЛИК, ИНСОН ВА КҮКЛАМ!

Тоғлардан шилдираб оқсан ирмоқлар
Қорликлар саломин олиб келади.
Майсадан күк нуқра туттан қирғоқлар
Баҳорга ташаккур айттан бўлади.

Майнни ҳам етаклаб келади баҳор,
Қўйнида ранго-ранг, құчоқ-құчоқ гул.
Қўзида саратон ҳарорати бор,
Лабида табассум, дейди: — Сен ҳам кул!

Қирда ҳам, тоғда ҳам баҳор нафаси,
Пахтакор водийда мағрур кезади.
Баҳорни етаклаб пахтакор ўзи,
Баҳорга кундалик режа тузади!

Баҳорнинг бир куни куздай салмоқли,
Ҳафталар юкини тутар кифтида.
Баҳорнинг ҳар они мойли, қаймоқли,
Олтин бор, гавҳар бор ҳар бир кафтида!

Баҳорда улғайиш, яшариш, униш,
Баҳорда камолот, севги, тинчлик бор.
Тинчликнинг ишқида ўртаниш, ёниш,
Ватандони дўстимда шонли ифтихор.

Баҳор бу май демақ, май эса мағрур —
Инсоннинг ақлига, кўркига кўрик.
Инсоннинг ақлида қуёши қадар нур,
Ер қадар сахийлик бор, сувдек мўллик!

Ихтиёр этаркан, ой ерга тушиб,
Сув кўкка шилдираб оқмоғи мумкин.
Ихтиёр этаркан, қуёшга учиб,
У ердан денгизга боқмоғи мумкин.

Ихтиёр этаркан, уришқоқ зотни
Умрбод тизгинлаб қўймоғи мумкин.
Ихтиёр этаркан, бу коинотни
Билай деб тарвуздай сўймоғи мумкин.

Мен инсон идроки, истаги, кучи,
Қалбига ишониб, жондан мафтунман.
Аминман, бузилмас дунёнинг тинчи,
Аминман, соврилмас кўкларга чаман!

Аминман, инсоннинг идроки голиб,
Бу жаҳон бурканар нурга, чечакка.
Бу жаҳон кундан-кун яшиаб, юксалиб,
Мардона боқади соф келажакка!

Боқ, ана, ўтмоқда музaffer парад,
Ўтмоқда тинчликнинг метин қатори.
Ўтмоқда келгувси — ҳу, кичик Марат,
Ғалаба байроғин тутиб юқори!

Ўтмоқда бахтини жангларда сақлаб,
Меҳнатда тобланган оқ сочли авлод.
Ўтмоқда ёшлигин севиб, ардоқлаб,
Истиқбол эгаси навқирон ҳаёт.

Парадда кўраман яшаш кўркини,
Балогат кучини, баҳор шодлигин.
Ишонч-ла кўраман башар эркининг
Ва тинчлик ҳуснининг абадийлигин!

Қалбимдан қувониб дейман ҳайқириб:
— Яшасин бу тинчлик, инсон ва кўклам!
Жаҳон дер фикримга акс-садо бериб:
— Амин бўл, бу тинчлик бузилмас ҳеч ҳам!

1960

ДҮСТИМГА ДЕГАНИМ

Гар менинг умримдан савол сўрасанг,
Кўп узун изоҳга ўрин йўқ, дўстим!
Баҳорда туғилдим, баҳорда ўсдим,
Баҳор деб фронтда қилдим қонли жанг!

Баҳорда улғайдим, баҳорни куйлаб,
Баҳорли ҳаётда умр кечирдим.
Нимани ҳис этса бу баҳорий қалб,
Баҳорий руҳ билан оқиқа кўчирдим.

Шу учун гул, севги шодлик қўшиғим,
Шу учун ҳамиша олчи ошиғим!

1960

БУ — ЎША ТАНИШ ЕР

**Бу ердан ўтганман солдат чоғимда,
Ҳар онни ўлимга қўйиб бир гаров.
Эркимга қасд қилиб, сўлу соғимда
Даҳшатдан қон қусиб, ўқ узарди ёв!**

**Зарбимдан титрарди тоғу тош, осмон,
Боғларнинг кўркидан қолмаган нишон.
Тупроққа қоришган гул, чечак, инсон,
Қон билан, жон билан олинарди шон!**

**У йиллар даҳшати, дўстим, бекиёс,
Номи бор, ўзи кул қишлоқлар кўрдим.
Кўмирдек қоп-қора бошоқлар кўрдим,
Ҳар бири дер эди: қасос ол, қасос!**

**Илондек тўлғаниб кетган сўқмоқлар,
Қон сачраб тусини йўқотган чечак;
Баҳорда бемаҳал сўлган янроқлар,
Кўприги портлаган мунгли шаршарак;**

**Бомбадан йўл узра қулаган харсанг,—
Ҳаммаси ҳали ҳам эсимда шундоқ.
Эсимда қуёшни тўғсан тутун, чанг,
Гўёки ҳали ҳам куйдирар димог!**

**Эсимда: мурдалар устидан ҳатлаб,
Заъфарон боғлардан ёв қувиб юрдим.
Зўр эди ирода, ишонч ва матлаб,
Офарин, барига дош бердинг, юртим!**

**Бу ердан ўтганман солдат кезимда:
Бу — ўша таниш ер, ўша куйган боғ,
Ўша йўл, ўша қир, ўша кул қишлоқ!
Қувончдан нур кезар энди юзимда.**

**Ўнгим гул, сўлим гул, гулзор ҳамма ёқ,
Барқ уриб яшиаган ўзга бир олам!
Ранго-ранг гуллар дер: менга тўйиб боқ,
Ва аммо унутма у йилларни ҳам!**

**Қай юртда, қай боғда ўсмангиз, гуллар,
Мен сизни севаман жонимдан ортиқ.
Истардим: гулларга бурканса йўллар,
Гулларга ғарқ бўлиб яшасин эллар!**

**Истардим: ҳей гуллар, энди ҳеч тўзманг,
Ҳуснингиз тўсмасин ҳатто ғубор, чанг!
Кишилар! Кишилар! Гулларни босманг!
Босишига қўйманг!**

1961

* * *

Дарёга ярашар ҳайқириб оқмоқ,
Қўлларнинг ҳуснидир сокинлик, сукут.
Узукка кўз учун яралган ёқут,
Арининг ишидир пайт топса чақмоқ,
Тинимсиз қайнамоқ чашма учун хос,
Бургутнинг хислати юксакда парвоз.
Мабодо сўрасанг инсонлар бурчин,
Инсонлар яралган яхшилик учун!

1963

* * *

Қаршимиздан сой чиққанда,
Кеч деган — сен, кечган менман.
Меҳринг қўшиб ол шаробни
Ич деган — сен, ичган менман.

Муҳаббатнинг ғам-ғуссасин
Сотган — сенсан, олган менман.
Ғаму ҳижрон сахросидан
Кетган — сенсан, қолган менман.

1965

СОПОЛ ТОВОҚ

У кеттандир сени ташлаб йироққа,
Қүй, уринма, парвонадек чироққа!
Қанотингни күйдирасан бекорга,
Ким етибди зўрлик билан дилдорга!
У осмонда, сен — ердаги нарсасан,
Сен ўзингта ўз ёнингдан teng қидир!
Оғу тўла нақшли олтин косадан
Асал тўла сопол товоқ яхшидир!

1966

С Е Н Г А

Мени эсла, ташвиш тушса, бошингта,
Мени эсла, оғу томса ошингта;
Мени эсла, гар адашсанг йўлингдан,
Мени эсла, баҳтинг учса қўлингдан;
Мени эсла, гар эшитсанг шум хабар,
Гар олдингда турса олис, зўр сафар,
Мени эсла, дўстинг ташлаб кетганда,
Номардлардан меҳру шафқат кутганда;
Лаббай, дея мен қошингта борурман,
Елка тутиб, ёнгинангда туурман.
Йўлда йўлдош,
Ишда қўлдош бўлурман,
Оғир юкинг бир томонин олурман!
Қўзгалмасман яхши кунинг келгунча,
Яхшилигин амин бўлиб билгунча!
Лекин...
Яхши кунлар эсламасанг, майлига,
Ойдин тунлар эсламасанг, майлига.
Майли, айтма, ҳатто орзу тўйингта,
Ойда бир бор келмай эсу ўйингта,
Зарра қадар, ишон, гина қилмасман,
Бу гинани ўзимга эп билмасман.
Сенга меҳрим бирдай бўлур ҳамиша,
Гарчанд кўнглим нозикликда бир шиша!

1966

ЁШЛИК МАДҲИЯСИ

**О, ёшлик йиллари, ўчмас чироғлар,
Истиқбол уфқида мангу порлоқсан.
Сен билан баркамол бўз ерлар, боғлар,
Дарёга туташган жўшқин ирмоқсан!**

**Куйларга монанддир сенинг овозинг,
Чаманлар кўркига бастинг ярашиқ.
Эй, ёшлик! Қуёшдан буюқдир кўзинг,
Хуснингга ҳаётнинг ўзидир ошиқ!**

**Сен агар истасанг, баҳту ҳуррият
Тонг каби кўчади элдан элларга.
Қон, қирғин йўқолиб агадулабад,
Нур бўлиб оқади тинчлик дилларда!**

**Оналар қаддини ғам-алам букиб,
Сочига тушмасин десанг бевақт оқ;
Гўдаклар кўзидан маржон ёш тўкиб,
Зальфарон бўлмасин десанг ол ёноқ;**

**Лаблардан кетмасин кулги, табассум,
Кўзларни яшнатсин атлас жилоси;
Гулзордан ўчмасин муқаддас изим,
Синмасин ёт қўлда машпоқнинг сози;**

**Севгининг ҳаётбахш ёрқин тонгини
Айрилиқ зулмати босмасин десанг;
Нур билан янграган яшаш бонгини
Бомбалар портлаши тўсмасин десанг;**

Эй, ёшлик, кўз-кўз қыл музaffer азминг,
Истиқбол уфқига лочин бўлиб боқ.
Келажак — тинч ҳаёт сенинг измингда,
Ҳар кўзинг бу йўлда бўлсин бир маёқ.

Эй, форум, омонлик байроғин кўтар
Беш қитъа уфқида ҳилпираб турсин!
Замину замонлар баралла кўрсин!
Башарни ҳамиша тинч меҳнат кутар!

1961

КЕЧ КИРДИ

Кеч кирди.

Ел турди. Үфқда қуёш —

Гёёки ногаҳон эзилган аиор.

Елларинг амрига райҳон эгид баш,
Мудраган булутдек оғир солланар.

Кеч кирди.

Кеч кирди қора шол тутиб,

Қоронги тушса ҳам, майли, ҳеч гапмас!

Фақат сен, қуёшим, мени тарик этиб,

Ҳижронинг тунида қолдирмасанг бас!

25 апрель, 1960

ДҮСТИМГА ЖАВОБ

— Қор босган чўққидай бўлса ҳам бошинг,
Севгини куйлашдан тинмайсан ҳамон.
Гўёки ўттиздан ўтмаган ёшинг,
Гўёки қалбингда қайнар олов қон!

— Рост айтсам, эй дўстим, гул ва муҳаббат
Қўлимга тутқизган баҳорда қалам.
Шу қалам қўлимдан тушмайди албат,
Чаманга бурканиб яшаркан ўлкам.

Мабодо беш юз йил умр кўрсам ҳам,
Баҳордан, севгидан ёзардим фақат.
Дер эдим: — Яшасин гул ва муҳаббат,
Дер эдим: — Яшасин бу нодир олам!

1960

ҚОРА КҮЗОЙНАКЛИ ҚИЗГА

Мен сени кутардим соғиниб боғда,
Сен келдинг күзингда қора күзойнак.
У шаҳло кўзларинг кўролмай доғда,
Хаёлга гарқ бўлдим, кўп эмас, андак.

О, шаҳло кўзларинг берқитдинг нечун!
Кўзинг-ку ҳуснингни очган, эй жонон!
Умримни бераман бир кўзинг учун,
Иккала кўзингта ҳадядир жаҳон!

Мен энди англадим: кўзларинг, эркам,
Ҳуснингнинг жавоҳир калиди экан!
Ол кўздан ойнагинг, ярашмас ҳеч ҳам,
Ол кўздан, ҳуснингта қадама тикан!

1959

АРИҚҚА БОҚИБ...

**О, ариқ, мен сенга қачон боқмайин,
Хамиша тилингда хушнуд қўшиғинг.
Биламан, қуйингнинг сирлари тайин,
Орзиқиб кутади сени ошиғинг.**

**Ошиғинг — гуллардир, бир эмас, минглаб,
Ҳар бири интизор кутар, соғиниб.
Ҳаттоқи, булбуллар мадҳини тинглаб,
Қолмайди йўлингни қутишдан тиниб.**

**О, ариқ, меҳрингта меҳримни қорсам,
Оҳ, ҳани, сен каби яшолсам буткул!
Сен каби куй ҷалиб, қувониб борсам,
Қаршилаб олурми мени ҳам бир гул??!**

1962

* * *

Дўстим кўплитидан ҳеч ажабланма,
Ев хушомадидан кўп ғазабланма
Ва кутма яхшилик тариқча лекин!

Беш бармоқ баробар, teng бўлса кошки,
Дўстларим юз эмас, минг бўлса кошки.
Душманнинг бири ҳам ортиқча лекин!

1962

МҰЙЫЖИЗА

Вужудимни титроқ босди,
Хаяжондан тилем лол.
Күзларимни ишқаб күрдим,
Тушимми, деб әхтимол.
Йүк, ҳақиқат! Ҳақиқатдир!
Ҳақиқатий мүъжиза!
Бу ҳақиқат қаршисида
Афсоналар гунг, изза!
Афсонани халқнинг ўзи
Яратганди бир маҳал,
Бугун яна унинг ўзи
Бу жумбоқни қилди ҳал!
Инсон ақли! Инсон ақли —
Қуёшдан ҳам нурлидир.
Шоир бўлсанг сўз конингдан
Тасвирига дур қидир!
Инсон боши кўкка етди,
Ердан узуб оёғин.
Фазоларда силкиб ўтди,
Тафаккурнинг байробин!
Бу лаҳзани ғойибона
Кўрган эди Ленин ҳам,
«Аврора»нинг илк залплари
Мағрур нидо берган дам!
Инсон боши кўкка етди!
Қандай шараф, тантана!
Оёғингта бошим қўйиб,
Дейман: — Раҳмат, эй она!

Она-Ватан! Сенинг меҳринг
Фарзандингта қанотдир.
Сенинг меҳринг мўъжизадир,
Сенинг меҳринг ҳаётдир.
Мард Гагарин ер юзидан
Оёқ узуб кетганда,
Афсонавий бўш фазонинг
Меҳварига етганда,
Ўзинг эдинг йўлларида
Машъал бўлиб ёнган нур.
Ўзинг эдинг мардлигига
Айтиб турган ташаккур!
Ўзинг эдинг мададкори,
Ўзинг эдинг йўлдоши,
Фақат, фақат сен туфайли
Бўлди қуёш элдоши!
Адаштирмай таниб турди
Фазода ҳам ерингни:
Улкан дарёнг, кенг ўрмонинг,
Богу роғинг, қирингни!
Сенинг меҳринг соғ-саломат
Ерга уни қўидирган.
Сенинг меҳринг юрагида
Мардлик ўтин ёндирган.
Фазо энди бўшлиқ эмас,
Гагариннинг изи бор.
Изи эмас, сўзи эмас,
Мард инсоннинг ўзи бор!
Қандай баҳтки, Гагаринга
Ватандошман ва ўртоқ.
Ватандошлиқ шавқи билан
Буғун қалбим бўлди төғ!
Вузжудимда ғурур кезар,
Кўзларимда ҳаяжон.
Магурлансам ҳаққим бордир,
Ажабланма, эй жаҳон!
Биз иккимиз бир байроқни
Маҳкам тутган элатмиз.
Нақ бир данак ичидағи
Қўш мағиз — ялакатмиз!
Донгимиз бир, тонгимиз бир,
Бирдир ёруғ юлдузи.

Бир тупроқдан озиқ олган
Иқболимиз илдизи!
Фикру, зикру ўйимиз бир,
Бир дараҳтнинг баргимиз.
Бир кечада туғилгандир,
Бахт-саодат, эркимиз!
Шундан бери ўртамизда
Неъмат тўла дастурхон!
Ҳавас қиласанг арзир сен ҳам
Бу қисматга, эй жаҳон!
Яша, дўстим, асрдошим,
Ўлкадошим Гагарин!
Севинчимдан кўкда бошим,
Елкадошим Гагарин!
Яша! Яша, афсонавор
Умринг бўлсин пойидор.
Жумла-жаҳон сенга қойил,
Хизматингдан миннатдор.

12 апрель, 1961

СЕНИНГ БАЙРОФИНГ

**Кўз очиб дунёга келганим замон
Бошимда мен сенинг байрофинг кўрдим.
Қайтадан яшариб бу кўҳна жаҳон,
Ҳукмдор болға-ю, ўроғинг кўрдим.**

**Байрофинг йўлимда мададкор бўлди,
Истиқбол уфқига боқдим мардона.
Музaffer маслагинг меҳри ёр бўлди,
Ҳар ишда ҳужумкор бўлдим мен яна!**

**Бахт излаб кезмадим ўлкама-ўлка,
Бегона эшикка урмадим бошим.
Бошимда бўлмади қора кўланка,
Дийдамдан оқмади қонли кўз ёшим.**

**Ҳар куним бахт туғиб, қуёшдек балқди,
Ҳар куним бахтимга бўлди бир зина.
Кўнглимда севинчим денгиздек қалқди,
Ҳар йилим тенги йўқ буюк хазина!**

**Сув десам, йўлимда қайнади булоқ,
Нур десам, офтобининг ўзи боқди тик.
Бахт десам, истиқбол тонглари порлоқ,
Ҳар куним уфқига кўз солдим тетик.**

**Байрофинг бошимда турди ҳилпираб,
Кўзимни нуридан олмадим бир дам.
Умидим манзили яна ярқирааб,
Яна ҳам гўзалроқ кўринди олам.**

Эсимни танибоқ, ундан парча деб,
Лоладек бўйинбоқ тақдим қувониб.
Навбаҳор ўлкамга ёйганида сеп,
Бағрида яйрадим янада қониб.

Қонимда йигитлик кўпирган йилда
Итвачча Гитлернинг ҳужумин кўрдим.
Ғазабим жўш уриб бу оташ дилда,
Байроғинг остида мардона турдим.

Жанг қилдим байроғинг ҳаққи-ҳурмати,
Жанг қилдим навқирон умримни тикиб.
Ҳаттоқи, ажалдан қўрқиб турмади
Ленинча ёшлигим тиззасини букиб.

Үлимлар ўлди-ю, у қолди тирик,
Яшашга туғилган асло ўлмайди!
Ким ўлим кўзига қарай олса тик,
Энг оғир дамда ҳам шошиб қолмайди.

Бу жангдан қайтмадим ҳориб-толиқиб,
Яна ҳам маҳкамроқ тутдим байроғинг!
Мамлакат қалбида қон бўлиб оқиб,
Яна ҳам кўркамроқ қилдим юрт богин!

Шу байроқ қўлимдан мангу тушмайди,
Шу байроқ ёвимга доим бешафқат.
Уч ўғил, бир қизим маҳкам ушлайди,
Оталиқ меросим унга шу фақат.

Аминман, бу байроқ улар қўлидан
Неварам-чеварам қўлига ўтар.
Шу байроқ бошлаган ҳаёт йўлидан,
Башарнинг музаффар баҳт тонги отар.

Ҳилпира, эй байроқ, Ленин байроғи,
Рангингда менинг ҳам тоза қоним бор.
Бахтиёр қалбимнинг ёниқ чироғи
Сендан нур олмоғи билан бахтиёр!

Ҳилпира, ҳилпира, эй шонли байроқ!
Нурингдан муниаввар яқину йироқ.

1962, Андижон

СЕН БАЪЗАН...

Сен баъзан ёшимни сўраб қоласан,
Баъзида бошимга тикиласан жим.
Сочимнинг оқидан ўйга толасан,
Ҳа, рост-да, ёшлиқни ким севмайди, ким!

Балқи сен ўйларсан: бевақт тушган оқ
Кўнглиниг армони, умрининг доғи.
Рост айтсам, эй дўстим, ҳеч ўқинчим йўқ
Ҳамиша тип-тиниқ кўнглим чироғи.

Дейдилар, у менга ярашар эмиш,
Майлига, ҳаттоки, ярашмаса ҳам.
Оқлиги кўнглимга солмайди ташвиш,
Оқлигин гашти ҳам ёзи бир олам!

Гар сочим қорасин кўрмоқ истасанг,
Уч ўғил, бир қизим бошларига боқ.
Сен менинг бошимдан излаганинг ранг
Уларнинг сочида ёнади порлоқ!

Мен улар қалбига нур бўлиб кириб,
Умрини умримга пайванд қилганман.
Сочимнинг қорасин уларга бериб,
Оқини ўзимга олиб қолганман!

27 май, 1962

ИШҚИНГДА ЁНИБ...

Ишқингда ёнмасам ўртаниб-куйиб,
Ҳаётнинг мунчалик завқини туйиб,
Тилимга қаёқдан келарди қўшиқ.

Ишқингда ёнмасам, бу кўҳна олам:
Шу сойим, шу қирим, паҳтазор далам
Бўлмасди мунчалар кўркам, ярашиқ.

Ишқингда ёнмасам, жонимдан кечиб,
Жангларда душманинг емириб, янчиб,
Диёrim, меҳрингни шон билармидим.

Ишқингда ёнмасам, дарёдай тошиб,
Хар ёзу қишингга гулдек ярашиб,
Васлингга энтикиб, ёр, елармидим.

Ишқингда ёнмасам, ёrim, диёrim,
Уч пулга қимматдир борлиғим, борим.

1962

ЎЗИМ, ОНАМ ВА ШОГИРДЛАРИМ ҲАҚИДА

Гап сочнинг оқида бўлса мабодо,
Бобо деб чақирса бўлади мени.
Кексалик қуналарни қилсан-ку ато,
Бу ёшлик минг кўйга солади мени!

Уч ўғил, бир қизим тарғил лоладай,
Борлигин сездириб турар шўхлиги.
Уларга қўшилиб баъзан боладай,
Үйинга тушаман — қўнглим тўқлиги!

Ада деб чақириб қолмаса бири,
Унугтиб қўяман оталигимни.
Билмадим, нимада ёшликтининг сири,
Нимада ҳис этай катталигимни.

Барибир шунда ҳам шогирдларим бор,
Устоз деб кафтида тутишар сийлаб.
Уларни ижодга қайириб, бийлаб,
Эҳтимол қилганман мамнун, миннатдор!

Чиндан ҳам ўсмирмас, ўрта ёнданман,
Элликниң эшигига қоқиб турибман.
Шоирлар саналса кўзу қошдаман,
Ҳисобга тер тўкиб ҳалол кирибман!

Кексалик ўзига яхши ярашган
Нуроний, мўътабар азиз онам бор.
Ўн саккиз набира севган, қараашган,
Бир ўғил, уч қизл амрига тайёр.

Етилган бошоқдай бошимни эгиб,
Қошида сақлайман мен ҳам итоат.
Ҳосилин йигғандир нимаки экиб,
Нимага тер тўккан ҳар кун, ҳар соат...

На сочу кексалик қўрқитар мени,
Бобо ҳам десангиз рози бўламан.
Онамнинг наздида ҳамон боламан,
Ҳамон у болам деб чақирад мени!

1962

СЕВГИНГ КЎЗИНГДА

Мен сени биламан: севгинг кўзингда,
Бир ерда ҳали ҳам топмаган қўним.
На чақнаб ўт қолур босган изингда,
На бири ўртаниб дейди: — Кел, жоним!

Ҳар қизга ошиқсан бир бор кўргандан,
Ҳар қизга қалбингни қиласан эъзоз.
Севгингни ҳаммага сочиб юргандан,
Ҳаммасин бир қизга йигиб берган соз!

1962

ЁШЛИК БИЛАН ХАЙРЛАШУВ

Мен бундоқ қарасам куз келиб етиб,
Үтиб боради.
Булутли осмонда қушлар саф тортиб,
Кетиб боради.
Шу қушлар сингари сен ҳам, ёшлигим,
Қалам қошлигим,
Умримнинг боғидан ўтиб борасан,
Кетиб борасан.
Қушлар-ку қайтади келаси баҳор,
Сен эса зинҳор!
Лекин бир илтимос: қай боғга қўнсанг,
Меҳрига қонсанг,
Уни ҳам мен каби мангу рози эт,
Мангу рози эт!
Алвидо, гул ёшлик, минг-минг ташаккур!
Мангу ташаккур!

1962

АЙВАЗОВСКИЙ ФОНТАНӢ

Қримдаги Феодосия шаҳрида рассом Айвазовский ташаббуси билан 1884 йилда қурилган жўмракли фонтанга.

Оқ, фонтан, сувларинг тансиқдир, тансиқ,
Оқ, куйлаб, мисоли кумуш кўнгироқ.
Атрофинг бир гулдор дастурхон — ёзиқ,
Дастурхон устида ўзингсан чироқ.

Гўё сен такрорлаб турасан доим
Рассомнинг номини ширин тил билан.
Ширин тил суҳбатин ким севмайди, ким,
Суҳбати боргандা сахий дил билан!

Сахийсан, ширинсан, оби ҳаётсан,
Бир ҳўплаб кўрганинг меҳри қонади.
Қирлардан, тоғлардан учган қанотсан,
Аксингда Қримнинг ҳусни ёнади.

Бир томчинг қуёшда қалқиб турганда,
Минг гавҳар жилvasи бекордир, бекор!
Юзимга сен қиздек нафас урганда,
Керакмас боғ ошган насими баҳор!

Чининг айт, эй фонтан, ўзинг нимасан,
Елларнинг суҳбати, чечак исими!
Сен мунча сеҳрни кимдан әмасан,
Кўксингга нур қуйган Қрим қизими!

Мен әнди англашим, ҳар дилга ёққан
На гуллар шарбати, қирлар сеҳридир.
Бу гўзал фонтандан туну кун оққан
Барҳаёт рассомнинг эзгу меҳридир!

1962, Феодосия шаҳри

ҚРИМ ОҚШОМИ

О, Қрим оқшоми, Қрим оқшоми,
Бунчалар юмшоқсан, бунчалар майин!
Май қилиб тутаркан табиат жоми,
То умрим борича қониб ичайин.

Қирғоқда ўтирсам Қора денгизнинг
Минг йиллар эртагин шивирлар ҳамон.
Гүё дер ёнингда ўтирган қизинг
Қошимда яйрасин, кулсин беармон.

О, дengiz соҳилин сирли қучоги,
Минг-минглаб севгининг сенсан гувоҳи.
Қанчалаб юракнинг ёнса чироги,
Қанчалаб севгининг бунда «эвоҳи».

Бирини улуглаб, бирин овутиб,
Сен ҳамон севгидан эртак айтасан.
Сен ҳамон тун қўйинин муздай совутиб,
Эрталаб ўт салом олиб қайтасан.

Тун сокин, сен сокин.
Бахмал тўнингда
Бир садаф тугмадир кўкдан боққан ой.
Шу садаф тугмали илиқ қўйнингда
Кашф этар ҳар лаҳза ўзга бир чирой!

Бошқа бир тунинг ҳам эсимда, Қрим,
Автомат қучоқлаб ётганман бунда,

Бу ўша қирғомим,
Бу ўша ерим,
Ой хунук кўринган ҳу ўша тунда!

Ойда не гуноҳ бор!
Бизни кузатган
Душмандан яна ҳам писиб юрганман.
Ойингни кўзимга хунук кўрсатган
Ёвингни ўзим ҳам тоза қиргандан.

Бугун-чи! Ўша ой,
Ўша шум қиргоқ,
Кўаимга ўзга бир жило беради.
Шу ерда бош қўйган шинелли ўртоқ,
Шу бугун тушимга албат киради.

Эй, шинель кафани бўлган ўртогим,
Сен севган, орзуманд тунингни кўрдим.
Номингни такрорлаб,
Эзилиб бағрим,
Бошингда ёш тўкиб бош яланг турдим!

Эҳ, Қрим оқшоми, сурма ранг оқшом,
Сен бугун қанчалик сокину кўркам.
Гўёки қалқимас шодлик тўла жом,
Гўёки жанг бунда бўлмаган бир дам!

Кел, шу тун гаштини сурайлик, эркам,
Шу тунги денгиздек бўлгил хотиржам.
Бизлардек барча қалб қовушса маҳкам,
Ой хунук кўринмас жаҳонда ҳеч ҳам!

22 июль, 1962, Қрим

КҮКТЕБЕЛ

Кўктебел! Кўктебел — илҳом қучоги!
Сен менга бир даста шеър бахш этдинг.
Мунча ҳам нурбахшсан шоир чироги,
Кенг Дунай бўйларин бутун ёритдинг!

Мен сенда илҳомга тўлиб туну кун,
Унугиб қўйибман дам олишни ҳам.
Ижоди гар бўлса куз каби тўкин,
Шу ўзи шоирга энг аъло бир дам!

Кўктебел!² Мен сенга Ахалцихедек³
Жой бердим кўнглимнинг юксак тўридан.
Паловга дамланган нордон беҳидек
Софиниб боқаман она-Еримдан.

Денгизнинг тўлқини қалбимда кетди,
Кундузинг баҳаво,
Тунинг бебаҳо!
Ойдининг кўнглимга севги беркитди,
Елғондир десалар:
— Ҳаёт бебаҳо!

¹ Шоир шу ерда ёзган «Дунай соҳиллари» номли шеърий туркумини кўзда тутади.

² Кўктебел — Қўнимдаги бир қишлоқ, Қора денгиз бўйида. Бу ерда «Ижод уйи» бор.

³ Ахалцихе — шоир «Кавказ дафтари» номли шеърий туркумини ёзган, Грузиядаги кичик ва сокин бир шаҳар.

Бу ҳаёт қуёшдек кўксимга тўлиб,
Сел бўлиб дилимдан қуишиб келди.
Гоҳ ёвдек хўмрайиб,
Гоҳ қиздек кулиб,
Бу илҳом қурмағур уюлиб келди.

«Илҳомнинг вақти йўқ!» — деганлари рост,
Меҳнату курашдир илҳомнинг ўзи!
Илҳомдир интилиш, севги, эҳтирос,
Илҳомдир нафрат, ўч, изтироб кези!

Жаҳоннинг ташвиши шоир қалбидаги
Симобдек ҳамиша қалқиб туради.
Нафаси камолот, кураш уфқида
Улугвор маёқдек балқиб туради!

Шоирнинг юраги ўтдек ёнмаса,
Тафтидан баҳраманд бўлади ким ҳам!
Тафтидан баҳраманд бўлиб қонмаса,
Китобхон дер албат: — Барҳам топ, барҳам!

Кечиргил, ўқувчим, жиндай ўт бўлиб,
Мусаффо руҳингда йилт этсам, кошки!
Бир даста гул ичра қиёқ ўт бўлиб,
Гулдонда диркиллаб бўй отсам, кошки!

Имконим, ўқувчим, сендан бекитсам
Китобим иста йирт, иста ерга ур.
Шоирлик бурчимни ўтамай кетсам,
Қабримнинг тошлари ўт олиб ёнур!

Кўктебел! Кўктебел! Илҳом қучоги!
Сен менга бир даста шеър баҳш этдинг!
О, дengiz қирғози — илҳом үчоги,
Бир ёниқ умиддек кўксимда кетдинг.

1 август 1962, Крим, Кўктебел қишлоғи

ЯХШИ ҚОЛ, ҚОРА ДЕНГИЗ!

Яхши қол, эй денгиз, учқур тўлқинлар!
Яхши қол, тоғларга туташган соҳил!
Яхши қол, сув узра сочиқ ёлқинлар,
Тонгда заб гўзалсан, кечқурун сархил!

Мен сенинг бағрингга узоқдан келдим,
Номингни сўрголаб, эй, Қора денгиз!
Ер қолиб осмондан ютурдим, елдим,
Мехрингни ардоғлаб, эй, Қора денгиз!

Соҳилда бир нафас ўтирганим он.
Тўлқининг чарчоғим олиб кетдилар.
Кўнглимга келтириб бир олам жаҳон
Ажойиб илҳомлар солиб кетдилар.

Қирғоқча сочганинг тошларга боқсам,
Сен ўзинг бекиёс наққош экансан.
Бунчалар ранг-баранг, чиройли десам,
Ҳар бирин пардозлаб, безаб ювгансан.

Ҳар бири бир тарих сўйлаши мумкин,
Саргузашт китобга зўрга сигади.
Ҳар куни Фикратим¹ саралаб секиц
Ажойиб эсдалик дея йигади!

¹ Фикрат — шоирнинг ўғли.

**Биламан: кўрсатиб ўз дўстларига,
Ў сенинг ҳақингда эртак айтади.
Эҳтимол узоқда, сендан нарида
Янги бир денгизчи куртак отади.**

**Юр, ўғлим, ҳозирча, соҳилга юр,
Ўзингни чапакли тўлқинларга от,
Ҳайиқма зарбига доим тайёр тур,
Бетиним денгиз ҳам мисоли ҳаёт!**

**Мен сени хонага қўйилган гулдай
Пуф-пуфлаб сояпар қилмадим сира.
Соҳилда ястаниб ётгандан гулдай,
Тўлқинлар қўйнида қийналган сара!**

**Бу ҳаёт денгизин нақ ўпқонидан
Саломат, барҳаёт чиққан отангман.
Юр, ўғлим, тўлқиннинг ўтма ёнидан,
Тўлқинда яшасанг — ҳаётинг чаман!**

**Тўлқинлар! Тўлқинлар! Учқур тўлқинлар
Мен сизга ҳамиша дўсту ёр, ўртоқ!
Яхши қол, эй, денгиз, чайка, оққуввлар,
Яхши қол, синашта, оромбахш қирғоқ.**

**Бағримда чайқалиб кўпириб кетган
Сенинг тўлқинингдир, эй, Қора денгиз!
Қалбимни ўзига мангу банд этган
Сўлим қирғогингдир, эй, Қора денгиз!**

Қrim, 1962

ШАМОЛ

У баргларни юлқиб ўтади,
Пардаларни қилар пирпирак.
Майсаларни бир-бир титади,
Гўё унга нимадир керак!

Баъзан кўкка чиқиб, булутни
Подачидек ҳайдаб қолади.
Баъзан чўпон ёққан қўр-үтни
Елпийман деб алдаб қолади!

Хуштак чалиб баъзан эшикдан
Аллакимни имлаб кетади.
Гулзорларни кезиб, ошиқдай
Ҳар гулга бир арzin айтади.

Сокин турган кўлнинг бетига
Жимир-жимир танга сочган у.
Деразанинг қўша қатига
Ўзин уриб, бирдан очган у.

Баҳорни ҳам у уйғотади,
Қулоғидан тортар гиёҳни.
Шоирга ҳам ручка тутади,
Гунафшадан сиқиб сиёҳни!

1962

ЭНДИ СЕН ЙИГЛАЙСАН...

Энди сен йиглайсан аччиқ ёш тўкиб,
Қудуққа ташланган тош каби чўкиб.
Энди сен йиглайсан айҳаннос солиб,
Гўёки улкан тош остида қолиб.
Гўё сен нотавон, маъюс, ғариссан,
Аламда қоврилиб, бевақт қарибсан.
Гўёки бу кўжна дунё бебақо,
Инсонлар жоҳилу бадбахт, бевафо.
Энди сен йиглайсан,
Йиглайсан аччиқ.
Майли, сен ув тортиб саҳроларга чиқ,
Майли, сен ёқсанг йирт, соchlaringни юл,
Майли, сен тақдирни масхарала, кул!
Бу ёшли кўзларинг қаерда эди,
Виждонинг олдида нималар дерди:
Бировнинг эрини тортқилаб олиб,
Эркалаб, ачомлаб, минг кўйга солиб
Богма-бог хилватда санқиб юрганда,
Хар кечака тонгтacha базм қурганда,
Инсофу виждонинг қаерда эди!
Танишу билишинг нималар деди;
Хотини чинқириб келган чогида,
«Тинч қўй!» — деб илтимос қилган чогида,
Икки қиз, бир ўғлим тирик етим деб,
Ўзим ҳам ёшиликда етим эдим деб;
Дада, деб жавдираф турганда қизи,
Еш билан лиқ тўлиб иккала кўзи!
Шунда сен: «Бу — севги!» — дединг-да қулиб,
Йўлингта жўнадинг ўйноқлаб, елиб.

Гүё сен севгига мубтало эдинг,
Гүё сен севгининг ғамини единг!
«Икки қиз, бир ўғлинг ўзинг боқавер,
Мен уни севаман, уни менга бер.
Мұхаббат умрда бир бор берилур,
Севгида ёнган қалб ҳақли керилур!»—
Дединг-да, кеккайиб юрдинг бепарво,
Гүё сен севгининг қиласындағы вафо.
Аслида сен севги атаган нарса,
Күйларга күтариб мақтаган нарса
Севгимас пул эди, түшак ва безак,
Гүёки девордан ушалган кесақ.
Сен энди йиглайсан ҳақ жойин топса,
Құрт тушган бутоқни бешафқат чонса!
Үйнашиң қайтганда таъзирини еб,
Үз уйим, үз жойим, бола-чақам деб.
Уни ҳам мен оқлад демайман, балли,
Құчада учратиб, бериб тасалли.
Уни ҳам юз оxaнг, минг күйга солған,
Ақлини кишиннелі, ҳүшини олған,
Бошига қадаган сохта тикан тоғ,
Бу ифлос денгиздә оттирган қулоч,
Хүроздек кеккайиб, түқ кекирирган,
Хар кече маст қилиб, бир бўкирирган,
Харомдан топилган жиққа пул эди,
Гүёки қўлида қоғоз гул эди.

Ҳаммаси тугади!
Тугади «даврон».
Қатиқдан из қолур, айрон-чи — айрон!
Туш кўрган кишидек айрончи ҳайрон.
Жамоат ҳақлидур, унга фидо жон;
Ҳаромхўр, гўсхўрга келгуси қирон!

Сен энди йиглама,
Тақдирга тан бер.
Эл юрган кўчадан кўп қатори юр.
Ҳаётнинг тотидир меҳнат, поклик, тер,
Ўқинма, умрингни тўғри йўлга бур!
Нафсинг тий, тайёрга югурма чопиб,
Шириндир қора ион, гар ўзинг топиб,
Тер билан оғзингга олсанг, чайнасанг!
Лаънат дер элу юрт яна айнасанг!

1962

ОНА ТАШВИШИ

Балх тут остида ўтириб она,
Эрмакка зерикиб дўппи тепчийди.
Тўкилган тутларга қушлар парвона,
Шапалоқ сояда хамир кепчийди.

Тиззада дўпписи, қўлда қатими,
Кўзида эридан қолган кўзойнак.
Анави чағнаган гулхан ўтими
Ва ёки қуёшда қолган мис чойнак!

Баъзида чумчуқлар недир талашиб,
Бир-бирин қувлашиб, чўқишиб қолар.
Онанинг фикрида ўйлар қалашиб,
Кўнглини қўймасдан не ҳолга солар.

Умиди, давлати биттаю битта
Кўзининг оқио қораси фарзанд.
Шу ўғлин тақдиди унинг, албатта,
Хаёлин қиласи эртаю кеч банд.

Оҳ, қани, у энди уйлана қолса,
Набира юзини кўрса бечора!
Ўғлига келиндан қачон гап солса,
Вақт бор! — дейди-ю, топади чора.

Эркалаб пуф-пуфлаб ўстирса ҳам у
Арзанда фарзанди ёмон чиқмади.
Етимлик устига орттириб қайғу,
Эрта-кеч талтайиб қалбин сиқмади.

Топиши тутиши бир йигитча бор,
Еш кетган отасин босди изини.
Кексалар сўзига қилса эътибор,
Ешларга ўтқизар одил сўзини!

Она-чи, сояда ўтириб ёлғиз
Ахтарар ўзича келинликка қиз!
Яқину йироқни солади чўтга:
Ким бермас қизини шундай йигитга?

Ойниса яхши-ю, тили қурғур тез,
Фарқига бормайди катта-кичининг.
Е келин қилсинми Саври пучуқни,
Узи ҳам уй боп-да, тоза саҳархез.

Муборак кўҳлигу қовоғи қалин,
Тушгача донг қотса қўшнидан уят.
Ўғилой кампирнинг кенжা Мисқолин
Мақтовори тилдаю, паст бўйроқ фақат.

Соч деган Қумрида — тақимни ўпар,
Кўчани тўлдириб юрар ўзи ҳам.
Лекин иш десанг у сояга чопар,
Келиннинг ишчани жонинигта малҳам!

Карима чевару, саводи камроқ,
Етар, бас, мен ўзим саводсиз ўедим!
Қўзининг қизи-чи! Гапдон, қақилдоқ,
Патефон келинми бир каму кўстим!

Иш қилса Тўтининг қизи қилса-ю,
Дуторни Соттининг Ҳуриси чалса!
Ишидай дуторни черта билса-ю,
Дутордай ишинингни қўлингдан олса!

Афсуски, биттаси гапу сўзда йўқ,
Биттаси шўх, эрка ва ўйинқароқ.
Назмидай пазанда уруг-хешда йўқ,
Сал судраб босади оёғин бироқ...

Барчасин фикридан ўтказар она:
Биттаси семизу биттаси новча.
Биттаси ориғу бири пакана,
У бирин елкаси чиқиқроқ пича!

У бирин кўзи кўк, у бири хум бош
У бирин киприги қисқа ва сийрак.
У бирин қоплари қалину туташ,
(Туташган қош яхши бўлмаса керак!)

У бири бўтакўз ва кампирдаҳан,
У бири салмоқлаб, хунук юради!
У бирин энгаги бўртиброқ чиққан,
Дейдилар: «Ёши ҳам ўтинқиради!»

Ҳар таниш қизини бирма-бир кўзлаб,
Биридан нуқсону ибрат топади.
Бирига майлини мажбуран тезлаб,
Бирига сигмасдек кўринар ҳадди.

Охири дейдики, «манглайи билар»
Ишқилиб, инсофу иффатли бўлсин.
Олтмишдан ўтганда бир келин қиласар,
Дўст-душман олдида ибратли бўлсин!

Эй, она, сен ортиқ ташвишга тушма,
Ўйма-уй юрмайсан қиз кўриб, ҳориб.
Биридан қувониб, биридан зориб,
Бекорга ҳар қизга бир нуқсон қўшма!

Ўғлингнипг ишқ қўйиб танлагани бор,
У сенинг мушкулинг осон қилгандир.
Юлдузи юлдузга тўғри келгандир,
Лекин у ҳозирча бир сирри-асрор!

Сен, она, ҳозирча сабр қил, сабр,
Уларнинг ўз иши, режалари бор.
Сен учун бўлса ҳам бари алжабр,
Охири бўлурсан албат миннатдор.

Келинга албатта ёлчийсан, она,
Ўғлингнинг дидига қоласан қойил.
...Қара-я, хамиринг ошибди, ана,
Нонинг ёп, ишидан қайтар Исмоил!

ЎФИРЛАНГАН ЎРАҚ

Бир неча ўғил-қиз йигилиб кеча
Қизил гул сайлида кездик кун бўйи.
Қулф урган ҳар чечак, ҳар гул, ҳар гуна —
Қошида капалак, ишначи тўйи!

Эҳ, ёшлик монанди яшнаган баҳор,
Мунчалар дилрабо, мунча сахийсан.
Ёшликдек сен ўзинг эркин, бебаҳо,
Тоғларда сакрашиб юрган оҳусан.

Богларда ўйнасанг, ярашигинг бор,
Тинч-сокин қалбларга соласан ғулув.
Сен ўзинг бўёқсан, ўзинг санъаткор,
Сен ўзинг расмда тенги йўқ сулув.

Эҳ, сенинг қўйнингда қизил гул сайли
Қанчалар кўнгилли, қанча соз ўтди!
Неча ёш умрнинг кўнглиниңг майли
Гулларнинг қатига сирин бекитди!

Эртаси қўксимга қарасам: бўм-бўш,
Қалбимни ўғирлаб қолибди кимдир!
Эҳ, сени танидим, ўғри, қаламқош,
Умрбод мен сени янисб юргумдир!

Шоядки, ўғирлаб олган қалбимни
Бир умр ўзимга қайтиб бермасанг.

**Бир умр ташвишда қолган қалбимни
Үгирлик деб айнаб, ерга урмасанг!**

**Яна бир илтимос: шу ўгирликни
Бошқа бир одамлар билиб қолмаса,
Таъна қилмаса!**

1962

СЕВГИ ИЗТИРОБИ

Севгини шодлик деб хато тушуниб,
Қалбимни измига берибман у чоқ.
Шу куни щўхлигим тўлқини тиниб,
Үрнини алмашди ўйчанлик, фироқ.

Мен энди англасам: соф севгининг ҳам
Ўз дарди, ташвиши, ғами бор экан.
Бир даста гул бўлиб боқса ҳам олам,
Баъзида кафтингга ботаркан тикан!

О, севги гуссаси — ширин изтироб,
Тун бўйи қўзлардан уйқу қувасиз.
Ҳаттоқи тунда ҳам порлатиб офтоб,
Баъзида ёш билан юзни ювасиз.

Барибир мен сизни севаман жондан,
Барибир сиз менинг бору йўғимсиз.
Айрилсам айрилай жону жаҳондан,
Лекин ҳеч япилмам сиз эзгу ғамсиз!

Қанчалик аламли бўлманг, барибир,
Ҳар қандай шодликдан аълосиз, аъло.
Сиз ёруг дунёда мўъжиза ва сир,
Сиз мангуда туби йўқ маъно!

Севгини шодлик деб янгиш тушуниб,
Хатога йўл қўйган бўлсан ҳам у чоқ,
Армону ўқинчим йўқ бугун, бироқ!

1962

САДОҚАТ

Сен менинг кўзимга термилиб туриб,
Қалбимни китобдек ўқисанг ҳам, ёр,
Баъзида минг турли сўроқлар бериб,
Қилмоқчи бўласан тилимдан иқрор.

Не чора! Шоирнинг қалби шеърида,
Шеърида сир сақлаб, ёлғон айтмайди.
Шеърида айтганин, ҳатто гўрида
Турғизиб сўрсанг ҳам асло қайтмайди.

Бу ҳаёт нақадар ҳузурбахш жонга,
Нақадар фусункор, нақадар кўркам.
Ҳаммаси беқиёс! Лекин жаҳонга
Биргина сен учун келганман, эркам!

1962

ЭШИГИНГ ТУБИДА...

Кел!

Сен келсанг, гўзалим, кўнглим тоғ бўлур,
Сен келсанг, тилим ҳам бўлади бийрон.
Сен келсанг, ҳамиша, эй меҳри жаҳон,
Бу шоир юрагим бир булоқ бўлур.

Айт десанг, айтаман эркин, bemalol
Минг-минглаб эртаклар токи субҳидам.
Ва лекин эшигинг тувида, эркам,
Хайр демак мен учун кўп амримаҳол!

1960

Х А Т

Сен менинг хатимни йиртиб ташлама,
Бир четга ҳозирча яшириб қўй, ёр.
Ҳозирча сен қанча куйиниб тошма,
Довуллар сўнгидага сокин кунлар бор.

Сен шунда хатимни олиб ўқисанг,
Билурсан қалбимнинг қанчалик дарди!
Бундай хат ёзади йигитнинг марди!
Майлига шундан сўнг нима ҳам қилсанг!

Хоҳласанг ўтга от, хоҳ йирт — ихтиёр,
Ва лекин ҳозирча яшириб қўй, ёр!

1962

ҲАЛИ ҲАМ ЎШАСАН...

Мен кеча альбомим варақлаб туриб,
Бир кичик расмингга қўзларим тушди.
Кўзларим тушди-ю, хаёл чарх уриб,
Биз юрган боғларга қуш каби учди.

Расмингга термилиб қолдим кўп узоқ,
Ўша кўз, ўша қош, ўша гул дудоқ.
Эркимни боғлаган ўша чилвир соч
Кўксингда тўлганиб ҳамон дейди: — Қоч!

Ўттиз йил ўтибди шунга ҳам дарров!
Гўёки йилларни ўғирлаб бирор
Қўйл етмас олисга қўйиб кетибди,
Орага чуқур жар ўйиб кетибди!

Дейдилар: — У чилвир соchlаринг оппоқ,
Кўзларинг ёнмасмиш аввалдек порлоқ.
Дудогинг лаълиси ўчганмиш пича,
Юзларинг эмасмиш қип-қизил кулча!

Йўқ, ҳеч ишонмайман, ёлғондир, ёлғон!
Ҳали ҳам сен — ўша,
Ўшасан ҳамон!
Ўшасан ҳали ҳам: ўн саккиз ёшлик,
Ол дудоқ, чилвир соч, қайрилма қошлиқ!

1962

КЕТ ДЕМА!

Жуда ҳам кет дема севган кишингга,
Севган дил сингари нозик дил бўлмас.
Чақирсанг келмасман кейин қошингга,
Кейин кел демоққа сенда тил бўлмас.

Кет десанг кетаман ёқамдан туттагач,
Бунчалар бераҳм бўлмасанг, эй қиз!
Лекин айт, азизим, мен жўнаб кеттагач,
Сен қандай яшайсан бир ўзинг ёлғиз!

1962

БЕШАФҚАТ ТАҚДИР

Қизингни етаклаб чиқдинг қошпимдан,
Үглимни етаклаб келардим мен ҳам.

— Бу кўзни ўғирлаб олдинг, ҳой, кимдан?—
Деб аста қизингта савол ташласам,
Қизариб кетдингу ерга қарадинг,
Бурнингнииг устига тошди реза тер.
Бу кўзнииг эгаси асли сен эдинг,
Дадаси дебди-да : — Қизингта ҳам бер!

Гапимга тушундинг,
Үглимга боқиб:

— Шунча ҳам қош қуюқ бўларми?— дединг,
Қуралай кўзингни менга қададинг,
Дегандай сўзимни олдингми уқиб!
О, тақдир бўлмаса шунча бешафқат,
Сендан кўз, мендан қош жамулжам топиб,
Ёшликнииг нуқсонин фазилат ёпиб,
Тантана қилмасми эди муҳаббат!

1962

СЕНИ ЭСЛАТДИ...

**Сен севгим рад этиб кетгандан буён
Неча қиши, неча куз, неча ёз ўтди.
Қалбимда тұлқындең ухлаган армон
Шу кече құйққисдан бир қалқыб кетди.**

**Хаёлинг тун бүйи бўлиб намоён
Ярамни тирноқлаб яна бўзлатди,
Шу кече экранда нозли бир жонон
Чиройли бир кулиб, сени эслатди!**

1962

ШОИР ОНТИ

Кўп узоқ сафарга чиққан сайёҳдай
Ҳар куним уфқида янги жилва бор.
Ҳар куним уфқида порлоқ маёқдай
Умидим манзили чорлайди бедор!

Илҳомим мевасин тут каби қоқиб,
Оқ қоғоз бетига теролсам кошкি!
Кошкийди қалбимни Данкодек ёқиб,
Илк сафда мардона боролсам кошки!

Эй, халқим, сен менинг вужудим, ақлим,
Меҳрингиз бир одим, бил, отолмайман.
Гар сени миннатдор қилмасам, халқим,
Ҳаттоки қабримда тинч ётолмайман.

1962

ТАЪНА ТОШЛАРИ

Шаънимга отилгани таъна тошлари
Охири йигилиб улкан тоғ бўлди.
Мен унинг устига чиққаним сари
Ғурурим ошди-ю, кўнглим чоғ бўлди.

Мен унинг устидан мағрур, тик боқиб,
Ҳаётим уфқини ёрқинроқ кўрдим.
Баримга илашган чанг-чунгни қоқиб,
Шу уфқи — манзилга мардона юрдим.

О, таъна тошлари, таънам йўқ сизга,
Сиз сабаб бўлдингиз, боқдим узоқроқ.
Ҳаётни қадрлаб чиқдим кенг изга.
Эй, умид! Машъалинг баланд тутиб ёқ!

Эй, таъна тошларин отган кишилар,
Сизни ҳам юрагим бугун олқишилар!

1962

ШОИР — МАШИНА ҲАҚИДА

Бир шеър тўлғоги қалбимни титиб,
Азоб ҳам, роҳат ҳам қоришган бир чоқ,
Қошимга келди-ю, гўё раҳм этиб,
Тасалли бермоқчи бўлди бир ўртоқ.

Дедики, кун келар, шеърларни ҳам
Машина бир зумда тўқиб ташлайди!
На унда чекарсан изтироб, алам,
На унда бўлади илҳомнинг пайти!

Эҳтимол шу сўзинг ҳақ чиқар, дўстим,
Машина кучига имоним комил.
Не завод-фабрика, қирларни кездим,
Машина ҳар ерда, ҳар ишга омил.

Лекин айт, азизим, шу машинангда
Бўлурми шоирнинг қайноқ юраги!
Гар қалби бўлмаса, совуқ шеърнинг
Айт-чи, айт, ҳеч кимга борми кераги?

1962

«БИР ШЕЪР БАҒИШЛА МЕНГА ҲАМ»

«Бир шеър бағишила менга ҳам,— дардинг,—
Шоирлик қизларни мақташми, фақат?»
Баъзидаги шеърларим ерга урадинг,
Баъзидаги битгунча қилмасдинг тоқат.

Рост айтсам, нимангни ёзишни билмай
Ҳамиша баҳона излаб қолардим.
Лекин бу ниятни сира тарқ қилмай
Баъзидаги яширин қалам олардим.

Барибир ҳеч нарса чиқмасди, дўстим,
Бу балки шоирнинг ишудлиги.
Сен билан бир кўча, бир уйда ўсдим,
Ишингда йўқ эди бирорта гидир!

Барибир ҳеч нарса ёзомагандим,
Қалбимда ётарди бўлиб бир армон.
Бир куни эшишиб бошим эгдим жим:
Фронтда бўлибсан мардларча қурбон!

Сен қилган илтимос шу ондан бошлаб
Мен учун бўлди зўр бир мажбурият!
Ҳар қандай изходий режамини ташлаб,
Шеър эмас, бир достон ёзаман албат.

Бу — шеърим умрингнинг давоми бўлур,
Эй, дўстим, сиёҳи ўз қонинг бўлур!

1962

ШОИРНИНГ ЎЛИМИ

Бу шоир юрагим юлдұздең сүниб,
Күзимга киригим пардаңек түшса;
Бу иссиқ вужудим муз каби совиб,
Юзимнинг шуғласи түзөндек учса;
Муз таним құчоқлаб меҳрибон онам
Бағрии ўртаса дод-фарёд солиб;
Чумчуқдең чирқиллаб бошимда болам,
Хотиним йигласа сочини юлиб;
Барибир мен ҳали ўлғаним йўқ, йўқ!
Ҳаётим косаси умидга тўлиқ.

Қағанга ўрашиб, тобутга солиб,
Кишилар олишса елқама-елка;
Дўстларим ўлимнинг дастидан нолиб,
Узатиб боришса сўнги бор йўлга;
Қора ер бағрига авайлаб қўйиб,
Устимга тортишса совуқ, нам тупроқ;
Дўсту ёр қайтишса ўртаниб-куйиб,
Бағрини қиймалаб айрилиқ, фироқ,
Шунда ҳам мен ҳали ўлган бўлмасман,
Сиз билан яшашдан четда қолмасман!

Қабримнинг тупроғи қуриб, сўнгидан —
Ёмғирда ўрнашиб, бир оз чўкса ҳам;
Баъзи бир дўстларим кўзи ўйгидан
Қош-кўзим сурати бир-бир ўчса ҳам;
Гўримни кағандек чулгаса илк қор,
Бошимда қаргалар қурса тантана;

Қайтадан нур сепиб келса-ю, баҳор
Қабримни безаса мисоли она,
Барибир мен ўлган бўлмасман асло!
Ўлганлар сафидан тутинг мустасно!

Қабримга экилган гуллар кўкариб,
Баргига қўйса ҳам тиллақўнғизлар;
Қошимга дўсту ёр қатнашдан ҳориб,
Кундан-кун кам бўлса шаънимга сўзлар;
Ез келиб, бошимда ўт ёқса қуёш,
Қовжираб куйса ҳам ўт-гиёҳ, тупроқ;
Совуқ куз елига беролмай бардош,
Устимга тўкилса сап-сариқ япроқ;
Шунда ҳам мен ҳали ўлганим йўқ, йўқ!
Ҳаётим косаси умидга тўлиқ!

Фарзандим улгайиб, анкетасига
Ўлган деб ёзса ҳам эти сесканмай;
Хотиним тасалли бериб ўзига,
Кийиниб чиқса ҳам кўча-кўйга шай;
Уйимга қўйилган мармар тахтадан
Номларим сиёҳдек учиб кетса ҳам;
Ҳаттоки онам ҳам кундамас, баъзан
Эсласа кўзига олмасдан сал нам;
Барибир мен ўлган бўлмасман асло!
Ўлганлар сафидан тутинг мустасно!

Китобим чанг босиб ётса ҳар ерда,
Китобхон қўлига олмаса бир бор;
Гўёки мўмиё қилингган мурда,
Танқидчи қилмаса унга эътибор,
Шу куни мен ўлган бўлурман, дўстлар!
Шу куни кўмилган бўлурман, дўстлар!

1962

ШЕЛЬР ҲАҚИДА

Шеърим, дунёга келдингми, шу он
Измимда қолма, қўй! Майли, ногаҳон —
Қўлимдан варракдек узилиб кетсанг,
Турналар сафига тизилиб кетсанг,
Шамоллар кетидан қувласанг, майли,
Булутлар қатида ивисанг, майли.
Майлига чақмоқлар тешсин кўзингни,
Майлига бургутлар ўйсин кўзингни,
Майлига қуёшга яқин борсангу
Бир парча мум каби эриб йўқолсанг.
Ва лекин қуёшни нишон олсангу
Қанотсиз қуш каби учолмай қолсанг,
Яхшиси бу дунё юзини кўрма,
Ёш тўккан шоирнинг кўзини кўрма!

1963

ДИАЛОГ

- Дунёда муқаддас севги нимадир?
- Бегона ташвишин ўз ғами билмоқ.
- Дунёда энг тиниқ кўзгу нимадир?
- Дўстларинг қалбига наззора қилмоқ.
- Нимадир дунёда энг аччиқ нарса?
- Онанинг фарзанди мурдаси узра
Соч юлиб, ўртаниб, тўккан кўз ёши.
- Энг метин нарса-чи?
- Унинг бардоши!
- Дунёда энг тотли хаёл нимадир?
- Севолган ёрингнинг висол онидир.
- Энг буюк инсоний иқбол нимадир?
- Она юрт тупроғин шараф-шонидир!

1965

ЙИҚИЛМА!

Гўдаклик чоғингда минг бор йиқилиб,
Минг бора қайтадан турдинг оёққа.
Аячанг бу ҳолдан қувониб, қулиб,
Парвозлар тилади сен қарқуноққа.

Гўдаклик чоғида йиқилмоқ, турмоқ
Йўргалаб кетмоқдан қутлуг белгидир.
Энди-чи, улғайдинг, ҳатто қоқилмоқ
Эл кўзи олдида айбу кулгидир!

1965

ПОЛВОН

Полвон эди, оғир тошлар қўтартган,
Тишларида силкиб-силкиб отарди.
Ерга бориб тушишини кутаркан,
Томошабин олқишига ботарди.

Полвон эди, елкаси ер қўрмаган...
Йиллар ўтди...
Қаранг, қандай чўкибди!
Қаранг, йиллар тоши қандай чўнг экан,
Тик қоматин бир умрга букибди!

1966

ЗАМОНДОШИМ МОНОЛОГИ

Мен чақмоқман, баҳор чоги
Ларза солған ер-кўкка.
Мен булбулман, саҳар чоги
Завқ-шавқ қуйган юракка.
Мен чинорман, минг бир ёшли,
Яна минг йил яшарман.
Мен дарёман, бутун бошли,
Юз тўғондан ошарман.
Мен эртакман, йилдан-йилга
Ўтган мангу барҳаёт.
Мен куртакман, аччиқ елга —
Чидаб берган қанд-новвот.
Мен қояман, қуёш менинг
Яқин дўстим, сирдошим.
Мен чечакман, ҳар ёш менинг
Ишиқбозим, қурдошим.
Мен орзуман, мен эзгуман,
Мен кўзгуман соф, тиник.
Мен юракман, мен тийракман,
Мен тилакман кўп ёниқ!
Тўлқин бўлиб, ёлқин бўлиб
Жавлон урган ўзимман.
Бўстон бўлиб, достон бўлиб
Даврон сурган ўзимман.
Битта қўлим ойга етган,
Бир қўлим ер қаърида.
Битта қўзим китоб титган,
Бир қўзим қир бағрида.

**Ақлим сезиб, саҳро кезиб
Газ қайнатган ўзимман!
Элга ҳамдард, жангда чин мард,
От ўйнатган ўзимман.
Қудратим ҳам, шұхратим ҳам,
Нафратим ҳам бекиёс.
Журъатим ҳам, суръатим ҳам,
Санъатим ҳам бекиёс!**

1967

ТО ТИРИК ЭКАНСАН...

То тирик экансан: кураш, ишла, ён!
То тирик экансан: сев, севил, қувон!
То тирик экансан: изла, қидир, тоң!
То тирик экансан: интил, юксал, чоп!
То тирик экансан одамдай йиглаб,
Одамдай севиниб, қайғуриб яша!
Севдингми, ёрингни дадил қўлтиқлаб,
Одамли кўчадан одиминг ташла!
Дард-алам ўтганда ошкор ёш тўкиб,
Қувонсанг ошкора хандон солиб кул!
Душманинг қаддини бешафқат букиб,
Дўстингта тута бил даста-даста гул!
Дўстларинг қўл сиқиб нурга чўмгандা
Қалб тафтинг кафтида ловиллаб қолсин.
Вақт етиб кўзингни мангуб юмгандা
Сен юрган кўчалар ҳувиллаб қолсин!

1968

ОДАМ ВА ТУПРОҚ

Тупроқдан яралган дейдилар инсон,
Ха, унда юрак-чи, юрак нимадан?
Тупроқда шунча ҳис, шунча дард-армон
Борлиги ҳайратга солар ҳаммадан!

Менимча, юракни ўзга оламдан
Келтириб тупроққа кўмиб қўйғанлар.
Сўнг уни тупроқдан бўлган деганлар,
Акс ҳолда ёнмасди бунча аламдан!

Тупроққа жон берган аслида одам,
Шу юрак, шу идрок, шу ҳис-ҳаяжон.
Гар одам бўлмаса, қутлуғ тупроқ ҳам
Оддий бир тупроқдир бенур ва бежон.

Эй, инсон, сен ўзинг ҳаётнинг боши,
Сен борки шу тупроқ қадру қимматда.
Ер эса жавобан меҳру ҳимматда,
Иккаланг башарнинг қўша қўёши!

Инсонман, инсонча таъзимимни ол,
Эй, менинг муқаддас она тупроғим!
Ҳамиша саодат оғушида қол,
Ҳеч хазон кўрмасин баҳор япроғинг!

1970

ОКТЯБРЬ ШАТЬНИГА

Мен сендан атиги бир ёш кичикман,
Дунёни ларзага келтирган сана!
Ва лекин ўзимни санаб кечиккан,
Йўлингга боқмадим лоқайд, эй она!

Илк кунинг шоҳиди отам қўлидан
Яланғоч қиличин олдим улгайиб.
Мардана тик бордим унинг йўлидан,
Хаттоки қилча ҳам кетмадим тойиб!

Ишончим қанотим бўлди ҳамиша,
Довондан довонга ошдим йилма-йил.
Мишиши гийбатлар мисоли шиша,
Йўл узра қолдилар бўлишиб чил-чил!

Ҳақиқат уфқидан сенинг байрогинг,
Кўзимга нур қўйиб турди узлуксиз.
Кўзимга бирдайдир яқин-йирогинг,
Барчасин кўраман аниқ — кўзликсиз!

Ва яхши биламан: сенга талиниб,
Үтингда bemavrud хок бўлганлар бор.
Тарихлар эланиб, лойқаси тиниб,
Янада очилиб кетдинг, эй диёр!

Эй менинг имоним, эътиқод кучим,
Меҳрингиз ўтилган ҳар лаҗза бекор!
Сен турдинг уфқда уфқлар қучиб,
Башарий ниятлар энди барқарор!

Ўзгарди бу олам,
Ўзгарди одам.
Ўзгарди ҳаттоки гуллар ҳиди ҳам!
Ўзгача оҳангда энди қайғу, ғам,
Ўзгарди одамлар руҳи, диди ҳам!

Гўдаклар йигисин завқи бор энди,
Севинчлар кўзлардан юракка кўчди.
Энг узоқ кулбага шуълалар инди,
Жинчироқ ўтмишдай мангуга ўчди.

Халаҷўп ўрнида «Волга» калити,
Йўлларнииг танобин тортади зумлар.
Манзилга туташар умидлар кети,
Йўлларни соатлар ўзига имлар.

Баъзизда қурама, бу бетинч олам
Үйқумни бузади, ўйим чуватиб,
Кўзимга кўриниб шунда тўрт болам,
Иигитлиқ чоғимга боқаман қотиб!

Жанг кўрган азамат ёшлигим онти:
Уйқумни бузмангиз жаноблар сира!
Нафталин сепилган шинелим бутун,
Пегони тақилган елкаси узра!

Тун ўтиб, даламга кетаман эртан,
Аламим меҳнатдан оламан ёниб.
Нур ичра тўлғаниб ётади Ватан,
Ўз бахти, кўркидан қувониб, қониб.

Тўрт миллион тўрт юз минг виқорига бўқ,
Нақадар кўркаму нақадар улуг.
Ҳар грамм, ҳар шона ёниқ бир чироқ,
У билан бугуну эртамиз ёруг!

Нақадар қутлугсан, эй она юртим,
Ҳар қарич тупроғинг ўзи бир гавҳар.
Мен сенда ҳамиша фахр билан юрдим,
Ўфқингда нур кўрдим ҳар шому саҳар.

Нақадар азизсан, эй она тупроқ,
Қанчалар қайноқдир меҳринг, қучоғинг.

**Баҳорни эслатар ҳар олтин япроқ,
Паловга ёғ доғлар газли ўчоғинг.**

**Нақадар буюксан, эй она диёр,
Кўксингда туғилмиш доҳий аждодлар.
Ҳар кўча, ҳар кентда улар номи бор,
Толиби илмлар ҳикматин ёдлар!**

**Шу қуттуғ айёмда қалбинг тўла нур
Ва нурли уфққа боқишинг кўркам.
Манзилга юравер ишонч-ла магрур,
Бугундай ҳар куни байрам, эй ўлкам!**

**Бу кунга етмаган марҳумлар ҳаққи:
Кўчани тўлдириб юринг, одамлар!
Кўчани тўлдириб кулинг, одамлар!**

**Бу кунга стмаган қурбонлар ҳаққи:
Байроқни юқори тутинг, одамлар!
Мардана қадам-ла ўтинг, одамлар!**

**Бу кунга етмаган қиз-жувон ҳаққи:
Йўлларни гулларга кўминг, одамлар!
Гул узра ўйларга чўминг, одамлар!**

**Шарафли меҳнатга ярашар байрам,
Байраминг муборак, серқуёш юртим!
Бахтинта тасаддиқ замину олам,
Кўнгли оқ ва ўзи қора қош юртим!**

1970

ХОТИН-ҚИЗЛАР МАДҲИЯСИ

Сизларсиз бу олам кўрки кемтиқдир,
Сизларсиз бу ҳаёт эрки кемтиқдир.
Сиз борсиз оламнинг ҳусни баркамол,
Сиз борсиз бу олам кўрсатар жамол.
Сиз борсиз гулларнинг атри ўзгача,
Сиз борсиз шоирлар сатри ўзгача.
Сиз юрган боғларнинг файзи ўзгача,
Баҳори, кузаги, ёзи ўзгача.
Ўзгача мевасин тоти, салмоғи,
Сиз соққан сигирнинг ёғли қаймоғи!
Сиз терган пахтанинг фахри ўзгача,
Сиз очган каналнинг баҳри ўзгача.
Ўзгача сувларин қўнғироқ саси,
Не ажаб, кўрганнинг келса ҳаваси!
Сиз чўлда мардана қўйсангиз қадам,
Ўзга бир гўзаллик кашф этар олам.
Одамлик ҳақини оласиз чўлдан,
Тиканни айириб муаттар гулдан,
Уфқдан уфқни кўзлайсиз мағрур,
Янги бир уфқдан сўзлайсиз мағрур.
Сиз учун уфқлар пиллапоядир,
Сиз муштоқ манзиллар тилла қоядир.
«Муродга қасд қилиб юрган етур»¹,
Тарихга мардана ўз номин битур.
Сиз тарих бетида нурли сўзларсиз,
Тарихдан янги бир тарих кўзларсиз.

Усмон Носирдан.

Кунларнинг салмоги қўлларингизда,
Тунларнинг чироғи қўлларингизда.
Сиз кирган хонанинг чироғи нурли,
Сиз қурган давралар гаштли, сурурли!
Сиз фарзанд боқасиз: меҳрингиз олам,
«Нур билан йўғрилсин, дейсиз, ҳар болам!
Ҳар бири бир устун бўлсин ҳаётда,
Синчи ҳам ёмонмас турса қанотда!»
Сиз олий мурувват,
Олий нијатсиз.
Сиз тоза виждану
Олий ҳимматсиз.
Орият сиз билан,
Ҳаё сиз билан.
Ҳамият сиз билан,
Дунё сиз билан.
Гўзаллик сиз билан,
Наво сиз билан.
Муҳаббат сиз билан,
Вафо сиз билан.
Сизларсиз бу олам завқи йўқ куйдир,
Сизларсиз бу дунё чироқсиз уйдир.
Ҳамиша ярқираб ёнинг, бор бўлинг,
Ҳаётнинг меҳрига қонинг, бор бўлинг!

1971

БОЛАЛИКДАН КЕЛДИМ

(Дўстим Ҳабзиддинхонга)

Болаликдан келдим сенга, азиз кексалик,
Болалигим шўхликлари ҳали қонимда.
Болалигим саломига сен олсанг алик,
Ўзга олам ярлади менинг жонимда.

Болалигим, кексалигим — икки минтаقا,
Қоқ ўртада ёшлигимнинг баркамол басти.
Болалигим чечак истаб югурди боққа,
Фронтларда қилич тутди ёшлигим дасти.

Барчасидан миннатдорман умрим борича,
Болалигим, олов ёшлиқ, энди яхши қол!
Сендан кетдим соchlаримнинг оппоқ қорича,
Кексалигим ойдин туни, энди қарши ол!

1969

ЭРТАНИНГ ИЛИНЖИ

Календарь тўпидан сўнгти варағин
Бешафқат, беминнат юлқиб ташладим.
Кечамдан ўкиниб тундмас қовоғим,
Аслида бугунии кечча бошладим.

Ҳа, кечча бугундан ўтмишга кирди,
Ўтмишнинг кафтида ҳовуч-ҳовуч пур.
«Ташаккур ўтмишга!» — дилим ҳайқирди,
Эртага қўзини тикаркан мағрур.

Янги йил туғилди кўҳна оламда,
Кўҳнадир бу тупроқ, бу дарё, бу чўл.
Қайтадан яшарган янги одамда
Янгидир бу тупроқ, бу дарё, бу йўл!

Кўҳна бу дунёнинг янги одами
Янги бир оламни кашф этди мағрур,
Қитъадан-қитъага ўтган қадами
Чириган дунёга дейди: — Нари тур!

Одимлар мустаҳкам, орзулас буюк,
Буюkdir бу янги оламда инсон.
Инсонга не керак бу елка беюк,
Юрак ҳам керакмас сигмаса жаҳон.

Муштумдек қалбимда жаҳон ташвиши,
Қайдадир ўқ учди, бомба портлади.
Қайдадир зўравон, ҳаромхўр киши
Қитъадан денгизлар оша ҳатлади.

Ногиҳон гўдакнинг йиғиси келди,
Юрагим зирқираб кетди бемаҳал.
Кўзимга вайрона тутуни тўлди,
Устимда айланиб юргандек ажал.

Ялт этиб қарасам, қизим ёнимда,
Ўғиллар ўйнашар ундан нарида.
«Тўхта эй, зўравон!» — ёнди қонимда,
«Нима бор даҳлсиз ўзга ерида!»

Муштумдек қалбимда жаҳон ташвиши,
Эртанинг ташвиши, инсон ташвиши.
Ҳаттоқи қўшнининг оғриса тиши,
Тун бўйи ухламай чиқасан киши!

Янги йил туғилди кўхна оламда,
Янги йил муборак, янги одамлар!
Қадаҳлар садоси янграган дамда,
Қитъа-ла янги бир олам қадамлар.

Тонг билан йўлингта чиқдим, Истиқбол,
Тонг бўлиб бағрингта кириб боргумдир.
Елкамда бебаҳо, қиммат юким бор,
Ниятим холисдир, қадамим гумбур.

Мен ижод фарзанди, меҳнат фарзанди,
Минг йиллар қатида ўчмас изларим.
Қонимда асрлар заҳмати, панди,
Уфқиқа туташар илҳақ кўзларим.

Кафтимда ўзимдай қорамтири тупроқ,
Кифтимда дўстимнинг меҳрибон қўли.
Йўлимни олқишлиар гул, тикан, қирғоқ,
Асфальтмас ҳамиша бу ҳаёт йўли!

Ҳаётга жон фидо қилган ютади,
Тикандан ҳўрқмайди гулни севганлар.
Мард сафар олганда довон ўтади,
Муродга етади ният қувганлар.

Эртанинг илинжи бугун қонимда,
Эртага янги бир кун туғилажак.
Эртани севаман ёниб жонимдан,
Салом эй, эрта кун, мағрур келажак!

1971

ҲАҚИҚАТ ЙЎЛДАДИР

Ҳақиқат йўлдадир,
Ҳамиша йўлда.

Гоҳ қирдан ошади,
Гоҳ сой кечади.
Гоҳ куйиб-ёнади саратон чўлда,
Гоҳ қоя тошлардан ўйлар очади.

Ҳақиқат йўлдадир,
Йўллари олис.

Гоҳ қорда қолади,
Гоҳо ёмғирда.
Гоҳ ўқлар учади ортидан гиз-гиз,
Гоҳ қонга беланар кутмаган ерда.

Баъзидা зиндоңда,
Баъзидা дорда,
Баъзида туҳматдан тиллари қисиқ.
Баъзида муваққат бекиниб горда,
Жанг-жадал тӯфонга киради қизиб.

Гоҳ кўзи чиқади,
Гоҳ бели майиб.
Гоҳ оқсанб қолади мадори қуриб.
Лекин у кетмайди мақсаддан тойиб,
Доимо манзилга стар ҳайқириб.

Ҳақиқат йўлдадир,
Ҳамиша йўлда...

БУ СҮҚМОҚ МЕНИКИ...

Бу сўқмоқ меники,
 ўзим очганман.
Ўзимга жуда ҳам маъқул ва манзур,
Ҳар онни бу йўлда қулочлаганман,
Қаршимда қуёшим сочиб турган нур.

Мен шундан чиқаман катта кўчага,
Аминман бир куни бўлур катта йўл.
Нур тўкиб ёнади чироқ кечага,
Одамлар кезади қўлга бериб қўл.

Ҳозирча бу сўқмоқ,
 фақат бир ўзим
Қийналиб-қийналиб ўтиб бораман.
Уфққа қадалган синовчан кўзим,
Имоним байроқдек тутиб бораман.

Ҳар катта йўлни ҳам қачондир бирор
Илк марта қадамлаб ўтгандир яёв...

1970

ЮЛДУЗЛАР

Юлдузлар, аслида, ўзи беномдир,
Уларга исмни сен-биз қўйганмиз.
Шу кундан шоирга кони илҳомдир,
Қизларнинг кўзини унга йўйганмиз.

Сабаби порлаши йироқ-йироқда,
Қоп-қора тунларнинг ҳусни бўлгани.
Бўлмаса ким келмиш юлдузли ёқдан,
Ким етиб борибди уни кўргани?

Барчаси сен-менинг зеҳним ва қалбим,
Барчаси гўзаллик шайдолигимиз.
Барчаси ҳаётни фаҳмлаб, билиб,
Гўзаллик ишида фидолигимиз!

1970

Мен сени севибман,
Севгим бекиёс!
Лекин сен бехабар,
Парвойи фалак.
Юрагим чалади кунда ғамли соз,
Ҳасратим етурми сенга, эй малак?

Ё изҳор этайми ошкор тил билан,
Ё йўлга чиқайми даста гул билан?
Аҳволим не кечар, назарга илмай
Сен кетсанг бурилиб ўзга йўл билан?

Йўқ, бунга чидолмам,
қолсин ичимда,
Ошкора этмайман куйиб битсам ҳам!
Оппоқ кул кўринисин майли сочимда,
Майли қуримасин кўзларимда нам!

Буни ҳам уддалай олмадим, эркам,
Вужудим ўт олиб ёнди беомон.
Тутунга чулғанди бу ёруғ олам,
Томирим кўришиб табиблар ҳайрон!

«Бедаво дард!» — деди баъзи ҳушёр қиз,
Баъзилар кулишиди,
баъзилар зор-зор...

Мен энди англадим не учун Қайс,
Еввойи сахрони этмиш ихтиёр!

Севгимни дарёга қилсам ҳикоя,
Тўлқинлар ҳайқириб, қулиб кетдилар.
Севгимни саҳрога қилсам ҳикоя,
Еллари оғзимдан юлиб кетдилар.

Чечакка арз қилсам,
чечак саргайди,
Булутга арз қилсам, йиглади юм-юм.
Шамоллар дардимдан беқўним, дайди,
Жонсарак ошиқдай тинчи йўқ бир зум!

Қуёш дер: — Мен ўзим ошиқи шайдо,
Саноқсиз йилларки, ёнаман ҳамон.
Фақат бир булбуллар гул узра фидо,
Дардини ёрига тўкар беармон.

Биламан, севгилим, темирни занги,
Ошиқни севгиси кўрсатмас кўзга.
Бўсанинг тили йўқ,
кўз ёшнинг ранги,
Севгининг номи йўқ, севгидан ўзга!

1970

ЭШИККА ЧОП

Эшикка чоп, йиглаб ўтган ким?
Қўлидан тут, кўнглини кўтар.
Илиқ сўзлар ғамни даф этар.
«Ким ўзи?» деб сўрма, гўдагим!

Ким ўртаниб йиглай олади
Ахир, ўғлим, инсондан бошқа!
Инсон дардин инсондан бошқа
Ким ҳам уқиб, англай олади.

Эшикка чоп, йиглаб ўтган ким?

1970



Еир даста гул билан қошингга чиқсам,
Гулимни қўлимдан ололасанми?
Манзилга интилиб, йўлда толиқсам,
Қўлтиқлаб ёнимда бороласанми?

Бўлмаса гулимга тегмай қўя қол!

1970

ҲИДСИЗ ГУЛ

Сен нега ҳиди йўқ гулни ташладинг,
Ё хато қилдими қўлингда қайчи?
Бошиға гул йўқмиди боғингда, айт-чи?
Ё кўзинг алданди, ё шуми дидинг?

Бу гулинг, ақли мас, ҳуснини кўз-кўз —
Қилувчи енгилтак қиздек қулади.
Афсуски, чиройли, кўз алдар гуллар
Баъзида шунақа ҳидсиз бўлади!

1970

СЕНИ ИЗЛАБ...

Мен сени излаб боғларга чиқдим,
Дедилар: — Қирда.
Қирни айланиб, тоғларга чиқдим,
Йўқсан ҳеч ерда.
Сени сўроқлаб дарёга боқдим,
Деди: — Денгизда.
Денгизда суздим, тўлқинда оқдим,
Топмадим из-да!
Тошлардан сўрасам, қаттиқ тош деди:
— Мен унинг қаҳри.
Осмонга боқсам, нур қуёш деди;
— Мен унинг меҳри.
Ойдан сўрасам, юлдузда деди,
Юлдуз йироқдир.
Сенга етолмай ўртаниб энди
Ишим фироқдир.

1970

МЎЖИЗА

Одам қалби қизиқ мўъжиза,
Не дунёлар боқади ундан.
Не дарёлар оқади ундан,
Ўзи эса муштдай ожиза!

Шу муштдай қалб,
Шу бир парча ўт
Не кўйларга солади бизни!
Гоҳо тутиб гулдаста-букет,
Не ўйларга солади бизни!

Амринг билан урмаганидек,
Раъйингга ҳам юра қолмайди.
Бир лаҳза ҳам тинч турмагандек
Елдай елиб ғойиб бўлмайди.

Гоҳо ҳоким, гоҳида қул у,
Гоҳо хазон, гоҳида гул у!

1970

ҲАҚ СҮЗ

Сен ўзинг ёнмасанг ҳаётда, шоир,
Ўзгалар қалбини ёндиrolмайсан.
Сен ўзинг қонмасанг ҳаётдан, шоир,
Ўзгалар қалбини қондиrolмайсан.

Сен ҳаёт бағрига жавлон уриб кир,
Бахт топсанг қувониб, хандон солиб кул.
Ҳақиқат бўйнида гар кўрсанг занжир,
Юрагинг ўртаниб, соchlарингни юл!

Лекин сен ҳаётга қарама лоқайд,
Хаспўшлаб яширма нурсиз устини.
Дадил тур, ошкора ўз сўзингни айт,
Ҳақ сўздир дунёнинг синчи, устуни!

1970

ГУГУРТ ЧҮПИ

Ингичка ва нозик бир гугурт чўпи
Икки-уч дақиқа ёнар қўлимда.
Шу икки дақиқа қоронғи хавғи
Юзларча қадамга қочар йўлимдан!

Наинки йўлларим, ҳатто дилим ҳам
Шу икки дақиқа равшан тортади.
Бехавғу бехатар ташлайман қадам,
Йўлимга ишончим, умид ортади.

Ҳа, ундан аланга олган чироқ-чи?
Тун бўйи йўлимни ёритса мумкин!
Эй, нигор, бир лаҳза қалбингга боқ-чи,
Шу гугурт чўпича олов бормикин?

Шоядки бор бўлса,
Йўлим ёритса!

1970

САЖДАГОҲ

Сен кетдинг, мен қолдим орқангдан дөгда,
Яхшиям бор экан изинг тупроқда.
Мен унга боқаман соғинган чоғда
Сен эса юрибсан йироқ-йироқда.

Баъзиди кулади кишилар мендан:
«Шунчалар азизми, дея, ёр изи.
Аразлаб кетди-ку, ахир у сендан,
Сен эса узмайсан йўлидан кўзни!»

Оҳ, улар билмайди, кўнгил энтикса,
Кўзига суртгани ёр тупроғидир;
Қаерга маъшуқа оёғи тегса,
Уша ер ошиқнинг саждагоҳидир!

1970

З А Р Р А

Баҳор бўлсам фақат сен учун
Далаларда гул очар эдим.
Қуёш бўлсам эртаю кечин
Фақат сенга нур сочар эдим.

Юлдуз бўлсам сенга термилиб,
Оппоқ тонглар оттирас эдим.
Ирмоқ бўлсам сенга интилиб,
Пойларингга бош урас эдим.

Йўллар бўлсам фақат уфққа
Сени бошлаб, олиб кетардим.
Денгиз бўлсам сенга тортиққа
Инжуларим кафтда тутардим.

Шамол бўлсам сендан ўргилиб,
Атрофингда жавлон урадим.
Қишида ўлсам, ёзда тирилиб,
Ҳар амрингга ҳозир туардим.

Бургут бўлсам парвозим ростлаб,
Қоялардан салом берардим.
Кантар бўлсам қошингда пастлаб,
Хат ташувчи дастёр бўлардим!

«Мен нималар бўлай?» — деб, эркам,
Мени қилма асло хижолат.
Сенинг ўзинг мўъжиза олам,
Мен бағрингда зарраман фақат!

Шу заррани илғамай кўзинг
Йўқотмасанг бўлди сен ўзинг!

1970

УНУТМАДИНГМИ?

(Қўшиқ)

Ойлар ўтди бедор, бешафқат,
Эркам, мени унутмадингми?
Хаёлимда ҳамон сен фақат,
Эркам, мени унутмадингми?

Кўзим юмсам тушларимдасан,
Ёзу баҳор, қишиларимдасан,
Ўқиб олган «беш»ларимдасан,
Эркам, мени упутмадингми?

Баҳор келса гулда кўраман,
Сен хуш кўрган йўлдан юраман,
Баъзан қирдан, чўлдан юраман,
Эркам, мени унутмадингми?

Кўйда ёнгани сенинг кўзгинанг,
Менга мадад доим сўзгинанг,
Қачон кўргум сенинг ўзгинанг,
Эркам, мени унутмадингми?

Турна ўтса йўлга боқаман,
Фозлар учса кўлга боқаман.
Дилим ёнса гулга боқаман,
Эркам, мени унутмадингми?

Гулім қўлда сўлмасидан кел,
Дўсту душман кулмасидан кел,
Ишқинг дилда сўнмасидан кел,
Эркам, мени унутмадингми?

1970

ҚОРА КҮЗЛАР

Кўзларинг йигимас, севинчдан қора,
Севинган юракка қуёш инади.
Шу қуёш қалбингдан тошиб ошкора,
Кўзингда тимқора бўлиб ёнади.

Шу қора кўзларинг ёруг иқболинг,
Навқирон ёшлигинг таржимонидир.
Кишилар, шу кўзни ардоқлаб қолинг,
Бу кўзлар бегубор, бекиёс нодир.

1970

КЎКЛАМ

Илҳомга тўлибди яна бу тупроқ,
Чечаклар, майсалар унинг изходи.
Севгисин кўзидан сочади булоқ,
Борми деб севгининг тилга ҳожати!

Севинчи ичига сиғмасдан ғунча
Лабини тутолмай хандон қулибди.
Айвонга қалдиргоч, толга мусича
Жўжаси ғамида хашак илибди.

Темурнинг бошига соя ташлаган
Ўлимтиқ чинор ҳам ёзибди лпроқ.
Қумурсқа ўрмалаб сайлин бошлаган,
Қўнғизда ўзидан катта қумалоқ.

Кечиккан қарганинг поласи баланд,
Бош урар ерини билмай қолибди.
Эҳтимол қарқуноқ булбуллар билан
Ез бўйи юрмоқни орзу қилибди!

Бечора бинафша жонин авайлаб,
Майсалар остида ётса ҳам биқиб,
Бераҳм болалар қидириб, сайлаб,
Теришиб кетишар намини қоқиб!

Бўғот том бошида лолақизғалдоқ
Қирдаги дўстига қўйл силкиб кулар.
Ўтган йил ёнгогин чўқиб заргалдоқ
У бодган бу бөққа хавотир елар!

Кавакдан чиқибди чўтири қўрбақа,
Ликиллаб турибди оқ бақбақаси.
Ерини студент етаклар боққа,
Бир даста гулга ҳам етмас чақаси!

Қизларнинг қиши бўйи димиқкан сочи
Орқасин қириқ кокил бўлиб тўлдирар.
Осмон ҳам булатга қаҳрини сочиб,
Үстига шиддатли чақмоқ елдирар!

Тақдирин ер билан чандиган дөхқон
Она-Ер бошида мағрур боқади.
Кўнглидан ўтади олов саратон,
Серфайз куз йўлидан карвон оқади!

1970

СЕН КУЛАСАН...

Бу қанақа замондир
Йиғлаган кўп, кулган оз?
(Озарбайжон халқ қўшиғи)

Сен куласан, кулгинг билан
Осмон тиниқ тортади.
Сенинг очиқ қалбинг билан
Кўкда ёруг ортади.
Сен куласан, чаман бўйи
Бирдан нафис тортади.
Сен куласан, дўстлар бўйи
Бир қаричга ортади.
Кул, азизим кулгинг билан
Баҳоринг ҳам, қишинг ҳам.
Оразуларинг қаримасин,
Эзгу ният, ишинг ҳам.
Кул, азизим кулгинг билан
Кўнглим тиниқ тортади.
Кундай очиқ қулгинг билан
Дўстлар сони ортади.

1970

ҚАЛБИМ МАМНУН УРАДИ

Баҳор келди, ҳамал чоги
Кўчатга жой қазир ким?
Сену мен-да, азизим!

Кўчат унди, япроқ ёэди,
Соясида кезар ким?
Сену мен-да, азизим!

Йиллар ўтди, мева қилди,
Мевасини узар ким?
Ана улар, азизим!

Сен ҳам ўтдинг, мен ҳам ўтдим,
Бу боғларни безар ким?
Ана улар, азизим!

Боғ ичида кенжা ўғлим,
Бош набирам юради.
Қалбим мамнун уради!

САМБИТ ГУЛ

Сен кетдинг фронтга кўплар қатори,
Кўзингда ўч ёнди, кўксингда нафрат.
Қўл силкиб кузатди қалбинг дилдори,
Душманга тилади қиргину офат.

Дилдоринг нияти топди ижобат:
Ёв битди.
Эл тинди.
Уруш тугади,
Сен қайтдинг юртингга магрур, серсавлат,
Қошингдан ўтганлар бошин эгади.

Ҳайкалсан. Майдонда турибсан тикка,
Оёғинг остида даста-даста гул.
Самбит гул қаршингда бўй чўзар якка,
Бу гулни ўстирап сенга содик дил!

1970

ОПА ТИЛИМ

Оҳ, она тилгинам, муқаддас тилим,
Бир оғиз сўзингга жоним тасаддиқ.
Бунчалар ширинсан, бунчалар сўлим,
Бормикин ажиг тил сендан ҳам ортиқ!

Сен онам тилисан, отам тилисан,
Сен бобом тилисан асрлар ошган.
Меҳрда бекиёс нозик гулисан,
Ғазабда қутуриб Амудай тошган.

Сен ёрим тилисан, болам тилисан,
Неварам-чеварам тили бўлиб қол.
Сен мағрур қувонсанг, ўссанг ҳақлисан,
Ўғида кутади ёрқин истиқбол!

1970

А Н И Қ Л И К

Асил севги ҳусн танламас,
Дили дилга тўғри келса бас.
Дарёлардан ўтар бекўприк,
Чўққиilarни қиласди ҳавас.

Тош ҳам сўзлар унинг наздида,
Кесакнинг ҳам ҳатто жони бор.
Ниятининг ёниқ қасдида
Уфқлардан ошмоққа тайёр.

Томирида кезар ўзга қон,
Кўзи боқар ўзгача бутун.
Бир кечада ўзгариб жаҳон,
Атир бўлиб туюлар тутун.

Шодлигидан бағри ўт олиб,
Ер юзини қучмоқ истайди.
Баъзан эса бир ўзи қолиб,
Ўй қатида учмоқ истайди.

Ошиқларнинг кўз ёши қуттуғ,
Фарёди ҳам ўзга оҳангда.
Севмадингми? Йўқ, билмайсан, йўқ,
Бу кенг олам неча хил рангда!

1970

...ЭСКИДИР ОЛАМ

Бу йўллардан ўтган кўп одам,
Яна қанча одам ўтади.
Шу йўллардек эскидир олам,
Яна қанча даврон кутади.

Бу йўллардан тоймасдан юрган
Муродига албат етади.
Овчиларнинг зўри шер урган,
Қўрқоқлари қуёни отади.

Шерга ташлан, ҳалок бўлсанг ҳам,
Шер жангига ўлди дейдилар.
Зўр ишлар-ла серфайздир олам,
Из қолдирмас, қўрқоқ дайдилар!

1970

В А Ф О С И З

Бир чўққига интилдик икков,
Бир сўқмоқдан бордик ёнма-ён,
Баъзан йўлда учраб қолса ғов,
Олиб отдик четга беомон!

Нега энди мен йўлда қолсам,
Сен чўққидан қайтиб тушмадинг?
На қўлимдан тутдинг, ушладинг,
Шуми эди ичилган қасам!

Лекин билки, сен тойиб кетсанг,
Йиқиласан менинг устимга.
Шунда ҳамки сендай «дўстим»га
Қўл кўтариб жанг қилмайман, жанг!

Фақат чангинг устимдан қоқиб
Ўз йўлимга кетаман боқиб...

1970

**Сен расмим чизибсан турли бўёқда,
Кўрганлар айтишди: яхши чиқибди.
Ҳайронман, сен унда, мен-ку бу ёқда,
Узоқдан кўзларим қандай боқибди.**

**Сочим-ку белгили,
Таниш азалдан,
Қош учун йўқ эди сенга керагим.
Юрагим уришин қандай сезолдинг?**

Шунчалар яқинми эди юрагинг?

1970

ТОШ ҮЙ

Сен тошдан уйингта замин терибсан,
Дейсанки нам ўтмас, жони ҳам қаттиқ,
Мен рози, сен шуни лозим кўрибсан,
Гарчанд тош бетондан эмасдир ортиқ.

Тош уйда яшасаңг кулмайди ҳеч ким,
Тош юрак бўлмасаңг бўлгану, дўстим!

1970

ХОЛИС НИЯТИМ

Илк изим шу тупроқ, шу ерга тушган,
Шу тупроқ тинглаган илк йиғимни ҳам.
Илк кулгим қантардек шу ердан учган,
Шу тупроқ илк кўрган қилигимни ҳам.

Шу ерда онамни тўйиб эмганман,
Оlamдай кенг эди мен учун бағри.
Отамни шу ерга ўзим кўмганман,
Шу тупроқ бағрида бобомнинг қабри.

Шу ерда ажратдим гуллар рағини,
Севигига мубтало бўлдим шу ерда.
Шу ерга қайтдим мен Ватан жангини
Мардона тугатиб бегона элда.

Қол, деди, қолмадим бегона юртда,
Гуллари атрини сезмади қалбим.
Айтганиман, айтаман яна бир марта
Она-Ер матлаби менинг матлабим!

Бир ҳовуч тупроги ёнимда эди,
Согинган кўнглимда меҳри, хаёли.
Фарзандлик ғуури қонимда эди,
Тенгсиздир оламда ҳусни жамоли.

Сен ўлдинг, қайтадан тирил, десалар
Фақат шу тупроқда тирилар эдим.
Фақат тупроқда қучиб шон-зафар,
Шу тупроқ баҳтидан керилар эдим.

«Қўй уни, жаннатда юргин», десалар,
«Жаннатим шу ер!» деб асло жилмасдим.
Қўлимга тутсалар гар оби кавсар,
Чирчиғим сувига тенг билмас эдим.

Гар шароб тутсалар фақат шу тупроқ,
Она-Ер шаънига кўтарар эдим.
Она-Ер бағрида агар бир япроқ
Бемаҳал сарғайса дод урар эдим.

Шу тупроқ қўнглимга маъқул тобора,
Шу тупроқ имоним, эътиқод тошим.
Лекин бор дунёда қизиқ ибора,
Баъзидা ўқийман келса ҳам ғашим:

Дейдилар: «У топди иккинчи Ватан»,
Бу сўзга ишонгим келмайди сира.
Наҳотки бир она бўлса икки тан,
Бир фарзанд туголса икки бокира!

Дунёда инсоннинг онаси битта,
Биттадир Ватани — туғилган ери.
Фидойи жон бўлур эрларнинг эри,
У содик қолади ҳатто лаҳатда.

Мен шундай фарзандман Она-Еримга,
Севинчи севинчим, қайғуси қайғум.
Фарзандлик фахри-ла сиғмай теримга
Вақт етгач шу ерга мағрур бош қўйғум.

Лекин бир илтимос, азиз ёронлар,
(Биламан дўст-душман ғамгин бош эгар)
Гўрида тинч ётсин десангиз агар,
Рұҳида қўпмасин совуқ бўронлар.

Видолашиб сўзин айлангиз баён
Мен севган, мен ёзган она тилимда.
Шу тилда кўзимга очилган жаҳон,
Шу тилда ном топдим она элимда.

Биламан тилларнинг ёмони йўқдир,
Ҳар тилнинг ўз кўрки, улуглиги бор.
(Ким тилни камситса ўзи нўноқдир)
Менинг ҳам ўз тилим жонли, байроқдор.

Шу тилда алласин айтгандир онам,
Шу тилда ув тортган фарзанд догоидা.
Шу тилда янграган қўшиғим, яллам,
Шу тилда кирганман ёр қучоғига.

Шу тилда айтганман «Яша, Шўро!»ни,
Шу тилда ўқидим Ленинни илк бор.
Шу тилда танидим оқу қорани,
Шу тилда топганман обрў-эътибор!

Шу тилда фронтга кузатиб онам,
Шу тилда соғинган қишлоғим, далам,
Шу тилда соғинган қишлоғим, далам,
Шу тилда йўллаган номасини ҳам.

Мен голиб қайтганда шонли сафардан,
Шу тилда қаршилаб олган мағрур, шод.
Шу тилда гуркираб, чиқариб қанот,
Ҳикоя айтганман жангдан, зафардан.

Шу тилда хорижда бир сўз эшитсан,
Бағримга нур тўлиб, кўзим ёнарди.
Авлиё кўриниб менга шу одам,
Кўнглимга жуда ҳам яқин келарди.

Шу тилда домламга саломлар бериб,
Шу тилда боламга ҳарф танитдим.
Шу тилда душманга қаҳрим ҳайқириб,
Дўстимнинг бағрига ўзимни отдим.

Шу тилни кўз очиб эшитган эдим,
Шу сўзни сўнгти бор тингласин қулоқ.
Шу менинг охирги холис ниятим,
Сўнг майли устимга тортилсин тупроқ!

Розиман ўз умрим, ўз ҳаётимдан,
Орттирган обрўйим, шон-шуҳратимдан.

1970

ҚАЛБИНГГА БОҚ

Мени излаб чиқма күчага,
Күчаларда изим бор ёлғиз,
Эй, бағримга олов солган қиз!

Сенга ошиқ бўлган кунимоқ
Юрагингга кириб олганиман,
Унда чиқмас бўлиб қолганиман.

Кўчалардан излама мени,
Юрагингга умид билан боқ,
Унда ёнар мен ёққан чироқ.

Чирогимни ўчирма, эркам,
Ўзга қалбга кўчирма, эркам,
Унда мангут сўниши аниқ!
Зимиstonга айланар олам!

1970

КУЛИБ ҚУВОНТИР

Сен йиглаб қўрқитма,
кулиб қувонтири.
Ҳар муҳтоҷ қўнгилда бир чироқ ёндири,
Ўз хира дилинг ҳам бўлади равшан,
Ҳаттоқи йўлинг ҳам бўлади равшан.

Йигидан қўнгилга қайғу чўкади.
Қайғу-чи?
Азамат белни букади.
Сен йиглаб қўрқитма,
кулиб қувонтири.

Кулги бир атирки,
оламга татир!

1970

ШАЙДО

Мен узук әмасман тақсанг қўлингга,
Мен чечак әмасман сочсанг йўлингта.
Мен шайдо одамман,
Одамча сўз қот.
Севгину севганча жарликларга от,
Юрагинг ачишиб, ўртанимаса, ёр.
Қурбонинг бўлмоқни этгум ихтиёр!

Фақат сен,
сен ўзинг ижрочиси бўл,
Мен учун қутлуғдир сен танлаган йўл.

Кўзингда кўзларим,
Кўзларимга боқ;
Тилингда сўзларим,
Сўзларимга боқ;
Ҳаммаси сеники,
сенинг мафтунинг.
Лекин бил, ёrimас менингсиз тунинг!

1970

ҲАР ГУЛНИНГ ЎЗ ЭГАСИ БОР

**Севмаган кишининг гули ҳам оғир,
Қўлларинг узилиб кетади тутсанг.
Ҳаттоқи хушбўймас, ғам-алам анқир.**

**Ҳар гулнинг ўз атри, ўз эгаси бор,
Ўзгалар қўлида бефайз, беисдир.
Сен тутган гулгина менга азиздир! -**

1970

КЕЛ!

Кутиш яхши,
Кузатмоқ оғир.
Кетмас бўлиб кела қол, қўзим,
Дарвозамдек очиқ кенг бағир,
Йўлларингда интизор кўзим!

Лекин ваъда этмайман баҳт-таҳт,
Менинг баҳтим сенингсиз кемтик.
Сеники ҳам менингсиз кемтик,
Шундай бўлгач, кел, ўтмасин вақт!

1970

ОДАМ БЎЛСАНГ,,,

Тугмачадек кўзингга
Оlam сиғиб турибди,
Бир калима сўзингга
Одам йигиб турибди.

Оlamга боқ, одамга
Илиқ сўзинг айтиб кет.
Одамга боқ, оlamга
Ўз бахтингни инъом эт.

Тугмачадек кўзингга
Оlam сиғса, не ажаб.
Олам боқиб изингга,
Номинг тураг ҳижжалаб!

Одам бўлсанг исмингни
Эл оғзига ташлаб кет:
Яхши олсин изингни,
Ёмонларни бошлаб кет!

1970

СЕВГИ ЙИФИСИ

— Севганимдан йигласам айбми?

Ё кўз ёшни яширган маъқул?

Ё йиглаган қўнгил майибми?

Жавоб бергин, эй ёноғи гул?

— Хандон солиб кулолган одам,

Фарёд уриб йиглай олади.

Ишқида бағрин тилолган одам,

Ишқий достон бўлиб қолади.

Севганимдан юм-юм йиглайман,

Фақат унга умид боғлайман!

1970

ЧҮҚҚИДАГИ ҚОР

Чўққидан боқарди кибрланиб қор,
«Қанчалар баҳтлиман!» дерди ўзига.
Пастдаги қорлар-чи, мунглигу ночор
Кўринарди кўзига!

Бу ёвуз ғуурурдан топди-ю хабар,
Эритиб юборди бир кунда қуёш.
У энди фарёд-ла пастликка чопар,
Минг бир тошга уриб бош!

1972

ҚУЁШНИ ҚУВИБ...

**Түғилған кунимдан нурга шайдоман,
Илк қадам кунимдан қуёшни қувиб.
Энтикиб-энтикиб қадам отаман,
Ҳар тонгда нурига юзимни ювиб!**

**Биламан, муродга етишим мушкул,
Қуёшга интилмай яшнабди қай гул?!**

1972

САЪВА

Сен саъва тутибсан шу эрта кўклам.
Қафаси кўркам.
Қафаси кўркам.
Мақтоби тилингда туну кун достон,
Туну кун сайрармиш тиним билмасдан.

Аслида бу құшнинг сайраши әмас,
Қафасга тушганин оху ноласи.
Балки у ёрининг фироғида маст,
Қайдадир кутади балки боласи!

Мард бўлсанг сен аввал бечора құшнинг
Эркини бўғма-ю, қафасдан чиқар.
Сўнг сенга ёғдирап қўшиқ — олқишини!
Мана бу қўшиғи менга ҳам ёқар!

1970

ТОБУТ КЕТИДА

Тобут борар. Унинг кетида
Жамоанинг ёшу қариси.
Бири ёнар алам ўтида,
Фарёд ураг анов бириси.

Тобут борар. Унинг кетидан
Узоқ-яқин боради саф-саф.
Қайғу ёғса бирин бетидан,
Бири отар ҳазиломуз гап.

Тобут борар. Анов кишининг
Ўлик билан ҳатто иши йўқ.
Чўнтағида қўли шимининг,
Ўтган қизга кўзи бўлар лўқ.

Анов бири қилади ғийбат,
Бахти олчи турган дўстини.
Тўқиб-бичиб тахтайди қат-қат
Бир раҳбарнинг каму кўстини.

Анов бири парвойи фалак,
Мозоргами, тўйга кетяпти!
На бир жиндек ачийди юрак,
На тобутнинг бандин тутяпти!

Фақат бирга бориб келса бас,
Фақат кўрса эл-юрт кифоя!
Хаёлида ўз иши, ҳавас,
Ош буюрган қайтишга боя!

Тобут борар. Унинг кетидан
Узоқ-яқин боради саф-саф.
Қайғу ёғса бирин кетидан,
Бири борар дўстин гийбатлаб.

Хей, ноинсоф, жилла бўлмаса,
Гийбат қилма тобут кетидан.
Йиглаш агар қўлдан келмаса,
Сукут сақла шундай бир пайтда!

1972

МИНГ КЎЗИМ БЎЛСА...

З. Р.га

Бургут бўлсам, сенинг орзунгдай
Юксакларда учиб юардим,
Чақмоқ бўлсам, сенинг кўзингдай
Кечакундуз ёниб туардим.

Ирмоқ бўлсам, сенинг боғчангга
Хандон солиб, қувнаб оқардим.
Юлдуз бўлсам, порлаб кечангда
Фақат сенга, сенга боқардим.

Чинор бўлсам, узоқ умримнинг
Сирларини сенга очардим.
Қуёш бўлсам, олтин нуримни
Ҳатто қишида сенга сочардим.

Агар менинг минг кўзим бўлса,
Бари билан боқардим сенга.
Шунда ҳамки, эй меҳри тоза,
Тўймас эдим асло ҳуснингта!

1972

ЗОЛИМ СЕВГИ

Ишонмаганлар ўқимасин

У севди, ўртанди, ёнди туну кун.
Чўп бўлиб кетса ҳам у ёна-ёна,
Қайрилиб боқмади мағур жонона,
Севгиси топмади ижобий яқун.

Шунчалар уринди ўзин тияй деб,
Иложин топмади, барибир ёнди.
Баъзида ўзича ишқидан тонди,
Гоҳ қишида, гоҳ баҳор ёйганида сеп.

Сел бўлиб босарди ёрнинг хаёли,
Тиф бўлиб бағрига ботарди ҳамон.
Қанча йил ўтди-ю, қанча бир замон,
У золим севгидан бўлмади холи.

Сочига оқ тушди, тиши камайди.
Юз-кўзин қоплади илон из ажин.
Ҳамон у ёнади топмай иложин.
Ҳамон у золим ёр, бир кел, демайди.

Эр қилди жонона, бу ҳамон бўйдоқ,
Ҳамон у севгидан бўлмайди халос.
Баъзида май тортиб, баъзан отиб нос,
Оҳ, дейди севгига мен бўлдим адоқ.

Уч бола кўрди қиз, тўнгич ўғлини
Мактабга етаклаб кетди ўтган йил.
Бечора ошиқда ҳамон ёнар дил,
Ҳамон у топмайди совиш йўлини!

Охири йўл топди, доктор ўртоги,
Юрагин алмашлаб берди ўтган ой,
Тинчи迪 чамаси — қилмас оҳувой,
Сўнгига чиқмаса бирор чатоги!

Докторга, пиrim, деб қўйди у ихлос,
Келинглар бўлайлик яхши тилакда:
Илоҳим севгиси эски юракда
Кетгани рост бўлсин, рост бўлсин, ҳа, рост!

1972

СЕНИНГ МАДҲИНГ

Боғ-роғлар ялангоч, қирлар ялангоч,
Ялангоч кечаги оппоқ пахтазор.
Узоқда тоғларнинг боши оппоқ соч,
Тоғлардан ўрмалаб келмоқда оқ қор.

Сен ўзинг ясаган тоғларингта боқ,
Тўшиңгдек қабариб, мағрур турибди.
У сенинг меҳнатинг, пахтакор ўртоқ,
У сенинг меҳрингни юксак кўрибди.

Илк баҳор нафаси, саратон тафти
Қалбингда қоришиб, топмиш эътибор.
«Бу,— дейди кўрганлар,— заҳматкаш забти,
Забтида муҳаббат, эътиқод, шон бор».

Кўр, ана, қир-даланг мудрайди сокин,
Сенингдек эртани ўйлаб ухлайди.
Эртани ўйласа кимда-ким бугун,
Орзулар карвонин тўқис юклайди.

Мен сени ўйламай яшаган қуним
Завқи, йўқ, бефайздай бўлиб ўтади.
Мен сени қуйламай яшаган қуним,
Юрагим ўртаниб, увол кетади.

Сен олам ичида олам яратиб,
Бу кўҳна оламга таҳрир киритдинг.
Пахтакор номини мағрур янгратиб,
Қуш қўйнmas саҳрода олтин эритдинг.

Сен юртим қўркини очдинг қайтадан,
Сен ўзинг қўркисан тенгсиз, бекиёс.
Сен мамнун туғилиб мағурот отадан,
Фарзандлик бурчини ўтадинг кўп соз!

Пахтангдек оқ кўнгил, юмшоқ қалблисан,
Тантисан, сахийсан, кўкраги очик.
Устозлар шеърида мангуболибсан,
Шеърки, сатрида гавҳарлар сочиқ!

Эҳ, сени куйлашнинг ажиг завқи бор!
Эҳ, сени севмаган вужудда жон йўқ!
Сен фахрим, сен ҳусним, сен ҳақли виқор,
Сен юртим номини таратган довруг.

Мен сени куйласам олам-олам нур,
Кўзимга қуяйлиб, яшнади юрак.
Эй бахти очилган, муқаддас умр,
Байраминг муборак, байрам муборак.

1971, декабрь

ИЛҲОМНИ КУТМАДИМ...

Илҳомни кутмадим,
Илҳомнинг ўзи
Ҳокими мутлақдек кириб келди гоҳ.
Завқ билан чараклаб қуралай кўзи,
Кўнглимни ёритди мисоли чироқ.
Бўл, деди, қоғозу қаламингни ол,
Бўл, деди, ўтмасин бекорга фурсат.
Руҳимда ажиб ҳол очди-ю, жамол,
ЛАҲзалар овини кўзлади суръат.
Нур бўлиб тўкилди қоғозга сўзлар,
Гул бўлиб сочилиди ҳислар, туйғулар.
Ҳайратда чақнайди бу жоду кўзлар...
...Ҳа, шунда энг яхши сатр туғилар!

1971, декабрь

КУНЛАР — ОТИЛГАН ЎҚ...

Кунлар — ўқ. Нишонга теккани умр,
Қолгани бемаҳал сўнган бир кўмир.
Ёндиранг ёнмайди, ҳисобда фақат.
Не ажаб! Ноилож қиласан тоқат!

Ҳар ўтган кунингни сен умр дема,
У кунинг умрдир нурланиб қолса.
Кунларим ўтмоқда, қалбим, ўксима,
Шоядки ярмиси умр бўлолса!

1972 йил, январь, Янгийўл

Ү Й Л А Р И М

Үйлар менинг учиб кетган құшларим,
Фақат күнглим унинг олтин қафаси.
Дон сочса ҳам баъзан-баъзан тушларим,
Узи келмас, келар ёлғиз шарпаси.

Үйлар менинг қувончимдир, далдамдир,
Бу мураккаб, беҳаловат асrimда.
Үйлар менинг эртамга бир қадамдир,
Акс-садосин эшитаман наслымда.

Үйлар умрим денгизида қармоқдир,
Шояд дейман олтин балиқ илинса!
Неки менга насиб этмиш бу тақдир,
Қани әнди олдинроқдан билинса!

Үйлар, ўйлар! Шоду хандон ўйларим,
Баъзан ёруг, баъзан зиндон ўйларим.

1973, февраль

САЙЕХ МЕҲМОН

Узоқдан келибди ҳу ўша меҳмон,
Қошига пешвоз чиқ, кўрсат борингни:
Самарқанд тарихда ажаб бир армон,
Айлантир бирма-бир пахтазорингни.

«Оқ олтин» пахтанинг лақаби бўлди,
Лениннинг назари тушган тупроқда.
Ариққа сув тўлди,
Чўл ҳусни кулди,
Беш қирра юлдузнинг рамзи чаноқда.

Кузгача қолгудай бўлса мабодо,
Ҳашарга таклиф эт пахтазор ичра.
Меҳнат деб аталган бу totли бода
Беланг қилмаса меҳмонни зора!

Пахтазор камоли дасту азмингдан,
Боғларинг кўркида сенинг жамолинг.
Каналлар ёқалаб эсган шамолинг
Куй-оҳанг талашар ёниқ назмингдан.

Тоғларга олиб чиқ — кўрсин виқоринг,
Истаса яхмалак отсин bemalol.
Қанчалар тиникдир чўққида қоринг,
Қанчалар оромбахш қор ўпган шамол.

Қирларни айлантир — бағринг кенглиги,
Газ булоқ она-Ер меҳр-шафқати.

**Бу боғлар ҳуснига топса тенгини
Балли деб, қўлини олгин албатта!**

**Ҳусайнин узиб бер,
Анор эзиз бер,
Супага ўтқазиб шароб сузиб бер.
Тишлари ясама ё нозик бўлса,
Ғалвирак ёнгоқ қўй ё хандон писта!**

**Тонг чоғи уйғоту полизга бошла,
Қовунлар атрига тўйсин димоги.
Истаса ўн хилин кариchlаб ташла,
Ширадан ёпишиб қолсин бармоги!**

**Шундан сўнг меҳмондан қилсанг илтимос,
Боғ кўча айланса бир яланг оёқ.
Сезсин у бу тупроқ қандайин қайнок,
Қанчалар юмшоғу қанчалар серноз.**

**Каналлар қошига олиб чиқ чошгоҳ,
Бу ижод кўркига бўлса маҳлиё,
Тарихин эслатиб, пайт топиб гоҳ-гоҳ,
Сездиргин бу ахир ўзгарган дунё!**

**Қоракўл албатта ёқади унга,
Бир пўстин орзуси бордир дилида.
Қир, чўпон қошида ўтқазиб кунга,
Гапга сол: доврути қалай элида?**

**Истаса суратга олсин bemalol
Оқ лайлак уясин, чинор ковагин.
Мабодо тарихга бўлиб қолса лол,
Беравер синигин Темур тувагин!**

**Ажратса билолса қўйни бузоқдан,
Бу юртнинг ишига қолади қойил.
Дегилки, бу тарих келар узоқдан,
Қалин бир китобдир босгани ҳар йил!**

Дегилки, бу юртнинг нияти құтлуг,
Бу юртда кишилар олий табиат.
Нимаки қилибди меҳри-ла түлиқ,
Нимаки қиласы әлларга ибрат!

Гар меҳри товланса йўлга чиқар чоғ,
Майлий, бер қўлига бир оппоқ чаноқ.
Уйининг тўрига оссин ардоқлаб
Ва юрсии меҳрини дилида сақлаб!

1974

НОЗЛИ ЖОНОН

(Құшик)

Гулзоридан отди нигоҳ,
Күзи ўлдирди-ўлдирди.
Бир сўз қилди кулиб ногоҳ,
Сўзи ўлдирди-ўлдирди.

Акс-садоси ёногимда,
Ширин сўзи қулоғимда,
Атир бўйи димогимда,
Ўзи ўлдирди-ўлдирди.

Нола қилдим — ҳеч билмади,
Ҳолим сўраб бир келмади,
Гул узатсам қайрилмади,
Нози ўлдирди-ўлдирди.

Бунча нозли жонон экан,
Ҳар бир сўзи дармон экан,
Бир кўрмоқлик армон экан,
Изи ўлдирди-ўлдирди.

1975

ДИАЛОГ

— Одаммисан ёки шоир?
Шоир бўлсанг руҳимга кир!
Токи қалбни босмасин кир!
Одам бўлсанг ёнимда юр,
Ер юзидан кетмасин нур!
— Аввал одам, сўнг шоирман,
Шоирлигим ўлжам дерман.
Уфққа тик кўчам дерман!
Иккисини битта тушун,
Муқаддас бил ижод ишин!

1974, сентябрь

И Ж О Д К О Р

Пахтакор! Юртимда энг довруғли касб!
Ҳар йили бир улкан роман битади.
Илк сатрин баҳорда маржондек тизиб,
Кеч кузда тутатиб, кўз-кўз этади.

Ҳар сўзи, ҳар сатри шонли ва нодир,
Ҳар сўзин пардозлар ёз бўйи ёниб.
Ҳар сўзи қалбинга кирмоққа қодир,
Куз келгач чараклаб, кулиб, товланиб.

Меҳнатнинг гули бу, пешона тери,
Юракнинг қўри бу. Қуёшнинг сели.
Оқ тонглар кўрки бу, юмшоқ тун ели,
Она-Ер ҳиммати, ижоднинг зўри!

Пахтакор ижоди қойилмақомдир,
Узлуксиз довруғи чархиfalакда.
Ҳар куни йил бўйи ёниқ илҳомдир,
Иzzату икроми ҳар бир юракда.

Уфқлар чекинар у юрган ерда,
Саҳролар ҳуснини очади забти.
Нур, баҳор уфураг қалбининг тафти,
Матонат гуркирар у юрган ерда.

Шон-шараф изламас терин сидириб,
Мукофот кўзламас суқланиб боқиб,
Шон-шараф юради уни қидириб,
Мукофот келади эшигин қоқиб.

Мақтоворга зеб бермас, ишга куч берар,
Дастурхон тузганда пойгакда ўзи.
Ерини кўрсатса, орқада юар,
Уфқдан нарида ва лекин кўзи!

Сув очса жўякка, лунжин тўлдириб,
«Оҳ, оби ҳаётим!» дея чиранмас.
Унинг-чун сув — сувдир, аста жилдираб,
Тонгтacha мўлжалга етказолса бас!

Энг вазмин ишларни жим ўтайди-ю,
Йилтироқ сўзларни билмайди пухта.
«Оқ олтин» демайди, «пахта» дейди у,
Қалбига яқинроқ оддий сўз — «пахта».

«П»сида поклиги, «а»сида аҳди,
«Х»сида хотамлик, «т»сида тахти.
Охири «а»сида азизлик бордир,
Азизлик азамат сўзига ёрдир!

Манглайин танғиса кун қизигида,
Бу савлат тўкишмас, оддий зарурат.
Салгина жилмайса у мийигида,
Билингки, дилида қаҳқаҳа ҳолат!

Оlamча хирмонни уйиб, у ўзи
Бир четда туради сояпарвардек.
Нотиқлар мақтаса, қисишлиб кўзи,
Хижолат тортгандек қимтинади тек!

Гап-сўзга нўноқроқ, лек фаҳми юксак
Ү учун минбардан ер боши маъқул,
Қалбини туби йўқ бир дengиз десак,
Бетиним тўлқинлар остида нуқул!

Пахтакор — изодкор! Йилда бир роман
Тугатиб, элига этади тақдим.
У ўзи изодкор, ўзи қаҳрамон,
Мен унга ҳамиша ҳавас-ла боқдим.

1975

ЧҮКҚИЛАР

Қирда эдинг, бугун эса тогдасан,
Олдда яна баланд тоғлар турибди.
Үнга чиққач, яна баланд боқасан,
Ү баланднинг қасдида қалб урибди.

Ҳаёт шундай: киши қирда турганда,
Энг пастдаги төгни орзу қиласади.
Үнга чиққач, бошиқа бирин кўрганда
Яна уни ният қилиб қолади!

Умр ўзи чўққиларга интилмоқ,
Чўққиларда ахир нур кўп бўлади.
Интиқ юрак яйраб нурга тўлади,
Чўққилардан кўринади йўл йироқ!

1976, ноябрь

ЕТИЛИШ

**Болари ғувиллаб учади ҳар ён,
Чечаклар шарбати авжида дегин.
Гилосинг тўқ қизил бўлибди чунон,
Саватинг тўғрилаб қўявер секин.**

**Тутни кўр, бандида тутолмай ўзин
Роса гарқ пишгандир, ерга тушибди.
Сап-сариқ олтиндай бўлибди узум,
Демак, у етилиб тоза пишибди.**

**Анжирнинг шираси тилни ёради,
Демак, сен вақтида уни териб ол.
Полизни оралаб дехқон юради,
Дум берган қовунин йигар эҳтимол!**

**Буғдойнинг солланиб туришига боқ,
Қинидан чиққудай бошоқда ҳар дон.
Ғўза ҳам етилган — пахтазор оппок,
Қошида гиргиттон ҳар фидойи жон!**

**Ҳар нарса пишади,
Пишгани аён:
Ё юмшоқ тортади, ё қизил, ё оқ.
Қай рангта киради ақл тўлса инсон,
Ва неча ёшида етилар порлоқ?!**

**1976, октябрь,
Қораболта шаҳри**

F Y H C A

Лабин ҳамон қаттиқ қисганча
Очилмасдан туради ғунча.
Бутун атри ҳали ичида,
Ҳусни, қадри ҳали ичида.
Ҳали-замон кўрсатар жамол,
Озор берманг, эй, эсган шамол!
...Ҳамон лабин очмайди ғунча,
Ким бор, ким йўқ у очилгунча!

1976, октябрь, Қораболта

ЯКУН

Йўлдош бўл умримга, дедим, бир куни,
Жим қолдинг бошингни қуий солганча.
Шу онда жамланди ёшлик якуни,
Йўл юрдим қўлингни қўлга олганча.

Қўлингни қўлимдан қўймайман ҳамон,
Қўлимни қўйворинг, демадинг сен ҳам.
Бошимиз силади замину замон,
Аччиғу чучукни кўрамиз баҳам.

Баъзида қир ошдик, баъзида довон,
Баъзида йўлимиз бўлмади равон.
Баъзида сен ўтдинг олдинга сари,
Баъзида мен кетдим йўл бошлаб нари.

Барибир уфқимиз бир эди — ёниқ,
Бир-бирин дардини биларди юрак.
Ҳа, бундай чоқларда на бир тил керак,
На имо-ишора муштарак, аниқ.

Олтмишга киряпман, бундоқ қарасам,
Кетимдан ёшимни сен ҳам қувасан.
Армонинг борми деб энди сўрасам,
Қўлимни қаттиқроқ қисиб қўясан!

Сочимнинг оқини майин тараиман,
Ҳамон мен кўзингта тўймай қарайман.
Кўзингда ёшлигим ёнади ҳамон,
Ҳамон сен наздимда қошлиари камон!

Ҳамон сен ўн етти ёшдасан, эркам,
Сенинг ҳам наздингда мен ҳам шундайми?
Оҳ, унда бор бўлсин бу гўзал олам,
Ўп дея лабингта юзим тутайми?

Ўртада муаллақ қолади бўса...
Бағрингта ташланар неваранг эса!

Қораболта, 1976, октябрь

ДЕЙДИЛАР...

Дейдилар: фронтда кўзи чиниқиб,
Жангчининг бадани ўлиб қолади.
Мурданинг қўйнига қўлини тиқиб,
Сесканмай ҳужжатин бир-бир олади.

Лекин сен шу маҳал жангчи кўзига
Термилиб қараган чоғинг бўлганми?
Ишонма қўрқоқнинг ёлғон сўзига!
Яхшилаб қарагин жангчи кўзига!

Кўзида ёш билан қоришган алам,
Қуролдош дўстининг меҳри бўлади.
Душманга нафрати ошиб яна ҳам,
Қасосга чақирган қаҳри бўлади!

1976, октябрь

ШУДРИНГ

Шудринг ёнар қуёш чиққунча,
Томчи-томчи марварид дона.
Сен турибсан ҳайрон боққанча,
Дейсан: — Қуёп чиқяпти, ана!

Ҳали-замон эриб кетади,
Ҳали-замон қолмайди бири.
Гүё қуёш уни ютади,
Бунча қисқа бўлмаса умри!

— Сен ачиниб қараб тургандан,
Тўйиб-тўйиб кўриб қолсанг-чи!
Тўйиб-тўйиб завқ-шавқ олсанг-чи!
Мамнун бўлиб шуни кўргандан!

1976, октябрь

ҚИЗ ҚОМАТИ

Қиз қоматин чизганда тақдир
Илҳомининг авжида бўлган.
Шундай онга ҳамон муштоқдир,
Қайтаролмай армонда қолган.

Шундай они қайтганда яна
Нималарга бўларди қодир?
Йўқ, йўқ, бундай онни мардона —
Қайтаришга қодирмас тақдир!

Ўзи бир бор келгану илҳом,
Ёнмас бўлиб мангу сўнгандир.
Буёғи ҳам бўлгану тамом,
Қуийқалари энди қолгандир!

Шундан бери қиз ўзи илҳом,
Шундан бери гўзаллик рамзи.
Олганида она деган ном,
Яна ёниқ шоирлар сўзи!

1976, октябрь

* * *

Сен ерсан, мен омоч, бағрингни ёриб,
Ҳар баҳор күксингга сочаман уруғ.
Булутдан ўтиниб, кундан ёлвориб,
Бахтимга тилайман нам билан ёруғ.

Ер-омоч бирга-ю, нам-ёруғ бирга,
Тўрттови ажралмас ҳусндирир қирга.
Шу ҳусн ҳеч завол кўрмасин дея,
Инсонда баркамол қудрату мия!

Эй, ақли баркамол, қудратли инсон,
Ўзингни вужуд бил, шу тупроқни жон!

1976, октябрь

ЧҮҚҚИ ВА БУРГУТ

**Майли, мен чўққиман, сен эса бургут,
Лекин сен тепамда учма керилиб.
Минг баланд учсанг ҳам толиқиб ёхуд...
Охири қўнасан кўксимга келиб.**

**Мен сенга маконман, сенга куч берган,
Юксакка чорлаган менинг ўзимман.
Чақмоқлар ҳатлагин, булутга киргин,
Бир лаҳза кетмайсан нари кўзимдан!**

**Бургутли чўққиман — бу ажиз унвон.
Лекин сен яшай бил менда беармон!
Чўққида яшашнинг таърифи улуг,
Чўққида олам кенг, чўққида ёруг!**

1976, октябрь

* * *

Қайғудан тўқилган кўз ёши қора,
Аламдан тўқилса зардоб рангида.
Юракка ботдими, билки, тобора
Бардошинг куйдирав мудҳиши зангида!

Шодлик ҳам ёш тўқар нурдек мусафро,
Севгидан оққани оташ тусдадир.
Барига малҳамдир соғ кўнгил, вафо,
Калиди ширин тил, ёниқ кўздадир!

1976, ноябрь

О Н А

Неча кундир ёстиқда боши,
Неча кундир бемор, bemадор.
На ёришар кўнглини қуёши,
На оғзида овқат таъми бор.

Онасининг қошида ҳамон
Ўйнаб юрар бегам қизалоқ.
Ногоҳ оғриб қолди бир замон!
Қани энди кўзин очса, оҳ...

Иргиб турди ўрнидан она,
Боласини босди кўксига.
Доктор сари бўлди равона,
Ўз касали келмай эсига.

Уч кун ўтгач кўз очди қизи,
Қиқир-қиқир кулади, ана.
Шунда она билдики, ўзи —
Касал эди! Бечора она!

1976

АРМОН

Хайрлашдик. Ҳудди ўша дам
Бундоқ боқсам бир тугмачанг йўқ,
Қадаб бер деб айтмадинг сен ҳам,
Қадамадим мен ҳам — фаҳми кам.

Жўнаб кетдинг... Ой, йиллар ўтди.
Ёмғирли тун келди «қорахат».
Шу хат бир ой мени йиқитди,
Бир йил қилди тилсиз ва караҳт!

Йиллар ўтди. Сочларимда оқ.
Хаёлингсиз бир кун юрмадим.
Нега ўша, ўша ондаёқ
Тугмачангни қадаб бермадим!

1976, январь

ИШЧИ ШАРАФИГА

Мен сендан ўргандим меҳнат қилишни,
Мен сендан ўргандим ҳаёт мантиқин.
Сен асло билмайсан жангда қалқишини,
Сен очдинг оламнинг нурли бир қатин!

Мен сендан ўргандим умр қадрини,
Меҳнат шарофати, дўстлик завқини.
Мен сендан ўргандим ижод дардини,
Кўзингда доимо ҳаёт ёлқини!

Сен олам тираги, олам юраги,
Сен олам кўркисан абадул-абад!
Қидирган топади сендан керагин,
Сен ақли расосан, фикри кенг ғоят.

Сен энди мақтаниб қадоқ қўлингни
Ва ямоқ тўнингни ҳеч қилмайсан пеш.
Сен ўзинг қайтадан очдинг йўлингни,
Илму фан йўлдошинг ва техника эш!

Сен билан ўлчайди жаҳон бўйини,
Сен билан қаддини ростлайди жаҳон.
Сен бошлиб берасан кураш куйини,
Жўр бўлиб ёнингда боради ҳар жон!

Дастгоҳда барқарор сенинг нафасинг,
Қирда ҳам барқамол қанотинг бордир.
Осмонга учган ҳам, ишчи, сен ўзинг,
Бу олам қалбингу орзунгта тордир.

**Жамият устуни сенинг кўксингда,
Сен уни мардона тутиб турасан.
Салобат, виқор бор айтган сўзингда,
Сен яшаш бобида ибрат берасан.**

**Назаринг оламни қезиб туради,
Истиқбол тонгидан воқиф юрагинг.
Сен билан сафдошлар мағрур юради,
Ҳамиша муazzам нурли тилагинг!**

**Мен сенинг қошингда бошимни эгиб,
Музаффар ишингга тасанно айтдим.
Сен юрган йўлларга гул-чечак экиб,
Наслимни меҳрингга содиқ улгайтдим!**

**Эй, мағрур синфнинг мағрур фарзанди,
Шу мағрур замоннинг яловдорисан.
Сен энди азамат, суюк, арзанда,
Тарихнинг юк ортган улуғ норисан!**

**Манзилинг уфқлар оша мунаvvар
Манзилинг ҳар қалбга солар ҳаяжон.
Меҳнатда туғилган манзилинг севар,
Манзилинг нур билан йўғрилган жаҳон!**

**Шу жаҳон ҳурмати қўлинг бер, ўртоқ,
Дўстларинг беҳисоб, йўлинг бер, ўртоқ!**

1976, марта

К А П Т А Р

Болтиқбўйи, сўлим оромгоҳ,
Бир неча кун шу ерда турдим.
Ана шунда қантардан ногоҳ
Бир ажойиб ўртоқ орттиридим.

Тўқсон тўққиз хонамнинг сони,
Демак билки, тўққиздир қават.
Олдида бор кичик балкони,
Ўтиргичи — тўқилган сават.

Тўлқинларнинг шовқини шундоқ
Қулоғингга кириб туради.
Қантарлари доимий қўноқ,
Атрофингда ҳуркмай юради.

Менга ёқди қантар ишончи,
Бунча яқин тутмаса ўзин!
Мош ранг кўзи пирпираб пича,
Юлдуз қилиб босади изин.

Нон уқалаб ташладим кеча,
Сув ҳам тутдим бугун қулдонда.
Нақ әрталаб келиб қўнганча,
То кечгача юрди шу ёнда.

Бора-бора қўлимдан дон еб,
Сув ҳам ичди тутсам кафтимда.
Ён хонага ўтсам, кўз тутиб,
Эргашарди ҳатто кетимдан.

На ҳайиқиши, на ҳадиги бор,
На ётсираш кўрдим кўзида!
Ўзин эркин тутаркан жонвор,
Инсон турса ҳалол сўзида.

Тилсиз эди ва лекин ўзи
Бир ажойиб ҳамроҳим бўлди.
Бир кун ногоҳ келмаган кези
Дилда ўкинч ва оҳим бўлди.

Фурсат тугаб, қайтар пайтимда
Раҳмим келиб, кўнглим эзилди.
Силаб-сийпаб турсам кафтиимда
Кўздан бир жуфт ёшим узилди.

Яхши қол, ҳей, тилсиз ҳамроҳим,
Қанотларинг қайрилмасин ҳеч,
Юраклардан жой олиб доим,
Мухаббатинг айрилмасин ҳеч!

1976, февраль, Болтиқбўйи

О Р З У

Сен орзу отининг жиловин тутиб,
Сафарга чиқдингми, асло бўшатма.
Бахтиңг ёр бўларкан довондан ўтиб,
Отингни тушовлаб ўтлоқда ётма!

Довоилар кетида довои бўлади,
Уфқлар кетидан уфқ ёришар.
Мард орзу қилганда етиб боради,
Мард суҳбат бошласа мантиқ ёришар!

Орзулар сўнгандা олам торайиб,
Гўзаллик ҳиссини йўқотар гуллар.
Олисда кўринган уфқ қорайиб,
Тор бўлиб қолади эрганги йўллар!

Орзудан ҳаётнинг доим мағзи тўқ,
Қалбинги яйратиб турган қони шу.
Орзумга етдим мен, энди орзум йўқ,
Деганда одамнинг ўлган они шу!

1976, январь

БАХТНИНГ РАНГИ

Бахт рангини билсайди одам
Уни дарров таниб оларди,
Ё шарпасин сезса ўша дам,
Орқасидан отин соларди.

Яхшиямки, ранги йўқ аниқ,
Турли рангда келиши мумкин.
Уни фақат қалби пок, ёниқ,
Содик киши кўриши мумкин!

1976

ҚАЙМОҚ

Латиш қизи, ёқиб қолди қаймогинг,
Қайси қирда ўтлар сигир-бузогинг?
Ўша қирни бориб кўргим келади,
Бориб кўриб, салом бергим келади.

Ёшроқ бўлсам қолиб кетиб шу қирда
Бирга-бирга сигир боқиб юрардим.
Келганларни мен ҳам сендай шу хилда
Қаймоқ билан меҳмон қилиб турардим.

Ҳазиллашдим, оғир олма кўнглингта,
Меҳмон бўлиб келдим фақат элингга.
Ростинг айтсан ўз юртим ҳам чаккимас,
Қаймоқ билан сийлаб турсанг бўлди, бас!

Қаймогингни таъми кетди тилимда,
Достон қилсам ажаб эмас элимда!

1976, февраль, Рига

ОДАМНИ АРДОҚЛАНГ

«Үйлама шу дардни, ўздан йироқ тут,
Ишонма у гашга, у гаплар ёлғон.
Азобли ҳисларнинг, кел, баҳридан ўт,
Тинч бўлсанг шириндир бу оби ёвғон!»

Тасалли берасан, барчаси тўғри,
Фаҳмим ҳам етади бунинг барига.
Не чора, ҳайдасам ўздан нарига —
Кетмайди бирини алмашлаб бири!

Биламан бу ҳислар кони зиёдир,
Биламан барчаси бекору ёлғон.
Барибир қалбимда қиласар галаён,
Барибир оғзимда тиш ўтмас чандир!

Ўзимга ўз ҳукмим ўтмай қолади,
Гўёки ҳис бошқа, мен бошқа олам.
Ҳа, шунда донолар нидо солади:
Одамни ардоқлаб яшасин одам!

1976, январь

БОЛАЛИК

Болаликда ял-ял кийиниб,
Ипакларга беланганим йўқ.
Тол хивичдан ёғоч от миниб,
Баъзан очу баъзан юрдим тўқ.

Косиб эди отам бечора,
Қатимидаид қисқайди қўли.
Тирноқлари бўлса ҳам қора,
Оппоқ эди заҳматкаш дили!

Қанд-қурс қўйса ўртага онам,
Чўнтағимга олиб соларди.
Гўё инъом этгандай олам,
Кўзларимга боқиб қоларди...

Мана энди ўзим отаман,
Хатто бобо — набирам ҳам бор.
Уша йиллар лаззатин такрор
Хаёлимда баъзан тотаман.

Оҳ, болалик, умримнинг боши,
Очин-тўқин ўтган бўлсанг ҳам,
Кўпроқ йиглаб, озроқ қулсанг ҳам,
Олтиндандир тарозинг тоши!

Оҳ, болалик, тенги йўқ олам,
Қайси йўлдан қайтсам бўлади?
...Оппоқ сочим ўйнаб набирам,
Кемтик тишин очиб қулади!

1976, январь

БОЛТИҚ СОҲИЛИДА

Тўлқинда бемалол қўниб чайқалар,
Бешикда ётгандек аста чайқалар.
Гоҳида юксакдан бургутдек шўнгиб,
Балиқнинг додини беради чўқиб.
Баъзида шамолга ёнбошин бериб,
Қиялаб учади кўксини кериб.
Баъзида осмонда уч-тўртта бўлиб.
Ўзининг тилида сўзлайди кулиб.
Қанотин қилт этмай қўйиб ўзига,
Сузгандек кўринар денгиз юзида.
Чайқалар, чайқалар, ўйноқи қушлар,
Ҳамиша меҳмонни шундай олқишилар!
Бор бўлсин чайқалар, денгиз қушлари,
Ажидир санъатдир қиласи ишлари.
Баъзида қувса ҳам тўлқин кетидан,
Ва лекин қетмайди она юртидан.
Яна шу қирғоққа келади қайтиб,
Денгизу қирғоққа ташаккур айтиб,
Денгиз бор — чайка бор,
чайка бор — денгиз,
Ҳақлисиз иккисин бир жон десангиз.
Иккиси бу юртнинг жонли рамзи, десангиз
Биттаси ўғлидир, бири қизидир!

Қирғоқда турибман: чайқалар учар,
Денгизда оқ ёлли тўлқинлар кўчар...

1976, февраль, Riga

* * *

Түғилғанман ёмон йўлига
Тўсик бўлиб, ғов ташламоққа.
Нур қидирган киши қўлида
Чироқ бўлиб, йўл бошламоққа!

Ғов бўлмасам, йўл бошламасам,
Ишонмангиз баҳт тоғдим десам!

1976, март

* * *

Гар чанқасанг гул баргига сув тутиб,
Олов десанг, чақмоқ узиб бераман.
Керак бўлса қалбим қони, шарт ситиб,
Анор каби бир-бир эзиб бераман.

Лекин менсиз дунё сенга керакми?
Ё кераги сенга фақат юракми?

1976

ҚАЙГУ ВА ШОДЛИК

Қайғунинг ранги бор, қора бўлади,
Ҳиди ҳам бўлади тутунга ўхшаш.
Димоғинг ачитиб, кўздан тўкиб ёш,
Бардошинг чечагин бир-бир юлади.

Шодликдан қуёшнинг ҳиди келади,
Ўзи ҳам ўхшайди гулнинг рантига.
Тугамас нур тўкиб ҳаёт тонгига,
Узоқ бир умрни ваъда қилади!

Мард бўлсанг қайғунинг устига от сол,
Шодликнинг боғида мангу яйраб қол!

1976, ноябрь

ТУРНА ЎТАР

Турна ўтар кўқдан тизилиб,
Энг олдинда борар биттаси.
Учишидан турар сезилиб,
Ана ўша энг бир каттаси.

Тун қоронғи, осмон қоронғи,
Қур-қур деган садо келади.
Энг каттасин сезгир қулоғи,
Ҳар нидони аниқ билади.

Адашмайди қоронғи тунда,
Четда қолмас бирон-биттаси.
Қур-қурининг маъноси шунда,
Энг олдинда зийрак каттаси.

Энг каттаси доно ва зийрак,
Ҳаммасининг баҳтига кафил.
Юраги ҳам тоф бўлса керак,
Бари билан топган аҳил тил!

Турна ўтар кўқдан тизилиб,
Энг олдинда борар каттаси...

1977, февраль

ТРЕПТОВ ПАРКИДА

Трептов паркида турибди солдат,
Бир қўлда бола-ю, бир қўлда қилич.
Қилични қўлидан туширмайди ҳеч,
Болани кимгадир узатар албат.

Хўш, кимга? Ким унинг туққан онаси?
Беш қитъя узатар баробардан қўл.
Кўзида илтижо, дилда ииласи,
Армонли ёшидан ёқалари ҳўл!

У башар боласи, боқар барчага,
Барчада кўради ўз онасини!
Ўйнаса ярашар барча кўчага,
Барча юрт тутади пок сийнасини!

Шукурким, у тирик, омон қолгандир,
Сувларда оқмади, ўтда ёнмади!
Халоскор кўтариб қўлга олгандир,
Мана у турибди кулиб омади!

Ҳеч кимса, ҳеч қачон ўқинтирмас ҳеч,
Халоскор қўлида ялангоч қилич.
Ерга туш, азизим, ўйна, яира, кул,
Йўлингта тўшалгай чаман-чаман гул.

Сен уруш фарзанди, тинчликда яша,
Бахтингни бу жаҳон қиёлсин томоша!

1977, февраль

ГУНОҲИМДАН ЎТИБСАН

Гуноҳни кечира билмоқ ҳам
олижанобликдир.

Л. Толстой

Мен сендан хат олдим. Ўқимасданоқ
Қалбимни чулғади ажаб бир титроқ.
Шу титроқ бир сабаб бўлди-да, эркам,
Хотира ўйларим дилимда қўноқ.

Шу қўноқ ўйларим ипдек чўзилиб
Бир учи сенда-ю, бир учи менда.
Ўртада иккала юрак эзилиб,
Мажолсиз бир-бирин қилмоқда канда.

Кел, эркам, мардлик қил, гуноҳимдан ўт,
Бир қошиқ қонимдан кечу эъзозла!
Ўртада ёнаркан севги деган ўт,
На лозим инграамоқ мунгли овоз-ла!

Севгидан ўйғламоқ ноламас албат,
Илинжу илтижо, илтимос дарди.
Севгига ярашмас аразу ғийбат,
Очиқ дил бўлади одамнинг марди!

Хатингни ўқидим. Ўзга бир титроқ
Руҳимга нур сочиб кирди ногиҳон.
Сен олижанобсан, эй қуёш яноқ,
Ҳар доно сўзингта қурбон бўлсин жон!

Гуноҳим кечибсан! Йўлингда кўзим,
Ҳар соғинч сўзингга фидоман ўзим!
Бу ҳаёт қанчалик гўзал ва хушҳол,
Согиндим, куттирма, оғушингта ол!

1976, ноябрь

А Ф С О Н А

Мен энди биламан: денгиз суви шўр,
Дарёлар сувида баҳор ҳиди бор.
Денгизнинг түғёнли тўлқинлари зўр,
Дарёда олдинга интилиш, виқор!

Иккиси табиат кўркидир, лекин
Иккисин тақдиди икки хил экан.
Эртакка қулогим гар тутсам секин
Бирида гул кўрдим, бирида тикан.

Миллиард йил яшаган кекса табиат
Неча минг авлоднинг қисматин кўрган:
Дунёда ғам-алам бўлгану беҳад,
Пешона шўрини бир-бир сидирган.

Шунчалар кўп бўлган пешона шўри,
Нечалаб денгизлар пайдо қилибди.
Сўнса ҳам кўксига армонлар қўри,
Пешона шўрлари қалқиб қолибди.

Демакки, дунёда бахт анқо бўлган,
Бахт учун тўқилган қанча аччиқ ёш.
Пешона тери ҳам унга қўшилган
Ва асо бўлгандир сабр ила бардош!

Табиат уялган бу қилмишидан,
Тарихлар қаҳридан қўрқсану беҳад,
Қорларни эритиб, тоғлар бошидан
Денгизга оқизган узлуксиз муддат!

«Шоядки дengизнинг шўрини ювсам,
Келажак бўлмаса бу сирдан воқиф»,
Деб юзлаб дарёни унга бурса ҳам,
Дарёлар бетўхтов турса ҳам оқиб.

Шўрини ювмоқقا етмабди қурби,
Фарқ бўлиб кетибди дарёлар беиз.
Табиат бу сирни яширган каби
Денгизлар бетига қишида қошлиар муз!

Шунчалар шўрмиди пешонанг, инсон,
Шунчалар чексизми тўкилган кўз ёш?!
...Дарёлар оқади бетиним ҳамон,
Денгизлар чайқалиб чимиради қош!

1976 ноябрь

ДУНЁ СИРИ

Мен сени севибман: сойдаги сувлар,
Сув эмас, бошқача, нурмикан буткул.
Мен сени севибман: даҳшат, қўрқувлар,
Шубҳалар барчаси ўтмас чақа пул!

Кўкдаги юлдузнинг тили бор гўё,
Жаранглаб сўзлайди, қалбим тинглайди.
Кенгайиб кетгандек кечаги дунё,
Гўёки оламнинг яшарган пайти!

Топларнинг жони бор, деворнинг кўзи,
Ҳаммаси нимадир мендан кутади.
Ўткинчи кишининг ҳар оддий сўзи
Қалбимга қувончдан лавҳа битади.

Дунёда алам йўқ, аччиқ-чучук йўқ,
Дунёда ўлим йўқ, ҳасад йўқ гўё.
Муродга етмайди ёвуз отган ўқ,
Гўёки нур билан йўғрилган дунё.

Кошкийди шу ҳолда қолса бу дунё,
Шу кайфда яшасам, умрим борича.
— Йўқ,— дейди аллаким,—
 мумкинмае асло,
Доимо олмошdir кун билан кеча,
Оқ билан қораю, аччиққа ширин...
Шунда бил дунёнинг муқаддас сирин!

1976, январь

ЮЛДУЗ НУРЛАРИ

**Юлдуздан нур оқар. Балки нурмас,
Юлдузни ер узра йўллаган сўзи.
Бу сўзлар биз учун ҳали машҳурмас,
Маълуммас биз учун ҳали маъноси!**

**Балки у бир куйдир нурга йўғрилган,
Балки у ўз шаклин топмаган асар.
Балки у порлаган ажиб бир маъдан,
Ҳеч кимга бўлмаган билиш мұяссар!**

**Балки у сиридир ўзга оламнинг,
Кўмакка чақиравалки у бизни.
Биз эса англамай бу дард-аламни,
Шуъла деб овутиб юрибмиз ўзни!**

1977, апрель

Б А Р Д О Ш

Узоқдан ҳайқириб, жар солган кўра,
Шу гапни, азизим, қулоғимга айт.
Сир бўлса ўртада қолса-ю, зора,
Бегона кишилар қилоламаса қайд.

Севгининг пинҳони яхши бўлади,
Севгига хос хислат илтижо, илинж.
Севгидан ҳар юрак нурга тўлади,
Гоҳида оҳ уриб, гоҳ бўлиб тинч.

Кенгликни юрагинг истаб қолади,
Елғизлик кўнглингта сиғмайди гоҳо.
Гоҳида очилиб интиқ дил қати,
Сўйлагинг келади то субҳи сабо.

Гоҳида шаталоқ отиб, қувониб
Тўлдиргинг келади оламни куйга.
Гоҳида арзимас бир ҳисдан тўниб,
Даҳшатли фикрлар келади ўйга.

Гоҳида ёстиқни ҳўл қилади ёш,
Гоҳида юрасан паришон бир ҳол.
Ким шулар барига беролса бардош,
Ўшанинг севгиси ростдир ва ҳалол.

1976, ноябрь

ЕЛҒИЗЛИК ҲАҚИДА

Дўстлар! Мени ёлғиз қолдирманг,
Елғизликдан қўрқаман жуда.
Қани бошланг суҳбату оҳанг,
Ўйин-кулги бўлсин авжида.

Е қирларга йўл бошланг, кетдик,
Е ишчини чорланг кеч чойга.
Еки кийиб резина этик
Ов қилайлик ботқоқ тўқайдা.

Е чиқайлик лола сайлига,
Е дўлана терайлик тоғда.
Ўртоқларнинг қараб майлига
Тунаб қолсак майлига боғда.

Йиғим-терим бошланган палла
Қани кетдик, ҳашарга, ишга.
Қани дўстим, чананг тайёрла,
Қорда юрмоқ ярашар қишига!

Қайга бўлса бошла bemalol,
Е қошимда бўлиб тур тез-тез.
Суҳбат бериб, суҳбатимни ол,
Иста кечда, истасанг кундуз.

Лекин ёлғиз қўйинг бир ўзим
Юрагимни илҳом тилгандা.
Завқ-шавқ билан чақнаб бу кўзим
Куйиб-ёниб ижод қилгандা.

Ҳуркиб кетса илҳом париси
Яна қайта келиши қийин.
Минг илтижо қилсанг ҳам кейин
Кўринмайди хонада изи!

Ана шунда тек туринг, дўстлар,
Қилт этмасин ҳатто япроқлар.
Елғизликни севар бу чоғлар,
Елғизликни ҳамиша кўзлар.

Бошқа вақтда қолдирманг ёлғиз,
Елғизликтан қўрқаман жуда.
Ҳеч бўлмаса тепамда юлдуз
Ениб турсин нурлар мавжида.

Лекин ёлғиз қолдирманг ўзим,
Елғизликни жиним сўймайди.
Доим сизни кутади кўзим,
Дўстлар, сизсиз олам кулмайди.

Сизлар борки, бу олам бутун,
Сиздан олган юрагим ўтин.
Сизлар борки, бу осмон тиник,
Фикрим ёник, манзилим аниқ.
Илҳомимнинг боиси ҳам сиз,
Сиз йўлимда йўлчи бир юлдуз.

1976, ноябрь

ТАНБУР СИМЛАРИ

Қўшалоқ совуқ сим танбурнинг тори,
Гавдасин қарасанг бир ҳовуч ёғоч!
Лек унга танишdir ғамгузор зори,
Гар ишқдан ўртансанг юрагингни оч!

Үт бўлиб ёнади қўшалоқ сим ҳам,
Тилингга чиқмаган дардинг айтади.
Ўшанда дейсанки, менинг ўзим ҳам
Йўл топмас боғларга руҳим элтади.

Сен хаёл қилмаган юксакка чорлаб,
Еғдуга кўмади фикру руҳингни.
Ва яна тепангда мақсаддек порлаб,
Нур билан эритар ғам-андуҳингни.

Бу олам кўзингда қайта яшариб,
Ўзга бир жилода жилва қилади.
Қалбингга номи йўқ сирлар яшириб,
Ҳар мушкул сўроғинг осон билади.

Баъзида кўзингга қалқиб чиқса ёш,
Эзғилаб ташлама умид гулинни.
Энг оғир дамларда қилолган бардош,
Охири топади нурли йўлини!

Ким айтди ҳаётнинг бари гулзор деб,
Ким айтди ҳар куни қўшиғу ылла!
Ким олса шодликни қайғудан тортиб,
Ўшанга ҳаёт дер:— Ҳа, баракалла!

Шодлигинг тўғони бузилиб кетса,
Оҳ уриб ўтирма, сен уни тузат.
Ишонма рақибинг ногоҳ қўрқитса,
Гар кучинг етмаса дўстга қўл узат!

Танбурга қулоқ сол: гоҳ ҳазин, гоҳ шўх,
Иккала ҳолда ҳам дилингта яқин.
Ҳаётда ўзгармас руҳий ҳолат йўқ,
Булутда мавжуддир ёмғир ва чақин!

Бу симлар қалб тили, ҳисларинг тили,
Руҳ тили, нур тили, ҳаяжон тили.
Ўй тили, дард тили, кўзларинг тили,
Тиламоч зарурмас кенг жаҳон тили!

Шу оддий симларнинг қудратига боқ,
Оламнинг ташвишин қўйга солади.
Баъзида кўнглингта ёқади чироқ,
Баъзида ҳаётдан кўнглинг қолади.

Бу ҳаёт шунаقا: ранг-баранг олам,
Эй, танбур, қани кел, шўхроғини ол.
Йўқ бўлсин дунёда изтироб, алам,
Барқ урсин шодликка тасаддиқ иқбол!

1976, ноябрь

ҚАРШИМДАГИ ТОҚҚА

Сен мағрур боқасан юксакдан ҳамон,
Елкангни қиздирар ёз бўйи қуёш.
Қорларинг, кўзидан оққанича ёш,
Қўйига бўлади шилдираб равон.

Йўл узра тошларга уриб ўзини,
Атрофга сочади маржон-маржон дур.
Атрофда чечаклар очиб кўзини,
Кўксисда ўйнайди чаман-чаман нур!

Дарёга айланар кейинча бориб,
Қирларнинг қутоёқ насибаси бу.
Илдиздан қуёшга олқиши юбориб,
Бошоқда айтилган қасидаси бу.

Наздимда оқ сочли онасан, тоғим,
Меҳрингни сочибсан чўлга, ўтлоққа.
Меҳрингдан кўм-кўқдир яшнаган боғим,
Меҳрингни кўчирмиш пахтазор оққа!

Сен борсан, оппоқ тоғ, сув кўп бўлади,
Истардим ҳамиша оппоқ бўлиб қол.
Сен борсан чўлларда ҳаёт кулади,
Элу юрт таҳсинин қабул этиб ол!

1976, ноябрь

БЕДАНА

Musa Жалил хотирасига

Тиззадан келади кўм-кўк бедазор,
Бедана тоңгача сайрайди ёниб.
Нималар мадҳини шарҳлайди зор-зор,
Ҳаётда нимага тўймабди қониб?

Ери-ку ёнида. Яна не керақ?
Она юрт ўтлоги турибди яшнаб.
Нималар истайди у оташ юрак,
Куйининг кетидан қуйини бошлаб!

Мен яхши биламан унинг қуйини:
Завқидан, шавқидан билмайди тиним!
Ел ўйнаб бедазор атир бўйини,
Майсалар оҳиста солланади жим!

Мен яхши биламан кўйи сирини:
Кўкалам кенглилка олқиши айтмоқда.
Олқишилар эркини, ўтлоқ, қирини,
Дўстларин чақирап бу гўзал боққа!

Бир маҳал матрабин судраган овчи
Шайига тушди-ю, босди беомон.
Бўлмади бечора ҳолин сўровчи,
Бедазор ҳувиллаб қолди шу замон.

Бедазор ҳувиллаб ётади ҳамон,
Тўрқовоқ ичиди гарип бедана.
Тицирлаб ўзини уради ҳар ён,
Кишилар бегона, атроф бегона!

Қорни тўқ, суви бор, қафасда лекин,
Эгаси муштоқдир унинг куйига.
У эса соғиниб ўтлоғин, эркин,
Сайраш ҳам келмайди ҳатто ўйига!

Шунчалар тор экан бу кўҳна олам,
Дер, нега билмадим аввалроқ шуни!
Қалбини қиймалаб ҳасрат билан ғам,
Бир йилга ўхшарди ҳатто бир куни!

Бир маҳал кўнглига қуиилиб оҳанг
Питбилдиқ, вавагин қўйди баралла.
Ва лекин бу куи эди бошқа ранг,
На хандон куй эди, на жўшқин ялла!

Бедазор куйига ўхшамас эди,
На завқдан маст эди, на ҳавас эди!
Куйларди бедазор қирни соғиниб,
Қуёшга, кенгликка, эркка сифиниб!

Сифиниб, ёлвориб нола қиласарди,
Соғиниб юрақдан ўтлоқ гӯшасин.
Эй, овчи! Тутмасанг нима қиласарди!
Эрк учун туғилган эркда яшасин!!!

1976, ноябрь

СЕВГИДАН ҚҮРҚАРДИМ

Севгидан қўрқардим,
Жуда қўрқардим,
Не кечар ҳолим деб гар ошиқ бўлсам.
Барибир севгидан китоб ўқирдим,
Гоҳ ишим ораси, гоҳо бўш қолсам!

Энди-чи, мен ўзим ошиғи гирён,
Хаёли кўнглимдан кетмайди бир он.
Шунча йил севгидан бебаҳра юриб,
Умрим ўтганидан ҳайронман, ҳайрон!

1977, январь

ЯНА БОЛАЛИК ҲАҚИДА

Болаликдан кетсанг йироқ!
Йўлингга ким ёқар чироқ!
Болалик бу орзу демак,
Орзу билан яшар юрак.
Болалик бу мангут ҳамроҳ,
Баъзизда баҳт, баъзизда чоҳ.
Сочларингга тушса ҳам оқ,
Болаликдан кетма йироқ.
Оҳ, болалик, шўх болалик,
Ҳам гўдаклик, ҳам донолик!

1977, январь

СЕВГИНИНГ ТАЛАБИ

Оламда нима бор вақтли, мұваққат,
Барчаси ўзгариб, оқиб туради.
Фақат бир муҳаббат, қайноқ муҳаббат
Юракдан юракка бокиб туради.

Юракдан бошқани тан олмайди у,
Замину замондан тешіб ўтган ўқ.
Улфати гоҳ шодлик, гоҳида қайғу,
Тожу-тахт, баҳт билан ҳатто иши йўқ.

Фақат бер юракнинг тўрини унга,
Умрингнинг бори-ю, қўрини унга!

1977, январь

ДУНЁНИНГ КЎРКИ ШУНДА...

Сенингча бир оддий юлдуз у ёнган,
Менимча бир олам тенги йўқ қўшиқ.
Сенингча бир қиздир ишқда ўртанган,
Менимча нур ичра йўғрилган ошиқ.

Сен кўм-кўк майсани кўрсанг, ўша он,
Бузогинг етаклаб чиқасан мамнун.
Мен эса майсалар қўркидан ҳайрон,
Балки у шеърга айланажак ун!

Сен тунни уйқуга айни пайт дейсан,
Мен эса илҳомнинг сокин булоги.
Сен тоққа назаринг тушса ҳуркийсан,
Ахир у энг гўзал оҳу ётоги!

Демак, биз икки қалб,
Икки хил олам,
Дунёни кўрки ҳам эҳтимол шунда.
Дунёда бир хилда бўлсайди одам,
Ким шоир, ким косиб бўларди унда!

1977, январь

* * *

Ҳар одамнинг онгида бир қуёш бордир,
Ҳар одам қалбида бир ёргуғ юлдуз.
Шу қуёши ишқидан тақдирни куидуз,
Шу юлдуз тимсоли юксакка зордир.

Қуёшинг булутга кирмасин сира,
Ҳеч шастга тушмасин баланд юлдузинг.
Бахтигни поэлигиг ростликдан сўра,
Хоҳ бахтли, хоҳ бахтсиз сабаби ўзинг!

1977, январь

НА ЗДИМДА

**Наздимда осмонни чинор ва терак
Азамат кифтида тутиб туради.
Дунёни фикри тез, одил, соф юрак
Кўксидা кўтариб олиб юради.**

**Чинору теракни асранг, кишилар,
Бошимга тушмасин десангиз осмон.
Мард, оқил кишини тарих олқишилар.
Мафтуни доимо замину замон.**

**Бор бўлсин ҳамиша чинору терак,
Бор бўлсин ҳамиша одил, соф юрак!**

1977, февраль

ФАҚАТ МЕН ЭСИНГГА СОЛДИМ

Муз бўлди анҳорнинг сувлари қотиб,
Сен музда юрибсан ўғлингни тортиб,
Чананг ҳам сирғанар силлиқ ва равон,
Майда ҳор алайди булут нотавон.
Қийқириб кулади ўғлинг мамнун, шод,
Гўёки шодликдан иборат ҳаёт!
Унутма муз ахир анҳор устида,
Хамон сув оқади унинг остида.
Муз қотган анҳорнинг фақат бетидир,
Остидан ҳали ҳам тўлқин ўтади.
Тўлқинда қувват бор, шиддат ва гирдоб,
Ҳали муз тош экан ўйна, югур, чоп!
Бу оддий ҳақиқат, ҳаммага аён,
Фақат мен эсингга солдим шу замон!

1977, февраль

ҚАНИ ЮР, АЗИЗИМ!

Кимдантир дилингта етибди озор,
Кимдантир йўлингта тушибди кўлка.
Бу ёруг дунёдан бўлгандек безор,
Хонада бурканиб ётмоқлик иега?

Кўз ёш ҳам тўкибсан уялмай яна,
Соқол ҳам босибди юзу кўзингни.
Тун ўтиб, ёруг кун отмоқда, ана,
Кўяга ол, азизим, ахир ўзингни!

Қани тур, дадил бўл, эл ичига кир,
Бу ёруг жаҳонда кўзинг оч катта.
Дунёда ёмондан яхшилар кўпдир,
Яхшиси ўнтадир, ёмони битта!

Битта деб ўнтадан юзинг ўтирма,
Қани тур, азизим, ўксисб ўтирма!

1977, февраль

МАЙЛИ, ХАЙР...

Майли, хайр, эй соҳиби қалб,
Қолар бўлди юрагим бўзлаб.
Ким севимли бўлибди зўрлаб,
Мен бормайман кетингдан иалаб.

Севгинг топсанг мени унугиб,
Мангу баҳтли бўлиб қоларсан.
Баҳтсиз бўлсанг мени ёд этиб,
Балки кунда эсга оларсан!

Майли, эркам, соғ бўл, омон бўл,
Чин дилимдан тилайман оқ йўл!

1977, февраль

ДАРЁ БЎЛСАНГ...

Дарё бўлсанг тошни тошга уриб оқ,
Қуёш бўлсанг сен осмонда кулиб боқ.
Булут бўлсанг раҳматинг қуй, чақмоқ чак,
Чаман бўлсанг гулларинг соч хушчакчақ.
Чашма бўлсанг тиним билмай қайнаб тур,
Булбул бўлсанг саҳар туриб чақчақ ур.
Оҳу бўлсанг оҳу кўзинг яширма,
Арслон бўлсанг босган изинг яширма.
Турина бўлсанг юксаклардан бер садо,
Бургут бўлсанг, қояга қил жон фидо!
Одаммисан эзгу ишдан қўл узма,
Нокасларга шафқат қилма, қўл чўзма!
Яхшиларнинг елкасида бу олам,
Яхшиликни ният қиласин ҳар одам!

1977, январь

ТАШВИШ БҮЛМАСИН ЭЛДА

Кўзим ёниб турибди, демак,
Куним яхши ўтибди бугун.
Нигоҳимда ёнаркан юрак,
Иши ўнгдан келибди, дегин!

Табассумдан яшнаса юзим,
Демак, қалбим қувончга лим-лим.
Кўшиқ бўлиб янграса сўзим,
Демак, қанот ёзибди дилим!

Кўзларимга чўкса чуқур ўй,
Ниманидир ташвиши дилда.
Бунинг бари ўтар, сўрма, қўй,
Аммо ташвиш бўлмасин элда!

1977, февраль

ҮЗИНГДАН ЎЗГАНИ ҚИЛМАСМАН ҲАВАС

Мен сени баҳорим демасман, эркам,
Баҳор ҳам бир фасл — ўтиб кетади.
Мабодо қуёшим дегудай бўлсам,
Жамолин қиши куни булут тутади.

Ой десам, тунда бор, қундузи йўқдир.
Чечак ҳам сал қунда яшиаб сўлади.
Оҳу ҳам демайман, макони тоғдир,
Орамиз баланд-паст, олис бўлади.

Қуббашини нур сочиб турсин жойида,
Оҳуни безовта қилмайлик, кел, қўй.
Чечак ҳам барқ уриб кулсин сойида,
Баҳорни истасанг томоша қил, тўй!

Яхшиси сен ўзинг ўзингсан, эркам,
Ҳар қандай қиёсу ташбеҳлар бекор.
Наздимда тенги йўқ фозилу кўркам
Фақат сен ўзингсан, эй севгилим, ёр!

Шу ўзи кифоя, шунинг ўзи бас,
Ўзингдан ўзгани қилмасман ҳавас!
Маъшуқа кимлигин истаган одам,
Ошиқнинг кўзи-ла қарасин шу дам!

1977, январь

ЧҮҚҚИДА МУЗ КҮРИБ...

Чўққи деб паст-баланд тоғлардан ошдим,
Чўққида муз кўриб ушладим ёқа.
Наҳотки, мен ахир бу гал адашдим,
Наҳотки муз бўлса қалин шунақа!

Дейдилар юз йиллаб эримаган қор,
Юз йиллаб муз қотиб ётади мағрур.
На иссиқ ёз билан унинг иши бор,
На таъсир этади қуёш сочган нур!

Ё тавба! Биз билган шу олов қуёш
Шунчалар ожизу шунчалар сустми?
Қўйган-ку қуёшнинг кўкси узра бош,
Ё тақдир ҳукмida шу иш дурустми?

Қуёш-ла ёнма-ён турса-ю, чўққи,
Музлари сув бўлиб оқмаса, ажаб!
Эй, қуёш! Тоғ суви қирларнинг ҳаққи,
Ҳаққини аяма ортиқча тежаб!

Ё тогнинг бошида сенми бош мироб,
Оламга ҳукмини ўтказган офтоб!

1977, февраль

АЧЧИҚ СҮЗ

Дарёда эшкаксиз борасан сузиб,
Ўзингта яраша қайифинг ҳам бор.
На еллар әсади йўлингни тўсиб,
На тўлқин беради дилингта озор,

Қалбингда бир олам ҳузур-ҳаловат,
Пинагинг бузмайди атроф-теварак.
Ҳеч кимга қилмайсан танбеҳ, адovat,
Бир текис уради кўксингда юрак.

Баъзида қўясан қўшиқ ҳам айтиб,
Мовий ранг уфқа тинч, сокин боғиб.
Эшқак ҳам сурмайсан жонинг койитиб,
Ўзича боради қайифинг оқиб...

Бу хилда сузмоқлик зўр ҳунар эмас!
Дарёга тушдингми, эшкагингни ол,
Тақдирнинг ҳукми-ла ўйнаб басма-бас,
Қайифинг уфқа тўлқин оша сол!

Кимнидир қувиб ўт, кимгадир ёндош,
Кимгадир ҳавас қил, интил, қайнаб-тош.
Тўлқинлар чарх уриб қолсин кетингда,
Марварид тер ёнсин бўртган бетингда.

Ёнгину бошқалар юрагини ёқ,
Бўлмаса дарёдан, қани, четга чиқ.
Бу нима жонсизлик тебраниб бормоқ,
Бу сўзим аччиғу ва лекин очиқ!

1977, февраль

ДАРЕ ЎЗАНИ

Қачонлардир худди шу ердан
Тўлқин уриб оққандир дарё.
Энди эса воқиф бу сирдан
Фақат тарих ва кўҳна дунё.

Энди унинг изи бор фақат,
Қиргоқлари битибди нураб.
Баҳор келса, ниш уриб кўкат,
Ез чиқдими кетар қовжираб!

Қани ўша тўлқин урган сув,
Қани ундан баҳраманд боғ-роғ?
Юрагимга тушади ғулув,
Ачишади ўқинчдан димоғ!

Кимнинг иши — душман қаҳрими,
Е ютганми ногиҳон офат?
Е хасислик қилиб табиат
Кўп кўрдими элдан меҳрини?

Нима бўлса, бўлгандир, лекин
Юрагимда афсус, надомат.
Ўзан бўйлаб юраман секин,
Келажакка тилаб баҳт-омад.

1977, февраль

ТОНГ МАНЗАРАСИ

**Милт-милт этиб учган юлдузлар
Қувиб кетди туннинг изини.
Қуёш аста уфқни кўзлар,
Шудринг билан ювиб юзини.**

**Бобоқхўроз тонгни олқишилаб,
Сўнгги марта қаттиқ қичқирди.
Кўршапалак овини ташлаб,
Шошганича инига кирди.**

**Қумурсқалар қолди ғимиллаб,
Уясидан чиқди бол ари,
Бузоқ қолар ўкиниб, маъраб,
Сигир кетди ўтлоқ қир сари!**

**Қуёш чиқар уфқида боқиб,
Кунгабоқар қиласди таъзим.
Олма келар ариқда балқиб,
Уни кимга оқизибди ким?**

**Тунга қўйган сутини олиб,
Қаймогини сузади кампир.
Иссиқ нонни қўйнига солиб,
Кириб келар чоли ҳам бир-бир!**

**Тонг ҳам оппоқ,
Пахтазор оппоқ,
Оппоқ нурга чайилган ўлкам.
Шу ўлканинг жамолига боқ,
Тонг чогида айниқса кўркам!**

1977, февраль

У Н У Т И Ш

Яхшиямки, киши эсидан
Кўп нарсалар унут бўлади.
Унут бўлиб, унинг изидан
Янги ҳислар оқиб келади.

Ҳеч нарсани унумаса у,
Барчасини олиб қолса ёд,
(Хоҳ шодлигу, хоҳ алам-қайғу)
Қандай даҳшат бўларди, ҳайҳот!

Шундай мудҳиш хотиралар бор,
Жигар-бағринг хун қиласр буткул.
Ииллар ўтиб, устин босиб кул,
Ўқтинг-ўқтинг беради озор.

Баъзисидан битган ярадек
Оғриқ кетиб, изи қолади.
Баъзисидан вайрон қалъадек
Тилга кирмас сўзи қолади.

Шундай бадбаҳт хотиралар бор,
Ўлим ҳиди келиб туради.
Оҳ, бу ҳислар шунчалар ғаддор,
Қайси юрак бардош беради!

Оҳ, унутиш, нодир ҳалоскор,
Яхшиямки, дунёда сен бор.

**Сен бўлмасанг бу ширин ҳаёт,
Қай кўйларга тушарди, ҳайҳот!**

**Оҳ, унугтиш... Сен доим ғолиб,
Ҳар бир юрак сени кутади.
Лекин, афсус, ёмони қолиб,
Яхшиси ҳам ўчиб кетади!**

1977, февраль

ТАШВИШЛИ ДҮНЁ...

Дейдилар дунёга келдинг, кетасан,
Бу дунё ташвишин тортиб нетасан!
Бу дунё ташвишин тарк этсам агар
Сен мендан у ҳолда нима кутасан?

Ташвишсиз дунёнинг қизиги йўқ-ку,
Ташвишдан туғилар интилиш, орзу.
Интилмай яшамоқ дарё әмас, кўл,
Бир кўлки, бузилар ўзидан-ўзи!

1977, январь

ҚУЁШ ОЛАМДА БИТТА

Куни бўйи порлади офтоб,
Куни бўйи нурга ғарқ юрдинг.
Гоҳ тигига беролмасдан тоб,
Ўзни салқин хилватга урдинг.

Қош қорайиб, қуёш ботган чоғ,
Юз-кўзингни нега босди ғам?
Нега ахир ёқмайсан чироқ,
Нега сенга қиласди алам?

Ер шарининг нари ёғида
Ахир уни кутган эллар бор.
Уларнинг ҳам меҳнат боғида
Мева-чева шуълаларга зор.

Ахир қуёш оlamда битта,
Битта унинг эзгу нияти.
Нурга тўйисин инсон албатта,
Ҳар одамнинг келсин омади!

1977, январь

К У Л

Бу кўлнинг номи йўқ картада,
Дарсда ҳам ўтмайди ҳеч бола.
Сал елдан чайқалар юз марта
Ёз бўйи қирғоги гул-лола!

Танийсан турганни у бетда,
Қўшигин тинглайсан bemalol!
Шунчалар кичикки, бу юртда
Бундайдан ўнтасин санаб ол!

Лекин у шунчалар феъли кенг,
Осмон ҳам сиғади бағрига.
Қуёш ҳам остидан боқиб, денг,
Оlamни тўлдирап нурига.

Шу кўлга ўхшайди юрагим,
Оlamни ўзига этган жам.
Жам этиб оламни, ўзи ҳам,
Дер олам ичида тирагим.

1977, февраль

КҮМИР ҚОРАСИ

Кўмирнинг қораси юқса қўлингга
Нимага лабларинг буришиб кетди?
У әса зориқиб ернинг қаърида
Сен билан мулоқот онини кутди.

Сен уни қора деб камситма сира,
Қоралик тақдири бўлса не ажаб!
Оқ бўлиб қора иш қилгандан кўра,
Яхшидир ўз рангин юрса ардоқлаб!

Гар кўмир қорадир, нияти ёруг,
Шу ёруг нияти қанчалар улур!
Шу ёруг оловда нур бор, ҳарорат,
Ҳарорат ҳаётнинг бошидир албат!

1977, февраль

СЕН ТАКЛИФ ҚИЛМАДИНГ

Сен таклиф қилмадинг: ёғди оппоқ қор,
Сен таклиф қилмадинг: келди гул баҳор.
Севги ҳам шу баҳор, шу қорга монанд,
Кутмаган чоғингда қалбинг қиласар банд!

Ижозат сўрмайди севги ҳеч қачон
Ва талаб этади фидо қил, деб жон!

1977, март

ХОТИРА ЧИРОГИ

Кўп нарса йўқотдим ҳаётда дема,
Хотиранг дафтарин бир-бир очиб боқ:
Қачондир олисда йўқолган кема
Интизор кишига ёққандек чироқ,
Ялт этиб кўзингта ташланар бари,
Кўксингда қўпориб түғён, ҳаяжон.
Биридан қувонсанг бола сингари,
Биридан кўзингта тор келар жаҳон.
Сен тотли онларни варақла кўпроқ:
Қалбингни забт этган қайғу лашкари
Шоядки, даф бўлса, чекилса нари,
Кўнглингта ёқилса севинчдан чироқ!
Хотиранг дафтарин, дўстим, очиб тур,
У ерда пинҳондир қанча ёрқин нур.
Кексалик дардидан ўзинг тут йироқ,
Кексалик тун бўлса, хотира чироқ!

1977, февраль

ЕР ҲАҚИДА

«Ердай очкўз бўлма, дейдилар,
Ер тинимсиз одам ютади!»
Йўқ, йўқ, дўстлар, ер жуда сахий,
Барча ризқ-рўз ерда битади!

Шу тупроқдан яралган одам,
Яна ерга кирса не ажаб!
Шу одамнинг ҳаққи-ҳурмати
Ер оламни туради безаб!

Кўкси узра олиб юради,
Ўраб-чирмаб нурли меҳрига.
Вақти етиб, кўз юмса одам
Силаб-сийпаб олар бағрига.

Тиригига минг фидойи жон,
Ўлганида мангу бир макон.
Очкўз эмас, йўқ очкўз эмас,
Сахийликда меҳри бир жаҳон!

1977, февраль

КЕЧИҚКАН СЕВГИ

Ёшлиқда севгидан бўлмадим огоҳ,
Китоблар ўқидим, ўзин кўрмадим.
Энди-чи, сочимга тушганида оқ,
Севгининг юқидан эгилди қаддим.

Ёшлиқка ярашар, дер эдим севги,
Ёшлиқнинг ҳаққи деб қўлмасдим парво.
Ногиҳон қалбимда, оҳ, берди белги,
Шу экан, азизлар, дарди бедаво!

Ошкора қўлмоққа номус букади,
Ошкора этмасам ёнади ичим.
Наҳотки, куйдириб, кулдек тўкади,
Наҳотки, етмаса бардошу кучим!

Олисдан товуши келса кифоя
Вужудим қоплайди ҳаяжон, титроқ,
Деразам ортидан тушса бир соя,
Ўшами, дейману қотаман, эвоҳ!..

Бир оғиз сўзига зору муштоқман,
Тинглашга мадорим етмайди лекин.
Баъзида боқаман унга узоқдан,
Баъзида режалар тузаман секин.

Барибир бу дардим тортмайди енгил,
Барибир қалбимда сўнмас бу олов,

Кундан-кун гуриллаб ёнади лов-лов,
Не кунга қолдинг, эй, нотавон кўнгил!

Қаршимда чуғурлаб, ёғоч от миниб,
Тўрт ёнга бепарво чопади ўғлим,
Ортидан қарасам кўзларим тиниб,
Ўзга бир ҳис билан тўлғанар бағрим!

1977, февраль

ОҚ ТОНГЛАР ҲАҚҚИ...

Мен ҳаёт кўрмадим беташвиш, бекон,
Мен ҳаёт кўрмадим қийнамасдан жон.
Ким деса бу умр доим роҳатда
Ёлғондир, ёлғондир, ёлғон албатта!
Ҳаётнинг тик, равон кўчаси йўқдир,
Бу ҳаёт серташвиши, дардда улугдир.
Ҳаётда роҳатдан заҳмат кўпроқдир,
Барибир умрнинг тонглари оқдир.
Шу тонглар ҳаққи сен чекасан заҳмат,
Заҳмат бор, шунинг-чун шириндир роҳат.
Дунёда энг ширин бўлган фарзанд ҳам
Тўлгоғу дардан сўнг кўради олам!

1977, март

БАХТ ВА БАХТСИЗЛИК

Бахтиёрнинг нони ҳам ширин,
Нияти ҳам топади ўрин.
Йўл юрганда сўқмоқлар сирин —
Билиб олар ҳаммадан бурун.

Бахтсизликдан асрасин ўзи,
Нажот топмас ҳатто ҳақ сўзи.
Иш қилганда иши унмайди,
Қара сўраса, дўсти кўнмайди!

Иккаласи икки миңтақа,
Бири олтин, биттаси чақа.
Бир-бирига ибрат иккиси,
Бир-бирига ибрат даккиси!

1977, март

ДОН

Ерга дон тушади, исмидир уруг,
Нияти мусаффо, эзгу ва ёруг.
Ўзини ер ичра этади қурбон,
Ўзга бир ҳаётга фидо этиб жон.
Эртага ниш уриб чиқади қайта,
Қуёшу тупроққа ташаккур айта!
Яна у гуллайди, уруг боғлайди,
Бошқа бир умрга ўзин чоғлайди.

Шу хилда яшайди пуч эмас, тўқ дон!
Изини йўқотмас фидо бўлган жон.

1977, январь

БАХТ КАЛИТИ

Бахт нимади — билмасдим бурун,
Тасаввурим мубҳам ва тарқоқ
Сен очдинг-ку муҳаббат сирин,
Фикрларим ёришди порлоқ!

Бахт нимади — билмасдим олдин,
Сени севгач у бўлди аён.
Қайда эдинг, эй, бахт калитин
Олиб юрган соҳиби армон!

1977, февраль

ИНСОНЛИГИНГ УЛУҒ...

Сени юлдуз дер эдим, бироқ
Юлдуз тушкүр жуда ҳам йироқ.

Сени денгиз дер эдим, бироқ
Жуда баланд сирғанчиқ қырғоқ.

Сени оқу дер эдим, бироқ
Оқуларнинг маконидир төғ.

Сени дарё дер эдим, бироқ
Сўзларимга солмайди қулоқ.

Сени дердим эркалаб қушим,
Қўниб турмас тушганда ишим.

Сени гулим дер эдим, лекин
Куз келганда сўлади секин.

Сени қуёш дер эдим, бироқ
Қани эди етиб борсам, оҳ!

Нима десам, хулласи калом,
Сенга лойик келмас ўша ном.

Яхниси сен ўзингсан — инсон,
Инсонлигинг улуг, бенуқсон.

Ҳеч бир нарса сенга тенг эмас,
Сендай бағри, феъли кенг эмас.

1977, март

ҒАФЛАТДА ҚОЛМА

Дарёдан қўрқма сен, ахир у дарё,
Биласан сертўлқин, чуқур бўлади.
Кўлмакдан хавфсира! Бўлиб бепарво
Кўп киши сирғаниб дардда қолади!

Тоғлар ҳам хавфлимас, метин тош гарчанд,
Эҳтиёт чорасин кўриб турасан.
Кўчада ётган тош, дўстим, берар панд,
Оёғинг ногиҳон келиб урасан!

Куёш ҳам осмонда ёниб турган ўт,
Ва лекин ўт кетмас ундан ҳеч қачон!
Азизим, гугуртни бир четга бекит,
Гугуртдан ўқинчда қолмасин жаҳон.

Рақибинг аниқми, демак хавфи кам,
Сен ундан доимо зийрак албатта.
Мабодо дўстингдан чиқса муттаҳам,
Ана у қолдирав сени ғафлатда!

1977, январь

МЕН ДАРЁ ӘМАСМАН, АРИҚМАН

Мен дарё әмасман, ариқман,
Шу дарёдан чиққанман оқиб.
Шу дарёга доим боғлиқман,
Шу дарёга тураман боқиб.

Умидим шу: дарё бор бўлсин,
Ийлдан-йилга яшнаб, барқ уриб.
Доим сувга лиммо-лим тўлсин,
Оқсин мангур мағрур ҳайқириб

Дарё халқим, мен ўша ариқ,
Дарё билан тақдирим боғлиқ.
Истиқболим кўраман унда,
Минг ташаккур айтаман кунда!

1977, январь

ТУРКУМЛАР



«ЖАНГЧИ БЛОКНОТИ»ДАН

Сенинг альбомингга

Севишингта ишончим комил,
Яшнаб турган кўзларинг гувоҳ.
Ишқимизга кўнглимиз омил,
Бунга ширин сўзларинг гувоҳ.
Гувоҳликка вужудинг ўтар,
Керак бўлса исбот ва даъво.
Севгимизга кимки қасд этса,
Бўлар албат юзлари қаро.
Бир тиканин кўрмадим раво,
Дардларингта бўлдим қайғудош;
Жангта кетсам, баҳтинг қўриқлаб,
Ҳижронимга берасанми дош?

Г У Л

«Севгимнинг рамзи шу!» — дедим-да, у чоқ
Кўксингда бир тоқ гул қолдиридим ёдгор.
У олтин, гавҳардай азизмас, бироқ
У гулда акс этар биз севган баҳор.
Гулимии кўксингдан ташлама, эркам,

Қоюжираб сўлса ҳам дилимнинг нақши.
Қўнгилеиз ўзганинг даста гулидан
Сенганинг қовжироқ бир гули яхши.

КЎЧАТ

Ери эксан кўчатни дилбар
Нарваришлар гўёки боғбон.
Меваси мўл, эгилса агар
Тирговучга қўймоқ истар жон.
Соясида ўлтириб ҳар ёз
Иўлларига тикар кўзини
Кўчатига шунча меҳри бор,
Қандай севар экан ўзини?!

УКРАИН ҚИЗИГА

Гул тутдинг қўлимга: — Ма, ҳалоскорим!
Гулингни қўлимдан ташламам зинҳор.
Ҳужумда гулингни тутиб юқори,
Олдинга чопарман гўё яловдор.

Номимни сўрадинг айтдим батафсил,
Унутмам, дединг, эй украин қизи!
Эҳтимол ёдингдан ўтгач қанча йил
Туш қаби исмимнинг йўқолур изи.

У маҳал ўзингни қийнама, нигор,
Мунгли куйламасин қалбингнииг тори,
Етарми, исмимсиз демагинг такрор:
«Халоскор йигитим, ўзбек шунқори!»

ҚИЛИЧИМНИ ОЛ!

Ҳужумга отланди шонли эскадрон,
Қиличлар қинидаи суғурилди магрур.
Гўёки уғида ухлаган бўрон
Қон-қора булатлар сари югурап!
Ўқ тегиб, олдинги қатордан бири
Отидан майсага ийқилди беҳол.
Сўнгги бор қиличин тиклаб юқори,
Ҳайқирди: — Қўлимдан қиличимни ол!

ЖАНГЧИ ҚАБРИ

Тўхта, ҳеъй, ўткинчи, тўхта бир нафас!
Тўхтагин ҳаётинг шукуҳи учун.
Осоиши умринг-чун янгратиб зўр сас,
Шон олиб, жон берган эр руҳи учун.
У сенга на ошна, на бир қариндош,
На сенга бир бора ташлаган назар.
На сенга ҳаммиллат, на куйи дилдош,
На тилинг тушунар, ўзга сарбасар!
У фақат сен билан маҳсад ўртоғи,
Сен содик ўлканинг бир граждани.
Эл кулфат кўрганда ушлаб ярогин
Унутди оромни, деди: — Ёв қани?
Тизза бук, бошинг эг, тўхта бир нафас
Улуг жанг қурбони ушбу баҳодир.
Ёрлақа ва эсла — бу гуноҳ эмас,
Майдонда жон берган эр бебаҳодир!

ПОЛЯК ҚИЗИГА

Альбоминг бетида щеърим қолди,
Фақат у сен учун бегона тилда.
Ҳурматинг дилимга муҳаббат солди,
Ҳамроҳим бўлғуси кўнар манзилда.
Яна биз кетамиз гарб сари, эркам,
Жанг, сафар тебратар ёшлиқ бешигим.
Шеъримга термилиб ўқолмасанг ҳам,
Десанг бас: — У очди баҳтим эшигин!

МЕН ТИРИК

Мана мен тириқман, йиғлама она!
Йиғлама, сатқайи кўзингнинг ёши.
Ғам шами қошида бўлма парвона,
Йиғлама, ботмаган умринг қуёши.
Еч, сна, эгнингдан одми кўйлагинг,
Шодлик либосини айла намоён.
Ки, қалбда сақлаган эзгу тилагинг
Яхшилик мулкида бўлсин ҳукмрон.
Йиғлама ув тортиб ҳар лайли наҳор,
Шайтоний хаёллар эзмасин дилинг,
Роз айтиб сувларга боқмагил зинҳор,

Гам юки эгмасин қоматинг, белинг.
Елгизинг, арзанданг ўлмаган, ҳаёт!
Ўлмаган ниятинг ўлмаган каби!
Дўстларга шарафу душманга лаънат
Дейишдан тинмаган, тинмайди қалби.
Шум ўлим бешиги белолмас уни,
Гўр — ўлим бешиги қилади торлик.
Ҳаётга муҳаббат — қалбим ёлқини,
Ўлимдан минг марта қилади зўрлик.
Мен учун бичади кўп фашист кафан,
Ва лекин ўзлари ўралар унга.
Кимда-ким бирорга ҳозирлар кишан,
У ўзи тушади кишанли кунга!
Биз уруш очмадик, ўзингга аён,
Чаманга юзланди ногаҳон оғат.
Яхшими шу ҳолда жим турса боғбон
Ки, кўкка соврилса қилгани меҳнат?!
Жанг йўли хилма-хил, билсанг, онажон,
Гоҳ ҳужум қиласан рӯбарўсидан.
Гоҳ ганим ортида юриб кўп замон,
Ҳужжатлар йиғасан қонли изидан.
Мен ўглинг, Ғуломжон, тириқман, салом!
Салом, эй, муштипар, меҳрибон она!
Салом, эй, дардимда ҳар узун оқшом
Ғам-ғурбат шамида куйган парвона.
Салом, эй, давлатим, муҳтарам ота,
Хатимни ўқисанг дардинг енгиллар.
Салом, эй, бир қалдан баҳтина талашиб,
Туғилган жонажон, эрка сингиллар!
Кечиринг, узоқ вақт ёзолмадим хат,
Кечиринг, қайғуга қўйдим сизларни.
Фашистни тугатиш билан бўлиб банд,
Ёшга тўлдирибман ташна кўзларни.
Қиличим қўлимдан тушмаган ҳали,
Бетида иссиқ қон қотмаган ҳали.
Қасосим юлдузи ором олгали
Ғалаба кўкида ботмаган ҳали.
Фақат ёв ортида юрдимиз кўпроқ,
Шароит бўлмади хат ёзмоқ учун.
Тоғ ошиб, сув кечиб, пайт пойлаб ҳар чоқ,
Кўрсатдик душманга қуроллар кучин.
Кутингиз, ғалаба муддати яқин,
Шон билан, жон билан қайтаман албат.

Ҳақиқат уфқида музaffer өлқин
Нур берур оламга!
Үруш мувакқат!

ИЛТИМОС

Чегара чизигин ўтди-ю, солдат,
Ўқ тегиб тўхтади метин тўшидан.
Олдинга қаради: ҳужумда дўстлар,
Нигоҳи ёришди кетмай ҳушидан.
Кўкрагин гижимлаб мук тушди, лекин
Кўзини тикарди йироқ-йироқقا.
Кўзини абадий юмаркан, деди:
— Жасадим кўмилсин она тупроққа!

УМИД УЗМАДИМ

Озмунча жанглар қилмадим мен,
Озмунча қонлар кечмадим.
Озмунча тоғлар ошмадим мен,
Озмунча сувлар ичмадим.
Неча бора ўқ есам ҳам,
«Бас, етар жанг» демадим!
Энг оғир дамларда ҳам
Жим ётиб жон бермадим.
Бахт-саодат юлдузидан
Ҳеч умидим узмадим!

ЖУГРОФИЯ ҮҚИТУВЧИМГА

Сиз дедингиз бир куни дарсда:
«Қани кўрсат Берлинни, ўғлон!»
Жавоб бўлмай сиз кутган тарзда,
Муаллимим, уялдим чунон...

Жангта кирдим ва ўша савол
Хаёлимда жонланди такрор.
Бир сиз эмас, жаҳонга бу гал,
Кўрсатишга айладим қарор.

Муродимга етдим кўп масур:
Мана, Берлин, оёқ остида.
Ғолиб байроқ ҳилпиар мағрур
Кўҳна, машъум Рейхстаг устида!

Энди айланг, майли, имтиҳон,
Майли, сўранг Германияни!
Майли, агар тутилсам бир он,
Уялтиринг, эй устоз, мани!

Фашист юрти — кафтим чизиги,
Бутун юртин ўтдим қадамлаб.
Ҳаммасидан шуки қизиги:
Ола билдим барини қамраб.

Нишон олиб бу ваҳший инни
Босиб ўтдим йўлда нечасин.
Энди сўранг мендан Берлиннинг
Хатто майда-чуйда кўчасин!

ЭНДИ БИЛСАМ

Куттак дилдор!
Зўр синовдан — тўрт йиллик жангдаи
Олиб ўтдим севгингни омон.
Эй вафодор!
Ихлос билан ёзган номангдан
Ва сабрингдан ором олди жон.
Азиз эркам,
Энди шубҳам йўқдир албатта,
Десанг агар: — Жондан севаман!
Энди билсам,
Олтин ўтда, инсон меҳнатда,
Ишқ ҳижронда синалар экан!

БАЛКИ...

Жанговар йилларнинг эртаги узун,
Хар ўқнинг учиши ўзи бир достон.
Сўпама, қўй, эркам, ўйла келгусин.
Қўй, кўзни яшнатсан истиқбол — бўстон.

Бир лавҳа айтмасдан кеча тугайди,
Бу ёзнинг тунлари қисқа шу хилда.
Хар оқшом сочингдай узви бўлсайди,
Хикоям тугарди балки бир йилда!

1941—1957 йиллар

КАВКАЗ ДАФТАРИ

ВАЪДАГА ШОШГАНДЕК

Турсунойга

Кузатдииг, мен кетдим узоқ сафарга,
Кўзингда йилтиллаб қолди ҳижрон — ёш.
Хаёлан ўзингни отма ғам — жарга,
О, умр йўлдошим, меҳри бир қуёш!

Ўксима, ёшинг арт гул ёногингдан,
Оқ йўллар тилаб қол, кулиб, қувониб.
Ваъдангга шошгандек қизлик чоғингда
Қошингга қайтарман соғиниб, ёниб!

Ахалихе, 25 август, 1959

ШАУМЯН ҲАЙКАЛИ ҚАРПИСИДА

Бир құчоқ гул билан қошингга келиб,
Қаршиғда бош әгиб, тиззамни буқдим.
Ҳаётинг йұлдан миннатдор бўлиб,
Бир томчи ёш билан қалбимни тўқдим.

Қалбимда бор эди меҳрим, ҳурматим,
Шу меҳр қошингта етаклаб келган.
Шу меҳр қалбимга ғулгула солган,
Йўл олис, қийин деб қараб турмадим.

Ассалом! Бургут кўз, оташин юрак!
Ассалом! Кавказнинг шонли шунқори!
Сен кураш байробин тутиб юқори
Истиқбол тонгига боқдинг кўп тийрак!

Кўзингта қарасам, кўзингда ҳамон
Үлмаган қалбингнинг ўзи ёнади.
Кўзингта қарасам, бу ёруғ жаҳон
Бахт билан тўлғаниб, минг тоеланди!

Кўзингда ҳаётга ҳали тўймаган
Инсоннинг кураши, муҳаббати бор.
Кўзингда ёв кўзин тубдан ўймаган
Баҳодир жангчининг ўч, нафрати бор.

Кўлингта қарасам, кафtingда ҳамон
Ленин қўлларининг иссиқ тафти бор!
Кўксингта қарасам, кифtingда ҳамон
Жанг — кураш юки бор, ғолиб забти бэр!

Кўзимга нур тўлди боқсам кўзингта,
Қалбингдан қалбимга журъатинг оқди.
Суқланиб боқаман шонли изингта,
Изинг кўп шарафли, изинг порлоқdir.

Майлига қурашда ўртансам, ёнсам,
Майлига элликка етмасин ёшим!
Майлига сен каби қонга белансам,
Ўқлардан галвирак бўлса бу тўшим!

Сен қилган хизматнинг юздан бирicha,
Шаумян, қилолсам ҳалиқимга хизмат;
Миннатдор бўлардим умрим борича,
Ҳаётдан, баҳтимдан, тақдирдан беҳад!

Ленинакан шаҳри, 16 сентябрь, 1959

Б О К У

Яна келдим, шонли Боку, сени сўроғлаб,
Яна келдим, юрагимга меҳрингни боғлаб.
Яна келдим, кўчаларинг бир-бир кезай деб,
Яна келдим, денгизингда яйраб сузай деб.
Шинель кийган ёшлигимни согиниб келдим,
Ёшлиқ ўтиб, соchlаримга оқ иниб келдим.
Шинель кийган у йилларим ўзи бир китоб,
«Милтиқ тут!» деб Ватан унда қилганди хитоб.
Хитоб билан жанг борарди чексиз майдонда,
Хитоб билан иш борарди заводда, конда...
Хитоб билан минар эди отга чавандоз,
Хитоб билан келар эди ҳатто қишу ёз!
Чироқларга ниқоб тутиб тунинг ўтарди,
Ғалабага кўзни тикиб кунинг ўтарди.
Кўзларингда ёнар эди ишонч ва виқор,
Кўзларингда эрир эди ғазаб мисли қор.
Кўзларингда қон бор эди, қасос бор эди,
Шон бор эди, нафрат тўла бир соз бор эди.
Самад Вурғун у чоқларда барҳаёт эди,
Шеърлари жангчиларга бир қанот эди!
Минбарлардан сўзлар эди оташин нутқин,
Гўё ёвга отар эди адашмас ўқин!
Ёшлиқ эди, муҳаббатим оҳор тўкмаган,
Ёшлиқ эди, белларимни қайгу букмаган.
Ёшлиқ эди Каспий қаби бетиним, ўйноқ,
Ёшлиқ эди, қалби қайнок, иқболи порлоқ!
Ёшлиқ эди, шинель кийган, шинель ярашган,
Ёшлиқ эди, ёвга қарши нафрати тошган!
Худди шунда кўриб қолдим гўзал Зебони,

Зебо эмас, баҳт пуркаган тонгги сабони!
Йўлларимиз бирга тушди, фикр, ният ҳам,
Яна кўркам кўринди-ю, бу кўҳна олам,
Мұҳаббатнинг кўзи билан боқдик қайтадан,
Орзу тўла елканида оқдик қайтадан.
Олиб кетди йироқларга бермай тизгинин...
Шунда билдим муҳаббатнинг олов кўзлигиги!
Шунда сенинг гулбоғингда юрганман, Боку!
Ўйга тўлиб қирғоғингда турганман, Боку!
Олтин бўлиб кўринарди қуминг, тупроғинг,
«Мен — баҳорман!» дерди ҳатто сариқ япроғинг!
Жангта кирдим шу тупроғинг, япроғинг учун!
Зебо билан кезган еrim — гулбоғинг учун!
Тошкент бўлиб кўринардинг кўзимни юмсан,
Иккинга ҳам хат ёзардим соғиниб, қўймасб;
Кутар эди йўлларимни Тошкентда онам,
Сенда эса, гўзал Боку, севгим, парвонам!
Икки меҳр юрагимда қуёшим эди,
Оғир дамда мадад берган йўлдошим эди.
Иккисини эслаганда қонли жангнинг ҳам,
Машаққати ўша онда топарди барҳам!..
Уруш экан, Зебони ҳам тортди бағрига,
Бағригамас, қайтиб келмас қора қаърига!
Уруш битди. Мен бағрингга қайтдим саломат,
Аммо Зебо унда қолди! Урушга лаънат!
Лаънат бўлсин севгимизнинг у жаллодига!
Лаънат бўлсин уруш деган машъум отига!
Лаънат бўлсин уруш деган қора ниятга!
Лаънат бўлсин уруш севган шум сиёсатга!

Шундай, Боку, қора тутиб кетганман сендан,
Аммо сенга меҳрим ҳамон самимий, чиндан!
Илк севгимнинг доясисан, мураббийисисан,
«Салом!» десам, «Қучоғимга хуш келдинг!»

дейсан.

Мана келдим, Боку, яна сени сўроглаб,
Кўкрагимга муҳаббатинг гулларин боғлаб,
Ўлгунимча сиқиб турсам кафтингни дейман,
Қора шароб каби ичсам нефтингни дейман.
Зебо юрган кўчаларни кўрай деб келдим,
Ҳар чечакдан хуш нафасин сўрай деб келдим.
Айт-чи, Боку, қай кўчангда унинг изи бор?
Қайси боғда, қайси гулда хушбўй иси бор?

О, Бокуниңг үпган қайсар еллари,
Кечакундуз тиним билмай эсар еллари,
Қўлларимдан тутиңг, кетай сиз билан бирга,
Зебо юрган, Зебо қурбон бўлган у ерга!?
Яна келдим, шонли Боку, сени сўроғлаб,
Муҳаббатинг кўкрагимда сақлаб, ардоғлаб,
Вишкаларинг кўзларимга танишдир, таниш,
Аммо сенга мумкин эмас бир бокиб қониш.
Ҳар кўчангнинг таърифига бир достон керак,
Денгиз — сиёҳ, қоғозига кенг осмон керак!
Кўрсам яна қўшилибди ҳуснингта ҳусн,
Ҳар тонгигда шафаги бир шонли келгусин!
Меҳнатингнинг самарасин йўргаклаб тунда,
Истиқболга минг кўз билан боқасан кунда.
Туниңг кўркам, тонгинг эса, ундан гўзалроқ,
Истиқболинг чироқлари, биламан, порлоқ!
Гўзал Боку, сени жондан соғиниб келдим,
Ким ёшлигин соғинмайди, қани айт-чи, ким?
Ёшлигимсан, илк севгимсан, жонажон Боку!
Еруғ жаҳон тургунича бўл омон, Боку!

Боку — Тбилиси, 27 июль — 30 август, 1959

САМАД ВУРҒУНГА

Дунёга келдингу кўзинг очмасдан
Бигиллаб йиглэдинг, нолиб йигладинг.
Фарзандга интизор онангнинг қасдан —
Меҳрини ўзинта қаттиқ боғладинг.

Улгайдинг эркин, шод, мағрур, бахтиёр,
Номингни порлатди ақлинг қуёши.
Номингни зар билан ёзди ҳур диёр,
Ишингдан миннатдор кексаю ёши!

Фурсатинг етди·ю, ўтдинг дунёдан,
Қора ҳошия тутди байроқقا Ватан!..
Сен ёруғ дунёга йиғлаб келдингу
Умрингдан миннатдор, шод қулиб кетдинг.
Жонажон элингни йиғлатиб,
мангу —
Номингни дилига ёд қилиб кетдинг!

Ахалихе, 31 август, 1959

ЖИМ ТУРИНГ, ҲОЙ, ЕЛЛАР...

Жим туринг, ҳой, еллар, эсманг бу ердан,
Эсмангиз, ўтиниб сўрайман сиздан!
Ўргилиб кетайин қанотингиздан,
Ўтиниб сўрайман, кезманг бу ерда!

Кўрингиз, ҳар қабр усти бир чаман,
Уларни совурманг ногиҳон эсиб.
Кетмасин тупроққа бекорга тўзиб,
Шундай ҳам сиз юрган боғу қир чаман.

Ҳар мармар остида ётар бир одам,
Бузмангиз уларнинг уйқусин, тушин.
Бу ерда дам олар инсонлик бурчин —
Шарафла ўтаган Самад Вурғун ҳам!

Жим туринг, ҳой, еллар, ғувламанг, эсманг,
Ҳориган Вурғуннинг уйқусин бузманг!

Боку шаҳри, 27 сентябрь, 1959

ОТЕЛЛОДЕК СЕВОЛСАМ ЭДИМ...

«Отелло» балетини Тбилисида
кўришим муносабати билан.

Отеллонинг рашки қурсин деб,
Туни бўйи йигладинг юм-юм.
Туни бўйи боғчамизга сеп —
Ёйиб чиқди баҳор, боқ, ойим!

Гулни яхши кўрганидан ҳам
Баъзан киши уни узади:
Баргларидан буғланмай шабнам
Бечора гул бевақт тўзади.

О, севгилим! Муҳаббат юртин
Отеллодек ким забт этмиш, ким?!
Отеллодек севолсам эдим,
Отеллодек рашқ ҳам қиласардим!

Август, 1959, Тбилиси

АРМАНИ РАҚҚОСАСИ

Анжела Шахнабатянга

Анжела, армани рақсининг кўрки,
Мунчалар саҳнага ярашмасанг, жон!
Қошингга қўнибди армани бўрки,
Белингни камар ҳам қисмиш беомон!

Кўксингга ташланган икки қамчи соч,
Сочми ё тўшингда тўлғанган илон?
Мунчалар саҳнада отмасанг қулоч,
Мунчалар демасанг мафтунингга: ён!

Мен сенинг рақсингда Зангу тўлқинини,
Армани тоғларин ғуурорин кўрдим.
Мен сенинг рақсингда қуёш ёлқинини,
Арагац чўққисин қор нурин кўрдим.

Рақсингда халқингнинг асрий фарёдин
Бегона юртларда дайдишин кўрдим.
Мен сенинг рақсингда ўз она юртин —
Согиниб эртаклар айтишин кўрдим.

Мен сенинг рақсингда севган юракнинг
Дардини, рашкини, орзусин кўрдим.
Мен сенинг рақсингда ёниқ тилякнинг,
Умидвор бир қиззинг нақ ўзин кўрдим!

Мен сенинг сиймонгда мағрур, баҳтиёр
Армани қиззинг рамзини кўрдим.
Анжела! Рақсингга тўйсайдим бир бор
Азроил: «Жон!» деса, «Майли, ол!» дердим,

23 сентябрь, 1959, Ереван

ТОҚҚА ЧИҚДИМ...

Тоққа чиқдим ўшгирларни ёқалаб,
Пастда қолди минг бир кўзли булоқлар.
Пастда қолди булутларни орқалаб
Терга ботган ягрини кенг, зўр тоғлар.

Пастда қолди чашмаларнинг бўйидан
Хуркиб қочган оҳуларнинг тўдаси.
Пастда қолди дарёларнинг қуйидан
Нусха олган дайди қушлар шўх саси.

Пастда қолди енгил-сигил кўчган у
Сувга чиққан гуржки қизи — қалам қоши.
Пастда қолди чўққилардан учган-у,
Мўъжизадек қўниб қолган харсанг тош.

Тоққа чиқдим, тоққа эмас, чўққига,
Тўрт тарафим тизза бўйи музли қор.
Чўққи тураг табиатнинг дўқига
Парво қилмай аср бўйи пурвизор!

Дейдиларки, бу чўққига бургут ҳам
Қанот қоқиб чиқа олур камдан-кам.
Ана қуёш, қўлим етар гар чўzsам,
Елғиз удир менга бунда бир ҳамдам.

Йироқларга кўз ташладим тик туриб:
О, нақадар гўзал экан бу жаҳон!
Шеър битдим чўққи узра ўтириб,
Қуёш бўлди ёнгинамда сиёҳдон!

*12 август, 1959, Арагва қирғози, Чўхи
қишлоғи*

КОШКИ ЯНА АДАШСАМ...

Тогда юриб, чечак териб
Бирдан адашдим.
Ўз изимга тушмоқ бўлиб
Неча тоғ ошдим.
Қани у йўл, қани у из,
Қани у сўқмоқ!
Мундоқ боқсам турар бир қиз,
Гўзал, оқ томоқ!
— Адашдингми? — деди кулиб,
Кулиши қувноқ.
Кўзи кўқдан юлдуз юлиб —
Олгандек порлоқ...
Бошлиб бориб анча ерга
Деди: — Бундан кет!
Мен қизариб ботдим терга,
О, қўзлари ўт!
Кошки эди яна бир бор
Адашсам тоғда.
О, қаршимдан чиқсанг дилдор,
Сен ўша чогда!

Тбилиси, 16 август, 1959

ЭСДАЛИК ХАНЖАР

«Кавказдан ёдгор!» деб, қайтар пайтимда
Қўлимга садаф соп бир ханжар тутдинг.
О, мени жуда ҳам миннатдор этдинг,
Мақтаниб юраман она юртимда!

О, дўстим, бу совғанг чин дўстнинг иши!
Бошингта қора кун тушаркан, инон,
Ханжарни қўлимда тутиб ўша он
Турарман ёнингда ёвингга қарши!

Ахалцихе шаҳри, 21 август, 1959

МУҲАББАТ ХИЁБОНИ

Боюнчаги Киров номли паркни айланиб юрар эканмиз, ёш шоир Жаҳонгир Мамедов салқин, кўкаломзор, сердараҳт ва ўртасидан тик йўл ўтган бир жойни кўрсатиб, бу ер «Муҳаббат хиёбони» деб аталишини айтди.

Кошкийди муҳаббат йўллари шундай
Равону гулларга бурканган бўлса!
Кошкийди қалб унга ўрганган бўлса,
Хаётин ёритиб ўтарди кундай!

Афсуски, эй дўстим, севги йўллари
Тиканли, чақиртош ва қингир-қийшиқ.
Барига бардош-ла чидаган ошиқ —
Бошини чулғайди мурод гуллари!

Мен қалбан истардим: ишқи хиёбони
Шу ердай равон, тик ва ёруғ бўлса!
Севигига садоқат, гул тўлуг бўлса,
Битарди мангуга ишқи биёбони!

Яшасин соғ юрак, яшасин ҳаёт,
Муҳаббат аталган қайрилмас қанот!

Боку, 30 июль, 1959

ТБИЛИСИ

Тоғдан боқдим сенга тунда, Тбилиси,
Минг кўз билан оғушингта имладинг.
Меҳринг билан юрагимни эмладинг,
Ўлгунимча асти ўчмас бил, изи!

Чуст дўйнимни ўнг чаккамга қўндириб,
Кезиб чиқдим парку майдон, кўчангни.
Таърифига сўз етмайди кечангнинг,
Безагансан ҳар қадамни дўндириб.

Чашма сувинг ичган эдим, қалбимдан —
Илҳом бўлиб қайнаб чиқди тилимга.
Қўшиқ қилиб олиб кетдим элимга,
И non! И non! Асло тушмас лабимдан!

Метехида¹ Ладо ётган хонада
Горькийнинг ҳам изи бўлса не ажаб!
Истиқболнинг ўйин сурган кечалаб,
Бўрон қуши ухлар эди қонида.

Лермонтовнинг нафасини қидирдим,
Лаббай!— дея нидо берди елларинг.
Арчазорга олиб кетди йўлларинг,
Ўша ерда таърифингни битирдим.

¹ Метехида — Тбилисида, Кура қиргогида эски бир қалъа. Бунда Ладо Кецховели, Горький, Камо, Цулукидзе қамоқда бўлган.

Кумуш камар белларингда Мтквари¹,
Салом олиб келар қорли тоғлардан,
Үнгурлардан, даралардан, боғлардан,
Тўлқинлари тиним билмас сарсари!

Шу тўлқиндай қалбинг урар бетиним,
Кўм-кўй шаҳар, кўркам шаҳар, гул шаҳар!
Кўқдан ёғар тунда — кумуш, кундуз — зар,
Ярашади Тошкент деса гар иним!

Бир кафт тупроқ олиб кетдим ерингдан,
Тошкентимнинг кўчасига сепсан деб.
Иккисини қўшиб туриб ўпсан деб,
Ола кетдим унга қўшиб меҳрингдан!

Бири оға, бири ини — қардошмиз,
Фикримиз бир, орзумиз бир, манзил бир.
Истиқбол бир, баҳт-иқбол бир ва дил бир,
Ўлуг сафар йўлларида йўлдошмиз!

Тоғдан боқдим сенга тунда, Тбилиси,
Минг кўз билан оғушингга имладинг.
Меҳринг билан юрагимни эмладинг,
Ўлгунимча асти ўчмас бил, изи!

Тбилиси — Xашури, 5 сентябрь, 1959

¹ Мтквари — Куранинг гуржи тилидаги номи.

КУРА

Кура! Кура! Машҳур дарё, шўх дарё,
Тоғли дарё, боғли дарё, ўқ дарё.
Минг шеърга кириб борган тўлқиндай,
Шон-шарафда тенги қури йўқ дарё!

Ҳар тўлқини бир шеъру соз шеър,
Харсанглардан сакраб ўтар мисли шер...
Қирғоғидан боқиб турдим суқланиб,
Балки Пушкин боқиған қирғоқ нақ шу ер.

Минг-минг чашма манбаидир, эшидир,
Тошда нақшлар унинг ижод ишидир.
Салом дедим Сирдарёдан, Амудан,
— Иш қалай? — деди,
Дедим: — Яхшидир!

Тунлар бўйи уйғоқ, дедим, айқириб,
Бўз ерларга кириб борар ҳайқириб.
Нафасида сажоват бор, ҳаёт бор,
Қишлоқларга чироқ ёққан нур бериб.

Деди: — Қандай олижаноб ишда банд!
Бу хабар-ла қилдинг мени кўп хурсанд.
Қайтар чогинг қардошимга салом айт,
Мартабаси бўлсин бундан ҳам баланд!

Варзия, 23 август, 1959

КАЗБЕК

О, Казбек, улуг төғ, машҳури олам,
Ўзингга ярашар бастинг, виқоринг.
Қуёшга қўшнидек яқин турсанг ҳам
Нечундир бошингдан аримас қоринг.

Бошингни тирноқлаб кетибди елинг,
Бир яхши тароққа муҳтож, зорми у?
Тамара давридан қолган қорми у?
Боқ, бордир излари Руставелининг!
Ёки у қарилик сочими оппоқ?
Кексалик ёшими оққан ирмоқлар?
Бошингга кийдингми ё момиқ папоқ?
Юзингда ажинми қатма-қат тоғлар?

Ҳар харсанг тошингнинг бир тарихи бор,
Ҳар томчи сувингнинг ўз кўз булоги.
Кўксингда ўтлайди бўлиб миннатдор
Бадавлат юрtingнинг қўю улоғи.

От чопса гумбурлар унгуринг, даранг,
Куй чалса беради жаранг, акс-садо.
Ўқ отса чўққингга етади аранг,
Музофар қаддингта жон бўлсин фидо!

О, Казбек, чўққингга чиққаним замон
Яна ҳам чиройли кўринди олам.
Сен юксак, сендан ҳам юксакдир инсон,
Қуёшга энгагингтираб турсанг ҳам!

Ахалцихе шаҳри, 23 август, 1959

ТАМАРА ҚАЛЪАСИ

О, инсон билаги, инсон билаги,
Нақадар улуғвор куч-қудратинг бор.
О, инсон идроки, инсон юраги,
Минг йиллар яшаган шон-шуҳратинг бор.

Тамара қалъаси кўрганим заҳот
Тасанно ўқидим ақлу кучингга.
Шунчалик ирода, бардош, куч наҳот,
Сиголса чумчукдек қалбинг ичига!

Бир бутун қоятош бағрини ўйиб,
Юздан кўп ҳужрали қалъа солибсан.
Лаънати қул меҳнат қаҳрида куйиб,
Тонг саҳар елларга балки қолибсан.

Нолангдан ҳеч ерда асар йўқ, бироқ
Тирногинг излари ҳар уйда мавжуд¹.
О, инсон идроки, мисли йўқ чироқ,
Баъзида нур берар, баъзан пуркар дуд!

«Тамара қалъаси» дейиш яхшимас,
У парча тош йўниб кўрганми бир қур!
О, гўзал Тамара, мен сенга эмас,
Тош ўйган инсонга дерман: — Ташаккур.

Вардзия, 23 август, 1959

¹ Тош ҳужралар чўқичсимон асбоблар билан уриб қилинган бўлса керак, излари қолган — шунга ишора.

ҚИЗ ҲАЙКАЛИ

Тбилисида шаҳарнинг ҳамма еридан кўри-
надиган баландликка бир қўлида пиёла, бир
қўлида қилич тутган гуржи қизининг ҳайкали
кўйилган. Бу Гуржистон рамзиdir.

Бир қўлингда шароб тўла пиёла,
Бир қўлингда тифли қилич ярқирап.
Менга кўзи тушган замон бир йўла
Имо билан ўз қошига чақирап.

Мен биламан одатингни, жасур қиз;
Ол шаробинг дўстинг учун тортиғдир.
Кимки келса Ватанингта шум ёвуз —
Ният билан, қилич унга бир тиғдир!

Ишонч билан юриб бордим қошингта,
Кўзларингда ҳаёт кўрдим, шон кўрдим.
Ўтмишларнинг алами бор тўшингда,
Ўтмишлардан қиличингда қон кўрдим.

Табассум-ла кутиб олдинг, май тутдинг,
Мен симиридим, шароб эмас, мисли нур.
Дўстлигимга ишондингу қайд этдинг,
Ишончингта минг ташаккур, ташаккур!

Ишон, синглим, бизнинг дўстлик метиндири!
Тошлиар эриб, денгиз қуриб кетса ҳам
Қилт этмасдан турар мангу мустаҳкам!
Бу юраклар истагидир, ўтидир!

О, Гуржистон рамзи бўлган гўзал қиз,
Бахтинг билан мангу яша, чўкма тиз!

Тбилиси — Боржоми, 22 август, 1959

ХОТИРА ЧАШМАСИ

Йўл ёқасида, тоғ этагида
Бир чашма оқар, йилт-йилт этарак,
Юз таърифи бор халқ әртагида,
Қошида ўсар мажнунтол, терак.

Ичаман десанг жўмраги ҳам бор,
Ич, азизим, ич, сувлари яхна.
Орқасида бор оппоқ бир девор
Деворда ёзув, дейсанки дахма.

Тўгри, азизим, бу дахма ёдгор,
Жангларда қурбон бўлган инсонга.
Ич сувидан, ич, уни ёдга ол,
Мехри зўр эди унинг, бил, сенга!

Сен яшагин деб, у жангга кирган,
Сен яшагин деб, лойқа сув ичган.
Сен яшагин деб, ёвингни қирган,
Сен яшагин деб, жонидан кечган!

Унинг нафаси тоғлардаги ел,
Орзу-умидин рамзи шу чашма.
Кел, чашмадан ич, кел, азизим, кел,
У борган йўлдан асло адашма!

Ахалцихе, 25 август, 1959

АРМАН КУЙИ

Дўстим Рубен Манукянга

Армани дўстимга дедим бир куни:
— Куйларинг мунчалик нолали, ҳазин?
У дўстим кўзимга тикди-да кўзин
«Рост айтдинг!» — деди у ва қўшди шуни:
— Нега ҳам куйлари бўлсин шод, хуррам,
Минг йиллар ютида қирилган бўлса!
Эллардан элларга сурилган бўлса,
Ҳаттоқи ҳар тоши дегач: — Бор ярам!

Қай юртга бормагин армани қабри
Кўзингта ташланар сарғайиб, нолиб.
Кайларда жисмимиз кетмади қолиб!
Машриқда минг бўлса, гарбда минг бири!

Ватанини соғиниш нимади? — десанг,
Армани куйига қулоқ ос, дўстим.
Қалбингни ўртайди армон, роз, дўстим,
Оҳига чидамас тогу тош, харсанг!

Куй — халқнинг ўртанган юрак-бағридир,
Куй — халқнинг, дейдилар, орзу-армони.
Куй — халқнинг кураши, шарафи, шони,
Куй — халқнинг, дейдилар, нафрат, қаҳридир!

Шундайми? Бас! Демак, бу ҳазин қуйлар
Дилидан тилига оққандир элнинг.
Кўзига боқ унинг, кўмирнинг, кулнинг
Сояси қолгандир қуйганда уйлар!

Ереван, 19 сентябрь, 1954

ШАЛОЛА ҚАРШИСИДА

Мен келдим узоқдан сени кўргани
Ортимда қанча тоғ, қанча боф қолди,
Қанча чўл, қанча кўл ва ирмоқ қолди...
Мен келдим қошингга завққа тўлгани...

Овига ташланган бургутдек шўнғиб,
Шер каби ўкириб оқасан магрур.
Минг турли товланар кўқдан тушган нур,
О, сурат солсайдим уларни йиғиб!

О, чарчаб қолдингми, гўзал шалола,
Қирғоинг — тошларда маржон-маржон тер.
Кун бўйи боқсам ҳам қалб ҳамон оз дер,
Кун бўйи яйрадим мисоли бола.

Кун бўйи завқланиб боқдим ҳуснингга:
Кўшириб қайнайсан — остингдан бирор
Туну кун эринмай ёққандек олов...
Умрбод мубтало қилдинг ўзингта!

Боқишида: кўшириб ётибсан бекор,
Аслида инсонга сен ҳам зарурсан.
Нақадар кўркамсан, зўрсан, магурсан,
Инсоннинг қалбида сенинг руҳинг бор!

Ахалцихе, 28 август, 1959

ЧУ, САМАН ЙЎРҒАМ

Оёғинг толмасин, чу, саман йўргам!
Түёғинг тоймасин, чу, саман йўргам!
Бу Кавказ сафари кўп гаштли сафар,
Армоним қолмасин, чу, саман йўргам!

Олдинда муз кўэли тоғлар бор ҳали,
Олдинда лимонли боғлар бор ҳали,
Олдинда чақмоқли чоғлар бор ҳали,
Оёғинг толмасин, чу, саман йўргам!

Тоғлардан елдирим чақиб ўтасан,
Боғлардан суқланиб боқиб ўтасан,
Қирлардан чечаклар тақиб ўтасан,
Түёғинг толмасин, чу, саман йўргам!

Чу, азиз йўлдошим, ёлинг силкиб юр,
Оҳулар кўрганда, майли, ҳуркиб юр,
Кимсасиз тоғларга ҳаёт пуркаб юр,
Армоним қолмасин, чу, саман йўргам!

Нефть қайнар булоқлар йўлимиздадир,
Юрт кўрки туф¹ тоғлар йўлимиздадир,
Чанқасанг, ирмоқлар йўлимиздадир,
Кўзларим ўйнасин, чу, саман йўргам!

¹ Туф — Арманистонда чиқадиган, қурилишда кенг қўлла-
ниладиган харсанг тош.

Уйида бир кўрай гуржи қизини,
Чой терган чогида шаҳло кўзини,
Оқшомлар эшитай эртак сўзини,
Юрагим яйрасин, чу, саман йўргам!

Дўстларга беражак қарз саломим бор,
Эсадалик совгам бор, майли жомим бор.
Яхшилаб кузатай — шоир номим бор,
Илҳомим қайнасин, чу, саман йўргам!

Йўлдошим, елдошим ёлғиз ўзингсан,
Сирдошим, қирдошим ёлғиз ўзингсан,
Юртимдан элдошим ёлғиз ўзингсан,
Чу, саман йўргам!
Чу, саман йўргам!

Ленинакан шаҳри, 17 сентябрь, 1959

КАВКАЗ ГЎЗАЛИ

Дараларда шарқираб оққан
Сувларингми, булоқларингми?
Е бўсага интизор боққан
Қўшиқ айтган дудоқларингми?

Тоғ башида ўстган сурх арча
Қоматингнинг рамзими, гўзал?
Боғда пишган қора тоғолча
Кўзгинангнинг ўзими, гўзал?

Чўққи узра сузиб юрган оқ
Булутларми ёки нафасинг?
Билолмадим ҳу... кўм-кўк ўтлоқ
Ез ойингми ё баҳор фаслинг?

Мен кўксингда Казбек, Эльбруснинг
Иккисини ёнма-ён кўрдим.
Жамолингда нодир бир қизнинг —
Камолатин намоён кўрдим.

Сув ичасан қайси ирмоқдан,
Кўрсат менга, мен ҳам ичайин!
Ошиб келдинг қайси бир тоғдан,
Кўрсат менга, мен ҳам ошайин!

Қўшиқ айтсанг чалиб чангурি¹
Билганимча жўр бўлай мен ҳам.

¹ Чангурি — гуржи миллий музика асбоби.

**Гар бошингдан ўтса кун нури
Соябоним кўрайин баҳам.**

**Сувга чиқсанг кўзангни шу он
Толиқтирмай олай елкангдан.
Гар севаман демасанг, жонон,
Ҳеч кетмайман, билгил, ўлкангдан!**

Aхалцихе, 29 август, 1959

ДЕНГИЗ ЙЎЛИ

Хаёлимни банд этганди шўх денгиз,
Қирғоғига чиқмоқ эди умидим.
Шу умидда гоҳ кечаси, гоҳ кундуз
Йўллар босиб ҳавасида маст эдим.

Бирдан йўлим тўсиб чиқди Тошбулоқ,
Тиник суви тушиб олган бир изга.

— Кўмак бергин,— дедим унга,— эй ўртоқ,
Қайси йўлдан борсам бўлар денизга?

— Энг яқин йўл — менинг йўлим, истасанг
Ёнимга ўт, йўлдошим бўл, бирга бўл.

Аммо билки, менинг йўлим қийин йўл,
Йўлим тўсар гоҳ қия төғ, гоҳ харсанг..

— Майли,—дедим,—қўлингни бер, Тошбулоқ,
Бардош булоқ, йўлдош булоқ, ёш булоқ!

Ахалцихе, 31 август, 1959

ТОҒ БОШИДА ЁНАРДИ ЛОЛА

Манзара

Тоғ бошида, баланд бир тошда
Ёнар эди бир дона лола;
Гүё Казбек тутар қуёшга
Хванчкара¹ тўла пиёла.

Е тонггача ёниқ қолибди
Тунда чўпон ёққан бир чироқ.
Ё альпинист тоғни «олибди»,
Шарафига қадабди байроқ.

Ахалцихе, 31 август, 1959

¹ Хванчкара — гуржи қизил виносининг бир нави.

Б У Р Г У Т

Туманли чўққилар оша юксалиб
Осмонда бир бургут учарди мағрур.
Гоҳ улкан қанотин силкимай солиб,
Гўёки қуёшдан ўғирларди нур!

Гоҳ парча булутнинг устидан ўтиб,
Қояга шўнгирди дадил, мардона.
Гўё дер: берайми юлдузни тутиб,
Осмоннинг эгаси менман, кўр, мана!

Шу замон самолёт товуши янграб,
Тангадек йилтиллаб кўринди ўзи.
Нима гап, у бургут теаликда англаб,
Ўфққа қадади норизо кўзин.

«Изату нафсимга тегдинг-ку, Инсон,
Наҳотки, сенга тор бу ернинг юзи»,—
Дегандай у бургут номусдан шу он
Паст тоғлар бағрига отди ўзини!

Ахалихе, 31 август, 1959

КҮҲНА ҚАЛЪА

Кўҳна қалъа, метин қалъа, тош қалъа,
Кеккаясан тог бошида бир ўзинг.
Икки кўзи зардоб ила ёш қалъа,
Еки борми авлодларга арз сўзинг?

Айт-чи, ўзинг, бу ётганлар тошларми,
Еки шаҳид кетганларнинг бошими?
Деворингда ёниб турган нақшларми,
Еки қулнинг юрак қони, ёшими?

У кўрингган қора туйнук эшикми,
Еки душман ўйган сўқир кўзингми?
Кўксингдаги у нуқталар тешикми,
Евинг отган ўқларининг изими?

Мен биламан, бунда қанча жанг бўлган,
Қанча қирғин, қанча ур-йиқ, қанча дод!
Қанча мардинг чўнг билаги букилган,
Қанча душман бунда тутдек тўкилган!

Неча аср қалқон бўлдинг гуржининг
Шарафига, гурурига, орига.
Синови ҳам бўлдинг битмас кучининг,
Ев ўтмади сени босиб нарига.

Ииллар ўтди, бари қолди орқада,
Кўпдан бери қон оқмайди тўшингдан.
Порох дуди бошларингдан тарқади,
Энди чўчиб уйғонмайсан тушингда!

Узоқ юргдан мана келдим қошингта,
Қўлларимда на тигим бор, на қурол.
Душман бўлиб ўқ отгандир тўшингта
Аждодимдан бирортаси, эҳтимол!

Кечир, қалъа, бу тарихда қора доғ!
У ўтмишдан розимасман ўзим ҳам!
Ўтган ўтди... Кел, қўлингни бер, ўртоқ,
Бу дўстликка қойил қолсин кенг олам!

Энди бизнинг ёвимиз бир, ният бир,
Сўзимиз бир, орзумиз бир, қалб иноқ.
Дўстлигимиз бузилмайди бир умр,
Бошимизда ҳилпираиди бир байроқ.

Мукета шаҳри, 12 август, 1959

ЧУСТ ДҮППИ

Чуст дүппи! Мен сени ардоқлаб, кийиб,
Кавказ шаҳарларин қилдим томоша.
Мезбонлар қарашди қизиқиб, суйиб,
Юртимни эслатиб турдинг ҳамиша!

Араат водийсин кезиб ўтганда,
Пахтазор чайқалиб қолди ортимда.
Арманинг гўзали этак тутганда,
Пахталар тергандек бўлдим юртимда.

Шунда сен жуда ҳам ярашиб кетдинг,
Пахтазор ўлқамнинг рамзи, чуст дүппи!
Яна ҳам қалбимга фуур бахш әтдинг!
Яшасин халқларнинг дўстлик офтоби!

29 сентябрь, 1959, Эчмиадзин шаҳри

КАВКАЗ БАҲОРИ

Maқsуд Шайхзодага

Қаерда кўрмадим умримда баҳор,
Қаерда юрмадим чечагин тақиб.
Баъзида тўймадим кўркига боқиб,
Баъзида йўлимни тўсди сўнгти қор.

Дедилар, гулпараст, баҳорпарастсан,
Дедилар, баҳорни энди кўрдингми?
Е баҳор ишқида туғма бир мастсан,
Е севги сочини энди ўрдингми?

Кўп баҳор кўрдим, рост. Лекин ҳеч бири
Сеники сингари гўзалмас, Кавказ!
О, сендан ҳеч бири узолмас, Кавказ!
Айт, Кавказ, айт, дўстим, нимада сири?

О, Кавказ баҳори, Кавказ баҳори,
Гўзаллик худоси бор десам — сенсан!
Жаҳоннинг энг улуг рассоми сенсан,
Эй, Кавказ баҳори — ҳаёт виқори!

Ахалцихе, 10 сентябрь, 1959

СУВИНГДАН БИР ҲЎПЛАБ КЎРГАНМИ ШОИР?

Тепада осилиб қолган, эй харсанг,
Лермонтов ўтганин кўрганмисан, айт?
Шу хилда туришдан чарчасанг, толсанг,
Исёнкор йўлчига боқдингми лоқайд?

Майсалар оралаб оққан ирмоқлар,
Сувингдан бир ҳўплаб кўрганми шоир?
Арагва ёқаси — қирра қирғоқлар,
Бирор сўз айтганми у сизга доир?

Куранинг оқ ёлли чўнг тўлқинлари,
Неча бор банд этдинг шоир диққатин?
Неча бор шоирнинг ҳасрат, кинлари
Кўксингда оққандир, эх, бирин-кетин!

Мцхета гўзали, мўйсафид чинор
Шоирни кўргансан неча ёшингда?
Қаддингта суқланиб, термилиб бир бор
Тизгинин тортганми отин қаршингда?

Биламан, о, тошлиар, сизда олган дам,
Чинорга отини боғлаб ўтгандир.
Ҳуснингта, о, Кавказ, кўзи ёнса ҳам,
Кўксисда юраги йиғлаб ўтгандир!

Пасанаури. 12 август, 1959

БИЛОЛМАДИМ

Гўзал Кавказ, о, Гуржистон, айта қол,
Мен келганда баҳормиди, ёамиди?

Йўлларингда куни бўйи бемалол
Сузиб юрган ўрдакмиди, ғозими!

Йўлларингда қатор-қатор кўрингган
Сурх қоматлар теракмиди, толмиди!
Чўққиларда оппоқ бўлиб сурингган,
Билолмадим, булутмиди, қормиди?

Тоғдан тоққа енгил-енгил сакраган
Тоғ эркаси оҳумиди, шермиди?
Чой баргида сал ел билан титраган
Шудрингмиди, мардлар тўккан термиди?

Қизларингнинг ол лабига нур берган
Адаш тушган иуқтамиди, холмиди?
Лабларида қатра-қатра эриган,
Билолмадим, шакармиди, болмиди?

Анормиди, олмамиди тўшида
Кўз-кўз қилиб олиб юрган нарсаси?
Утган ҳафта, янги ойнинг бошида
Совгамиди менга берган нарсаси?

Билолмадим. Билолмасдан додгаман,
Билолмасдан қайтиб кетдим юртимга.
Изоҳлашига ваъда берсанг қайтаман,
Қор ёғса ҳам, дўл ёғса ҳам ортимга!

Боржоми шаҳри, 3 сентябрь, 1959

ТОҒЛАРГА БОҚИЕ...

О, улкан, чўнг тоғлар, залворингиздан
Букилиб кетмасми бу ернинг бели!
Тўхтосиз эриган муз, қорингиздан
Ер юзин тутмасми навбаҳор сели!

Марварид томчилар тинимсиз оқиб
Харсангни ғалвирак қилганин кўрдим.
Чўққидан кенг қанот бургутинг шўнғиб,
Бир зумда ўлжасин илганин кўрдим.

Ҳар тонгда булутлар оқ этагидан
Тортқилаб қоласиз ўйнашгансимон.
Гоҳ чўққинг кўринар осмон тагидан,
Гоҳо чўққингизда тургандек осмон.

Хошури, 3 сентябрь, 1959

АРАГВА ҚИРГОФИДА

Тўйиб-тўйиб сувлар ичдим ирмоғингдан,
Ойна булоқ сувларидаи мунча муздай!
Эсдалика бир тош олдим қирғоғингдан,
Тўлқинларинг қизғанғандай деди: — Ҳай!
 Ҳай!

Қизғанма, қўй, эрка дарё, сахий дарё,
Қирғоғингда бундай тошнинг саноги йўқ.
Бири қора, бири оппоқ — сочар зиё;
Бири қизил — тун қўйнида худди бир чўғ!

Мен олганим оддий бир тош, кўр, мана, боқ,
Ноёб тошдай асрагайман уни бироқ.
Уни кўрсам хаёлимга тушасан сен
Ва ўйимдан бир-бир ўтар муздай ирмоқ.

Арагва қирғоғи, Чўхи қишлоғи, 12 август, 1959

СЕНИНГ АЛЬБОМИНГА

Үчмас бир мұхрдай қирингда қолди
Оёк изларим.
Күксингда яшнаган гулингда қолди
Муштоқ күзларим.
Ха, ўша гулдан сүр, умрим фаслини,
Эй, озар қизи!
Қошимга келтирап истасанг сени
Оғим изи!

14 февраль, 1960

ЯХШИ ҚОЛИНГ...

Яхши қолинг зўр тоғлар,
Ойна қўзли булоқлар.
Яхши қолинг, ирмоқлар,
Теграси гул-гул боғлар.
Яхши қолинг, қирғоқлар,
Майса-гилам ўтлоқлар.
Яхши қолинг, ўнгурда,
Тоғ бағрида, тош ерда,
Яшнаб ўсган арчазор,
Ёнгоқзор, тоғолчазор;
Турли-туман тоғ чечак —
Табассумда келинчак!
Хайр, Кура, Арагва,
Чор тарафи гул, мева!
Тўлқинларинг дилимда,
Қўшиқларинг тилимда!
Сизни эслаб юрарман,
Баъзан тушда кўрарман:
Пахта ўсган ерларда,
Чексиз текис қирларда;
Ҳовуз бўйида қовун
Сўйганимда кечқурун;
Кўрганимда шаршарак;
Завқ-ла чалиб тартарак,
Боғдан узум узганда.
Қизил вино сузганда;
Аччиқ-аччиқ чой ичсам;
Суви ўйноқ сой кечсам;

Юмшоқ, салқин елингни
Меҳмондўст мард элингни
Унутмоқ амримаҳол!
Эй, гуржи қиз, лаби бол,
Кўзи юлдуз, яхши қол!
Бахти кундуз, яхши қол!
Вино тутдинг сув десам,
Боқишиларинг қув десам,
Содда, дилқаш экансан.
Қалбга тулаш экансан.
Тоғ бошида уйинг бор,
Арагвадек куйинг бор.
Чиқиш қийин тоғларга,
Ҳатто қорли чоғларда —
Сен кезасан bemалол,
Гўё қанотинг — шамол!
Балки ўн беш ёшимда
Бўлганингда қошимда,
Мен ҳам бирга кезардим,
Балки сендан ўзардим.
Энди ёшим кўп улуг,
Ҳавас бору қувват йўқ.
Боқ, сочимнинг оқи бор,
Гўё чўққидаги қор!
Майли, эркам, кезавер,
Ёшлик қони шуни дер.
Ёшликка тўй, завққа тўй,
Баъзан мени эслаб қўй!
Мен ҳам сени умрбод
Унутмасман, елқанот.
О, елқанот, гулқанот,
Бахтингта ёр бу ҳаёт!

Тбилиси, 16 август, 1959

ХОТИМА

**Гўзал Кавказ! Мадҳинг бўлди бир дафтар!
Сендан мени бирор сўрса, де унга:
«Шуҳрат бунда меҳмон бўлди уч ҳафта,
Аммо қалбин қўйиб кетди мангуга!»**

Рустави қишлоғи, 23 август, 1959

ДУНАЙ СОҲИЛЛАРИ

НИМАДИР ДЕМОҚЧИ БЎЛГАНДИНГ...

Турсунойга

Кузатиш қанчалик оғир бўлса ҳам,
Лабингда табассум,
Кўзингда ийқ ёш!
Биламан меҳрингни, мисоли қуёш,
Қалбимни ёритар ҳар ерда, ҳар дам!

Нимадир демоқчи бўлгандинг, шу чоқ —
Қарасанг ўртадан олинган трап¹.
Армондан кўзларинг кетди ялтираб!
Бағримда сен берган гуллар бир қучоқ...

Ўкинма, азизим, ўша гапингни
Олиб қўй, айтасан қайтган чоғимда,
Гул бўлиб очилиб зор қучогимда.
Ўкинма, бекорга тирнаб қалбингни!

Сухуми, 1960

¹ Трап — пароход билан соҳилган қўйиладиган вақтинча кўпrik.

ЯХШИ ҚОЛ, ОНА-ЕР!

Теплоход чайқалди,
Түлқин кўпирди.

Юз қадам нарида жонажон қирғоқ.
Қўй силкиб қолгандек герб, қизил байроқ,
Чиройли ҳилпираб шамол шопирди.

Умримда илк марта она-Ватандан
Ёт элга, сафарга чиқиб боришим.
Илк марта жон чиқиб боргандай тандан
Қандайдир ташвишли нафас олишим.

Қандайдир ҳаяжон, ғулув қалбимни
Гоҳ ширин, гоҳ ғамли чертиб қолади.
Томоғим гоҳ қуриб, тамшаб лабимни,
Хәёлим керакдан ортиб қолади!

Илк марта бегона юртнинг ерини
Ўзга бир ҳис билан босиб юраман.
Илк марта хилма-хил шаҳарлар кезиб,
Ўз ерин бошида тўйиб кўраман.

Илк марта бегона боғдан гул узиб,
Илк марта кўксимга тақаман севиб.
Илк марта хилма-хил шаҳарлар кезиб,
Эҳтимол ёмғирда қолурман ивиб!

Илк марта ёнимда туриб таржимон
Тилимнинг мағзини чақар тилига.

**Илк марта ифтихор, ғурур, ҳаяжон
Шеър бўлиб қўйилар шоир дилига!**

**Теплоход қўзғалди,
Йўл олди аста,
Яхши қол, она-Ер, севимли қирғоқ!
Яхши қол, қалбимнинг меҳри пайваста
Жонажон давлатим Герби ва Байроқ!**

1962

ПРАГА

Прага, мен сени биламан яхши,
Таърифинг шаҳримга бориб етгандир.
Бу қекса жамолинг ҳусни ва нақши
Бир яхши қўшиқдай элни тутгандир.

Ҳуснингта солғанда ёвуз душман доғ,
Қалбингнинг ноласин эшитганим бор.
Ўшанда деганман, оҳ, қани шу чоқ
Ўч учун ёнида турсам бир қатор.

Не кунлар тушмади сенинг бошингта,
Неларни кўрмади бу ёниқ кўзинг!
Ёв қадаб келганда ништар тўшингта
На фикринг ўзгарди, на метин сўзинг!

Олти йил қоқмасдан бир кеча мижжа,
«Фолиб» ёв қошида турдинг сен уйгоқ.
Ховлингдан йўқолса бир кичик жўжа
Калхатга мардана кўтардинг таёқ!

Қўлларинг сингари иш берди тишинг,
Кўксингда ғазабинг тинмай кўпирди.
Қўлида дармони қолмаган кишинг
Ҳар фашист юзига бориб тупурди!¹

¹ «Чехлар немисларнинг олдига бориб, юзига тупуришарди»
(1939, март, чех газетаси).

Сен қарға умридан бургут ҳаётин
Муқаддас санаган құттуғ шаҳарсан.
Фучикнинг қайрилмас учқур қанотин
Парвозга тоблаган улуг шаҳарсан!

Лениннинг изи бор сенинг күчангда,
Фахрлан, эй күұна, яшарган тупроқ!
Ильичнинг чироги ёниң кечангда,
Сен учун нурлидир яқину йироқ!

Дард чекиб, согайган ёш йигит каби,
Хеч таниб бўлмайди сени, Прага!
Шунчалик тўлиқки ҳаётинг қалби,
Хеч узиб бўлмайди кўзни, Прага!

Жонажон дўстингман, кафтингни сиқиб,
Айб этма, қувончдан «Яшавор!» десам.
Қайта бор келишга яна орзиқиб,
Бугунча бошингга дўппи кийгизсам!

Прага! Қурилдинг метину тошдан,
Ва лекин иссиқидир меҳринг оташдан.
Кепкасин олгандек чех дўстим бошдан,
Йўлимни қаршилар дам-бадам каштан.

1962

ЧЕХ ҚИЗИГА

Сафардошим Сайёра Раҳматхўжасваги

Чой десам, тимсиёҳ қаҳва келтириб,
Дедингки, бу чойдан яхшироқ, меҳмон!
Лабингда табассум яшинар, барқ уриб,
Кўзларинг чағнади мағрур, беармон.

Ҳурматинг, қаҳвангни ичдим чор-ночор,
Рост айтсам, чойчалик бўлмади, эркам.
Рост айтсам, чанқовим қонмади ҳеч ҳам!
Сен бўлсанг боқардинг мамнун, баҳтиёр.

Мен бўлсам ўз юртим анҳор бўйини,
Тол таги, кўк чойни ўйлардим шу чоқ.
Ҳаттоки, гуркираб чиққан бўйини,
Сезгандек роҳатдан, яйрардим шу чоқ.

Чой нима, билмасанг айби йўқ, дилдор,
Ҳар юртнинг ўз гашти, ўз одати бор.
Бизга кел, меҳмон бўл!
Мен шунда, қўзим,
Бир аччиқ чой дамлаб бераман ўзим!
Сен шунда биласан чойнинг таъмини,
Ва эслаб юрасан умрбод мени!

Прага шаҳри, 1962

ТАНК № 23

Прагадаги Танкчилар майдонига 1945 йил
9 майда Прагани озод қилиш учун Берлиндан
ёрдамга келган, биринчи бўлиб шаҳарга кирган
23-сонли Совет танки баланд гранит устига
эсдалик қилиб қўйилган.

(Ён дафтаримдан)

Сен илк бор шаҳарга кириб келганда,
Прага жон олиб, жон берар эди.
Фашистлар Берлинда мағлуб бўлгандা,
Бу ерда ҳали ҳам жанг борар эди.

Жанг эди, бешафқат, хунрез ва тенгсиз,
Прага оёққа турганди мағрур.
Ҳар бир чех қалбидагазаби денгиз,
Дер эди: дуч келган ерда ёвни ур!

Қаршингда учраса кўкрагидан от,
Қўйқисдан йўлиқса манглайига сол.
Үрнида кўрдингми сен ўша заҳот
Уйғониб кетмасдан калласини ол.

Қўлга ол қуролинг, майдонга отил,
Майдонда тақдиринг жангига боради:
Унладир эркингни бўғган шум қотил,
Чоп, югур! Ватанинг буйруқ беради.

Ян Гуснинг нуридир кўзингда ёнган,
Ян Жижжка қонидир қалбингда урган.
Чех доим эрк деса, жангта отланган,
Евенинг беомон таъзири берган!

Қани юр, майдонга, отил жанг аро,
Эрк учун курашмоқ ҳар марднинг иши.
Қафасда гул ҳидлаб ётгандан кўра
Эркинда сассиқ ўт терганинг яхши!

Бу нидо ҳар чехда берди бир садо,
Йўлда жанг, уйда жанг, ҳар кўчада жанг.
Жангга деб елади ҳар тонгдан сабо,
Ёв баттар хунрезу бешафқат, тажанг!

Боқ, ана, у ерда бир мурғак гўдак
Тўшидан отилиб ўлиб ётади.
Ҳар қўра, ҳовлиси, йўлаги, чердак
Бегуноҳ мурдага тўлиб ётади.

Шунда сен Берлиндан ел каби учиб,
Ёрдамга қўлингни чўзиб келгансан.
Дўст учун жантларда жонингдан кечиб,
Ҳаммадан олдинда ўзиб келгансан.

Сен илк бор шаҳарга мардона кириб,
Азамат тўпингдан берганингда залп,
Ҳар чехнинг юраги севинчдан уриб,
Офарин дегандир бир қалқиб чўнг Альп.

Крестли байроғин мағлуб бўлган ёв
Бир ифлос латтадай ташлаб қочганда,
Мард чехнинг юзлари қувончдан — олов,
Бронли тўшингни келиб қучганда,

Кўкрагинг тўлиб сен нафас олгансан,
Қардошлиқ бурчингни ўтаб мардона.
Ана шу майдонда яна қолгансан,
Мен сенга фахр билан боқаман, мана!

Сен энди бир ёдгор, тўпларинг отмас,
Қалбинг ҳам урмайди олта интилиб.
Сен дейсан: — Одамлар! Етар уруш, бас!
Урушни қўйингиз бир банди қилиб!

Сен энди гранит, турасан мағрур,
Оlamга тинчликдан жар соласан, жар:
«Ҳар кимнинг уйига қуёш сочсин нур!
Гитлерни эсласин, ким бўлса ўжар!»

Тур шунда умрбод, юлдузли танким,
Ерга ҳеч тушмайсан тўпингни ўқлаб!
Қабул эт, эй ботир, миннатдор ўлкам —
Саломин келтирдим соғиниб, йўқлаб.

1962

БИР СИҚИМ ТУПРОҚ

Кенг ойна остида, музей тўрида,
Шиша туради бир сиқим тупроқ.
У нима қилади чехлар ерида?
Ким олиб келгандир қаердан, қай чоқ?

Гоҳ уни кўрганлар кўзда ёш билан
Ўпкасин тутолмай хомуш ўтади.
Гоҳ уни кўрганлар қалбда тош билан
Кўуллари туғилиб бир мушт ўтади.

Гоҳ уни кўрганлар кўкси тоғ бўлиб,
Кўзида тенги йўқ виқор ёнади.
Гоҳ уни кўрганлар ўчи ўт олиб,
Фашистга нафрати бисёр ёнади!

Бу азиз тупроқдир, узоқдан келган,
Узоқдан келса ҳам ҳар дилга яқин.
Дунёда инсонни муқаддас билган,
Жон фидо қилғуси ҳар элга яқин.

Бу азиз тупроқдир, инсон ақлини
Қалбини, эркини қилган намойиш.
Бу азиз тупроқдир, совет халқининг
Матонат кўркини қилган намойиш!

Бу азиз тупроқдир, тенги йўқ азиз!
Жон билан, шон билан қоришиган тупроқ,
Эрк севган билади қадрини ёлғиз,
Эрк севган қалбида ҳамиша маёқ!

Ҳар қарич ерига бу кекса олам
Юз ўн кун кўз тиккан мижжа қоқмасдан.
Юз ўн кун ҳар солдат қасддан олмай дам,
Улимга панд берган аламдан, қасддан!

Ғазабдан жон ачиб,
Темирни ғажиб,
Башарни вабодан қутқарган Инсон.
Жаҳонга ҳайрату таажжуб сочиб,
Музаффар байрогин кўтарган Инсон.

Бу Волга бўйидир, қаҳрамон шаҳар,
Шу шаҳар тупроғи бунга қўйилган.
Бу шаҳар номини билади башар,
Ҳар қалбга бир нақшдек бўлиб ўйилган.

О, азиз, тенги йўқ, муққаддас тупроқ,
Мангуга матонат рамзисан, албат!
Дунёда энг сўнгти инсон ва япроқ —
Бор экан тинчликка бўлурсан ибрат!

1962

ЧЕХ ШИШАСИ

Чех шишиаси мўъжизадир санъатда,
Ҳеч кўрмаган бориб кўрсин албатта.
Камалакнинг минг туси бор рангида,
Бир кўрдингми, турар кўзинг ўнгида.
На парранда, на дарранда қолибди.
Ҳаммасини бир-бир қуийб солибди.
Учид кетай деса қуши қўлингда
Юз тур гули қайтаради йўлингдан.
Ҳатто ҳиди анқигандек бўлади,
Бир боқиша қалбинг завққа тўлади.
Қўлинг асли гул экан-ку, эй уста,
Энди билсам юрагинг ҳам гул тусда.
Мўъжизангда ақлу меҳринг баркамол,
Ҳар ишингда сеҳр очар бир жамол!
Бир намуна олиб кетдим юртимга,
Хурматингни қўшиб юрак қатимга.
Уй тўримда турар яшиаб бир ўзи,
Гўё менга бордек айтар хуш сўзи!
Унда сени, юрагингни кўраман,
Софиндимми, унга қараб тураман.
Мўъжизангни сен соғинсанг келиб кўр,
Сеникидир атлас кўрпа ёзиқ тўр!

1962

ФУЧИК

Ҳеч кимса кўммади сени кузатиб,
Ҳеч кимса қолмади бошингда бўзлаб.
Ҳеч кимса сенчалик қийноқда ётиб,
Ҳеч кимса сенчалик бермади сўзлаб.

Үлимни ўлимдан олдинроқ енгиб,
Ўлимни ўлдириб, сен тирик қолдинг.
Мавжудот қалбига нур бўлиб сингиб,
Тириклар умрига сен шерик қолдинг.

Табиат бир бутун кўммасдан сени,
Ҳар чехнинг қалбига зарралаб сочди.
Ҳар чех-чи, кўксизда унган ҳиссини
Оlamга номинг-ла карралаб сочди.

Жаҳоннинг ақлида ёрқиндуру сўзинг,
Матонат тахтининг тожи ўзингсан.
АЗроил қошида титрамай тизинг,
Тақдирни рад этган «гожи» ўзингсан.

Бу ҳаёт чашибасин қайнапида — сен,
Сен жаҳон bogida кезиб юрибсан.
Ўзлуксиз курашнинг баҳт нашидасин
Ҳаммадан яхшироқ сезиб юрибсан.

Мен сенинг юртингда номинг такрорлаб,
Сен юрган кўчага бурдим йўлимни.

**Ҳар таниш озод чех уйига чорлаб,
Сен бўлиб самимий сиқди қўлимни!**

**Демак, сен ҳар чехнинг табассумида,
Эркида чироқдек ёниб қолибсан.
Тарихдек классик шоир назмида
Сен мангу шоҳ асар бўлиб қолибсан!**

1962

НОМАЪЛУМ СОЛДАТ ҚАБРИ

Бу ерда ётади номаълум солдат,
Ё оддий бир деҳқон, ё олим солдат.
Ё ишчи бир солдат, ё боғбон солдат,
Ё қўшчи бир солдат, ё сарбон солдат...
Кимлиги номаълум, аммо у солдат,
Шу ерга бошини қўйгандир албат.
Кими бор, кими йўқ!— Ҳеч ким билмайди,
Уруғ-аймоғи йўқлаб келмайди.
Гўё бир ғарибдир беватан, уйсиз,
Гўё бир булбулдир чамансиз, куйсиз.
Гўё у дайдиган, кимсасиз саёқ,
Гўё у йўлидан адашган тайлоқ!
Гўё у бошига қўйиб тош болиш,
Тақдирдан қиласди бу ерда нолиш!
Ким ўзи, айтсанг-чи, эй, қора тупроқ?!
Ким ўзи, айтсанг-чи, эй, сариқ япроқ?!
Ким ўзи, айтсанг-чи, эй, мудҳиш кеча?!
Ким ўзи айтсанг-чи, эй, гиёҳ, фунча?!
Ким ўзи, айтсанг-чи, эй, мангу қуёш?!
Ким ўзи, айтсанг-чи, эй, харсанг, эй, тош?!
Ким ўзи, айтсанг-чи, эй, дайди еллар?!
Ким ўзи, айтсанг-чи, эй, қонли йиллар?!
Ким эди бу ғариф, шинелли инсон?
Ким эди, эс-ҳушли ва тилли инсон?
Ким эди, кўксисда дили бор инсон?
Ким эди, жон фидо эли бор инсон?
Кимларга хат ёзиб, кимни овуттай?
Тақдирга тан бер деб, кимни совутай?
Кимларни етаклаб келай бошига,
Еш қўшиб кўзимдан аччиқ ёшига?

Балки у акамдир: изиз изиз изиз изиз
Онамнинг кўксига алами қолган;
Хотини оҳ уриб, сочини юлган,
Фарзанди изини тополмай юрган.
Балки у тогамдир: уй ичи ҳамон
Тирик деб эрта-кеч қилади гумон;
Тирик деб кийимин сақлайди ҳамон,
Дўстлари соғиниб йўқлади ҳамон!
Балки у қўшнимдир: наққирон йигит,
Хаёли лочину қараши бургут!
Лекин у етиму бир ўзи эди,
Улфатнинг жони-ю, ўт кўзи эди!
Балки у дўстимдир: бирга ўқиган,
Баъзида ҳавасга шеър тўқиган!
Бир Байрон бўлай деб, урушга кетган,
Ўқ, порох ҳидини зориқиб ютган.
Балки у... дея мен санаб ҳам секин,
Аниқлаб олишим маҳолдир лекин.
Дунёда нима кўп танишу билиш,
Шарт эмас, барчасин бир рўйхат қилиш!
Биламан, бу қабр номаълум қабр,
Лекин у инсондир.
Инсон қабридир!
Урушда жон берган марднинг биридир!
Тўхта, ҳой, ўткинчи, тўхта бир нафас,
Бу уруш даҳшати! Эслаб тур бирпас!
Тўхта, ҳой, минбарга чиққан Цицерон,
Мана шу қабрга кўз ташла бир он!
Бармоғи узукли пулдор жаноб, сиз,
Урушда ҳисобсиз олтин санабсиз.
Мана бу солдат-чи? Ҳеч нима! Қуруқ!
Бас энди, сочмангиз урушдан уруғ!
Номаълум шу солдат мозори ҳаққи,
Муштипар онасин оҳ-зори ҳаққи,
Дўсту ёр, хешининг озори ҳаққи,
Тинчликнинг қизиган бозори ҳаққи
Тилингиз тийинг-да, чиқманг минбарга!
Инсон ўз жонини алишмас зарга!
Шу қабр тошига қўйингиз қулоқ,
Том битган бўлса ҳам тинглайсиз бироқ:
Урушни лаънатлаб нидо келади!
Ҳар қалбдан жаҳонга садо келади!

1962

ЯН ЖИЖКА ҚИЛИЧИ

Мен қилич шаънига бир шеър айтиб,
Кўкларга кўтарсам, бўлмангиз ҳайрон.
Қилични мақташнинг вақти эмас деб,
Танқидчи сўкмасин минбардан бийрон.

Бу қилич на очкўз, на босқинчи, сур,
На ёвуз ниятда жангларга кирган.
Бу қилич муқаддас, бу қилич мағрур,
Бу қилич сувига халқ терин берган.

Бу қилич сопини Жижка тутганда
Босқинчи немиснинг тўзган сафлари¹.
Душмандан юртини халос этганда
Учига қўнгандир тинчлик калтари.

Чех унга боққанда қалбida виқор,
Кўзида ташаккур, ғурур кўраман.
У турган ўлкада мангу бир баҳор,
Мангу бир яшариш, сурур кўраман.

Мен яхши биламан: чех уни асло
Қинидан суғуриб, жанг бошламас, жанг!
Ва лекин талтайиб, бўлиб бепарво,
Дамини қайтариб, бостирмайди занг!

1962

¹ 1442 йилдаги немисларнинг Чехияга ҳужуми кўзда тутилади.

ДУНАЙДА ТОНГ КУТДИМ

Теплоходда бедор қолиб тонг кутдим:
Дунай гүё эритилган қўрғошин.
Бир оз ўтгач, бу тусини унудим;
Нақ олтинга чайқаб олди у бошин.

Ўт босдими улкан дарё нарёғин,
Уфқ узра акси тушди яллиғин.
Сал ўтмасдан билиб қолдим бу ёғин:
Олов йигит кутар экан қаллиғин!

Сокин дарё кумуш эди, зар бўлди,
Энди унинг тасвирига бўёқ йўқ!
Сув тубидан мағрур чиқиб тонг кулди,
Қуёш гүё бир хокандоз лаққа чўр!

1962

Г У Л Л А Р

Сафардошим Латиф Исматовга

Сен бунда, бегона ўлкада, дўстим,
Тугилган кунингни этурсан байрам.
Бегона боғлардан гул-чечак уздим,
Сен билан кечангни кўрай деб баҳам.

Рост айтсам, гуллардан кўнглим тўлмади:
Гўёки уларнинг тузи йўқ эди.
Кўрки йўқ, иси йўқ, файзи йўқ эди,
Гўёки бағрингда яшнаб кулмади.

Мен энди англадим: она юртингнинг
Гули ҳам чиройли, файзли бўларкан!
Гар совфа қилсанг-чи, кўнглинг тўларкан,
Жам топиб муфассал меҳринг, ҳурматинг!

28 август, 1962, Вена шаҳри

ВЕНА ОҚШОМИ

Тунинг сокин, тунинг бегубор,
Тунинг сирли эртакқа ўхшар.
Осмонингда ёнган неки бор,
Сенга хомуш-хомуш боқишар.

Альп қорларин сийпалаб тушган
Үрмон елинг қандай дилрабо?
Дараҳтингда мудрашиб учган
Қушларингми ё уйғоқ сабо?

Кўчаларда ёнган чирогинг
Мунча хира, бунча ҳам нурсиз;
Бўйнингдаги садаф мунчоғинг
Гўё сўниқ гавҳарсиз, дурсиз.

Каштанларинг мудҳиш шарпадай,
Ҳар юракка солар бир ташвиш.
Тоғда ўрмон қора кўрпадай,
Гўё уни ёпинмиш тун-қиши!

Лекин яхши биламан, Вена,
Оппоқ тонгинг бордир олдинда.
Тонг уфқига интил мардана,
Гашт қиласиз шунда ойдинда!

Ростин айтсан, мен сенда яна
Ўзга жило кўрарман девдим...
Ойдин уфқ ҳаққи, эй Вена,
Сўник боққан тунингни севдим!

1962

Мен сени кўрганда Венада, хоин,
Нафратим тошгани шубҳасиз тайин!
Ватанинг сўрадинг кулиб дафъатан,
Хоинда бўлурми виждану ватан!
Сен қайси ватанини кўзда тутасан,
Қай ватан дардида зардоб ютасан?
Энг оғир йилларда юзинг ўгириб,
Душманга илжайиб, кулиб, букилиб,
Тарк этган ерингу тогу тошними?
Е оғу қўшганинг тотли ошними?
Е сойда кўкарган мажнунтолними?
Е тоғда йифилган ширин болними?
Е кўлда яйраган ўрдак-ғозними?
Е ўзинг синдириган садаф созними?
Е ёшлар қувнаган ойдин кечани?
Е ҳаёт қайнаган улкан кўчани?
Е сочи қирқ кокил жонон қизними?
Е ўзинг булғаган ҳалол тузними?
Е чарос қорайган чаман боғними?
Е ўзинг қолдирган изу доғними?
Қай бири сен учун ватану элат,
Ватан деб атаган тилингта лаънат!
Ватанин таҳқирлаб, унга ўқ отиб,
Илжайиб қулласан яна гап қотиб.
Сен отган ўша ўқ ҳали танада,
Сен эса юрибсан қочиб панада.
На бирор ўқинчу дил ғашлигинг бор,
На виждан қийналиб, чекасан озор.

На Ватан пойига қўйиб бошингни,
Кечирим сўрадинг тўкиб ёшигни!
Ҳамон сен ўша из, ўша йўлдасан.
Ҳамон сен душману ёвуз қўлдасан.
Ошкора қуролни четга ошириб,
Қўйнингта солгансан ханжар яшириб!
Шу бийрон тилларинг остида заҳар,
Доимо кутасан яна бир саҳар¹.
Гўё сен яхши-ю, бошқалар ёмон,
Ватандан қувганмиш тақдир беомон.
Тақдирни ўзингта ўзинг яратдинг,
Ўзингни Азроил оғзига отдинг.
Ҳаром баҳт изладинг, нақд баҳтни қўйиб,
Чарогон эртани эртакка йўйиб.
Қуёшини кўрмадинг кўршапалакдек,
Меъдага сингмадинг аччиқ данакдек!
Итбалиқ кўзингта наҳаңг кўринди,
Тонг нури бурқсиган бир чанг кўринди.
Ҳовлиқиб қўлингни қонга ботирдинг,
Қон эмас, саноқсиз жонга ботирдинг.
Ҳамон сен ўша из, ўша йўлдасан,
Ҳамон сен душману ёвуз қўлдасан.
Эгасиз ит каби юрибсан дайдиб,
Дуч келган жанобга бир эртак айтиб!
На сенда виждан бор, на одамий ҳис,
Ҳар ишинг найрангу ҳар ишинг қалтис!
Ҳаммаси қум узра қурилган чайла!
Сен уни метин деб ётибсан пойлаб.
Сен унда бичилган айғирдек кишинааб,
Минг улоқ тизгининг қўясан тишлаб!
Юзингни эсласам хаёлим учиб,
Оғзимга келади балғамим кўчиб!
Ҳаттоқи балғамим сендан тозадир!
Сенинг ифлослигинг беандозадир!
Шу ифлос ниятда ириб кетарсан,
Бегона тупроқда чириб кетарсан!
Қўлингни узатма, ҳазар қиласман!
Мен сени биламан, яхши биламан!

1962

¹ 1941 йил 22 июнь эрталабки немис-фашист ҳужуми кўзда тутилади.

ЙЎҚОЛГАН ҚАБР

Моцарт мұхтожликда яшаганидан, хотини
унинг жасадини гарнблар мозорига күмисша
мажбур бўлган, устига ҳеч нарса ўрнатилма-
ган. Оқибатда қабр йўқолиб кетган.

(Ен дафтаримдан)

Қашшоқлик, қашшоқлик, машъум қашшоқлик,
Моцартнинг қабрига етган балосан!
Насллар тилида қолган иоласан,
Қашшоқлик — қўл қисқа ва дили боғлиқ!

О, замон, дилпора, бешафқат замон,
Наҳотки фарзандинг қадрин йўқотдинг.
Дўстлари сафидан юлиб беомон,
Изи ҳам топилмас йўқликка отдинг!

Наҳот сен кўрмадинг бир олам-жаҳон,
Тугамас хазина ташлаб кетганин?
Бойлиги эвази қалби бўлиб қон,
Армонли кўзини ёшлиб кетганин!

Наҳот сен оташин дарди ҳурмати
Қабрига қўймадинг кичик бир нишон.
Наҳот у қабрида тиска турмади,
Инсофинг борми деб, эй разил замон!

Эй замон! Эй тузум! Бешафқат номинг
Тарихда мангуга қора ёзилгур:
Борми, айт, инсонга иззат-икроминг,
Кўзингда ёнурми қиттай бўлсин нур?

Мен қайси қабрга қўяй гулдаста,
Қай қабр устида эгай бошимни?
Қай қабр устига тўкай ёшимни!
О, меҳрим бекиёс, чексиз, барваста.

Шу меҳрим ҳурмати сени лаънатлаб,
У босган ҳар тошга лаб қўяман, лаб!

1962

ВЕНАНИНГ ХАЙРЛАШУВИ

**Теплоход қўзгалди, сув қалқиб кетди,
Венанинг соҳилин тўлқин ялади.
Тўлқинлар беармон учиб елади,
Гўё тинч оҳуни овчи ҳуркитди.**

**Палуба устида тураман ёлғиз,
Сўнгти бор Венага ташлайман нигоҳ.
Нимадир қалбимда этиб кетди «жиз»,
Нимадир фикримда кезади тарқоқ.**

**Бир маҳал қарасам, ёшгина бир қиз,
Балкондан бир қизил байроқча елпир.
Шу онда нурдан тез, ширин ва азиз
Ҳаяжон қалбимни босади бир-бир.**

**Бу ахир Вена-да, кўҳна Вена-да,
Бетховен яшаган табаррук эл-да!
Мен қизга қарайман, у ҳам янада
Баландроқ силкийди ўткинчи елда.**

**О, Вена гўзали, байроқчанг силкиб,
«Яхши қол, хуш боринг!» десанг ташаккур.
Шаҳрингга яна бир келарман балким,
Шу байроқ меҳри-ла, әркам, яшаб тур!**

1962

МАЖОР ҚИЗИГА ДЕГАНИМ

Сафардошим Файзуллаевга

Мен келганда айни ёз эди,
Кўлинг тўла ўрдак, гоз эди.
Қайиқ олиб, жуфт-жуфай бўлиб
Дунай бўйлаб сузмак соз эди.

Дунайни қўй, боқقا юр, дединг,
Бирор кўрмас ёқса юр, дединг,
Чуст дўппингга ишқим тушибди,
Бирпас кияй, бериб тур, дединг.

Дўппим кийдинг, жонон, бошингта,
Сал қиyroқ қилиб қошингта.
Кутмаганда очилиб кетдинг,
Сочинг тушиб Альшдек тўшингта!

Етишмаган шу дўппи экан,
Анор юзинг хўп лўйши экан.
Этагингта ёпишган, тўхта,
Олиб ташлай, хас-чўпми экан?

Дўппи бердим сенга ёдгор деб,
Четларида қиз оти бор деб.
Ташвиш чекма мендан, мажор қиз,
Шу қиз кутар: «Софиндим, ёр!» деб.

Фақат дейман: бахting бор бўлсин,
Севган йигит содиқ ёр бўлсин.
Мендек «дайдиб» узоқлаб кетса,
Мендек ёниб интизор бўлсин!

1962

БУДАПЕШТ ҲАҚИДА ЎНТА РУБОЙИ

I

Ўнг томонда Будадир, чап томон Пештдир,
Иккиси туғишиган, қадрдан хешдир.
Гүё тўқ өнгоқининг икки палласи,
Иккиси бир баҳтга баробар эшдир!

II

Пештидан Будада ўқ изи кўпроқ:
Ҳай, йўлчи, ҳар шаҳид қабрига шам ёқ!
Пештини кўкалам, гўзал боғ десанг,
Будани дейишинг мумкин мағрур тог.

III

Будаси тепада, Пешт эса пастда,
Иккиси қош каби туташ пайваста.
Дунайга ташланган азамат кўм-кўк
Кўприги банди-ю, Пешт бир гулдаста.

IV

Пештида сурур бор, Будада ғуурур,
Будага тушади Пештдан олдин нур.
Будада автомат қучоқлаб маҳкам
Ватандош жангчимнинг ҳайкали туурур.

V

Дунайда кўпrikнинг устидан юрсанг ,
Қоқ ярим ўртада тўхтасанг, турсанг.
Сен ўзинг тарознинг шайини бўлиб,
Ҳақлисан, иккисин қўш палла десанг!

VI

Будадан чақирсанг Пештга етмайди,
Иккиси бир-бирин ҳеч ёт тутмайди.
Бу улкан шаҳарга бир меҳмон келса,
Бирини тоқ қўйиб, бири кутмайди.

VII

Буданинг қизлари эркин, қора қош,
Пештнинг шўх қизлари дуркун, қора қош.
Бирини кўзимнинг остига олсам,
Севгимга нималар дерқин қора қош!

VIII

Будада ўт ёқсам, Пештда яллиғи,
Дейдилар, ҳар ёрнинг бор ўз қилиғи.
Дунайда чўмилган ҳу ўша қизнинг
Пештдами, Будада турар қаллиғи?

IX

Будадан бир йигит Пештга қарайди,
Соҳилда жонон қиз сочин тарайди.
Бирининг қалбига бири ишқ солса,
Айтинг-чи, қай бири кўнглин сўрайди?

X

Будадан сайр қилиб Пешт томон ўтдим,
Иккиси ҳавосин баробар тотдим.
Иккиси аслида битта Будапешт,
Бирлигинг битмасин умрбод дедим!

1962

ТАНГАМ ЙҮГИНИ ҚАЁҚДАН БИЛДИНГ?

Атрофимда айланиб-елиб,
— Бугун кўнглим кўп чоғдир,— дединг,
Муздай ҳовуз четига келиб,
— Танганг бўлса улоқтири!— дединг.

Ана шунда яна келасан
Бу шаҳримни соғиниб, меҳмон¹.
Яна азиз меҳмон бўласан,
Шаҳар кезиб мамнун, беармон!

Нега ўзинг уялгансимон
Алланечук бўлиб кетдинг, қиз?
Кўзларингда акс этиб осмон,
Менга танга таклиф этдинг, қиз?

Тангам йўгин қаёқдан билдинг,
Ташла!— дея мунча қистадинг.
Мунча мени шошириб кулдинг,
Келишимни мунча истадинг!

Болгар қизи, эй, меҳри малҳам,
Таклиф учун раҳмат, минг раҳмат!
Ишон, танга ташламасам ҳам,
Яна, яна келаман, албат!

1962

¹ Софияда шундай иримли бир ҳовуз бор. Таги танга билан тўла.

ДУНАЙ ҚИЗИ

Дунай бўйида мен сени кўрдим,
Киприк қоқмасанг, бир ҳайкал дердим.
Дунай шамоли гўё бир наққош,
Қўша кўкрагинг худди эгар қош.
Ҳарир кўйлагинг нозли ҳилпирав,
Бастингда жўшқин ёшлиқ қулф ураг.
Шудринглар ювган оёқ, болдиринг
Дейди, хаёлни бунда қолдиринг!
Дунай ҳам мовий, кўзинг ҳам мовий,
Сеҳр бобида бирдек самовий!
Уфқлар оша ўтли боқишинг,
Шундан келарми интизор кишинг?
Интизоринг ким?
Қалбинг ёқсан ким?
Бир имо билан дардинг уқсан ким?
Қандай баҳтиёр йигит экан у,
Альпдан юксалган бургут экан у!
Мунча кутдириб қўймаса сени.
Бир оз ранжитди шу иши мени!

1962

БАЛИҚ ОВИ

*Сафардошларим Шарифа ва
Жалол Маҳсумовларга*

Юр соҳилга, дединг қиз,
Хўп, дедим дарров.
Кўрқма, дединг, мен ёлгиз,
Кўрмайди бирор.
Бирор кўрса, балиқчи
Меҳмоним дейман.
Тегма унга, зўр кучи,
Полвоним дейман.
Кулиб қўйдинг мийигда,
Мийигингта — жон!
Бундай олов қилиғда
Ёндим бегумон!
Тушиб кетдик қиялаб
Дунай бўйига.
Дунай ётар қум ялаб,
Маст ўз куйига.
Утири, дединг шўх кулиб
Утири берироқ!
Ёнгинамга ўтириб,
Ташладинг қармоқ...
Куни бўйи пойладинг,
Тушмади балиқ
Хафа бўлиб, хит эдинг:
— Бу қандай қилиқ!
Ўксима, қиз, ўксима,
Ўксишинг бекор.
Бошинги қўй қўксима;
Жаҳон бўлса тор!

Кўзимга боқ, кўзимга,
Кўзимда чақмоқ.
Сен Дунаймас, қўксимга
Солибсан қармоқ!
Қармоғингга балиқмас,
Қалбим тушибди.
Озор бермай олсанг, бас,
Ёмон тешибди!

1962

ДАРЁГА ИЛТИМОС

Сокин Дунай, эркин Дунай,
Соҳилингга құшдек қўнай!
Соҳилингда бир кеч тунай,
Десам нима деркин Дунай!

Соҳилингнинг тоши майда,
Бундай яхши жой бор ҳайдада!
Юрагимга қўлинг солгин,
Етсирасанг, майли, ҳайдада!

Тўлқинларинг майин-майин,
Боққинг келар боққан сайин.
Бу оқшомим совуқ десанг,
Майли, қилгин бир кун тайин.

Кечанг бўлур мисли қундуз,
Кўксинг узра тўлса юлдуз.
Қани шу чоқ ёнгинамда
Кулиб турса нозли бир қиз!

Сирдарёдан саломим бор,
Ширин-шакар қаломим бор.
Соҳилингда яйраб кетай,
Шоир деган бир номим бор.

Сирдарёning иши яхши,
Соҳилида ўзим бахши.
Иккингни дўст чатиштирасам,
Шоирликнинг шу зўр иши!

1962

ГУЛЛАР ВОДИЙСИ

Болгария — гуллар водийсининг гулчиларига

Ўнгинг гул, сўлиинг гул, гир атрофинг гул,
Кўқдан гул ёққанми баҳордан бошлаб.
Эй кўнгил, мана гул, ўйна, яйра, кул.
Армонинг қолмасин, кул, хандон ташлаб!

Айт, кўнгил, тортина шу ёшга келиб,
Ҳеч маҳал турфа гул шайдоси бўлиб,
Шундай кеңг гулзорни кўрганимисан жеч!
Бағрингга тўлганми шунчалик севинч!

Шунчалик ифтихор,
Шунчалик викор.
Шунчалик гулларнинг сирли жилваси.
Гўёки гулпараст бу «жинни» баҳор,
Барчасин бир ерга тўплабди ўзи!

Кўз илғаб етмайди, ахир, қара-я,
Тури-чи? Турига етарми саноқ.
Ҳаммаси чиройли, асил, сара-я,
Рангиги-чи? Оқ... бахмал... нимқизил янок!

Бунча ҳам гўзалсан, эҳ, гуллар, гуллар,
Асти дард кўрмасин экканинг қўли.
Шодликдан ҳеч айри тушмасин йўли!
Эҳ, атир уфуринг жаҳонга, еллар!

Сиз босиб кетингиз порох ҳидини,
Бу жаҳон унутсин уруш ўтини!

1962

САФАРДОШИМ БИЛАН СУҲБАТ

**Сен менга мақтама кўҳна Венанинг
Чанг босган ғуурлли, маъсум қўркини.
У менга әслатди ғариб онанинг
Ёшлиқда йўқотган баҳти, эркини!**

**Қани у, аввалги салобат, виқор!
Қани у, назокат, латофат, сурур!
Қани у, мангудек кўринган баҳор!
«Минг йилга етаман!» деган ёрқин нур!**

**Мен энди тушундим: кечаги Вена
Бугунги Венага ўхшамас экан.
Гўё бу асрга ўгай бир она,
Гуллари сўлибди, қолибди тикан!**

**О, менга довруғи сўнгган Венадан
Иқболи чароғон Тошкентим яхши!
О, менга қон томган олтин зинадан
Ёшлиқда шимиган тош қандим яхши.**

**Гавҳардан тож қадаб Тошкент бошига,
Оёғин ўисам ҳам камдир бегумон!
Армонсиз кетди денг, Тошкент тошига
Бош қўйиб, мабодо берарканман жон!**

1962

ВАТАНГА ҚАЙТИШ

Сафардан қайтдим мен мамнун, миҳнатдор,
Кенг Дунай бўйлари орқада қолди.
Йўлимда ҳамиша ҳамроҳим дилдор,
Штраус қуйлари орқада қолди.
Ян қолди (ҳайкалда) отин ўйнатиб,
Тонг қолди уфқда олтин қайнатиб.

Альп қолди қор босган бошини силкиб,
Дунайга «Сен ўзинг кузатиб қўй!» деб,
Тун қолди Венада бошини буркиб,
Ўрмони кеккайиб, ўзга бериб зеб.
Кенг Дунай сувлари қолди жимирлаб,
Соҳилда ўтлари вазмин шивирлаб.

Фучикнинг энг сўнгти дастжатин кўриб,
Кўзимдан тирқираб чиқди қайноқ ёш.
У юрган кўчадан мағрур, тик бориб.
Эшиги тубида эгдим аста бош!
Хокини кўрсайдим ўпардим, албат!
Изини кўрсайдим чопардим, албат!

Мажорлар боғининг зийнати, кўрки,
Қўлбola винолар супада қолди.
София бошида Витоша бўрки,
Терганим маймунжон капада қолди,
Каштанзор, олчазор боғларда кездим,
Турнакўз булоқли тоғларда кездим.

Белград кўкида булут қонталаш,
Бир кучли шамолга муҳтоҷ кўринди!
Ҳар майдон, кўчада гўзаллик талаш
Улкан Альп бошида қор тоғ кўринди!
Қанча йўл, бекатлар орқада қолди.
Изтироб, ҳурматлар орқада қолди!

Ассалом, она юрг, салом, ол байроқ,
Ассалом, соҳилда тик ўсган терак!
Узоқдан кўзимга ташланганинг чоқ
Қинидан чиққудек энтиқди юрак.
Бир дона баргингдан ташла ўзимга,
Гоҳ ўпиб, гоҳ суртай юзу кўзимга!

Қирғоқча чиқдиму ўша ониёқ
Кўчага югурдим, эҳ, яланг оёқ!
Оёғим ҳис қилсин, бу она тупроқ
Қанчалик юмшоғу, қанчалик қайноқ!
Она-Ер — магнитдир, юрак — сен темир,
Магнитга шип ёпиш ва этма қимир!

Она юрг! Соғиндим анжирзоримни,
Соғиндим соҳилда ўсган ялпизим,
Соғиндим бўтакўз севган ёримни,
Соғиндим сени ҳам қизим, ёлғизим!
Соғиниб кўзимда қувончимдан ёш,
Соғиниб, соғиниб тугабди бардом!

Толзорим салқини, соғиндим сени,
Қўлингга бир лаҳза елпингичинг ол!
Эҳ, қандай соғиндим палов исини,
Кел, энди куттирмай, дўстим, суза қол!
Қозонда қолдирма қирмочини ҳам,
Ер шимган сап-сариқ гўшт сочини ҳам.

Сен сира ишонма, ватандош ўртоқ,
Десалар ҳар ерда шу тупроқ, шу гул,
Шу қуёш, шу булоқ, шу тош, шу қирғоқ!
Хатодир! Хатодир! Хатодир буткул!
Она-Ер тупроги бутун бошқадир,
Сувлари шарбатдир, гуллари атири!

Қора дengiz қирғоги, 1962

СОФИНГАНДА

— Мунча ҳам кеч қолдинг! — сафардан қайтсам
Доимо сўзингнинг боши шу, жоним.
Бу соғинч белгиси, ростини айтсам,
Софиниб қолибсан, жону жаҳоним!

Бир кун кечикиб қолмадим, лекин
Кўзларинг негадир чақнаб туради!
Бил, эркам, айрилиқ соати секин,
Висолнинг хуш куни чопиб юради!

1962

ОДАМЛАР ВА ОБИДАЛАР

(Бухоро туркумидан)

ТУРИСТ

У деди: — Амирнинг аркини кўрсат.
Мен дедим: — Яшарган шаҳарга кўз от.
У деди: — Минора қандай баҳайбат!
Мен дедим: — Санъатда мўъжиза албат.
У деди: — Машҳурдир Лабиҳовузи.
Мен дедим: — Машҳурдир шаҳарнинг ўзи.
У деди: — Тор, пастқам кўчалар қани?
Мен дедим: — Йўқотдик кўҳна нусхани.
У деди: — Эҳ, аттанг, кўргим келади.
Мен дедим: — Кенг йўлдан юргим келади.
У ўтмиш шавқида ёниб, тутақиб,
У фақат ўтмишини севиб кўтарди.
Нураган деворга суқланиб боқиб,
Энтикиб-энтикиб хаёл сурарди.
Мадраса пешидан нураган увоқ,
Унингча, тенги йўқ бир гавҳар парча!
Унингча, мўъжиза — кўҳна лой сувоқ,
Ўргимча ин қўйган, ис босган дарча.
Мен ҳайрон қолардим унинг дидига,
Кенг, ёруғ бинога солмасди назар,
Гўё у юрарди тисланиб кетга.
Гўё у дер эди занг темирни зар!
Сўнг билсам, дўстларим, унинг кўзлари
Мен кўрган нарсани кўролмас экан,
Мен юрган кўчадан юролмас экан!
...Кўп эриш туюлди менга сўзлари!..

1963

ГИЛЬЗА

Бухоролик дўстларимга

Бухоро чўлида бир куни ногоҳ
Бир эски гильзага кўзларим тушди.
Кўзларим тушди-ю, ярқ этиб нигоҳ,
Хаёлим кўп олис йилларга учди.

Мен уни танийман,
Танийман яхши!
Сиртида инглиз тамғаси ҳам бор.
Босқинчи жанобнинг бу қора иши
Бизгача етибди бўлиб бир ёдгор.

Эй, дўстим, сен бунга яхши назар сол,
Лондондан шум ният бунда келтирган.
Шу гильза ўқидир, дўстим, эҳтимол,
Отангни у йиллар қонга ботирган.

Эҳтимол, сен севган қизнинг акаси
Шу ўқдан бўлгандир мангу ногирон.
Эҳтимол, қўшнининг ёлғиз эркаси
Эрким, деб шу ўқдан берган бўлса жон.

Шу ўқидир эркингни нипонга олиб,
Бахtingни бемаҳал қонга белаган.
Шу ўқидир юрtingта минг ташвиш солиб,
Босмачи-хоннинг бошин силаган.

Шу ўқидир лондонлик очкўз жанобнинг
Бухоро мулкига узатган қўли.

**Бемаҳал қуритиб ёстигин кўпнинг,
Эҳтимол, шу ерда тугаган йўли.**

**Мен уни танийман!
Сен ҳам таниб қўй,
У йиллар бешикда йиғлаган дўстим.
У йиллар даҳшатин эслаб, яниб қўй
Ва дегин: — Тинчлигу меҳнатда постим?!**

1963

БУХОРО ГЎЗАЛИ

Шарқимиз шоири тилга олгандай
Ҳуснингдан бир нуқсон топмоқлик маҳол.
Лаб деган, лаълидан қўйиб солгандай,
Кўркингнинг гавҳари — лабинг узра хол,
Кўзларни ёндириб, дейди: — Қочиб қол!

Солланиб, ҳуснингни кўз-кўз қилиб юр,
Шаҳрингта ярашар нозу латофат.
Ва лекин, эй синглим, бўлмагин мағурур,
Мағрурнинг ҳусни, бил, баҳтига оғат,
Ҳуснингта ақлингни қила бил улфат!

Баҳтинг шу: ҳуснингта ўзинг эгасан,
Ўғирлаб кетмайди амир айғори.
Истасанг ҳовлингга ўсма экасан,
Сеники меҳнатнинг ёғлиқ қаймоги!
Умрбод ободдир баҳтинг гулбоги.

Яшнаб юр, баҳтингта ўзинг ёр бўлиб.
Ҳуснингнинг мадҳига жаҳон тор бўлиб!

1963

БУХОРО ОҚШОМИ

(*Манзара*)

Кун ботди. Қуёшнинг сўнгти шуъласи
Минора учида йилтиллаб қолди...
Тун қизи қошига тортиб сурмасин,
Юлдуздан лабига хол қўйиб олди.

Ел турди, гўёки осмонкапанинг
Четида ҳилпирав оқшом фартуғи.
Ой чиқди, гўё у Қизилтепанинг
Бир коса лиммо-лим машҳур қатиги!

1963

ЎЛИМ МИНОРАСИ

Гар осмон қуласа тутиб қолгум деб,
Кифтингни кўкларга тираб турибсан.
Ўзингта ортиқча бериб ғурур-зеб,
Кеккайиб олисга қараб турибсан.

Биламан, бир замон сенинг савлатинг
Ҳар маъсум юракка минг даҳшат солган.
Тилларга олинса сенинг шум отинг
Кўпларнинг сўзлари бўғзида қолган.

Сен машъум ўлимни эслатиб доим
Ҳар қалбни ларзага солиб тургансан.
Ҳар қалбни қўрқувдан қилиб мулойим,
Гўёки инсофу динга бургансан!

Аслида қаршингда турган ҳар одам
Қалбида бир исён, тўфон бор эди.
У сени нафратлаб босарди қадам,
У учун бу дунё мисли дор эди.

У йиллар орқада. Сен эса ҳамон
Кифтингни осмонга тираб турибсан.
Энди сен даҳшатмас, ҳунарманд инсон —
Мўъжиза санъатин асраб турибсан.

Рост айтсам, минора, сен-чи аслида,
Ясанган-тусангани бир чўпон қизсан.
Қўйларинг таратиб баҳор фаслида
Кузатиб турувчи бир шаҳло кўзсан.

Мен сенга термилсам йигирма ёшим
Кўзимнинг ўнгидан бир-бир ўтади.
Эҳ, қандай қувончки, бу мағрур бошим
Қаршингда ўзини тикка тутади!

Мен сенга термилсам, қалбим даҳшатмас,
Санъаткор меҳрига лим-лим тўлади.
Кўзларим ажалга сени ўхшатмас,
Сени бир мўъжиза деса бўлади!

Чиндан сен мўъжиза!
Ҳар битта ғиштинг
Боболар қалбидан беради дарак.
Энди сен тунларни кунга алмашдинг,
Минг йил тур — кўз ёниб, қувонсин юрак!

1963

ЗАРАФШОН

Зарафшон, сен менинг қалбимга яқин,
Мен сени кўрганман Самарқандимда,
Ҳайқириб оқасан, тўлқининг чақин,
Минг ҳаёт бор, дея, менинг қатимда!

Чиндан сен ҳаётбахш: кела-келгунча
Ҳар ниҳол қаддига суқли боқасан.
Ҳар ниҳол улгайиб гулга киргунча
Қалбида нур бўлиб ўзинг оқасан.

Шу водий, шу чаман, шу гўзал чорбоғ
Сен сабаб — куйдирар инсон кўзини.
Сен сабаб, Нурова — минг кўзли булоқ
Мунаввар боғларда кўрар ўзини.

Бухоро келдиму хуморинг тутиб,
Бир кўриш ишқида қошингга елдим.
Қошингга етдиму ёқамни тутиб,
Ҳайратдан хаёлим чувалиб қолдим.

Сен бунда на дарё, на бир анҳорсан,
На қирғоқ ўпираиб, тошиб оқарсан.
Бир номинг демаса, ариқча борсан,
Болалар ҳатлашиб ўтгудек торсан.

Анави қишлоққа кирдингу аста
Охирги томчингни улашиб битдинг.
На нола-оҳ урдинг сўнгти нафасда,
Гўё муродингга шу ерда етдинг!

1963

ЯНТОҚ

Дейдилар, янтоқнинг илдизи узун,
Иигирма метрга етармиш ҳатто.
Эҳтимол, жони бор дўстимнинг сўзин,
Талашиб ўтирсам қилурман хато.
Лекин у илдизин чўзмасин қанча,
Барибир бўлолмас чинор ё арча!

1963



ТҮРТЛИКЛАР

* * *

Бир лаҳза тинчима, дардкаш юрагим,
Тинчиган онингни ёмон кўраман.
Бу замин шунчалик нотинч курраким,
Тинчитиш дардида бетинч юраман.

* * *

Ўт тушган юракка далда берма, қўй,
Ҳақ бўлса ўртаниб ёнсин то абад.
Дард билан яралган бу олам, бу куй,
Дард билан улғаяр ҳаёт, муҳаббат!

* * *

Туғилмоқ — ўлмоқнинг илк дақиқаси,
Бас, нечун ўлимдан қўриқмоқ, аланглаб?!
Сен шундай яшаки, виждонинг саси
Тарихлар уфқида қолсин жаранглаб.

* * *

Баҳор келди гул сочиб ҳар ён
Ва ўрмалаб кетди у тоққа.
Олқишилайди уни беармон,
Боғда булбул, сойда қурбақа.

* * *

Бир илга боғлиқман. Бу ишнинг учи
Эй, жонон, кўлдандир сенинг қўлингда.
Шу итни ўзингта аста торгсанг-чи,
Зигирдай шафқатинг бўлса дилингда!

* * *

Аравам тортарди аввал битта от,
Энди у жуфт бўлди гўё қўшқанот:
Биттаси ўз тилим, бири рус тили,
Довонлар ошурман энди дадил, шод!

* * *

Сен келдинг, кўзимга ёришди олам,
Сен келдинг, руҳимда ўзга бир оташ.
Сен шунча қалбимга яқинки, эркам,
Ўт билан тутундай қоришиқ, туташ.

* * *

Боғ ҳувиллар салқин куз келмб,
Құшлар кўучиб кетибди.
Гўзаллик ҳам гўё қуш бўлиб
Боғдан учиб кетибди.

* * *

Бахт излаб ҳар ерга ташлама қадам,
Олисга нигоҳинг тикма дам-бадам.
Уйида бахтини топмаган одам,
Бахтини топмайди кезса ҳам олам!

* * *

Мен сени кутаман, сендан йўқ дарак,
Минг хаёл, минг кўйга тушди бу юрак.
Қўрқаман, чирт этиб узилмасайди,
Севги деб аталган нозик бир ипак.

* * *

Гул узмоқ ҳамманинг қўлидан келар,
Гул эса ҳаммани кўрмас муносиб.
Гул экмоқ ҳаммага бўлмайди насиб,
Ҳар ерда кўкармас биз севган гуллар.

* * *

Чироқ ёқдинг, ёриди жаҳон,
Оппоқ нурдан туннинг кўрпаси.
Кўршапалак қочди шу замон,
Узоқлардан келар шарпаси.

* * *

Ўзбек, тоҷик, қирғиз, туркман ва қозоқ,
Улкан, соғлом бир қўлдаги беш бармоқ.
Ёса — кенг кафт, буни дўстга узатар,
Юмса — зўр мушт, бу ракибга чўнг тўқмоқ!

* * *

Қатиқининг юзини ёғ босса агар,
«Хўи яхши ивибди!» — қувонар онам.
Дўстларнинг кўзини ёғ босса агар,
Фарёдки, гафлатда қолибди олам!

* * *

Ўқ тегди солдатга ва ҳалок бўлди,
Қўлида соати юрганча қолди.
Ва уни бир дўсти тириқ юракдай
Авайлаб қўлидан чиқариб олди.

* * *

Қор эриди, сув бўлиб оқди,
Сингиб кетди ерга қанчаси.
Эрта уни олиб чиқади,
Минг бир рангда баҳор ғунчаси.

* * *

Севибман, бу олам жилвагар, кўркам,
Рост бўлсин топганим кўнглинг майлини!
Ишқингни май қилиб симирсам, эркам,
Кайфидা умрбод қолсам майлими?

* * *

Болари ибратдир яшашга, бироқ
Болари сингари кезма боғма-боғ.
Сен ўзинг боғ ярат, токи дўсту ёр,
Богингни аридек қиласин ихтиёр.

* * *

Ўликни оёққа турғизар қўшиқ,
Оёқдан йикитар тирикни қилич.
Иккисин севади ёнгандан ошиқ,
Қиличдан аълодир най бўлган қамич.

* * *

Сен дунё севинчин гар инъом этсанг,
Мен уни дўстларга бўлиб бераман.
Гар дунё аламин елкамга ортсанг,
Бир ўзим оҳ-воҳсиз олиб юраман.

* * *

Нипонга тўғрилаб худди қалбини
Қўшиққа ўқ узган замонни кўрдим.
У ўлди, дедилар, хўп суриштирдим,
Ҳеч ерда топмадим қўшиқ қабрини!

* * *

Тақдир солса тоғ бошига ғам,
Тарс ёрилиб, чўкиб кетибди.
Фақат бардош берибди одам,
Одам ўзин мағрур тутибди.

* * *

Улгайдинг. Ўзингни ўт-сувга урма,
Тий ўзинг киборлик, шуч манманлиқдан.
Лек умринг биносин кесакдан қурма,
Ўшалиб кетади зарбдан, намлиқдан!

* * *

Қўлингта тушди-ю, қанотин юлдинг,
Энди у учолмас, уйингда қолди.
«Қўшим!» деб ардоқлаб яшнадинг, елдинг,
Учмаса нимаси укинг қуш бўлди!

* * *

Сен борсанки, менинг қалбим бутундир,
Сен борсанки, луқмам тотли ютиմдир.
Сен борсанки, орзум сиғмас дунёга,
Сен бўлмасанг муҳаббатим етимдир.

* * *

Юрагинг ўртанса йигла эрта-кеч,
Севинсанг тошларга тил кирит, кулдир.
Лекин сен унугта инсонлигинг ҳеч,
Инсонсиз бу олам либоси жулдур!

* * *

Врач учун одам юраги
Оддийгина бир эт парчаси.
Шоир учун илҳом тираги,
Кенг оламга ёруғ дарчаси!

* * *

Соч-соқол оқарар, дейдилар ғамдан,
Бўлмаса нега у қувончли дамдан
Аслига келмайди,
Қора бўлмайди?

* * *

Кўзингта айт, тушларимга кирмасин,
Изингта айт, учрамасин йўлимда.
Синглингга айт, эшигингда турмасин,
Сен хабарсиз бўлгач менинг ҳолимдан.

* * *

Фарзандлар қалбida оталар қони,
Кошкийди қон билан ақли, имони,
Софлиги, виждони, дарди ҳам кўчса!—
Хотиржам бўларди аждодлар жони!

* * *

Шамол турди — яйради япроқ,
Дўстларига у эди чапроқ.
Ўз бошича узилиб кетди,
Ерга тушди ва умри битди!

* * *

Эл мадҳини қилмаса, бу тил менга керакмас,
Ёр мафтуни бўлмаса, бу дил менга керакмас,
Оlam кенгdir, ранг-баранг, ташвишлари бекиёс,
Сигдирмаса ўзига, ундай юрак керакмас!

* * *

Бу йўлда нечанинг оёқ изи бор,
Изларки, чаплашган, узун-қисқа, тор.
Барибир шунда ҳам сенинг изингни
Бемалол ажратиб оламан, дилдор.

* * *

Мажнунтолнинг соясида
Қолган эди ёшлигим.
Излаб борсам куз кезида
Тополмадим. Олган ким?

* * *

Кўчаларда хотира бор яхши-ёмондан,
Кўчаларда хотира бор давр, замондан.
Кўчаларнинг кўзи йўқ деб, қалбсиз деб, эй жон,
Охирида бармоқ тишлаб бўлма пушаймон.

* * *

Илк баҳор нип урган нимжон бир гиёҳ
Юракка бир олам севинч сочади.
Эҳтимол шу севинч, шу соғинч нигоҳ
Ез бўйи чечаклар ҳуснин очади.

* * *

Энг сўнгги онгача ардоқлаганим,
Шу она тупроғим, шу она тилим.
Барибир меҳрига тўймайди таним,
Барибир армонда кетади дилим!

* * *

Ҳар одам — бир олам: тоғи, жари бор,
Туни бор, куни бор, дўли, чақмоғи.
Баъзida ёнмоқни этса ихтиёр,
Баъзida мумкиндири селдек оқмоғи!

* * *

У ўлди — меҳнаткаш, заҳматкаш одам,
На орден олганди, на бирор унвон.
Барибир ҳувиллаб қолди бу олам,
Барибир ўртаниб ачиди бу жон.

* * *

Ути сўнган қараб турмас,
Чора қидир, ён, югур, бас.
Прометей келиб сенга —
Оловингни ёқиб бермас!

* * *

Ишқингда ўртайвер, майли, эй пари,
Донолар сўзини унутма фақат:
Ҳижрондан туғилар висол онлари,
Қайғудан севинчу чарчоқдан роҳат!

* * *

Қилич қинда, ўқлар ўқдонда
Пинак бузмай ухлашиб ётар.
Мен уйгоқман. Ухласам агар,
Бари бирдан уйгониб кетар!

* * *

Мен ҳайрон қоламан боқиб булбулга,
Эсимни танибман сайрайди бир хил.
Барибир завқ солар ҳамон кўнгилга,
Ҳамон у куйлардан яйрайди бу дил.

* * *

Ҳасадгўй дўстини аввал ўлдириб,
Сўнгидан йиглайди ҳаммадан кўпроқ.
Билади энди у келмас тирилиб,
Кўринмоқ истайди энди у софроқ!

* * *

Юрагим нимани буюрса ёздим,
Баъзида яйрадим, баъзида оздим.
Баъзида ёқамни, ҳақ бўла туриб,
Тухматчи қўлидан аранг қутқаздим!

* * *

Оқ қоғоз хатингдан бўлибди қора,
Нурли ниятларга йўл очса зора!
Қоп-қора кўмирда ётади ахир
Бахтини топгунча олмос бечора!

* * *

Инқиlob гуlinни kўksimga босиb,
Нурига чулғаниб ўтди ҳaётим.
Шу йўlim кимгаки қиларкан насиb,
Кенг ёзsin уфқa мағрур қанотин!

* * *

Бу омад лочини баъзан йўқолиb,
Баъзида нияting уфқин қучади.
Тош отма дўстингта ғaflatgda қолиb,
Кўзингта ушoғи келиб тушади.

* * *

Ҳар япроқ баҳорда бир варақ китоб,
Ез бўйи ўқийди ҳижжалаб офтоб.
Охири саргайib, тўзиб кетади,
Офтоб ҳам тарқ этиб, безиб кетади.

* * *

Гар ботир адашса душман тогида,
Икки йўл топади сўлу соғида:
Ё нажот, ё ўлим! Лекин билинг у
Душманга тиз чўкмас жон сўроғида!

* * *

Гул тердим жaҳонning неча боғидан,
Ва не-не шaҳарлар кенг очди қучоқ.
Бегона кишилар пар ёстиғидан
Туғилган ўлкамning харсанги юмшoқ!

* * *

Тақдиrim қаршилаб чиқдим илк ёшдан,
Тақдири ҳам бошимни силади мағрур.
Йўлимга тўшалди мен интизор нур,
Мурувват кўрдим мен әлдан, қуёшдан.

* * *

У тирик чогида болта кўтариб,
Пайини қирқишига изларди фурсат.
У ўлгач кўксига мушт билан уриб,
Дейдики, дўст эдик қалин, серҳиммат!

* * *

Тириклар сафида ўликлар ҳам бор,
Нафас ҳам олади, сўз ҳам қотади.
Баъзида тирикка ўқ ҳам отади,
Баъзида топади обрў, эътибор!

* * *

Елгиз бош — қайроқ тош. Дўст орттирип,
Дўстим,
Дўсти кўп кишининг қўли ҳам баланд.
Мен дўстлар қавмида лйрадим, ўсдим,
Дўстлардан ажралсан доим едим панд!

* * *

Мақтовга учмадим чиқариб қанот,
Сўксалар турмадим ёшимни тўкиб.
Билдимки, бир хилда ўтмайди ҳаёт,
На унда, на бунда кетмадим чўкиб!

* * *

Мен доим фидоман азиз тупроққа,
Бу тупроқ бўлмаса боргум қаёққа?
Мен ундан ўзгани қилмадим ҳавас.
Қўшалоқ кўринар фақат қўрқоққа!

* * *

Юз тубан кетмадим шону шараф деб,
Молу мулк қилмади кўзларим хира.
Ҳамиша камтарлик бўлди менга зеб,
Дўстлардан кўзларим узмадим сира.

* * *

Пул билан тикланган иззату икром,
Ё амал туфайли тошилган обрўй,
Гўёки муз узра ёзилган бир ном,
Гўёки қарз олиб қилинган бир тўй.

* * *

Субутсиз сўзини тонгти туман бил,
Ё кўприк ўрнига солинган бир қил.
Туманинг ҳёти қуёш чиққунча,
Қил эса кўтармас ўз устида фил!

* * *

Дўст аччиқ гапирса қулогингни тут,
Гар оғу тутса у индамасдан ют.
Ҳар аччиқ гапининг лаззати болча,
Ҳар томчи оғуси малҳамдир ва қут.

* * *

Сен кулиб гапирдинг, мен солдим қулоқ,
Йиғлаган чоғинг ҳам кетмадим йироқ.
Чунки мен дўстингман, ялакат магиз,
Сен агар мой бўлсанг, мен нурли чироқ.

* * *

Аччиқ чой ўрнида совуқ сув тутсанг,
Хотиржам кўнглимга шак тушмас зарра.
Лек нотинч кунингда мени унутсанг,
Бу оғир мен учун саноқсиз карра!

* * *

Денгизнинг қирғоги, тоғнинг чўққиси,
Йўлларнинг энг охир тугар ери бор.
Лекин ҳеч тугамас дўстлик ҳалқаси,
Қуламас дўстлик-ла қурилган девор.

* * *

Давлатинг пеш қилма, қўлнинг киридир,
Сен менга соғлиғу ишингдан сўйла!
Бахтингни пул эмас, соғликдан қидир,
Соғлиқни пул билан топилмас, ўйла!

* * *

Ҳар ўтган кунингга қувонма, дўстим,
Ҳар ўтган кунингга берма мақтov, зеб.
Ўйлагин: нимага етди деб дастим,
Нимага етиши керак эди деб!

* * *

Дардингни қоғозга силлиқ битгандан
Дудуқлаб бўлса ҳам айт ўз юзига.
Сўзингни уқмаса бетинг бўртгандан
Чиқариб олади якун ўзига!

* * *

Елғоннинг оёғи қисқа бўлса ҳам
Баъзида у жуда узоқ кетади.
Гоҳ ҳолдан толдириб лоҳас этади,
Оёғи узилиб, егунча барҳам.

* * *

Қанчалик пок бўлма, сен тухматдан қўрқ,
Бу ожиз кишилар тўқиган тузоқ.
Баъзида қилади саёз жойда гарқ,
Баъзида қоп-қора бўлиб қолар оқ!

* * *

У сенинг дабдаба, амалинг дўсти,
Амалдан тушиб кўр жўрттага бир кун.
Ўйингта кирмайди ҳатто йўл усти,
Ишингта ясайди ёмонлаб якун.

* * *

Дўстингни ачитиб, қўйнига қўл сол,
Аразлаб кетмаса, шу асил қиши.
Шу дўстинг қошида қиши-бўронда қол,
Жонингни иситмоқ бўлур ташвиши!

* * *

Душманнинг ошидан, дўст тоши яхши,
Ширин сўз — юракнинг безаги, нақши.
Ўзга юрт баҳори, чаман ёзидан
Минг бора аълодир она-Ер қиши!

* * *

Туҳматчи узури тилда бўлади,
Алами ичида, дилда бўлади.
Ишониб сирингни, дардингни айтма,
Кейинча ҳаётинг қўилда бўлади.

* * *

Омадни омонат деганинг тўғри,
Омадга ишониб юрган ютқизар.
Омадга суянар одамнинг ғўри,
Кучига ишонган сўзин ўтказар!

* * *

Хушомад илиқ чой, ичса бўлади:
На тишга тегади, на тил қуяди,
Лекин у бор ерда ҳақ сўз ўлади,
Елғонни сув қилиб жарга қуяди.

* * *

Ажалнинг йўлида тўғаноқ бўлмоқ,
Сиҳатлик шишасин авайлаб тутмоқ,
Дарз кетса вақтида чегалаб олмоқ,
Сирғанчиқ ерларни айланиб ўтмоқ.

* * *

Дарз кетган косанинг бордир иложи,
Кўнглинигни дарз қилиб қўйма, эй инсон.
Чегага ярамас ҳатто шоҳ тожи,
Эвини қилолмас ҳаттоки Луқмон!

* * *

Тил дами қиличдан ўткир бўлади,
Жароҳат изи ҳам битмайди асло.
Дилозор бўлмагин тилим узун деб,
Тил бошинг посбони ҳар чоқ, ҳар асно!

* * *

Бу улуғ табиат ҳикматига боқ:
Инсонда бир тилу иккита қулоқ.
Демак у дейдики, бир марта сўзлаб,
Бошқани искки бор лозим тингламоқ.

* * *

Эҳтиёт қўрқоқлик белгиси эмас,
Йдрокли кишининг иттифоқдоши.
Ур-сурӯ, юр-югур мардликка кирмас,
Гавҳардан бўлади мардликнинг тоши!

* * *

Мард ўлим қошига тикка боради,
Шиддатли ўлимнинг ўтин ёради.
У ўлса, чўкади асқар тоғлар ҳам,
Лекин мард ўзи-чи, тикка қолади!

* * *

Бахт қўнса бошингта — беҳикмат эмас,
Таъм кирса ошингта — беҳикмат эмас,
Донолар юрмайди кўчада санқиб,
Келиши қошингта беҳикмат эмас.

* * *

Баҳор суви малла бўлади,
Ешлик чоги ялла бўлади.
Бахтили бўлсанг, ҳатто кексалик
Бир ажойиб палла бўлади.

* * *

Ирмоқлар қўшиғи тоғлар шаънига,
Булбуллар қўшиғи боғлар шаънига.
Қай шоир зинданда гул-чечак экиб,
Қўшиқлар тўқибди зоғлар шаънига!

* * *

Тилёғлама — чаққон сўз бўлма,
Усти тилла, ости жез бўлма,
Охирида нархинг паст тушиб,
Хардор севмас арzon бўз бўлма!

* * *

Сой бўйида ўсган тол,
Ешлигимни эслаб қол.
Қайтиб келсам кексайиб,
Иккиланмай қарши ол!

* * *

Туш кўрдим. Тушимда ўлиб қолибман,
Аллаким йиғлайди бошимда юм-юм.
Аллаким қалбига севинч солибман,
Устимда гул кўрдим уюм ва уюм!

* * *

Бир фарзанд бир халқнинг шону шуҳратин
Оламга минг достон қила олади.
Баъзида одамлар бир зот тухматин
Вақтида даф этмай ожиз қолади.

* * *

Гар құйғаш кулмаса, бу олам кулмас,
Оламни бутун деб, бепарво бўлма.
Ер шари тарвузмас, тилимлаб бўлмас,
Лек ёвуз қўлига пичоқ ҳам берма!

* * *

Сен менга шарафу шонлардан гапир,
Сен менга муборак қонлардан гапир.
Ҳаммаси ўтибди, шукронда қилиб,
Энди сен эртаги онлардан гапир.

* * *

Ёшликда куч мўлу маҳорат етмас,
Маҳорат ортиргач куч-қудрат етмас.
Табиат шунчалик устомон, хасис,
Иккисин бир қўлда, бир дилда тутмас!

* * *

Ватанга муҳаббат виждон амридир,
Садоқат ва поклик имон амридир.
Имонсиз яшашдан ўзни тий, эй жон,
Бебурдни айбламоқ замон амридир.

* * *

Бахтингни қидирма, меҳнатни қидир,
Меҳнат замирада босиқдир бахтинг,
Манглайда қайнаган терингни сидир.
Шу ерга қурилган арш аъло, тахтинг!

* * *

Умрни оқар сув дема, азизим,
Ҳар томчи зилолда ҳаёт ризқи бор.
Умрлар бўларки, биламан ўзим,
Бир томчи сувча ҳам нафи йўқ, бекор!

* * *

Эй, япроқ!
Жиндай ел турганга шунча титрамоқ!
Шунчалар ширинми жонгинанг сенинг.
Яшашга, курашга қодир бўлмасанг,
Нега сен дунёга келдинг, эй қўрқоқ!

* * *

Сен ўзинг ўзингта сиғмасдан денгиз,
Қирғоқдан отилиб, чиқмоқ бўласан,
Мен-чи, мен ўзимга сиғмаганим кез,
Не қил деб маслаҳат, фикр берасан?

* * *

Пичоқнинг дамига булбул қўнмайди,
Чириган ёғочни уста йўнмайди.
Севгидан лоф уриб бўса сўрама,
Севмаса, барибир ўлса кўнмайди!

* * *

Мен унга ишқ билан дарддан сўйладим,
Мен унга қўрқоғу марддан сўйладим.
Мен унга тиксану гулдан сўйладим,
Гоҳ тилдан, гоҳида дилдан сўйладим.

* * *

Чавандоз! Қиличинг офтобга солиб,
Пўлат деб, сен менга маҳтовни уйма,
Ўкинма охири назардан қолиб,
Перо ҳам пўлатдан, унутиб қўйма!

* * *

Ўз юртимда кўзларимни боғланг менинг,
Адашмасдан йўлларимни топиб юргум.
Текиси ҳам чуқур менга ўзга элнинг,
Очиқ кўз-ла пешонамни юз бор ургум.

* * *

Йўлларни тозаланг инсон ўтади,
Демакки кўчани нур тўлатади.
Инсонсиз бу жаҳон бўм-бўш ўрадир,
Ҳар они бир даҳшат, ажал кутади.

* * *

Тилингдан қўлингниинг узуни яхши,
Бефарқлик — умринг қаҳратон қиши.
Нодон даврасида ўтган юз йилдан,
Донолар сұҳбатин бир зуми яхши!

* * *

Улимнинг ваҳмаси босса кишини,
Имони сусайиб, шайтон кулади.
Ҳаётга қадаган ишонч тишини
Улимни ўлдириб, тирик қолади!

* * *

Сербутоқ шоҳдаги барра япроқлар
Илдизнинг қуёшга берган саломи.
Илдизни асранигиз, дўстлар, ўртоқлар,
Илдиздан бошланар наботот номи.

* * *

Бу умр карвони доимо йўлда,
Гоҳида чўққида, гоҳида чўлда.
Манзилга бехатар етиб боради,
Эътиқод машъали гар бўлса қўлда!

* * *

Сен дединг: бунча кўп дунёда ёмон!
Йўқ, дўстим, дунёда яхши кўпроқdir.
Яхшилар кифтида туради жаҳон,
Илоҳим, ёмонга қолмасин тақдир!

* * *

Бешафқат юрак у, юракмас,
Яхшилик оламда сийракмас.
Кўнгилга кўп нарса керакмас:
Бир оғиз илиқ сўз бўлса бас!

* * *

Олмосдай ярқираб турганинг билан
Аслида пишасан, ёнасан фақат.
Шерсимон солланиб юрганинг билан
Мушуксан, мушукдек қоласан фақат.

* * *

Дўстларим ачитса ноҳақ, ноўрин
Юрагим ўртаниб фарёд соламан.
Рақибим ачитса, агар кечқурун,
Тонгтacha севинчдан уйғоқ қоламан.

* * *

- Ўлимга ким чиқар ясаниб пешвоз?
- Мард йигит! Золимлар қилганда қатл.
- Ким шундай дамларда қолади адил?
- Онаси ва дўсти! — Икки жўр овоз!

* * *

Илонга дедимки, тўғри юрсанг-чи!
Изингни қарагин эгри ва бугри!
— Бекор гап! — деди у ўртаниб ичи,—
Нотўғри кўрсатган кўзларинг макри!

* * *

Кўзимда кечанинг нимтатир юқи,
Ҳар онда бир ният кезиб юрибди.
Эртани ўйлайман, эртанинг юки
Бугуноқ елкамдан босиб турибди.

* * *

Мен шерда кўрмадим қуён юрагин,
Мен гулда кўрмадим итга керагин.
Шер — шердир, ит — итдир, гул эса гулдир,
Инсоннинг йўлини гулларга тўлдир!

* * *

Қанчалик кенг багир бу она-Ерим,
Кўқсида гул ҳам бор, сассиқалаф ҳам.
Демасми у бизга, мардларга гулим,
Номардга шу сассиқалафим тухфам!

* * *

Йўлларинг минг олис бўлса ҳам, дўстим,
Манзилинг аниқми, шу учун қувон.
Шу олис манзилнинг илинжида ён,
Оёғинг чақир томш тилса ҳам, дўстим!

* * *

Ойга ҳам инсоннинг оёғи етди,
Ой романтикаси гўёки битди.
Аслида инсоннинг ақл қалами
Романтик оламнинг илк бетин битди!

* * *

Гулларни гул қилган на унинг кўрки,
На унинг ўхшашсиз муаттар иси.
Гулларни гул қилган инсоннинг эрки,
Инсоннинг идроки, диди ва ҳисси!

* * *

Бўйнимга солинса олтиндан занжир,
Нега мен олтин деб уни эъзозлай!
Олтинми, темирми, барибир занжир,
Занжирни ким айтар бўйнимга солай!

* * *

Қаламни яхшилаб очганинг билан
Яхши шеър ўзича ёзилавермас.
Хазина тоғини қучганинг билан,
Хазина ўзича қазилавермас.

* * *

Кечқурун шафақни ўғирлаб кеча,
Эрталаб уфққа қайтадан сочди.
Кечқурун ўқинчдан хўрсинган ғунча
Эрталаб шод-хандон лабини очди.

* * *

Не етсин беташвиш ёшлик чогига!
Кўз очиб юмгунча ўтиб кетибди.
Мен энди англасам: умр богига
Донолик кўчатин тикиб кетибди.

* * *

Шаънимга тўқилган гийбат за миши-миши
Қамишнинг учидаги турган тўзаноқ.
Ел турса, у тўзиб кетади ҳар ёқ,
Ўрнида қолади қалқса ҳам қамиш!

* * *

Жунжиган қўлини иситмоқ учун
Оlamга ўт қўймоқ истайди бирор.
Бирор-чи, шу ўтни даф этмоқ учун
Жон фидо!— мўйловин босса ҳам қирор!

* * *

Мен гулсиз қолсам ҳам, тақ, сенга бўлсин,
Бу — севги дарёси, оқ, сенга бўлсин.
Бахтсизлик довули қоқса эшигинг,
Мен қора кияйин, оқ сенга бўлсин.

* * *

Гулнинг қадри ҳиди билан,
Инсон қадри диди билан.
Мард йигитлар жангта киар
Юракдаги ўти билан!

* * *

Ким сенга молу мулк, жонни тикмади,
Хеч бирин қулмади баҳти, омади.
Сен эса мен ғарип йўлида зорсан,
Бу менга тақдирнинг буюк ҳиммати!

* * *

Ҳар қандай пурҳикмат доно авлод ҳам
Ўз бурчин ўтолмас мукаммал, тўқис.
Чаласи қолади. Чаласин баҳам
Үртада кўради содиқ ўғил-қиз.

* * *

Севмасанг бу тупроқ устида юрма,
Сен учун Ватан йўқ иссиқ бағрида.
Бекорга лофт урма, кўкрагинг керма,
Номардлар ёнади унинг қаҳрида!

* * *

Бу хасис табиат тантлилик қилиб
Сени яратди.
Сен эса, гўзал қиз, тентаклик қилиб
Ерга қаратдинг!

* * *

(Чет эл хотираси)

Кўнглимда кезади бир қизиқ жумбоқ,
Дунёнинг нотекис бир ишига боқ:
Меҳнатни қиласи ўнг қўл ва лекин,
Безакни тақади чап қўл, чап бармоқ!

* * *

Инсон-ку онадан туғилади соф,
Қачондан нопоклик унга юқади?
Шу савол ҳали ҳам ётар бежавоб,
Шу савол қалбимни мудом сиқади.

* * *

Бир дона гул билан кўнглимни олдинг,
Бир дона сўз билан совутдинг яна.
Қай бирин ўзингга сен маъқул билдинг,
Эй, ҳиммат мулкидан келган парвона?

* * *

Сен онанг ўлганда туздинг дастурхон:
Новвоту пистаю қазию қарта.
Лекин айт, эй йигит, сен неча марта
Онангнинг ўзини қилгандинг меҳмон?

* * *

Ҳақиқат — бешафқат, қаҳридан қўрқинг,
Ғафлатда бўлсангиз оёққа қалқинг!
Ҳақиқат қурбони бўлган кишини
Ўнгда ҳам, тушда ҳам олқишиланг, ўқинг!

* * *

Нега қоқдинг эшигим, шамол,
Хушхабаринг бўлса айта қол.
Йўқса, мени бевақт ранжитма,
Қўшнимга ҳам кирмай кета қол!

* * *

Боғларнинг атрини ҳовуч-ҳовучлаб,
Сувларнинг бетига сочади еллар.
Тарихлар юкини азот опичлаб,
Эллардан элларга кўчирап эллар!

* * *

Қабринг узра келдим, она, бошимни солиб,
Не-не қутлуғ, илҳақ ишлар эртага қолиб.
Сенга қилган хизматимдан кўнглим
тўлмасдан
Юрагимнинг аллаери ачишар ёниб!

* * *

Бу олам сирини англадинг бир-бир,
Баъзида тоғ ошдинг, баъзан кечдинг қир.
Яна бир олам бор — бу одам қалби,
Энди шу оламга илож топсанг кир!

* * *

Одамлар бор: йўлига сочасан гуллар,
Одамлар бор: садқайи гул кетсин.
Одамлар бор: бошига кўтарар эллар,
Одамлар бор: садқаи эл кетсин!

* * *

Қалб сўрама, тўртта бўлса ҳам
Ҳаммасини берардим сенга.
Ўзи битта, битта бўлса ҳам
Меҳри, дўстим, сифмас кўксингта!

* * *

Кўчаларни айланиб кўр, изим бор,
Мен тирикман, чунки ҳали ўзим бор.
Изим ўчгач, ўзим кўчгач, барибир
Мен тирикман то оламда сўзим бор!

* * *

Севинчни қайғуга қилиб омухта
Дунёни яратди бу кўҳна тақдир.
Ким севинч отини әгарлаб пухта
Қайғуни бостиrsa — шу одам марддир!

* * *

Ариқда сув эди, қумғонда қайнаб,
Чой бўлиб дамланди ва тўрга ўтди.
Шу маҳал гердайиб, феъли ҳам айнаб,
Ариқда оққанин, эвоҳ, унутди!

* * *

Гўзалликка бахтни эш қил,
Эй табиат наққоши!
Билки шунда ўқинмас дил,
Камроқ оқар кўз ёши!

* * *

Сен ёлғон гапирма, ижодкор юрак,
Наинки баралла, ҳаттоки секин!
Елғонни беморга яхши бир тилак,
Ниятда врачлар сўйлаши мумкин!

* * *

Иғламоқ ожизлик белгиси әмас,
Юракка ўт тушса, кўзга чиқар ёш.
Үртана билмайди бешафқат, нокас,
Уларнинг юраги музда ётган тош!

* * *

Ёмоннинг тилида асал ҳам тотсиз,
Чаманнинг атри йўқ, бефайзу сассик.
Яхшининг тилида энг оддий бир сўз
Новвотдан шириндир, қуёшдан иссиқ.

* * *

Тил солиб кўзингдан чўпингни олсам,
Кўзларинг чарақлаб менга боқарми?
Сен ўтар дарёга тош кўпприк солсам,
Йўлларинг қисқариб, меҳринг оқарми?

* * *

— Бунчалар тиниқдир сувларинг, булоқ?
— Она-Ер кўкрагин шафқат сути бу.
Истасанг ҳамиша тиниқ, соф кўрмоқ,
Сен уни жондан сев, ардоқла мангу!

* * *

Сен илҳом кутасан. Илҳом бехабар,
У дарддан йўғрилган қалбда юради.
Илҳом, бил, мўъжиза, қасоскор, лобар,
Танбалу бефарқни ёмон кўради!

* * *

Гулхандан сачради кичик бир зарра,
Хазонга тушса у олар аланга!
Эй, гулхан соҳиби, ҳушёр бўл, қара,
Яна ўт кетмасин бутун оламга!

* * *

Ўйлайсан: истеъдод соҳиби адиг
Қийиноқсиз, тўлгоқсиз изход қиласади?
Йўқ, дўстим, ҳар бетда сўз бўлиб қотиб,
Қонидан жонидан зарра қолади!

* * *

Ҳаётнинг ҳайратли бир ишига боқ:
Сигиру илонга макон бир ўтлоқ.
Бир ўтдан шум илон ясади заҳар,
Шу ўтдан сигир-чи, оппоқ сут-қаймоқ!

* * *

Ростгўйнинг ҳамиша чиройли сўзи,
Ўзи хунук бўлса ҳам.
Хушбичим бўлса-да ёлғончи ўзи,
Сўзи хунук жаҳаннам!

* * *

Шер бўлиб ўкирдинг амалдор чоқда,
Аслида қуёнсан ўт босган боғда.
Амалнинг кучини кўринг, ёронлар,
Қуённи шер қилиб кўрсатар тоғда!

* * *

**Кўрдингми, хушомад, совға-салом-ла
У яна карьера қилди бир бора.
Чунки биз ҳеч ерда аччиқ қалом-ла
Пўстагин қоқмадик очиқ-ошкора.**

* * *

**Аччиқнинг ҳам, чучукнинг ҳам ўз тоби бор,
Гўзалларга боқмоқликнинг савоби бор.
Меъеридан ошиб кетма, эй сук кўзим,
Ҳар саволнинг охирида жавоби бор.**

* * *

**Шу ерда туғилдим, шу ерда ўсдим,
Шу ерда имоним буюрган постим.
Баъзида қувондим, баъзида ёндим,
Баъзида ноилож сўзимдан тондим.**

* * *

**Биламан, азизим, ташвишинг катта,
Баъзида бу ҳаёт шунақа тарғил:
Обрўйни мисқоллаб топади ота,
Ботмонлаб сарфлайди бемаъни ўғил!**

* * *

**— Бу дарёни қилиб томоша,
Соҳилида юрганман боқиб.
— Тўғри, дўстим, соҳил-ку ўша,
Сен кўрган сув кетгандир оқиб!**

* * *

**Ўз қадри бор ҳар ер, ҳар жойнинг,
Бу йўл борар назмзор боққа.
Бу кўчага оёғи лойнинг
Ҳаққи йўқдир кириб бормоққа!**

* * *

Елғонга ишонсин десанг ҳар одам
Пардозлаб, ҳайқириб айтмоғинг керак,
Ростни-чи? Кишилар тинглар шундай ҳам,
На кўкрак кермоғу, на жағинг керак!

* * *

Сен менсиз яшайсан, мен эса сенсиз —
Яшапим мумкинмас, эй она тупроқ;
Сен доим омон бўл ва яша сўнгсиз,
Бу сўнгсиз оламда баҳти бўлиб оқ!

* * *

Бутун бир гулзорни этганда инъом,
У ҳатто қайрилиб қарамади ҳам.
Ва лекин битта гул қалбин қилди ром!
У гулни берганди кутгани одам!

* * *

Оталик бурчимни ўтадим ҳалол,
Бенуқсон бўлмаган бари, албатта.
Ўзр ҳам сўрмайман ва очмайман фол,
Ўзлари тушунар бўлганда ота!

* * *

Дунёда энг яхши, меҳрибон она,
Бу менинг онамдир, билинг, ёронлар!
Эй, ўғил-қизларим, бўлинг парвона
Онамда қолмасин дарду армонлар!

* * *

Хушёр бўл, бирликда яйраган,
Дўстини гафлатда қўймайди.
Дардига бепарво қараган,
Тириклар жонини қийнайди!

* * *

Олимлар измида бир синиқ сопол,
Уч йилки қўлма-қўл ўтиб юради.
У, «шунча иззату икромни, алҳол,
Умримда кўрмовдим!» — дея кулади!

* * *

Ўтмишга боқаман қўзойнак тутиб,
Кўринмай қолмасин икир-чикири!
Келажак турибди куртакдек бўртиб,
Шундоқ ҳам равшандир миридан-сири!

* * *

Инсондек яшадим: ғам чекдим, ёндим,
Истардим: бу хоким юртимда қолса.
Хокимни қучоқлаб қўш-қўш фарзандим,
Отам деб зор йиглаб кетимда қолса!

* * *

Бу ҳайкал турибди неча юз йилдир,
Ҳар авлод қошига келиб кетади.
Ҳар авлод идроки, қалби ҳар хилдир,
Ҳар авлод ўзича таъриф этади.

* * *

- Қайтадан туғилсанг ким бўлар эдинг?
- Албатта шоир!
- Ватанинг бўларди, қаер, қай юртинг?
- Шу ўлка, шу ер!

* * *

Сен дединг: — Тоғда қор иссиқдан қочиб
Ноилож қўйига оқиб келади.
Менимча «ҳаёт» деб, «ҳаёт» деб шошиб,
Тоғлардан қирларга болқиб келади.

* * *

Юртимнинг тупроғин совурса шамол,
Дўзахга келтириб ташласа, ҳайҳот,
Дўзахнинг ўтлари сўнару беҳол,
У ерда бошланар мунис бир ҳаёт!

* * *

Яраланган қуши кўрсанг
Лоқайд боқма, эй ўғлон!
Бир қўлингда сув бўлсин,
Бир қўлингда озиқ дон!

* * *

Сен пона қоққандек сўзладинг бир-бир,
Тошга сув сепгандек қилмади таъсир.
У эмас, сен учун ачиди жоним,
Эй, дўстим, сўзингни уққанга гапир!

* * *

Ҳаммага тенг экан ўлгач бу тупроқ
Бировга кенгрофу бировга торроқ,
Бировни тўрга-ю, бировни пастга
Нега сен кўмасан, эй гўрков ўртоқ!

* * *

Рангларнинг ҳам ўз ёши бор,
Кексаси бор, қардоши бор.
Вақти келса рақсга тушар,
Вақти келса, кўз ёши бор!

* * *

Ҳастаман. Ётибман. Деразалар берк.
Иссигим гоҳ чиқиб, гоҳо қайтади.
Дераза остида бир жуфт оқ терак
Шамолдан тебраниб қўшиқ айтади!

* * *

Бу кўчадан ўтган кўп одам,
Энди навбат келибди сенга.
Ўтганларни олсанг эсингта,
Эслар сени келувчилар ҳам!

* * *

Сен отдан тушасан, минар бошқаси,
Бу олам пойгаси шундай тузилган.
Биттаси яйраган ўни эзилган,
Ҳаммага танилган мард ва қашқаси!

* * *

Бир ҳовуч тупроқни олсам қўлимга,
Бир олам ҳис тўлди ёниқ дилимга.
Гулдир — бу, имон — бу, буюқ ғоядир,
Юксакка интилсам пиллапоядир!

* * *

Атлас тўқим урма эшакка,
Барибир у отга айланмас,
Айланса ҳам, етгач эшикка,
Кишиаб эмас, ҳанграб берар сас!

* * *

Баъзан кўзлар яхши кўрар, баъзан юрак,
Юрагида кўзи борлар бўлур сирақ.
Ҳам кўзию, ҳам юраги кўрса кимнинг
Ү одамга таъзим билан боқмоқ керак!

* * *

Бир фарзанд онага дебди астойдил:
— Айт сутинг нархини қанча туради?
...Табиат, нега сен унга бердинг тил,
Нега у биз билан бирга юради?!!

* * *

Ўзга юрак қўйма, эй, жарроҳ,
Ўзга қалбда ўзга ҳавасдир.
Ўз юрагим ўзимга басдир,
Ажал қадаб турса ҳам яроқ!

* * *

Қуёшни ким севмас?— айтсин сўзини,
Бир қуёш барчага нур сочар теп-тeng.
Нега сен бақириб қуёшни тепдинг,
Емоннинг оёғи шунча узунми?!

* * *

Сен ёнмасанг, у ёнмаса, мен ёнмасам,
Ким ёнади бу дунёнинг ташвишида?
Қизиги йўқ бу оламнинг ёз-қишида,
Юрак тўла ўт бўлмаса ҳар кишида!

* * *

Сен кўксимга агар ўқ отсанг,
Жарроҳ уни тезда олади.
Сўзинг билан ўқ бўлиб ботсанг,
Бу ўқ дилда мангу қолади!

* * *

Мен қанот сўрмадим қодир тақдирдан,
Қушларга термилиб, ўқсиб юрмадим.
Минг баланд учса ҳам шу она-Ердан
Узилиб яшаган бир қуш кўрмадим.

* * *

Рақиблар сўзига берурман бардош,
Туҳмату ғийбатга жавоб айтурман.
Ва лекин дўстларим отса зарра тош,
Ешимни тиёлмай йифлаб ўтурман!

* * *

Оёгим ўтмишнинг устида дадил,
Кўзларим шу куннинг нуридан равшан.
Хаёлим уфқлар оша йилма-йил
Келажак кунларда кезар ёниқ, шан!

* * *

Ҳар инсон умрининг ўз чўққиси бор,
Чўққидан чўққини камситмоқ бекор:
Паст-баланд чўққилар бўлмаса агар,
Пурвиқор чўққилар топмас эътибор.

* * *

Санъаткор бўлмаса асли бу халқим,
Юраги турмаса ҳар лаҳза тусаб,
Энг оддий ва сопол косага, балким,
Шунча нақш ва гуллар солмасди безаб.

* * *

Шунча кўп қоқилдим умримда, дўстим,
Оҳ, гурра бўлмаган еrim қолмади.
Шунда ҳам юрагим заҳа бўлмади,
Имоним куймади, синмади дастим!

* * *

Ҳар саҳро — каттакон, сирли бир китоб,
Инсонлар вараклаб ўқиши керак.
Кўзлари гар бўлса қўшалоқ офтоб,
Меҳри-чи, сув бўлиб оқиши керак!

* * *

Эрта пишган гилос шириндир,
Эрта келган хушхабар — қанот.
Еқангни йирт, созингни синдир,
Эрта келган шум ўлимдан дод!

* * *

Чинор-ку шундай ҳам узоқ яшайди.
Яна биз умрига умр улаймиз:
Үсталар нақшдор эшик ясайди,
Шоирлар шаънига қўшиқ куйлаймиз!

* * *

Сен тошга қоқилдинг, мен ўша тошни
Қаҳр билан келтириб қўйдим хонамга.
Уни ҳар кўрганда бутун танамга
Зил кетиб эслайман сен қалам қошни!

* * *

Бу оддий бир устун айвон пешида,
Бақувват бўлса бас — вазифаси шу.
Кифоя эмас бу! Ҳар бир нақшида,
Кўринг-а, қанча бир гўзаллик, туйғу!

* * *

Камтарлик дунёда энг кўркам лиbos,
Модадан тушмайди, тўзим билмайди.
Ҳар миллат, ҳар жинсга ярашар ва мос,
Кенг келиб ёки тор — бирор кулмайди.

* * *

Во ажаб! Бир қўлда атом бомбаси,
Бир қўлда гул тутиб турар бу асрим.
Шунчалар титрарки, ҳаёт компаси...
Шоядки, гул бўлса қисматинг, наслим!

* * *

Кечани менсимай эрта боққан
Узоқча кетмайди — қолади оқсаб.
Ахир нур кечадан бугунга оққан,
Бугундан әртага — шундай сарҳисоб!

* * *

Мен бугун эртароқ ётдим атайин,
Шоядки, бу кеча тушимга кирсанг.
Шоядки, тушимда жилмайиб майин,
Бирор он ортиқроқ қошимда турсанг!

* * *

Ажабланма ростлик кулса,
Елғон қочса беқарор.
Қуёш қанча тикка келса,
Соя шунча қисқарар!

* * *

Иблисга қўл берма ҳирсу нафс учун,
Виждонинг амрини сен муқаддас бил.
Покликда синайди йигит ўз кучин,
Пок қалбга сиғмайди ҳатто узиқ қил!

* * *

Келажак кунларга мафтунсан чунон,
Қалбингдан ифтихор, сурур тошади.
Лекин сен ўтмишга тош отма, ўғлон,
Бобонгнинг қабрига бориб тушади!

* * *

Кичик бир юракка сиғса ҳам севги,
Аслида у ўзи буюк бир олам.
Шу олам қўйнида яшолсанг, билки,
Сен оддий кишиилас, ҳазрати одам!

* * *

Асарни виждонинг амри билан ёз,
Виждонинг амрида бўлсин қишу ёз.
Виждонсиз ижоди қордаги издир
Нишон ҳам қолмайди келганида ёз!

* * *

Эй, дўстим, бу дайдиб юришинг бекор,
Ҳаётнинг битиксиз қонунлари бор:
Уйида топмаган орому роҳат,
Кўчада топмайди тинчлик, фароғат!

* * *

Мен сенда кўз очдим, бекиёс ўлкам,
Ва мангу биргаман ҳамиша, ҳар чоқ:
Тирикда ўғлингман фидойи ўқтам,
Гар ўлсам кўксингда бир ҳовуҷ тупроқ!

* * *

Ишқ bogига кирган ўспирин,
Дейди: — Илк бор кашф этдим ўзим!
У кўрмайди, минг йиллар бурун
Ўтган-кетган боболар изин!

* * *

Май ичсанг жўраю ёринг билан ич,
Ҳамдарду, ҳамкору зоринг билан ич,
Полвондек кўтариб урмасин ерга
Инсофу одобу оринг билан ич!

* * *

Хар сўзни олов бил, баъзан иситса,
Баъзида куйдириб қўйиши мумкин.
Гоҳ кўзинг ачитиб тутун саситса,
Гоҳ йўлинг ёритиб ёниши мумкин.

* * *

Юраги ёнса, қўй, ийгласин гирён,
Қўрқма сен, кўзга ёш этмайди таъсир!
Ийидан етсайди кўзларга зиён,
Юз минглаб оналар бўларди басир!

* * *

Қалбим, жисмим, руҳим ўзбек,
Фикрим-зикрим, түғим ўзбек.
Бағрим очиқ, тилим ширин,
Кўрса мени ким ўзидек!

* * *

Мен уйда ўтирсам ҳатто деразам
Пардасин кенг очиб қўйгин, азизим.
Бир зум ҳам дийдамдан бўлмасин нари
Бу гўзал табиат, бу тенгсиз олам!

* * *

Сен унинг ёшини қилма кўп такрор,
Умрни ёш билан ўлчамоқ бекор.
Бир онлик эзгу иш билан оламда
Номини умрбод қолдирганлар бор!

* * *

Игнага тақилган индек эргашиб,
Кетингдан юрмоқча розиман, Чарос.
Бирорта ямоқда ногоҳ адашиб,
Ўзилиб қолмоқдан қўрқаман, холос!

* * *

Сен ўққа кўкрагинг туттандинг дадил,
Ўқ эса журъатсиз қиялаб ўтди.
Ана шу кўкракни, эй мардона дил,
Она юрт олқишилаб орденга тутди.

* * *

Сен тўшга урасан, уни пеш қилиб,
Шу тўшнинг остида борми юрагинг?
Шу юрак не дейди? Тағин у кулиб,
Қизариб қолмасин уятдан рангинг!

* * *

Мен замин ўғлиман, заррайи олам!
Оlamга тиргакман мағрур кўксим-ла.
Тилим-ла сўзлайди ҳар бахтли одам,
Дардликлар йиглайди менинг кўзим-ла!

* * *

Бир сўзимга чидолмади, афсус, дедингиз,
Энди бекор армон билан чимирмоқ қошни.
Не-не оғир кемаларни кўтарган деңгиз,
Кўтармайди ўз кўксига отилган тошни!

* * *

Тоқقا чиқдинг. Қуйида қишлоқ,
Унга боғма бефарқ, эй, ўртоқ.
Шу қишлоқдан бошланади, бил,
Сени тоқقا кўтарган сўқмоқ.

* * *

Дўстларнинг хизмати жонимдир менинг
Хуснига ранг берган қонимдир менинг.
Бир эзгу иш қилиб гаштини сурмоқ
Умримда энг бахтли онимдир менинг.

* * *

Май тутиб, дўстликка ичилган қасам
Лайлакқор сингари умри қисқадир.
Меҳринги дилингда тута бил, одам,
Чин севги онтсиз ҳам топади қадр!

* * *

Ўзинг ҳам чиройли, сўзинг ҳам ширин,
Обрўй ҳам топгансан орзу қилгудай.
Гар бўлса ҳаммаси самимий ва чин,
Тарихда қолурсан кўзгу қилгудай.

* * *

Тириклар марҳумга таъзия тутса,
Нега сен ўйланиб, фикринг қочади;
Тириклар ўлганнинг кўзин бекитса,
Ўлганлар тирикнинг кўзин очади!

* * *

Бир он ичра туғилса ҳам беш бармоқ
Бири узун, бири қалта — қисқадир.
Таъна қилма чинчилоқча, эй ўртоқ,
Не-не ҳунар, не-не ишга у қодир!

* * *

Содда деб камситма, бу дард ёмондир!
Чиройли кулчалар ёпилган тандир
Тупроғин нечалар босиб юргандир!
Энг аъло чинни ҳам оддий лойдандир!

* * *

Ү сенга айтади қўшиғу ўлан,
Ҳар шомдан кейин.
Қошингда парвона бўлгани билан
Севмаса қийин!

* * *

Руҳимга ҳамиша уч нарса яқин:
Осмоний юксаклик, кўлам ва кенглик.
Дарёнинг бетўхтов оқиши, тўлқин,
Денгизча теранлик, асовлик, чўнглик!

* * *

Кеч кирди. Ҳадемай қораяди қош,
Кеч ели боғ аро атир улади.
Шунчалар ошиқми уфқча қуёш,
Бир тишлаб лабини қонга белади!

* * *

Икки ёшда тилинг чиқди: пишиқ ва бийрон,
Катта-кичик тилларингга бўлганди фидо.
Ҳозир эса элликдасан ва лекин ҳамон
Тилинг тиймай бошинг узра ташвишу савдо!

* * *

Гугурт кўрсак болада ваҳима босиб,
Дарров унинг қўлидан оламиз тежаб.
Нега эсли кишилар бомбалар ясаб,
Бомба билан ўйнашдан қўрқмас, воажаб!

* * *

Муҳаббат чашмадан оққан сув эмас,
Лабига лаб қўйиб бирдан симиранг.
У қайнот оловдир, гар чанқоқ эсанг,
Шошмасдан хўплашинг ўзи етар, бас!

* * *

Ҳар сўзнинг ўрни бор: баъзан кўрку зеб,
Баъзида нам ўрик ўтидек сўник.
Қабристон қошига «Хуш келибсиз!» деб
Ёзилса қандайин бўлурди хунук!

* * *

Тошкентда тугилдим, яшайман ҳамон,
(Хоким ҳам шу ерда қолур албатта!)
Лекин бир Тошкентмас, жумлайи жаҳон
Ташвиши қалбимга солур ғалаён!

* * *

Чўққини кўрсатсанг мардга шу маҳал,
Ғиқ этмай юксакка тармасиб кетар.
Кўрқоқ-чи, ўзича, тусмоллаб аввал,
Сўнг яна бир четдан саволга тутар!

* * *

Гул узмоқ-чун эгилмоқ роҳати жондир,
Булоқ узра эгилмоқ хизмати жондир.
Паст ва номард қошида эгилма, қаддим,
Гар эгилсанг умрбод ҳасрати жондир!

* * *

Бир иссиқ саломнинг ҳикмати қанча,
Бир ширин қаломнинг ҳикмати қанча,
Кўксингни очиқ тут дўстга, эй дўстим,
«Дўст» деган бу номнинг ҳикмати қанча!

* * *

Баҳт топсанг, қошингда дўстинг кўпаяр,
Қилмаган хизматинг ҳатто лоф урар.
Сен шунда ҳушёр бўл, вақтики келса,
Ана шу «дўстларинг» ўзи чап берар!

* * *

Бу кураш йиллари, мардана йиллар,
Одамни бугдойдек ғалвирда элар:
Мардни яшартириб, доно қилади,
Қўрқоқни қаритиб расво қилади!

* * *

Сен гулни мақтайсан: дилхушлик рамзи,
Навбаҳор шафқати, эҳтирос кучи...
Хўш унда, айт дўстим, жудолик кези
Мурданинг кўксига сочилиган гул-чи?

* * *

Оқни оқ, қорани қора демоқ ҳам,
Ҳар маҳал ҳамманинг қўлидан келмас,
Сен ўзинг дили пок бўлсанг, эй одам,
Ҳақ билан ноҳақлик қоришиқ бўлмас!

* * *

Уч нарсадан кимки шошса бўлур пушаймон:
Бири севги, бири таом, бири пул санаш.
Уч табақа киши доим бўлади талаш:
Бири олим, бири дилбар, бири қаҳрамон.

* * *

Бир парча лой эди, сен ундан шу чоқ
Ясадинг ажойиб, гўзал қўғирчоқ.
О, одам, қанчалик мўъжизакорсан,
Мен сенга ҳамиша очаман қучоқ!

* * *

Тогда сув ҳамиша тиниқ ва тоза
Мен лойқа кўраман уни қўйида.
Дўстларим, қарангиз, қайси bemaza,
Нималар қиласпти ариқ бўйида!

* * *

Сен уни эъзозлаб кўтардинг баланд,
Мис-мисдир, жез-жездир — ошмайди қадрим.
Бир гулни юз номда таърифлаш билан
Ўзгариб қолмайди жамоли, атри!

* * *

Кўксингда ёнмаса нафрат-аланига,
Ичингдан тошмаса қаҳринг кўпириб,
Душманинг сафини селдай ўпириб
Кирмогинг мушкулдир муқаддас жангга!

* * *

Сени ногоҳ чалиб йикитиб,
Полвонман, деб юрибди гирром.
Сен ўқинма, вақтики етиб,
Қайтиб келар ўзингга бу ном!

* * *

Бундай савол бердинг нечун,
Е ўтдими ноҳақлик?
Үйқу яхши золим учун,
Одил учун уйғоқлик!

* * *

«Оҳ дўстим ўлди!» деб ўкинма, ўртоқ,
Дўстингдан оламда яхши ном қолди.
Гўёки она-Ер кенг очиб қучоқ
Севгандан эъзозлаб бағрига олди.

* * *

Сафарга отлансанг, кекса сўзин ол,
Ишонки, сафаринг бўлур бехатар.
Қайтган сўнг болангни алдаб гапга сол,
Йўғингда не бўлган — ростини айтар.

* * *

Йиглардим онамнинг қабрини қучиб,
Кўзимдан ёшларим тийилмас эди.
Ғазабдан ер титраб, қаҳрини сочиб,
«Сени ҳам бир куни ютаман!» — деди.

* * *

Сен ҳавас қиласан, ўғлим, ёшимни,
Сен ҳавас қиласан мен кўрган жангни.
Оҳ, очиб кўрсатсан ғалвир тўшимни,
Эҳтимол топардинг ўз жавобингни.

* * *

Мен елканман, чўнг кемалар юрибди сўзиб,
Кулма дея: — Манзилига қандай етади?
Баъзан довул кемаларнинг йўлини тўсиб,
Елканларни елкасида олиб ўтади.

* * *

Қўй, азизим, жойсиз қилиқни,
Бу карашма, бу сўроқ нечун;
Тўрга тушган лаққабалиқни
Қармоқ ташлаб синамоқ нечун?!

* * *

Қор ёғди. Остида қолди илк куртак,
Нега ҳам қорини, аттанг, силкитдим:
Тун бўйи ингради мисоли гўдак,
Тун бўйи ўзим ҳам қон-зардоб ютдим!

* * *

Шогирдлар, наздимда, уй деразаси,
У қанча кўп бўлса, уй шунча ёруғ!
Еруғдан ўзингни тутма ҳеч дариг
Эй, ақл даргаси, ҳунар устаси!

* * *

Елгон жуда шириндир, ҳақиқат аччиқ,
Ширин бориб охiri аччиқ бўлади.
Аччиқ эса ширинга айланиб очиқ,
Ёниб-куйиб, тобланиб ғолиб келади.

* * *

Ер қадрин билади ер боққан одам,
Бу тупроқ тикани чамандан ортиқ.
Шу она тупроқча бўлиб тасаддиқ
Тупроқча айлангум бир кун ўзим ҳам!

* * *

Мен — ёнғоқман, мевам туфайли
Ҳар йил кузда калтакланаман.
Шохим ҳосил тугмаган йили
Калтак хумор қилиб ёнаман!

* * *

Сен, дўстим, чўғ бўлма қатта ўчоқда,
Яхшиси осмонда битта юлдуз бўл.
Ҳар одам кўради сени у чоқда,
Гўдаклар толпиниб узатишар қўл!

* * *

Беруний китобин варақлаб Колумб,
Океан ортига йўл олган, дейсан.
Бас, унда нимага Беруний қолиб,
Колумбнинг шаънига қўшиқ тўқийсан?

* * *

Фарқ қила бил пасту тозани,
Ҳушёр одам асти шошмайди.
Тошнинг нархи, дўстим, ошмайди
Синдирса ҳам олтин косани!

* * *

Мен яхши биламан ўша ўртоқни,
Тикани бўлмаса ютиб янтоқни,
Ҳазм ҳам қиласади тиш ўтса тоғни!
Бас, энди, азизим, берма сўргни!

* * *

Ақлини танигач кўрдики, инсон
Кўп эзгу ишлари кетар бенишон.
Бу хунук тақдирга кўтариб исён
Тошга жон киритди, айтди шеър-достон.

* * *

Ҳақиқат қаерда? — бир қарашдаёқ
Донолар рўйирост билади аниқ.
Шу аниқ билганни бошидан-оёқ
Ошкора айтмоқлик — бу қаҳрамонлик!

* * *

Сен асли қарғасан, қарғаликча қол,
Лочинлар сафида сенга нима бор!
Бу сиринг бир куни бўлади ошкор,
Кейинча ўкиниб юарсан беҳол!

* * *

Энди йўқ фойдаси «аттанг, оҳ-воҳ»нинг,
Ўзи ҳам ҳайрон-лол боши қотганча.
Дараҳтдан ажралган шоху япроғнинг
Оловга тушмасдан иложи қанча!

* * *

Сен келар йўлингни сир тут, жонгинам,
Фақат бир ўзгинам билсам кифоя.
Мен ўзим сен учун бутун бир олам,
Яйрасанг қирингман, суюнсанг қоя!

* * *

Эсингда тут албатта,
Келганда кези:
Қўрқоқнинг кўзи катта,
Аҳмоқнинг сўзи!

* * *

Кишилар йўл босди, узоқ-узоқ йўл,
Ҳамма йўл ўтилиб бўлгандек гүё,
Эй, сафар отига минган, амин бўл,
Ҳали кўп йўлларга муҳтоҷ бу дунё!

* * *

Сен қанча ошкора йиглама, жонон,
Еш кўзга чиқару, дард ичда қолур.
Бағритош рақиблар кулгига олур,
Яхшиси кўз ёш ҳам, кел, қолсин пинҳон.

* * *

Дарёга қўшилмоқ истар ҳар ирмоқ,
Дарёга етмайди бари албатта.
Ортида кўрару кўм-кўк боғу-роғ
Ерга жим сингади энг сўнгти қатра!

* * *

Кеч ҳам кирди, толикдим десам,
Кўзларимга сен боқма ҳайрон.
Елкангни тут, сенга суюнсам
Чарчоғимдан қолмайди нишон!

* * *

Айрича мингта қил, барибир қилдир,
Қовушса, тўқилса бўлади арқон.
Қилни-чи? Ҳар кимса узишга қодир,
Арқонни узолмас унча-бунча жон!

* * *

Мен энди тушундим сочим оқариб.
Сиҳатлик ҳаётнинг энг гўзал гули!
Кимсан деб сўрама қўзимга қараб,
Мен яхши одамнинг ҳамиша қули!

* * *

Қафасдан кенгликка интилган қушдай
Кўксингдан чарх уриб чиқмаса қўшиқ,
Чиранмоқ, ҳайқирмоқ, шарақа-шуруқ
Барчаси бенишон йўқолур тушдай!

* * *

Сен боқقا кирибсан яхши ниятда,
Кўзларинг ёнади завқдан албатта.
Кўзингта қараб юр, доғда қолмагин,
Бирорта ниҳолни босиб олмагин!

* * *

Қурбақатабиат кишилар ҳам бор:
Кун яхши — соҳилда яйраб юради.
Гар ҳаво ўзгарса, (улар кўп ҳушёр!)

Шу замон ўзини сувга уради!

* * *

Ҳар чечак атрини тутгандада киши,
Илк баҳор эсига тушганисимон,
Пок яшаб, жон фидо қиласа ҳар инсон,
Халқига ёғади раҳмат, олқиши!

* * *

Насру назм икки кўзим,
Иккисига бир юрак.
Темир йўлдек қўша изим,
Паровози мен ўзим!

* * *

Отингга ишонма, дўстим, ортиқча,
Ленталар тақильтган ёлини қашлаб.
Баъзида кўримсиз, оддий бир тойча
Финишга олдинроқ етади кишинаб!

* * *

Мен йиғлаб ўтаман баъзан кўчангдан
Ёшликда алданган ilk севгим ҳаққи.
Нур кўриб, гул турган кичик дарчангда,
Эсимдан чиқади сочимнинг оқи!

* * *

Ёшинг ўтгач, хотираинг қақшаб,
Кўп нарсалар ўчиб кетади.
Баъзи бири ажинга ўхшаб
Илдан-йилга чуқур ботади!

* * *

Сен йиқилдинг, мен турғиздим ўша он,
Чангинг қоқиб давом этдинг йўлингни.
Нега энди мен қоқилсан ногаҳон
Кўра туриб узатмадинг қўлингни?!

* * *

Ҳар рангнинг ўзига ярашиқ кўрки,
Ўзига яраша фазилати бор:
Қандай соз бодрингнинг барра кўм-кўки,
Ўзумнинг сарифи, оппоқ бўлса қор!

* * *

Кўзида ёш кўрдим, дема бир қараб,
Қаҳри тош одамда йиги қаёқда!
Сен уни кўргансан оқ ниёз тўғраб,
Аччиғи кўзини ачитган чоқда!

* * *

Таъна эмас, эзгу ният бу сўзим,
Гардни раво кўрмам сенга тўзонда.
Танбурнинг ҳам қулогини, азизим,
Куй бузилса, шунда буран созанда!

* * *

Севги билан ўйнашма, бас,
Ҳар гўзалга солма бир чанг.
Юрак ахир олма эмас,
Арчиб, тўртга бўлиб берсанг!

* * *

Қатралар томади битта-биттадан,
Туташса, бирлашса уммон бўлади.
Ҳар бири ўзини ёлғиз тутаркан
Бенишон йўқолиб, армон бўлади.

* * *

Ҳар юракнинг ўз чўққиси бор,
Ҳар фикрнинг теран нуқтаси.
Шу чўққида бўлсин нур, виқор,
Шу теранлик саёз тортмасин!

* * *

Адоват чироги уйни ёритмас,
Аксинча ёндириб вайрон қилади.
Қон билан ювилмас қонни — аритмас,
Бу сўзни донолар ҳикмат билади!

* * *

Бахт излаб дунёга атай келмадим,
Бир оддий кишидек туғилдим, холос.
Бахт мени кутибди, демак, аллаким
Мен учун жанг қилган ва берган овоз!

* * *

Қандай соз, заволсиз нур бўлса юзда,
Мард туарар доимо айтган бир сўзда.
Тароққа ўхшайди бебурднинг тили,
Биттамас, ўнтамас, элликта, юзта!

* * *

Биласаними, пичан ҳидини?
Эсга солар отам юртини.
Оҳ, мен ёдга тушмасам эди,
Анқиганда бензин тутуни!

* * *

Йўлингда кўзларим муштоқ албатта,
Хаёлим қошингта нурдек елади.
Шунчалар яқинсан, ҳаттоки хатда
Юборган саломинг иссиқ келади!

* * *

Олам асли чала битган бир бино,
Чаласи не? — Ҳеч ким тугал билмайди.
Қунт қилса ҳам не-не олим ва доно
Ҳамон чала, ҳамон тўқис бўлмайди!

* * *

Мен сенинг қабрингга келаман бот-бот,
Сен менинг кўксимда ҳаётсан ҳамон.
Менинг ҳам қабримга келарми бир зот,
Бошимда бош эгиб турарми бир он?!

* * *

Баҳордек сермаҳсул шоир бормикин:
Қирларга чечакдан шеърлар ёзибди.
Қанчалар ранго-ранг, қанчалар дуркин,
Одамлар дидини қандай сезибди?

* * *

Либоснинг янгиси, дўстнинг эскиси
Қалбимга доимо солади қувонч.
Дўст дўстнинг чалгитмас тиниқ кўзгуси,
Эски дўст бошига ярашар гултож!

* * *

Кўзимни ўткир деб мақтанма, ўртоқ,
Ўткири яхши-ю, билиб қўй, бироқ
Кўз етмас ерларга сўз етиб борар
Ва ёқар энг олис элларда чироқ!

* * *

Лочинга кўз керак, бургутга қудрат,
Инсонга иккиси ва яна одоб,
Одоб бу ҳар кунга керак бир китоб,
Варақлаб турғанин кутар шон-шуҳрат.

* * *

Йилдан-йил дўстларим камайиб борар,
Бешафқат ажалнинг ҳаҳридан фарёд!
Фақат бир ёниқ ҳис тасалли берар:
Дўстларим кўрдилар инсондек ҳаёт!

* * *

Кўчат экдим. Соя солганда
Балки тирик бўлмасман ўзим.
Еру дўстлар ҳордик олганда
Ҳар япроқдан кулади кўзим!

* * *


Бахт чашмам қошимда қайнаб турса ҳам,
Симириб ичмадим — тўйиб ҳамиша.
Гоҳо панд берарди баъзи бир одам,
Баъзида қиласадим ўзим андиша!

* * *

Мен олам китобин бир-бир вараклаб,
Кўп нарса тушундим, кўп нарса билдим.
Замину, замону оқимга қараб,
Ўнтадан биттасин ошкора қилдим!

* * *

Шукурким, элликдан ҳатладим омон,
Умримни ўзимча қилдим сарҳисоб;
Бемалол яшасанг бўлади, эй жон,
Юз ёруг, кўнгил тинч, ниятларим соф!



ҲАЖВЛАР

НОШУКУР ОДАМ

Етим эди,
Үсди оч-түқин.
Ямоқ эди кийим-боши ҳам.
Гоҳ эшитди кишилар дўқин.
Гоҳ кўзида қиши эди кўклам.

Ҳаёт шундай: ёмондан кўра,
Доим қўпроқ бўлади яхши.
Яхшиларнинг пинжида бола —
Үсди-унди, юришди иши.

Ортда қолди ямоқ тўни ҳам,
Ортда қолди ёмон куни ҳам.
Ортда қолди қайғу ва алам,
Лекин дейди: «Бор ҳали нолам.

Четдан келган кийим-бошим кам,
Топилмайди моднийси дарров.
Кийим-бошми мана шулар ҳам,
Ҳавас билан боқмайди бирор!»

Ҳа, оғзига ёқмайди овқат,
Нима истар — ўзи билмайди.
Норизою, ношукур фақат,
Хеч нарсани писанд қилмайди.

**Яхши кийиб, яхши еса-ю,
Фасон қилиб чекса сигарет.
Ҳар жононга бир сўз деса-ю,
Очиқ турса тонгтacha буфет.**

**Иши каму, пули кўп бўлса,
«Ҳой, сен кимсан?» демаса бирор.
Йил оралаб машина олса,
Эскидими, пулласа дарров.**

**Шундай бўлар ношукур одам,
Унугади ямоқ тўнини...
Қандай яхши ёргуғ кунда ҳам
Эслаб турса ўша кунини!**

1977, февраль

БИР САВЛАТГА

Китоблар варақлаб, ақлни «йиғдинг»,
Хаётга қани бир энди шўнғиб боқ.
Парпираб ёнурми сен ёққан чироқ,
Нур билан яшнарми яқину йироқ!

Бўлмаса ақлингни бўғча қилиб туг,
Дарёга оқизу енгил бўлиб юр.
Не керак бунақа савлату ғурур,
Амиркон туфлигу, ипак галстук!

1970

ЭЙ, АЗОБИ ЖОН!

Сен ўзингни тия билмасанг,
Нима келса тилингга, десанг,
Жаҳлинг чиқса унар-унмасга,
Қарамасанг баланду пастга,
Ажратмасанг дўстни рақибдан,
Овни берсанг доим тақимдан!
Мажлис бўлса, боқиб минбардан
Ажратмасдан кумушни зардан
Нутқ сўзласанг узундан-узоқ:
Сен сигиру бошқалар бузоқ!
Гўё ақлинг бошга сиғмайди,
Гўё бошқа ақлин йиғмайди.
Лекин бундоқ қарасанг, ўртоқ!
Фикрларинг саёзу тўмтоқ!
Ўтган гал ҳам шуни дегандинг,
Нақ ҳамманинг ғамин егандинг...
Рўйхат тузса, бошида турсанг,
Гул қўйгандада олдинда юрсанг.
Барчага сен берсанг йўл-йўриқ,
Мукофотдан қолмасанг қуруқ.
Фақат сени олса суратга,
Газеталар босса албатта!
Номинг терса қуюқ ҳарф билан,
Ёки мисга ўйса зарб билан.
Номинг тез-тез эсласа нотиқ,
Сифат берса ошириб, ортиқ.
Ана шунда у яхши одам,

Вақти билан маңтайсан сен ҳам.
Бирор ёзса, сен бўлсанг шерик,
Ва керилсанг: — Ишларим йирик!
Нуқсонингни гапирган одам —
Гўё сенга тупурган одам.
Умр бўйи қолар балога!
Қутулмайди қочиб самога.
Шаллақи, дер сени қишилар,
Гап бошлисанг бошини қашлар!
Дейдиларки, бола-чақсанг ҳам
Сендан безган, доим кўзи нам.
Дўстларинг ҳам ўзингга монанд,
Эртаю кеч фийбат билан банд.
Жиндай ишлаб, гап сотар кўпроқ,
Улар осмон, бошқалар тупроқ!
Ўйлайсанки фикри аълосан,
Ҳеч тенги йўқ, гапдон доносан.
Нима десанг ҳаммаси тўгри,
Гўё йўқдир юрагинг кири.
Барча сўзинг гўёки дилдан,
Аслида-чи, кўпроғи тилдан.
Сен ўзингни ўйлаб сўзлайсан,
Ўзингга боп ўлжа кўзлайсан!
Ўйлайсанки, ҳеч ким билмайди,
Билганда ҳам ҳеч гап бўлмайди!
Кишиларнинг қаҳри ичида,
Тилга чиқмас заҳри ичида,
Сен ўзингни фаришта билма,
Ҳамма ишинг саришта билма,
Одамларда андиша бордир,
Йўқса айтар бетингга бир-бир.
Олиб ташлар юздан ниқобинг,
Бериб қўяр бир кунда тобинг.
Аслида сен пуфланган пуфак,
Гулга эмас, бошиқа бир тувак!
Девордаги эски каваксан,
Бўйи узун, ақличуваксан!
Нотиқ эмас, эзма сўтаксан,
Барг ёзмаган қуруқ куртаксан.
Яхши эди, энди бас қилсанг,
Вақт борида иззатинг билсанг.
Кишиларнинг тегма жигига,
Учрамасдан ғазаб тифига,

**Инсоф қилиб, ўзингни тийсанг,
Сен ҳам одоб либосин кийсанг!
То ки бўлмай расвойи жаҳон,
Этагинг ёп, эй, азоби жон!**

1977, февраль

И Т

Яхши итсан — юмшоқ, мулойим,
Ҳеч кимсага бермайсан озор.
Ликиллатиб думингни доим,
Хуш феълингни қиласан нисор!

Бирор келса ҳуриб, ташланиб,
Юрагига солмайсан даҳшат.
Пайтин топсанг пойидан олиб,
Соғлигига еткизмайсан лат.

Ҳамма-ҳамма шод, мамнун эдик,
Сенинг бундай феълингни кўриб.
Сен ўзинг ҳам соғлом ва тетик,
Катта уйда бемалол юриб.

Бугун эса соҳибинг нолиб,
Сени уйдан қувиб солибди.
Фазилатинг нуқсонга олиб,
Ва норизо бўлиб қолибди!

Итлигингни унудинг, дебди,
Ҳа, тўғри-да итмисан, демак,
Даҳшат солиб ҳуришинг керак,
Баъзан тишлаб туришинг керак!

Бўлмаса, хўш, ниманг ит сенинг?!

1974, октябрь

ҲАЗИЛ

Икки кўзи бутун адабнинг,
Икки кўзла боқди оламга.
Хўп ўрганди ҳаёт, тартибни,
Сўнгра олди аста қаламга.

Куйди, ёнди, ўртанди чунон,
Тун билан кун қоришиб кетди.
Орзу қилган серзаҳмат роман
Йиллар ўтиб, охири битди.

Битди роман — йиллар маҳсули,
Қанча орзу, армонлар унда.
Танқидчининг текканда қўли,
Ўқиб чиқди уни уч куида!

Деди: — Адаб турмушдан узоқ,
Кўп нарсани кўрмайди кўзи!
...Кейин маълум бўлдики, эвоҳ,
Бир кўз әкан танқидчи ўзи!

Қандай бўлди бу ёғи, дўстим?
Дўсту душман, ҳамма-ҳамма жим!

1977, февраль

ҚУРБАҚА

Masal

Одам бўлган экан бир вақт Қурбақа,
Келишган, хушбичим, гап-сўзга чечан.
Отларда учаркан қоқдирмай таҳа,
Суҳбатда паҳлавон, танти, кўнгилчан!
Бир куни ногиҳон тилдан илиниб,
Подшонинг қаҳрига бўлибди дучор.
Бешафқат ўлимга ҳукм қилиниб,
Бозорнинг бошига қурилибди дор.
Дод солиб йиглабди шунда у одам,
Елвориб ўртага қўйибди киши.
«Майли мен шаҳрига қўймайман қадам,
Шу бўлса шоҳимнинг истак-хоҳиши.
Ит бўлиб ҳуришга розиман ҳатто,
Қурбақа бўл деса, розиман, майли,
Илтимос, жонимдан қилмасин жудо,
Бир парча юмшоқ эт — тилим туфайли!»
Подшоқ кулибди,
Үйлаб қараса,
Осишга арзимас жўн одам экан!
Ғазабдан титраган халойиқ эса
Қўрқоқча отибди гул эмас, тикан!
Элу юрт қўрқоқдан юз ўгирибди,
Қўрқоқни тутибди элнинг ҳарғиши.
Кечқурун одамдек ётган бу киши,
Эрталаб Қурбақа бўлиб турибди!
Вақиллаб юармиш ўшандан бери,
Очилиб эл аро қўрқоқлик сири!

1974

ХИРА ПАШША

Үйга кириб қолибди ногоҳ
Қаердандир хира бир пашша.
Энди бошим қўйган эдим, оҳ,
У бошлади роса хархаша!

Гоҳ лабимга қўнади келиб,
Гоҳ бурнимга, гоҳо қулоққа.
Кўзим очсам ушламоқ бўлиб,
Учиб кетар аллақаёққа!

Кўз юмдимми, яна келади,
Яна қўнап юз-кўз, қошимга.
Е тингиллаб хониш қиласди,
Шу атрофда тегиб ғашимга.

— Бор-эй! — дедим бошимни буркаб,
Кўзим юмсан тушга кирибди.
Тушимда ҳам хира муттаҳам,
Лабим узра қўниб турибди!

Таъбим хира, уйғондим чўчиб,
Ҳаром бўлди тушки уйқу ҳам.
Пашша эса юрибди учиб,
Хонам ичра — на қайгу, на ғам!

Бу бир пашша. Охири ушлаб
Деразамдан отдим ўлигин.
Пашшасифат одамлар учраб —
Қолса борми ҳаётда лекин...

1977, марта

УСТОМОН ОДАМ

Тиригига кўз очирмадинг,
Ҳар ишидан топдинг бир нуқсон.
Хато қилса, ҳеч кечирмадинг,
Хато қилмай яшамас инсон.

На мажлисда кун бердинг унга,
На базмда, на йўл-сафарда.
Ёруғ кунин ўрадинг тунга,
Гоҳ қойидинг, гоҳ қилдинг зарда!

У оқ деса, сен оқроқ дединг,
Қора деса, дединг қорароқ.
Охир унинг бошини единг,
Шу билан ҳам тинмадинг бироқ.

Қабри узра сўз олиб яна,
Энди кўкка кўттардинг уни!
Сўзинг тинглаб барча ҳайрона,
Юрагида ғазаб тўлқини!

О, такаббур, устомон одам,
Сенинг ичинг шунчалар қора,
Соф кишилар ўлганида ҳам
Қутулмайди сендан, бечора!

1977, февраль

СТОЛ—ОДАМ

С. Маршакдан

Кўрсанг уни дейсан бир йўли
Столи-ла бир тан, бир жондир.
Дейсан унинг ярми столу
Ярми одам бўлиб қолгандир.

Бир лавангдек кўзин қилиб лўқ,
Олти оёқ узра ўтирас.
Икки жуфти ёгоч — жони йўқ,
Учинчиси этикда тулас.

Жаҳолатнинг намунаси у,
Зўрга очар гафлатдан кўзин.
Ишинг тушса сарсон қиласу
Яна ҳақли санайди ўзин.

Сенинг арзинг ташланган қути
Қоғозютар чуқур ўпқондир.
Бу ўпқоннинг тўлмайди бети,
Иши тушган юраги қондир!

Аризангни босиб чангум нам
Ўз оҳорин бир-бир тўкади.
Шундагина бу стол — одам
Эснаб туриб имзо чекади.

Дейдиларки, куилар келади,
Арраланиб стол ва тўра
Кашф этилади ажойиб арра:
Бир-биридан жудо бўлади!

ЧИВИН

Чивинлар дастидан қолди на бурун,
На юз-күз, на қулоқ — чақар беомон.
Шунчалар хираки, ҳайдасанг бирин,
Үрнита келади тўрттаси шу он!

Бир замон гир этиб шамол турди-ю,
Чўпондай барини ҳайдади-кетди.
Шунчалар бемадор махлук әкан-ку,
Одамни бемаҳал шунча ранжитди!

1976, октябрь, Қораболта

СОЯ ВА ИТ

Арава тагида ётади бир ит,
Остида ишакдек юмшоқ барра ўт.
Ҳаво дим ва иссиқ. Бу ерда эса,
Ҳам салқин, ҳам шамол. Оҳ, қандай маза!

Дунёнинг гаштини суради ёлғиз,
Ҳомузга тортади баъзан эриниб.
Баъзида қўнаркан пашша ё қўнғиз,
Кўзини очарди аранг оғриниб.

Ху ундан нарида танишлар ишлар.
Саҳардан меҳнатни севиб, олқишлиар.
Саратон иссиги, куннинг яллиги,
Ажралмас ҳамроҳи, дўсти, қаллиги!

Ит эса уларга гоҳ назар ташлаб,
Кесилган думини қўяди тишлаб.
Яна у пинакка қетади секин,
Қандай соз: шамол ҳам, салқин ҳам текин!

Бир маҳал арава жойидан жилди,
Арава кетидан жилди соя ҳам.
Бечора кўппак ит энди не қилди,
Дўзаҳ-ку у учун бу қайноқ олам!

Бундайлар ёз бўлса салқин излайди,
Қиши келса иссиқроқ қавак кўзлади!

1972, январь

Ҳ А С А Д

Ўрмалаб юарди қумурсқа,
Бахтини кўтарди меҳнатда:
Йўл босиб гоҳ узун, гоҳ қисқа,
Юк билан гоҳ кичик, гоҳ катта!

Нолишни билмасди албатта,
Ҳар иши ўринли, расамат.
Бошқалар боқарди ҳайратда:
Оҳ, қандай меҳнаткаш, азамат!

Бир куни бузилди бу ҳаёт,
Нотаниш ҳис тилди юракни:
Қўшниси чиқариб қўшиқанот
Ихтиёр айлади фалакни!

Визиллаб учади: кенг осмон!
Истаса қўнади. Истаса...
Яшашни қара-я: беармон!
Учмоқлик қандай соз, оҳ, маза!

Шу ондан тинчлиги бузилиб,
Осмонга боқади қумурсқа.
Ҳасаддан юраги эзилиб,
Йўл босар гоҳ узун, гоҳ қисқа.

Нега у учмайди? Нега? Хўш?
Тун бўйи қоқмайди у мижжа!

**Ўй ўйлаб дили гаш, қўли бўш,
Минг режа тузади ўзича!**

**Нега у учмайди, хўш, нега?
Ўт кетди қумурсقا тинчига!**

1975

«ШОҲ АСАР»

«Асар бўлса худди магнитдек
Китобхонни торгса ўзига.
Чўғ ташласа бағрига ўтдек,
Ёниб турса доим кўзига!»

Ўи йилларки, шу шиор билан
Бир сатр ҳам ёзмай келасан.
Пайт пойлайсан,
Димоғинг баланд
Ишга шўнгиб кетган бўласан.

Мана, ёшинг ошди эллиқдан,
Ҳамон шиор ташлаб юрасан.
Куч-қувватинг кетди белингдан,
Қачон ишга қўлинг урасан?!

Қачонгача кутиб юрасан,
«Шоҳ асар»инг қачон берасан?!

1970

БҮРИ ЭДИ, ТУЛКИ БҮЛДИ

Исми эди Алижон полвон,
Полвонликдан бир иш чиқмади.
Қай майдонга бўларкан равон,
Бир кишини ҳалол йиқмади.

Бўри каби чанг солди гоҳо,
Гоҳ бўридек босиб йиқитди.
Бўлса ҳамки барча норизо,
У ўзини ғолибдек тутди.

Бора-бора исми ёнига
Бўри сўзи қўшилиб қолди.
Бу шум лақаб тегиб жонига,
Ҳийла қилиш йўлини олди.

Ҳийла билан битмади иши,
Ҳийла билан бўлмади полвон.
Энди уни кўрган ҳар киши
«Али тулки шу!» — дейди ҳамон.

«Али тулки» демаса уни
Бу атрофда ҳеч ким билмайди.
Билганлар ҳам ғирром полвонни
Тулки дея, иззат қилмайди.

Полвонликдан номи қолмади,
Аввал бўри, сўнг тулки бўлди.
Полвонлигин эл тан олмади,
Охирида бир кулги бўлди!

1977, май

ҚОР ЕКҚАН КҮН

Тун бўйи қор ёғди юмшоқ, оппоқ қор,
На йўллар қолибди, на бирон сўқмоқ.
Фақат ўз изида оқади анҳор,
Сувида қор йўту қирғоги оппоқ.

Ҳали из тушмаган. Шунда бир одам
Олдинга ўтди-ю, кетди йўл бошлаб.
Олдинда борарди кеккайиб бардам,
Баъзида ортига мағрур кўз ташлаб!

Янги йўл кашф этган кишидай бизга
Ҳар куни галати қарааш қиласади.
Мабодо кўзимиз тушса кўзига,
«Сен олдин салом бер!» деган бўлади!

Шундайлар каттароқ иш қиласа борми,
Бегуноҳ бошингни уриб ёради!

1976, октябрь

НАВБАТМА-НАВБАТ

**Мен уни олдинроқ севиб қолгандим:
Қизми, қиз! Тақимга тушади сочи!
Мен унинг ишқида ўртандим, ёндим,
Қани бир ваъданинг бўлса иложи!**

**Иложи топилди. Учрашдик боғда,
Худди мен излаган! Дишимга балли!
Мен тиним билмасдан сўзлаган чоғда
Қани у бирон сўз қўшса ақалли!**

**У бир сўз демасди, тингларди фақат,
Юзини босарди ширин табассум.
Шу бўлса керак деб асл муҳаббат,
Ташаббус отини сурдим мен ўзим!**

**Яна бир учрашдик. Яна... ва яна...
Охири тўй бўлди кузакка бориб.
...Энди у сўзлайди ёна ва ёна,
Мен эса тинглайман ночор жим туриб.**

**Сўз қўшсам ўт чиқиб кетади бирдан,
Тингламоқ мумкинdir кўп олис ердан!**

1977, май

ТУЛКИ ВА ҚҮЁН

Масал

Тулки тутиб Қүённи шу он,
Атрофига йиғди оломон.
Ва деди у: — Шу газзоб Қүён,
Қўшни боғда саҳардан буён
Сабзи ейди ўғирлаб ҳамон.
Номус ахир! Чидар қандай жон!
Мана уни тутиб келтирдим,
Қаттиқ жазо берилсин дердим!

Тол шохида ўйнарди читтак,
Қулоқ солиб турди-да қиттак,
Ҳайрат билан Тулкига боқиб,
Нафратидан титраб, тутоқиб,
Пастга учеби тушди-да, шу он
Деди унга: — Кечаку Арслон
Еганида ўғирлаб бузоқ,
Ахир қараб турдинг-ку узоқ!
На дод солдинг ва на бир нидо,
Гўё бурчин этарди адo!
Гўё унинг бу иши ёқиб,
Тураг эдинг сўлагинг оқиб!
Лабларингда борди табассум,
Ахир буни кўрдим мен ўзим!
Қачондан сен номусли бўлдинг,
Адолатли, ҳақ сўзли бўлдинг!
Бу масалнинг мантиқи аён:
Мунофиқлик ҳаммадан ёмон!

1957

454

Қ О Ф О З

Masal

У қоғозни писанд қилмади,
Еэди нима келса тилига.
Борми-йўқми нафи — билмади,
Тутаверди она элига.

Бора-бора ростнинг ўрнини
Елғон-яшиқ эгаллаб олди.
Баланд тутиб адид бурнини
Эл ичидা талтайиб қолди.

Шунда қоғоз номусга ўлиб,
Ениб кетди бирдан гуриллаб.
Адид эса қоғосиз қолиб,
Тўрт томонга чопар зириллаб.

Ҳамон қоғоз бермайди тутқич,
— Эиди,— дейди,— пушаймонинг кеч!
Ҳатто ёлғон қоғоз учун ҳам,
Билиб қўйинг, бир дунё алам!

1976, Riga



БОЛАЛАРГА

БОБОНГ ЙУЛИ

Сен шу чолга салом бер, ўглон,
Шу чол сенинг бобонгни кўрган.
Бобонг билан туриб ёнма-ён,
Қилич ушлаб, жангларга кирган.

Жангдан бобонг қайтмади, лекин
Довруғини шу чол келтирган.
Гўё бобонг қолдирган юкин
Манзилига шу чол етирган!

Қўлинин ол, қўлида бобонг
Кафт иссиғи сақланиб қолган.
Қулоғинг тут, дилида бобонг
Қалб уришин ардоқлаб олган!

Кўзига боқ, кўзида бобонг
Акс суратин кўришинг мумкин.
Сўзига боқ, сўзида бобонг
Иш суръатин кўришинг мумкин.

Йўлига боқ, йўли бегубор,
Йўли бобонг танлаган йўлдир.
Сен шу йўлдан адашмасдан бор,
Бу йўлларда шон-шараф мўлдир!

1975

ЭРКИН ЧИРОҚ ҶӘДИ

Чироқ зўрми, қоронғи?
Бу Эркинга қоронғи!
Ёқса агар чироқ у,
Қочиб кетар қоронғи.
Е бекиниб олади,
Чет-четларда қолади.
Чироқ ёқса шу замон,
Босиб келар беомон.
Бунча чаққон бўларкан,
Бунча учиб келаркан!
Яна ёқса у чироқ,
Қочиб кетар тумтароқ.
Демак, чироқ зўр экан,
Қоронғи-чи, кўр экан!

Эркин чироқ ёқади,
Оlamга нур оқади!

1977

БУВИЖОНИМ

Ўсма экдим бир бўйра,
Бувим қўйсин қошига.
Ялпиз тердим бир тўрва,
Бувим кергисин ошига.
Буви, буви, бувижон,
Бувим меҳри бир жаҳон!

Лола тердим қиртоғда,
Бир дастаси бувимга,
Балиқ тутдим қармоқда,
Энг каттаси бувимга.
Буви, буви, бувижон,
Бувим меҳри бир жаҳон!

Кечак тушдим суратга,
Бувим билан ёнма-ён.
Бувим лойиқ ҳурматга,
Ширин сўзу меҳрибон.
Буви, буви, бувижон,
Доим бўлинг соғомон!

Бувим сочи қордай оқ,
Оқ бўлса ҳам чиройлик.
Гуллар териб бир қучоқ,
Юринг, дўстлар, борайлик,
Буви, буви, бувижон.
Эртак бошлайсиз қачон?

**Дадам дейди «Ойижон!»
Доим қўли таъзимда.
Бизлар деймиз «Бувижон!»
Мехри нури кўзимда.
Буви, буви, бувижон,
Бувижоним бир жаҳон!**

**Бувим менинг аломат,
Доим бўлсин саломат.**

АЪЛО ЎҚИ!

Гўзал менинг азиз ўлкам,
Комсомолдир севган акам,
Ўқувчиман рост — чинакам
Десанг, тингла : — Аъло ўқи!

Она юртим Ўзбекистон,
Ўсган ерим боғу бўстон,
Ҳар кунимиз бўлсин достон
Десанг, тингла : — Аъло ўқи!

Барча миллат ога-ини,
Сон-саноқсиз шараф-шони,
Бир-бирининг меҳрибони
Десанг, тингла : — Аъло ўқи!

Галстугим номус-орим,
Мен ленинчи! — Чин шиорим,
Юрт атасин ёш шунқорим,
Десанг, тингла : — Аъло ўқи!

Октябрни кўрган отам,
Улуг жангда бўлган акам,
Ўшаларга ўхшай мен ҳам
Десанг, тингла : — Аъло ўқи!

Ҳужум қилса ёв қўйқисдан,
Кошевойлар юрган издан —
Боражакман мен ҳам тездан
Десанг, тингла : — Аъло ўқи!

Келажагим бўлсин порлоқ,
Раҳмат айтсин эл-юрт ҳар чоқ,
Умрим ўтсин шод-хушчақчақ
Десанг, тингла: — Аъло ўқи!

Москвадир улуғ пойтахт
Ундан бизнинг эрклиқ ва баҳт,
Унинг билан меҳрим ҳар вағт
Десанг, тингла: — Аъло ўқи!

ОНАЖОНИМ, ОНАЖОН!

Эрта турдим, юзим ювдим,
Тоза ювдим, онажон.
Үйқуни мен суриб қувдим,
Роса қувдим, онажон.

Уриб қўйинг энди сочим,
Майда қилиб, онажон.
Парқини ҳам тўғри очинг,
Ҳавас қилсин Гулжаҳон!

Дастурхонни ўзим йигиб,
Ўзим артиб оламан.
Эчкини ҳам ўзим соғиб,
Ўзим йўлга соламан.

Уйни ўзим супураман
Ҳеч эринмай, онажон.
Сут қайнаса, шопираман,
Сиз уринманг, онажон.

Фақат сочим майдা қилиб
Уриб қўйинг, онажон.
Ишим қилай сўнгра билиб,
Кўриб қувнанг, онажон,

Онаジョンим, онаジョン,
Мехрибоним, онаジョン!

1977

БУЛУТНИНГ АРМОНИ

**Осмон тўла булут кўчар
Карвон-карвон.
Булутларнинг бағри тўла
Армон-армон.
Армони шу: қуисам шаррос
Дала-қирга.
Мадад бўлсам қуёш каби
Она-Ерга.
Лола бўлиб япроқ ёёсам
Баҳор чоғи.
Мени эмиб ханда қилса
Гул дудоғи.
Меваларнинг шарбатида
Нурдек кезсам,
Каналларда тўлиб-тошиб,
Яшнаб сузсам.
Чашма бўлиб ердан чиқсам
Қайнаб-тошиб.
Тоғдан тушсам чапак чалиб,
Довон ошиб.
Қудратимдан ҳар хонада
Ёнса чироқ.
Нурга тўлиб яшнаб турса
Яқин-йироқ.
Тунда сувчи пахтазорда
Тараб юрса.
Майли, баъзан ўжарлигим
Койиб турса.**

**Майли, инсон измида мен
Мангу қолсам.
Майли, унинг раъий билан
Нафас олсам!**

**Осмон тўла булут кўчар
Карвон-карвон.
Юрагида эзгу ният,
Нурли армон.
Ниятига етсин булут,
Қўйисин шаррос.
Емғирниң ҳам ҳикмати зўр,
Нурга қиёс!**

1969

ВАЛИНИНГ САВОЛЛАРИ

Вали тунни севмайди ҳеч,
Ергул бўлса эртаю кеч.
Қуёш турса доим кулиб,
Вали юрса ўйнаб-кулиб.
Қушлар турса шохда сайраб,
Еки учса яйраб-яйраб.
Ариқ бўйи қандай яхши,
Қандай яхши сув оқиши!
Кўринади яқин-йироқ,
Керак эмас ҳар хил чироқ.
Гулзорларнинг кўркига боқ,
Қандай гўзал, қандай порлоқ.
Йўллар эса текис, равон,
Вали унда ўйнар ҳамон.
От минади фидиракли,
Фидирағи кўп керакли.
«Чу!» деганда чопмайди у,
Фидирағи айланар «ғув-в!»
Барибир у шоду хандон,
Кундузни у севар жондан.
Қоронғи ҳам тушар лекин
Вали қайтар уйга секин.
— Бу қоронғи қайдан келар?
Кундуз куни нима қилас?
Қайда ётиб, қайди турад?
Ё тунними пойлаб юрад?
Шу саволни ўйлаб Вали,
Жавобини топмай ҳали

Ухлаб қолар... Боқса бундоқ
Тонг отибди нурли, порлоқ.
«Тун қаёққа кетди қочиб?»
Дейди Вали кўзин очиб:
«Ё бекиниб ётарми у?
Ё узоққа кетарми у?»

Жавобини топмай ҳали
Ўйнаб кетар яна Вали!

1977

Қ У І І Л А Р

Қушлар, қушлар, жон қушлар
Навбаҳорни олқишилар.
Сизни кутиб майсалар,
Қорлар остида қишилар.

Қорлар ўтди, эриди,
Муддаомиз шу эди.
Дала-қирда, боғларда
Гул-лолаларнинг ҳиди.

Ўзоқ элдан келган қуш,
Кел, ўртоқжон, бизга туш.
Ҳар дараҳтда уя бор,
Кутиб турди бутун қиши.

Янги уя қурғанман,
Сизни кутиб турғанман.
Сизни мақтаб, олқишилаб,
Қўшиқ айтиб юрганман.

Сиз келганда ўтган йил,
Кўчат ўтқаздим беш хил,
Бу йил шохига қўниб,
Денглар: нишоналар қил!

Қара, гули чиройлик,
Юр, у томон борайлик.
Сен шохида сайраб тур,
Бизлар дарс тайёрлайлик.

Етиб келар ёз ойи —
Ўлкамизнинг чиройи,
Сизга жуда мос келур
Унинг кўркам ҳар жойи.

Чаман-чаман боғи бор,
Баланд гўзал тоги бор.
Сиз ўйноқи қуپлар-чун,
Хўп ярасар чоғи бор.

Узоқ элдан келган қуш,
Кел, кел, бизнинг боққа туш.
Яна кўчат ўтқаздим,
Шохларида ўйнаб уч!

САЁХАТ ҚИЛ, САЁХАТ

Етиб келди кутилган ёз,
Боқ қандайин кўркам ва соз.
Қушлар қиласар кўкда парвоз,
Саёҳат қил, саёҳат!

Дала-қирда ойна булоқ,
Оқиб ётар шарақ-шарақ.
Бориб кўрмак қандай мароқ,
Саёҳат қил, саёҳат!

Мева пишиди, бирам ширин,
Ўрган унинг тури, сирин.
Ёзиб олинг ўстган ерин,
Саёҳат қил, саёҳат!

Едгорлик кўп шаҳарларда,
Қолган қадим маҳаллардан.
Бўёғи зар ва ҳаллардан,
Саёҳат қил, саёҳат!

Улуғ завод бордир унда,
Ўнлаб машин берар кунда.
Отанг, аканг ишлар шунда,
Саёҳат қил, саёҳат!

Тоғларимиз маъданга бой,
Этагида оқар зўр сой.
Сайил учун жуда боп жой,
Саёҳат қил, саёҳат!

Үтлар хилин айт-чи, қани?
Кам муаллим ўқитгани,
Ҳавас қылсанг кўп билгани,
Саёҳат қил, саёҳат!

Эй навқирон, нодир авлод!
Бой ва гўзал ушбу ҳаёт
Сеникидир, бил, умрбод,
Саёҳат қил, саёҳат!

УЗУН СОЧ

Қизим Зебога

Сингилчам сочи узун,
Лента боғлар учига.
Бахтли санаб у ўзин
Севинч сиғмас ичига:

— Она,— дейди,— боғчада
Энг узун соч ўзимман.
Қизлар қарап күчада,
Ҳавас қилиб изимдан!

Баъзан отимни билмай,
Дейишади: «Узун соч».
— Тараб ювсант эринмай,
Яна қўяр ўзин соч!

Онасининг бу сўзин
Тинглар синглим керилмай.
...Сингилчам сочи узун,
Ювиб-тарар эринмай!

БИЗНИНГ КЎЧА

Бизнинг кўча зап кўча,
Чироқ ёнар ҳар кеча.
Машиналар қатнайди
Хаттоқи тонг отгунча.

Йўлкаси бор жуда кенг,
Ун беш одам сигар денг.
Қатор кетган дарахти
Менинг бобом билан тенг.

Бинолари кўп қават,
Кўриниши баҳайбат.
Гар остидан қарасанг
Дўппинг тушади албат.

Асфальти кўп ярқироқ
Ариқ оқар, шарқироқ.
Ёзилмаган қоғоздек
Деворлари жуда оқ.

Байрам қилса ҳур ўлкам,
Бўлар жуда ҳам кўркам.
Парад ўтар, танк ўтар,
Ўтар жийрон отлар ҳам.

Кулиб келганда баҳор,
Яна ўзга гашти бор.
Чаман бўлиб яшнайди,
Йўлка бўйи — кент гулзор.

Бизнинг кўча кўп донгдор,
Завод, мактаб унда бор.
Кўчамизда турганлар
Қилса арзир ифтихор.

Кенг ва гўзал қўчамиз.
Кундуз каби кечамиз.
Уни обод қилишда
Ишлаганмиз нечамиз.

ҚУЁШ, ҮЗ ЖОЙИНГГА ЧИҚ!

Қуёш кўлга тушиб кетибди,
Сув остида ёнади порлоқ.
Ҳамма ёқни нури тутибди,
Ишонмасанг ана, қараб боқ!

Ёз ҳам ўтди — турибди ана,
Куз ҳам келди — чиқолмас ҳамон.
То қишигача қолса-я яна,
Совуқда у қандай сақлар жон!

Қуёш! Қуёш! Үз жойингга чиқ,
Осмон яхши, осмон кенг, очик.
Қишида сувлар совуқ бўлади,
Қўл-оғинг музлаб қолади!

1977

АҲМАД САВЛАТ

**Аҳмад! Аҳмад! Ҳой, Аҳмад,
Дема бу гапинг тухмат!**

**Тирноқми у ё қошиқ,
Ости тўла ботмон кир.
Тагин айтиб сен қўшиқ,
Дейсан доим: — Мен ўткир!**

**Савлат тўкиб юрасан,
Баъзан сўкиб юрасан.
Сўз бермайсан ҳеч кимга,
Худди ўхшаб эчкимга.
Тил деганинг бир қулоч,
Бир қулочу «мендан қоч!»**

**Яхши эмас, бу Аҳмад,
Сенга берсак маслаҳат:
Аввал ўзинг эвлаб ол!
Маънисини кавлаб ол!**

1969

ҚАЛДИРГОЧ

Салом, сенга, қалдирғоч,
Узоқ эллар меҳмони!
Сени кўпдан кутади
Юртимизнинг бўстони.

Қири тоғлар ошдингми
Манзилингта кўз тикиб?
Кетганмидинг ўтган йил
Меҳримиз дилга тушиб?

Салом олиб келдингми
Улуғ ҳинди еридан.
Хизматингта ташаккур,
Меҳринг диллар тўрида!

Ҳинди халқи дўстимиз,
Азиз унинг саломи.
Яхши ниятли халқнинг
Тилда ҳамиша номи.

Балки Ганг қирғоғидан
Уянгта лой олгансан.
Балки Кашмир боғидан
Қалбингта куй солгансан.

Сайра ўша куйларни
Боғу бўстонлар кезиб.
Дарёларни кесиб ўт,
Оппоқ тўшинг тегизиб!

**Улуг юргдан келибсан
Бизда катта ҳурматинг,
Кез! Ҳеч кимса демасин
Нега бизда турмадинг?**

**Қайтар чоғинг меҳримиз
Қанотингда олиб кет.
Ҳинд халқи саломига
Биздан кўп ташаккур эт!**

ҚАЛАМНИНГ ЎКИНЧИ

Қалам дейди: — Мени чизма
Девор, тошга.
Ахир менинг хизматим бор,
Бутун бошқа.
Кишиларнинг қарғишига
Қўйма мени.
Шундай қийнаб, исроф этсанг,
Сўйма мени!
Яхши ният, орзу билан
Қўлингга ол,
Қоғозга ёз, гар истасанг,
Суратлар сол.
Хусниҳат ёз, хизматингта
Мен ҳозирман.
«Беш» олганда «Раҳмат» десанг,
Мен арзирман,
Мени севсанг қийнама ҳеч,
Этма исроф.
Мен дўстингман юраги кенг,
Нияти соф!

ҚАНДИМ ҚАНИ?

Хўш, айтинг-чи, қайси бола
Қандни ёмон кўради?
Чойига қанд солиб қўйсанг
Лаб-лунжини буради?
Бианинг Шодмон бўлар шодмон
Қамид солсангиз чойига.
Дарров келиб ўтиради
Ая айтган жойига.
Юзи, кўзи нурга тўлиб,
Енар майдা оқ тиши.
Лекин унинг бордир, дўстлар,
Ярашмаган бир иши:
Қанд эригач, дейди: — Қани?
Қандим кетди қаёққа?
Топиб беринг, топиб беринг,
Қани олинг бу ёққа!
Тушунтиранг тушунмайди,
Дод солади ер тениб.
Аяжони алдаб кўпар,
Гоҳ эркалаб, гоҳ ўпиб.
Қани қулоқ солса Шодмон!
Шу қилиғи кўп ёмон!
Сизлар шундай қилмайсизми,
Али, Вали ва Омон?

1977

Юксак тоглар саломини
Олиб келасан,
Қирлар ошиб, водий кечиб,
Толиб келасан.
Барибир сен ҳамон тетик,
Толиқиши ётдир.
Чунки сенинг қалбинг тўла
Эзгу ниятдир.
Чечак унса, гул очилса
Йўлимда дейсан.
Майса-гиёҳ қулса ўнгу
Сўлимда дейсан.
Боғда боғбон, қирда дехқон
Қаршилаб олса,
Етакласа йўлим очиб,
Измига солса,
Ҳар меванинг илдизидан
Чиқсам юқори,
Шарбат бўлсам, кўрки бўлсам,
Ошса виқори,
Ширин-шакар меваларнинг
Тотида кезсам.
Кишиларнинг соғлом тани,
Қалбида сузсам.
Шудир сенинг яхши ният,
Эзгу армонинг,
Яхши ният, юрак қўринг,
Битмас дармонинг.

**Шу ниятда боғу роғлар
Кезиб юрасан.
Ҳар томирнинг уришини
Сезиб юрасан.
Боғлар ошсанг, гулзор ошсанг,
Майли, ариқжон.
Ҳар илдизу, ҳар чечакда
Сенсан тирик жон!**

ПЕРО ВА АДҲАМ

Перо бирдан хунук ёзди,
Гүё унинг кўнгли озди.
Адҳам боқса, учи тўмтоқ.
Жаҳл билан уни шу чоқ
Юлиб олиб отмоқ бўлди,
Шунда бирдан перо кулди:
— Тўхта, Адҳам шаҳдингдан қайт,
Аввало сен ростингни айт:
Менми айбдор ёки ўзинг?
Олайтирма менга кўзинг?
Сиёҳдонга урсанг тақ-тақ
Бўламан-да, ахир тўмтоқ!
Авайлаб тут, аста ботир,
Ҳамма шундай тутаёттир.
Алмаштирмас улар кунда,
Яхши ёзар ана шунда!

Хижолатда қолди Адҳам,
Минг зўравон бўлганда ҳам!

ҚАЛАМПИР

Менинг номим қалампир, қалампир.
Мени севмас болалар ва кампир.
Худди чўғдек ёнаман, ёнаман,
Гўё қуёш ўғлиман, боламан.
Кўринишим ёмонмас, ёмонмас.
Рангу рўйим лимондек сомонмас.
Лекин тилим аччиқдир, аччиқдир.
Бу галим ҳеч сир эмас, очиқдир.
Эҳтиёт бўл, тилингга тегизма,
Гўё мен тифи ўткир бигизман.
Утлар чақнаб кетади кўзингдан,
Адашиб ҳам қоласан сўзингдан.
Менга тегдинг — кўзингни ишқама,
(Билиб қўйсиян буни ҳам бошқалар)
Кўзинг ачиб, ёшларинг тийилмас.
Яхиси, қўй, сен менга тегма, бас!
Ўртоқ бўлсанг, ўртоқман фойдали,
Менинг мазам билмайсан сен ҳали!

Менинг номим қалампир, қалампир.
Мени севмас болалар ва кампир.

1969

Ботир яхши билади,
Доим таъкид қиласди:
— Осмонда бир дарё бор,
Тошиб кетар ҳар баҳор,
Шунда ёмғир ёғади!
Қандай яхши ана у!
Ерга тушиб яна у
Дарё бўлиб оқади.
Ерга сингиб кетгани —
Гул-чечаклар кутгани!
Қорлар эса ёмғирнинг
Йўлда совуқ қотгани!

1977

Ў Ч И Р Ф И Ч

Бир кун деди ўчиргич:
Ҳадеб мени ишлатма!
Айб мендами эрта-кеч,
Хато ёссанг сен ғуж-ғуж.
Аввало сен яхши ёз
Яхши ёзу түғри ёз.
Яхши ёссанг қандай соз,
Бўлмас менда эътиroz.
Майли, мени олиб юр,
Папканга ҳам солиб юр.
Лекин кўп-кўп ишлатма,
Хижолатда қишлиатма!
Яхшиси ёз бехато,
Хато қилсанг мабодо
Ердамга мен тайёрман,
Тайёрману мен борман!

— Тегма менга,— деди ғўра,—
Дарсингни қил ундан кўра!
Ҳали хомман ва тахирман,
Шунинг учун кўп бахилман.
Олдин пишай, сўнгра егин,
Ана шунда раҳмат дегин!

Бу сўзларга солмай қулоқ,
Шартта узиб еди Қўшоқ.
Сал ўтмасдан оғриб қорни,
Излаб қолди холи ерни!
Қани энди қолса оғриқ,
Икки кўзи ёшга тўлиқ!

Ғўр бўлса ҳам гарчанд ғўра,
Сўзи эди доно, сара!

1977, апрель



ТАРЖИМАЛАР

А. С. ПУШКИН

* * *

(1825)

Ҳаёт сени алдаса агар,
Қалб ўртама, ҳеч чекма заҳмат.
Дардли кунга қылғыл қаноат:
Инон, құвноң күнлар ҳам келар.

Дил келажақ ишқида яшар;
Бу кундаги ғам чекиши, қадар
Бир лағзалик, ҳаммаси ўтар,
Неки ўтса, ўша мўътабар.

ЧОЛ

(1815)

Киборлар олами танг қолган
Серзакқ ошиқ энди мен эмас.
Баҳор, ёзим, оҳ, ўтиб бўлган,
Иzlари ҳам энди кўринмас.
Ешлик йиллар тантриси Амур,
Сенинг содиқ мухлисинг эдим.
Агар қайта туғилсан, билур
Эдим қандай хизмат қилмоғим!

ЎЗИМ ҲАҚИМДА

Улуғ шоир бўлмоқ орзум бор,
Россия шаънига жон фидо.
Ёзсан дейман тенги йўқ ашъор,
Шояд умрим етса, эй, худо!

Шундай эди, шундай бўлар ҳали ҳам,
Бу қадимдан қолган ибрат, йўл-йўруғ.
Билимдон кўп, лекин оқил, доно кам,
Таниш-билиш саноқсизу дўст-чи, йўқ!

Н. А. НЕКРАСОВ

* * *

Иилдан-йилга тарк этмоқда күч-құдрат,
Қоним совиб, заиф сездим ўзимни.
Она-Батан! Сени құчмай ҳуррият
Наҳот юмсам бу дунёдан кўзимни!

Улаётіб билсам дейман, эй ўлжам,
Сенинг йўлинг тўғри йўлдир муқаррар.
Қирларингда буғдой сочган қўшчи ҳам
Эртасини аниқ, равшан, соф кўпар.

Она қишлоқ осмонидан учган ел
Ҳар қишлоққа олиб борса хушхабар,
Ки, кўз ёши тўқмас энди она эл,
Қони қайнаб, чекмас энди ғам-қадар!

1891

* * *

Нақадар дим! Чексиз узундир
Бахти қора юртим кечаси.
Ҳайқирсанг-чи, эй бўрон, ҳайқир,
Лим-лим тўлди сабр косаси!

Ҳайқир денгиз гирдоби узра,
Қишу ўрмон оша ёз қулоч,
Халқнинг қайғу зардоби тўла —
Косасидан барин юлқиб соч!

1868

Г. ГЕЙН
(Германия)

* * *

Майли, ерлар қорга күмилсин,
Майли, бўрон қутуриб елсин.
Деразамни қоқса ҳам майли,
Бўрон дилга таъсир қилмайди
Унда жамол очиб гуллайди
Севгилим-ла баҳор чиройи!

* * *

Гўзал гул ошиғи дайди капалак
Парвона эрта-кеч унинг қошида.
Қуёш ҳам севгани, эркалаб фалак —
Тўридан тўқади нурин бошига.

Лекин мен билолмай ҳайронман мудом
Гўзал гул севгани қайси бири, хўш?
Ғазалхон булбулми ва ёки оқшом —
Юлдузи этдими нури-ла сархуш?

Аммо мен севаман қалбан барини:
Гўзал гул жамолин, булбул ғазалин,
Капалак дайдишин, қуёш зарини,
Ва порлок юлдузни — тунлар гўзалин.

М. Ю. ЛЕРМОНТОВ

* * *

Йиглама, йиглама, йиглама, болам
Садқайи кўз ёши, чекканинг алам.
У сени ҳазилдай қувнатди фақат
У сенга зерикиб қўйди муҳаббат!
Қуришиб қоптими зулта йигитлар
Биз ўсган Гуржистон ўлкаси ичра?
Уларнинг кўзида ёнади ўтлар,
Уларнинг мўйлаби ингичка, қора.
Узоқ, ёт ўлқадан тақдир еллари
Биз томон итқитиб отмишди уни.
У шуҳрат ва жанг-чун кезар сарсари,—
Бошига урсинми у ахир сени!
У сенга кўп олтин армуғон қилди,
Умрбод севишга этди қасамёд.
У сенинг меҳрингни баҳолай билди,
Лекин кўз ёшингта қўёлмас қиммат.

Р. ТАГОР
(Ҳиндистон)

ОНА НИДОСИ

Эй, Она! Эшикда бўлдинг-ку пайдо
Фарзандинг — бизларга ташладинг нидо.
Ер узра ёйилди оқшом ранг сояинг,
Далалар ёпинди қоп-қора ридо.
«Қучоғим сизларга кенг очиқ!» дединг,
Ҳар сўзга ажойиб бир маъно бердинг.
Маъноки, томири қонларда елиб
Ҳар қалбга йўл топар ҳайқириқ бўлиб.
Ғам-ғусса, ташвишга ботган кишилар
Сенинг бу нидонгни албат олқишилар!

Мўъжиза кутгандек шошамиз уйга,
Тонг отар чоғида дарёдан ўтиб,
Бир сиқим дон учун баримиз тутиб,
Очликни йўлатмай хаёлга, ўйга.
Сен кечув йўлини боллаб қўй, Она,
Елқанинг юборгин сўнгра мардона.
У олис қирғоқча ўтайлик бардам.
У томон еринг-ку, унда йўқ одам.
У ёқда совуқ ел фарёд уради,
Шамчироқ милтиллаб ёниб туради.
Ўчириб қўйгудек уни зўр шамол,
Эй, Она, у шамни сен кўксингта ол,
Милтиллаб ёнса ҳам майли, ўчмасин!
Сен уни ишонч-ла сақлаб bemалол
Ўнг қўлга олгину кўттар юқори,
Ажойиб манглайнинг эритсин нури.
У нурни кўрайлик уйга қайтган чоғ,

**Яхшидир йўлингни ёритса чироқ.
Бу олам ранг-баранг шаҳарга тўлуғ,
Ва лекин бирорта очиқ эшик йўқ!**

Қулоққа чалинди бир «ку-ку» саси
Сўнгти бор буталар оша кечаси!
Кечки ел қатидан анъиб туради
Ўрмонлар чечагин хуш бўйи, иси!
Бошқа бир йўловчи энди йўқ албат,
Иилтироқ қуртгина ёнади фақат.
Чақнайди бу кўзлар даҳшат кутгандек,
Ташвишу аламнииг вақти етгандек.
Сен эса эшикда турасан ҳамон
«Ҳаммангиз меники, юринг, деб, шу он!»

А. МИЦКЕВИЧ
(Польша)

М. г а

«Кўзимдан йўқол!» дер, хўп дейман шу он,
«Қалбимни тинч қўй!» дер, юрак ҳам лоқайд.
«Бутунлай унугт!» дер, лекин бу фармон
Ижроси мумкинми, қани, ўзинг айт!

Қанчалик кеч кирса соя ҳам узун,
Шунчалар кўланка бўлур қуюқроқ.
Шунингдек, менинг ҳам ҳаётда изим,
Хотирам йилдан-йил ғамгин, аламнок.

Сен билан дардлашган ўша хилватда,
Юрагим измингда қолгандир, эркам.
Ўшандан бу ёққа ўзим албатта
Сен билан биргаман ҳар ерда, ҳар дам.

Сен арфа торига қўлларинг қўйиб,
Ажойиб наволар таратган замон,
Ўкиниб эслайсан машқингдан ийиб:
«Шу қуй-ла кўнглини очардим ҳар он».

Ва ёки шахматга берилиб кетиб,
Мот учун қиролга қўйганда тузоқ,
Сен мени эслайсан қайғуга ботиб;
«У билан ўйнардим шундайин узоқ».

Ё базм қий-чуви ҳолдан толдириб,
Бир лаҳза каминда олмоқ бўлсанг дам,
Ногиҳон эсларсан мени қалб уриб:
«Неча бор бўлганди у бунда ҳамдам!»

Ё китоб ўқисанг, тақдирдан нолиб,
Севишган йигит-қиз бўлишса жудо,
Китобни итқитиб, оғир хўрсиниб,
Ўйларсан: «Биз каби бўлишмиш адо!»

Мабодо китобда йигит билан қиз
Севишиб умрбод топаркан висол,
Сен шамни ўчириб, қиласан афсус:
«Қанийди бизда ҳам бўлганда шу ҳол!»

Ё боғда қуриган нок шитирласа,
Ё яшин ялт этиб ўтса ногиҳон,
Ё бойқуш ноласи тинчликни бузса,
«Ана у келяпти!» дейсан титрабон.

Сен билан дардлашган ўша хилватда
Юрагим измингда қолгандир, эркам.
Ушандан бу ёққа ўзим албатта
Сен билан биргаман ҳар ерда, ҳар дам!

АБДУЛЛА ТҮҚАЙ
(Татаристон)

Б Ү Р О Н

Тинчгина турган ҳавони қоплади бирдан туман;
Қор учиб, қор сепкилиб, қорга күмилди ҳар томон.

Қор урага раҳмсиз, кўз очиб бўлмас сира;
Ҳар қаро нарса бўри ёки қароқчиға ўхшар, қара!

Қорни енгандек тушар ерга тўлин ой ёғдуси;
Гоҳ сариг, гоҳо кумуш қўрққан каби ойнинг юзи.

Не бало! Қоф тогидан жинлар тўзиб солган йиги?
Е тешилганми худонинг тенги йўқ зўр ёстиғи?

Қор бўлиб ерда учарми ушбу ёстиқ парлари?
Изғишиб парлар йигарми ёки Қоф тог жинлари?

Не ажабким, қор орасидан термилиб ул ой қулар
Мен гарияб заҳматда гўё — чарбогиндан бой қулар!

ИЛЬЯ ЧАВЧАВАДЗЕ
(Грузия)

Б А X О Р

**Чакалакзор оҳиста
«Яша!» дея шовқинлар.
Ҳамда маъюс тол новда
Армон билан қон йиглар.**

**Гуллолалар очилган
Тоғ сиртию, қир чаман
Сен ҳам қачон, эй Ватан,
Чаман бўлиб гуллайсан?!**

ВОҚИФ
(Озарбайжон)

F A Z A L L A P

* * *

Ҳар етук гўзални гўзал демасман,
Гўзалда бир ғайри аломат бўлар.
Сочлари бир ёнда, бели бир ёнда,
Ўзи билмас, ўзида бир одат бўлар.

Рақсга тушса парвоз этар нимтана,
Сочи қалқиб, учи учар ҳар ёна,
Пешанабоғ манглай қисиб ҳайронা,
Серкиллаган тўши қиёмат бўлар.

Мужгон ўқин отар, лаби дур тўкар,
Юрагим чокини бирма-бир сўкар,
Сўзи тузли бўлар, дудоги шакар,
Ҳар суҳбати ажиб ҳикоят бўлар.

Бўйни узра садаф маржон тизилар,
Қиё боқса жон танимдан узилар,
Сурма тортган қора кўзлар сузилар,
Ўтириб турмоғи қиёмат бўлар.

Асли гўзал шундай ҳиромон кезар,
Ниқоб тутиб, зулфи паришон кезар,
Сахар сайдрга чиқса гулистон кезар,
Севгисида ўтли ҳарорат бўлар.

Воқиф қурбон бўлсин қўша тоғига,
Тақимга чирмашган соч сўротига,
Қошлари ўхшайди ой ўроғига,
Томонаш айлаган бетоқат бўлар.

* * *

У гўзал жононлар ҳайдар кокили,
Яна менда дину имон қўймади.
Мастона кўзлари, хумор боқиши,
Ақлимни олди-ю, омон қўймади.

Мубтало бўлмасан ёнокда холга,
Албатта етардим ақлу камолга,
Қаддимни букмасди ўхшатиб долга,
Найлайнин, бир қошли камон қўймади.

Йўлим тушди, эвоҳ, бир ағёр билан,
Кеча-кундуз ёндим оҳу зор билан,
Кунларим ўтарди севган ёр билан,
Тушди орамизга ёмон, қўймади.

Воқиф унга бошдан ёримсан, деди,
Еримсан деди-ю охир панд еди,
Бугун жонон бизга келмоқчи эди,
Уни яна рақиб, гумон қўймади.

* * *

Кўзларинг жаллоддир, боқишинг ханжар,
Қонли ғамзанг каби бўлмас бало, қиз!
Нозли-нозли сўзлар қотиб кулганда
Ўхшарсан шакарга, қандга, ҳалво қиз!

Лабларинг ғунчадан, гулдан аълодир,
Сайр айла боғчада, гулдан аълодир.
Оқ танинг кечада гулдан аълодир,
Эй, қомати шадшод каби расо қиз!

Умрингта кўп дуо-сано деганман,
Ғурбату дардимни сана деганман,
Ширин жоним қурбон сенга деганман
Эл аро бошлаганда можаро, қиз!

Қоматинг, бўйнингу бўйинг гўзалдир,
Мушкину райҳонинг, бўйинг гўзалдир,

**Шайдойинг дейдики, куйинг гўзалдир,
Бу дунёда бўлмас бундай шаҳло қиз!**

**Воқиғман, яқин кел, айилма мендан,
Ақлимни, ҳушимни айирма мендан,
Йиглаяпман, әмиз менга маммангдан,
Мени сийнанг бешигига бела, қиз!**

ЛЕСЯ УКРАИНКА
(Украина)

МЕНИНГ ЙЎЛИМ

Илк баҳорда йўлга чиқдим ёлғиз ўзим,
Майин, сокин куйларимни куйлар эдим.
Йўл-йўлакай кимга агар тушса кўзим
Қалбимдаги ҳисларимни сўйлар эдим.

«Адашмоғим енгил — йўлда ёлғиз юрсам
Қўрқув йўқдир бир-бировга бўлсак
ҳамдам!»

Оҳ, нақадар мушкулотга тўла бу йўл.
Ёлғиз чиққан киши учун оғир яна.
Бу йўл оғир бўлса ҳамки кишига мўл,
Бу сафарда ёлғизмасман, кўринг, мана!

Ёлғиз юрсам адашмоғим мумкин менинг,
Биргалашиб йўл олайлик, дўстлар, келинг.
Мен бораман... қўшиқ оқар нақ қуилилиб,
Бу куйлардан излама сен бир башорат,
Қўшиқларим янгратмайди олам тўлиб
Лекин кимки кўз ёш тўкиб, чекса заҳмат,
Унга дейман: сенинг дардинг — менинг
дардим!

Ингисини қўшиғимга қўшиб бордим.
Кўз ёшлари қурий бошлар шафқатимдан...

Эрк, саодат қўшиғини йўлда ногоҳ —
Тинглаб қолсам, кўзим ёниб худди шу чоғ
Акс садо янграб чиқар дил қатимдан!

Шунда қайғу-аламимни бир ён қўйиб
Эрк қўшиғин янгратаман тўйиб-тўйиб.
Сокин кўкка гар ташласам кўзим қирин
Янги юлдуз топмоқ орзум йўқдир зинҳор.

Эркү Тенглиқ, Қардошлиқнинг олтин нуриң
Коқши әди булут оша кўрсам бир бор!

Шу уч юлдуз халқнинг умид-орзусидир,
Кўпдан муштоқ һиятининг нақ ўзидир!

Шу уч юлдуз кимга нуриң сочса баҳам
Қарши олар у эрк куйин мағрур куйлаб.
Менинг сиёҳ тунларимда ёнмаса ҳам,
У куйчини тентаж дея очмайман лаб.

Чунки бу нур порлаб туар туну куни
Йўл чанглари яширади биздан уни.

Наҳот йўлда умр бўйи тиксан кўрсам?
Наҳот сира учрамаса бир боғу роф,
Наҳот ёрқин мақсадимга етолмасам?
Наҳот йўлда умрим тугаб қолса, эвоҳ?
Қўшиқ билан бошлагандим ҳаёт йўлим,
Қўшиқ билан кўз юмарман, келса ўлим.

22 май, 1890

А. А. ФЕТ

* * *

Куз нақадар совуқ ва қурғоқ,
Шол рўмолинг бошингта ўра.
Олов ёнар уфқда, мудроқ —
Қарағайлар оша бир қара!

Шимол туни — кўзинг порлаши,
Хаёлимдан узилмас ҳеч чоқ,
Ёнган билан кўзинг оташи
Иситмайди қалбимни бироқ!

В. В. МАЯКОВСКИЙ

ЛЕНИНЧИЛАР

Гар қамал
бизларни
енголмабдикан,
Гар бязни
ютмабди
уруш ўпқони
Барига
сабабдир
Ильичнинг улкан —
Ақлию
идроқи,
ибрати, жони.
— Республика учун
вулқондек
отил,
Жангларга
кирмоқнинг
келгандир кези!—
Деб олға
ундаган
Ильичнинг ўзи.
Ҳар дасттоҳ
қудратин
уч бора ортдир —
Меҳнатинг яхшила!
Бил ишнинг кўзин,—

Дегандир,
бизларга
Ильичнинг ўзи.
Нефтуга
лиқ тўлсин
Республика баки!
Кўмир бер!
Тоғларнинг
қамапсин кўзи?
Шундайин ишла дер,
Ильичнинг ўзи.
«Таннархин камайтири!
Йўқот бракни!»—
Дегандай янграйди
гудоклар саси,
Бу асли
Ильичнинг
айтган ҳақ сўзи!
Коммуна ерига
сур
тракторни,
Қирларни
фабрика
нурига тўлат,—
Деб Ильич
Советга
берган маслаҳат.
Ҳар тийинни тежа,
бордир ўз ўрни,
Исрофга
йўл қўйма!
Ва сув қилиб ич —
Хўжалик ишини,
дегандир Ильич.
Нур билан
пармала,
битсин қоронғу,
Электр чулғасин
бутун ўлкани!—
Эсимда Ильичнинг
шундай дегани.
Дин — душман,
дин — афъюн,
дин — оғу,

Бас!
Етар!
Попларнинг
сафсатаси пуч!
Ундан
мусаффо бўл,
дегандир Ильич.
Қоғозлар остидан
тўрани тортиб
Савала
ишчининг
газаб-қаҳри-ла,—
Деб бизни
ўргатган
Ильич ҳар йўла.
Танқидда аяма
буёқни,
ҳадеб,
Ишда пеш
қилмагин
манسابингни ҳеч,—
Ўзингни
шундай тут,
дегандир Ильич.
Коммунизм байроғин
тортма
«сўл» ёқдан,
Ўнг ёқдан
мунгайиб
туришингдан кеч,
Оғишмай,
тўғри юр,
дегандир Ильич.
Фашистни занжирла!
Бас, етар
Ишчининг
«ўлжа»син
итга ем қилиш!—
деб шафқатсиз ҳужумга
ўргатган Ильич.
Нолиш бизларга ёт,
тантана, шараф

Биз билан!
Биз билан барҳаёт
Лениндеқ киши!
Музаффар сафарда
коинот бўйлаб
Ильичнинг идроки,
ақли
ва иши!

1930

ХО ШИ МИН
(Вьетнам)

* * *

Эликка етмасдан баъзи бир одам
Қарилик даъвосин қилади ҳар дам.
Олтмишдан нарига ўтиб кетсам ҳам
Ўзимни сезаман тетик ва бардам.
Камтарин бир ҳаёт кечирмоқ керак,
Камтарда ҳамиша ёш бўлур юрак.
Меҳнатдир ҳаётнинг кўрки, негизи,
Мунтазам меҳнатдир ёшликнинг ўзи!

* * *

Ой дейди осмондан кулиб: «Шеър ёз!»
Бу ҳарбий ишлардан қўйл тегмас, эй, ой!
Сабр қил, тўлин ой, вақт ўтсин бир оз,
Қулоқ сол, ос қулоқ!
Чалиб қўнғироқ
Хабарчи келтирас елиб хушхабар,
Бу хабар фронтдан, янги бир зафар!

* * *

Бу кеча тўлин ой нақадар кўркам!
Дарёниг сувлари гўёки кўклам —
Кўкига туташиб кеттандек улкан.
Қирғоқда кўп ҳарбий режалар туздик.
Тун оғгач, қайиққа ўтириб суздик:
Ой нури қайиқда лиммо-лим экан!

САМАД ВУРҒУН
(*Озарбайжон*)

ОЗАРБАЙЖОН

Тоғларингда кезиб юрдим, қуийда яйлоқ,
Қирларингда яйраб оқар ойнакўз булоқ.
Қамишларни ел ўйнаса, жим солдим қулоқ
Аракснинг оқшом чоги оқиши дилдор...
Шунда туйдим севги, дўстлик, ҳурматни илк бор.

Тандан юрак ўғирланмас ҳеч қачон, ҳеч ҳам!
Сен қалбимсан, сен ҳаётим, сенсан насибам.
Қаршимдаги шаҳарларинг кўркамдир, кўркам.
Борлигим-ла фарзандингман содиқ, меҳрибон,
Озарбайжон, Озарбайжон!

Тоғларингнинг сочи сутдек оппоқ, беноён,
Тепаликда булутдан улкан соябон.
Шу йўсинда яшаб ўтдинг неча минг замон.
Қайгу-ҳасрат ва ҳижронда оқарди бошинг,
Барчасини енгмак учун етди бардошинг.

Шум жоҳиллик булғаб келди азиз номингни,
Азалий деб фатво берди қайгу-ғамингни,
Умид-орзу ўртаб келди дилу жонингни,
Ҳаммасидан омон ўтди шарафу шонинг,
Кўпdir сенинг улуг қизинг, улуг ўғлонинг!

Боку узра қўяр экан гар душман қадам,
Танбеҳини бергусидир миллионлаб одам.
Шимол ели вишкаларда ўйнаса ҳар дам,
Қумли саҳро унга берар мағрур акс садо,
Тунги тоғлар суҳбати ҳеч бўлмайди адо.

Жудо бўлмас онасидан гўдаклар ҳеч ҳам!
Сен қалбимсан, сен ҳаётим, сенсан насибам,
Қаршимдаги шаҳарларинг кўркамдир, кўркам.
Борлигим-ла фарзандингман содик, меҳрибон.
Озарбайжон, Озарбайжон!

Кумуш тусли Каспий узра шамол ўйнайди,
Қирғоғида тўда-тўда ўрдак яйрайди...
Қани йўлчи севишганлар меҳмон бўлсайди,
Тўйиб-тўйиб Шемахада виномиз иссин.
Ҳаёт сўнгсиз, умр қисқа, роҳатда кечсин!

Қилсам экан шу ҳаётни минг йил томоша,
Нур ўйнайди ўнгириларда қоялар оша...
Она-бала буғу отар югуриб, шоша,
Уя топар улкан тошнинг остидан секин.
Утлоқлар-чи! Пода ўтлар беташвиш, эркин.

Тонг отар чоғ уйқининг тарқ эт, эй шоир-сайёҳ!
Қаршиңгдадир Астраю, Ленкоран, бир боқ!
Мисрдану Ҳиндистондан бўлишиб қўноқ
Бизга келар тўда-тўда қўшлар ҳувнашиб,
Гўё жаллод панжасидан чиққандек шошиб.

Бунда лимон сарғаяди колхоз боғида,
Меваларнинг ҳосилидан дарз бутогида.
Меҳнат қилган дам олади боғ қучоғида.
Эй гўзал қиз! Қани боллаб чой дамлаб ташла,
Кекса онам кўнглини сен бир йўла хушла!

Ленкоранда гуллар асли, ҳиди бир жаҳон,
Улар гўзал, ўлкамизнинг қизларисимон.
Колхозларнинг омборида лиқ тўладир дон,
Оппоқ пахта товланади кенг далаларда,
Вино пишиб, тобга келар ертўлаларда.

Шу винодан тотиб кўргин эрта наҳорда,
Денгизларнинг қирғоғида туман борида.
Танант сезар шер кучини ихтиёрида!
Қуёш кучи содик улфат курашда, жангда,
Ҳар юмушда кўмак берар ёниб тепангда!

Жийрон отни эгарлаб мин гўзал Қозоқда,
Силаб-сийшаб бўл доимо дўст, иттифоқда.

**Ўзи сени әлтар тўғри Капезга, тоққа,
Ҳали унда совуқ ўткир, унда қиши кезар,
Шунда ташла Гўй-Гёл номли кўлга бир назар!**

Ширин қуйлар ватанисан, эй гўзал ўлкам,
Мевазордан янграб учар қўшиқлар ҳар дам.
Гўзалликнинг қучогисан, нақадар кўркам,
Куй яратмоқ ҳар юракнинг бизда фахр иши,
Ҳатто кичик кентимизда бор зўр бир бахши!

**На Насимий, на Фузулий ўлмас мутлақо!
Ўтмишимиз фахри улар умридир бақо!
Бизга туман оша ёнган юлдуздек боқар...
Ҳали кўплаб туғилади бундай кишилар
Халқим барин машъалим дер, севар, олқишилар!**

Бўғиздан куй ўғирланмас ҳеч қачон, ҳеч ҳам!
Сен қалбимсан, сен ҳаётим, сенсан насибам.
Қаршимдаги шаҳарларинг кўркамдир, кўркам.
Борлиғим-ла фарзандингман содиқ, меҳрибон,
Озарбайжон, Озарбайжон!

Г. ЛЕОНИДЗЕ
(Грузия)

ГУРЖИ СҮЗИ

1

Эҳтимол, барчанинг кўнглин олмадим,
Эҳтимол, дидига мос келолмадим,
Лек ошкор айтаман,
Гуржи шеърини
Бир лаҳза бўлса ҳам ерга урмадим!
Хизматим каттамас балки элимга,
Ва лекин асримнинг фикрин уққанман,
Шу она тилимга, туржи тилимга,
Дўст каби қалбимни мангут тикканман.
Она тил!
Шодлигу дардинг олдида
Барчаси бачкана, саёз ва бир шул!
Бу қалтис ташбеҳдан қўрқмайман, сен бил,
Дентизни дентиз деб атамоқ маъқул!
Қўшиқдан бир сўзни ситиб чиқармоқ,
Ё болта туширмоқ
Мумкинмас ахир!
Биргина сўз учун, эй содик шоир,
Шарафдир минг ўлиб, минг бор тирилмоқ!
Сен она тилингнинг навкарисан, бил,
То сўнгги нафасинг чиққунга қадар.
Пантеон бўлади фақат ушбу тил!
Ўнда бор чин ҳаёт,
Антей қудрати,
Шаънига тайёрман бўлмоқча қурбон.
У юртим таҳдири, шону шуҳрати,
Завқ-шавқи, кўз ёши, орзу ва армон!
Иккинчи қуёшсан,

Эй, она тилим!
Қуёшдек улуғлаб куйлайман ҳамон.
Гар фидо эканман амрингга, дилим,
Наҳотки йўқолсам беному нишон!

2

Юлдузлар сонича
Ерда гулчечак,
Чамандек барқ уриб ёнади бари...
Шу гуллар сингари
Гуржи сўзлари
Қалбимга ҳамиша нурлар қуяжак.
О, қандай жаранглар!
Уни қаранглар,
Висолу айрилиқ, кураш қезлари!
Май гули гар бўлса ернинг саломи,
Гуржи шеърлари—халқим каломи!

3

Ёшимни санайди баъзи бир одам,
Кексайиб қолибсан, дейди ҳайқириб.
Йўқ, тўхтанг! Мен ахир бошқа бир олам,
Эсимни ебманми ҳали дум бериб!
Қалбимда кезади баҳор нафаси,
Билмайди толиқиши, уйқу нимадир.
Ҳар йили янграйди бир баҳор саси,
Ҳар йили баҳорим сочади атири.
Яна мен дур-маржон тизаман бир-бир,
Ўзга бир жилвада ёнади сатр.
Ҳар гуржи сўзидан куч-шарбат эмгач,
Наҳотки қарисам бемаҳал, ахир!
Гар йиллар қиласа ҳам соғлиғимга қасд,
Гариб деб урмайман ерга ўзимни.
Давлатим бекиёс!
Мен қуёшараст
Ҳар тонгда тутаман унга юзимни!

4

Қалдирғоч сасини пепи қиласа-ю, ким
Қуёшдан воз кечса, келади раҳмим.
Ҳар гуржи сўзини пиширган кулол

Шу ўтда мени ҳам тоблаган ҳалол.
Сен оби ҳаётсан,
Эй, гуржи тилим,
Бир томчинг қайтадан менга берар жон.
Сен — байроқ!
На довул, на даҳшат сели
Сопинг синдирилмас ҳеч вақт, ҳеч қачон!
Эй, шеърни от каби эгарлаб олган
Истиқбол баҳорин содиқ шоири,
Ниятинг шеър кучин синашмоқ экан,
Бошингта тож қўйисин Мцхета пари!
Бас, гуржи сўзининг қўрки, жаранги
Сиз учун очаркан ойдин жамолин,
Дер экан: — Куйлангиз шараф-шон, жангни,
Шеърият қадаҳи сизники, олинг!

5

Ҳар гуржи сўзимда Антей қудрати,
Барқарор умрнинг лаззати бордир.
Ўзиму юртимнинг тақдир шуҳрати,
Халқимнинг ўй, дарди, иззати бордир.
Асрлар қаъридан замонлар оша
Ҳаётбахш олови келмоқда порлаб,
Ялнаасин яна ҳам довонлар оша,
Янги ҳис, туйгулар шон-шараф чорлаб!

1959

А. ИСААКЯН
(Арманистон)

* * *

Нафрату қасоснинг ўтли нафаси
Қалбимда очгандир битмас бир жароҳ.
Тилимдан янграмас тинч ором саси,
Бу қўшиқ газабдан туғилган ярог.

Нафрату қасоснинг ўтли нафаси,
Истайман: ҳар қалбда олсин аланга!
Эй, оч қул! Қулоқ сол келганда кези,
Сен учун бу қўшиқ,
Аталган сенга!
Сен чўлда кезасан сарсон-саргардон,
На сенда бор либос,
На бошпананг бор.
Сен дарё, тер тўкиб ёнасан ҳамон.
Кел энди, тақдирнинг зулмин пурвиқор —
Устингдан ағдару қиличинг қайра!
Ҳақиқат қиличин мен этай инъом.
Аминман қўлингдан тушмайди сира.
Парчала эскилик занжирин мудом.
Чақнасин бошингда толеъ юлдузи.
Қалбингда ўт ёқай, нафратинг қайра,
Озодлик жангига бошлийман ўзим!
Ҳақиқат қиличин мен этай инъом,
Аминман қўлингдан тушмайди сира.

1905

* * *

Мен дағн әтилдим төг қиясига,
Үстимга тортилган ҳўл, оғир тупроқ.
На таниш, на билиш олар эсига,
Ет кўмган мурдамни!

Қалбимда фироқ.

Бир маҳал туш аро келди бир нидо:
Чақирап ҳуррият жанглари сари,
Айғирлар кишинайди, куй берар садо,
Ҳилпираб байроқлар ундар илгари.
Халқ босар одимин дадил, мустаҳкам,
Қуроллар жаранги кўкни тутади.
Титратиб қабримнинг тупроғини ҳам
Оламон ва садо менга етади.
Эҳ, яна қалбимда жўш урди қоним!
Эҳ, қани қабримдан турсаму шу он
От суриб жанг қилсан яна беармон
Ва яна бўлсайдим жанг аро қурбон!

Карс, 1906

ЖУМАРАЛИ САИН
(Қозогистон)

МАСТ УЙҚУДА...

Маст уйқуда ётар эдим,

тун эди,

Илҳом менга буйруқ берди,

тур, деди.

Иргиб турдим.

Тутди илҳом қўллари,

Олиб кетди учқур фикр еллари.

Кетдим бирга,

эрким тушиб асирга...

Шошиб-пишиб кийдим кийим-бошимни

Нозли илҳом олган эди ҳушимни:

Гоҳо хира,

гоҳо равшан бир олам

Кўз олдимга келди шунда жамул-жам.

Чироқ ёқдим.

Столимга ўтиридим.

Шунда бирдан санаб туриб лол қолдим:

Ўрнида йўқ тарашланган тўрт қалам.

Олиб кетмиш тўрттовини тўрт болам.

Илҳом қочди...

туриб қолдим сокин, жим.

Эшиклар берк,

тиқ этмайди бирон ким.

Қайда экан ўша зарур тўрт қалам?

Маст уйқуда ётар, ана, тўрт болам.

Боқиб-боқиб жамолига тўймайман,

Аста юриб тақдирларин ўйлайман.

Тузатаман кўрпасини, болишин,

Кузатаман майин нафас олишин.
Қаранг киприк, қошу кўзи, юзига
Худди менинг ёшлигимнинг ўзи-я!
Шунда мени илҳом босар ногаҳон,
Бир илҳомки келажакдан бир достон.
Уйқу ичра ана бири кулади,
Балки ўйин тушларига киради?
Балки кеча карнавалда бўлгани
Эсга тушиб, қўймас тинчib олгани?
Маст уйқуда ётар, ана, тўрт дўмбоқ,
Қандай яхши юзларига термилмоқ!
Жигар-бағрим,
теран отган илдизим,
Жон тинчлигим,
ёғду сочар юлдузим!
Узоқ... яқин...
талай ўйлар ўйладим.
Не ажабким, боқиб-боқиб тўймадим!
Софиндим мен шунда бола кезимни,
Қизиқ... оғир...
хаёл эзди кўксимни...
Шунда бирдан яна илҳом келади
Езилмаган куйга юрак тўлади.
Шу куйларни жону дилдан тўқийман,
Тўрт боламнинг юзларидан ўқийман.

Бундан ортиқ қўшиқ бўлмас дунёда,
Қайси шоир куйлар бундан зиёда!
Хўш, нима бор бу дунёда тотлироқ
Тўрт юракнинг соғинишдан ортиғроқ!

МИКОИЛ МУШФИК
(Озарбайжон)

К И Й И К

Беҳосдан сакрама қоя тошларда
Тошлар оёғингни эзар, кийигим!
Кел, сени юўзларим устида тутай,
Этма ошиғингдан хазар, кийигим!

Нозланиб-нозланиб қиё бойқанда,
Маъсума кўнглимни ўтга ёққанда,
У кўз чашмасидан нурлар оққанда
Қайнар булоқларга ўхшар кийигим!

Юлдузлар ҳуснингдан айлайди сўроқ,
Бадназар кўзлардан бўл, эркам, огоҳ,
Кўксимда сайр айла, кетма кўп йироқ,
Ҳижрон тоғларини кезар кийигим!

ИОГАННЕС БАРБАРУС
(Эстония)

ЭСТОН ЮРАГИ

Душманлар талади сени неча бор,
Жонингга қасд қилиб, ёқангдан ушлаб.
Энг сўнгра фашистлар, эй азиз диёр,
Бор-йўтинг олдилар қириб, қиртишлаб.

Аммо бор сенда бир кўҳна хазина,
У яшар умрбод, ийёқолмас мангур;
У қасос чогида душман кўзига
Ўқ бўлиб қадалур, қалбига оғу.

Бу кўҳна хазина — эстон юраги,
Севишида — улкану, нафратда — даҳшат.
Боболар қони ҳам унда юради,
Буқунга бахш әтиб мадор, муҳаббат.

Бу юрак ҳамиша мағрур, улуғвор,
Жанг чоги зафарга чексиз ишончи.
У жангта киради дадил, шиддаткор
Ва ёвни ташлайди эзгилаб, янчиб.

Ҳеч кимса, ҳеч қачон енгмаган уни
Асрлаб тарихлар кечган бўлса ҳам.
Халқ топди у билан ўз иқболини,
У асло енгилмас, ҳамиша бардам.

О, юрак! Бугун ҳам ҳар қачонгидай
Мағурсан, улуғвор, шиддаткор ғолиб.
Рухсат эт шеъримга сени киритай,
Сен уни иситгин бағрингта олиб!

СТЕПАН ШЧИПАЧЕВ

УМР ВА ЎЛИМ ТҮҒРИСИДА

«Ҳаёт нима? Барчамизни ўлим кутади,—
Дейди қўшним,— бу дунёга баримиз меҳмон.
Тобутимиз қопқоғини мих беркитади,
Буни юз бор кўргандирсан ўзинг бегумон.

Болға билан бир-бир урар михнинг қалпоғин,
Шунинг билан инсон умри тамом, вассалом!
Шуидай экан, «ундай яша, бундай яша!» деб
Жар солмоғинг нега керак кундузу оқшом?»

Шундан сўнгра юzlаримга боқди ишшайиб,
Калтафаҳм, ичи қора, пасткаш ўша чол.
Ташқарида эса баҳор кумуш сеп ёйиб,
Деразадан хуш атрини сочар bemalol.

Лабларига қўйиб олиб, горнин пионер
Улуғ ҳаёт завқи шавқин куйлар баралла;
Инсон қўли юлдузлардан энди баланд дер,
Инсон орзу, интилиши тугамас сира.

Инсон умри қисқа, албат,— бунга минг афсус!
Гуллар борки, умри битар ҳатто келмай куз,
Лекин унинг қисқа умри қандай гўзал, боқ!
Инсон умри ундан эса минг бор гўзалроқ!

ШАЙХИ МАННУР
(Татаристон)

ЭДИЛ ОҚШОМИ

Эдил оқар тинч-сокин,
Сокин...
Соҳилин ўпар секин,
Секин.
Кўшиқ бошла, эй дўстим,
Дўстим!
Юраклар нурга тўлсин,
Тўлсин!

Эдил усти нимзаррин,
Заррин...
Кечки шамол шўх, сарин,
Сарин...
Сайрар теракда какку,
Какку,
Оҳ, қандай гўзал, сулув,
Сулув!

Ўйна, дўстгинам, яйраб,
Яйраб...
Эшкак сурай мен куйлаб,
Куйлаб...
Кўнглим сенда, дилдора,
Дилдора!
Мафтунингман, нечора,
Нечора!

Әдил оқар тинч, ҳорғин,
Тинч, ҳорғин.
Айланайлик юр, тағин,
Юр, тағин!
Қандай роҳат, жонгинам,
Жонгинам,
Бахтга тўлиқ бу олам,
Бу олам!

МАРО МАРКАРЯН
(*Арманистон*)

ТОШ

Қоядан боқарсан савлатинг тўкиб,
Ўт-олов яшириб метин қалбингга.
Азамат ва мағрур қанотин силкиб
Бургутлар қўнади сенинг кафтинга.

Оёғинг тубини бахмалдай лола,
Минг турли чечаклар ёз бўйи безар.
Бу ердан ким ўтса албат бир йўла
Ажойиб қаддинга ташлайди назар.

Лекин сен гўзалсан дара ичра ҳам,
Ёнингда шилдираб оқади ирмоқ;
Гўё у шивирлаб сени бир олам —
Муҳаббат сиридан қиласди огоҳ.

Ким сени жонсиз деб, атаса хато,
Йўқ, сенинг кўксингда ажиб ҳаёт бор:
Бинокор деворга қўйгандан қатор
Қанчалик гўзалсан ва итоаткор!

Наққошнинг санъати, қалби, меҳнати
Кўксингда мўъжиза яратган замон,
Инсоннинг юраги, соф муҳаббати
Ҳуснингда юз йиллар порлар беармон!

Ва лекин кишининг қалби бўлса тош,
Нақадар хунукдир, нақадар даҳшат!
На унда ҳаёт бор, на безар наққош,
Совуқдир, тилсиздир, ваҳшатдир, ваҳшат!

* * *

Сен дейсан: — Энди кеч, умр ҳам ўтди,
Минг орзу-ҳаваснинг ҳаммаси бекор!
...Қўлларинг китобни аста беркитди,
Кўзларинг бетига боқмасдан бир бор.

Не деяй! Сўзларииг тўғридир балким,
Тортишиб суҳбатга ким ҳам тўйибди.
Лекин айт: «Бу ёшда баҳт топар ҳар ким!»
Деб қайси китобда ёзиб қўйибди!

АВДУЛЛА ТОЖИБОЕВ
(Қозогистон)

ОЛТМИШ ЁШИМ ШЕЪРЛАРИ

* * *

Қоратов бошини босди опшоқ қор,
Босди-ю, ярқираб қолди у мангу.
Ям-яшил қирларни тарқ этди виқор,
Сап-сариқ япроқлар тўкилар дув-дув.

Қоп-қора сочимни босди опшоқ қор,
Босди-ю, йилтиллаб қолди умрбод.
Қип-қизил юзимда энди ўзга ҳол,
Ён-атроф олису ўзгача ҳаёт.

Биламан, қайтадан барқ ураг офтоб,
Биламан, қайтадан қизийди тупроқ.
Майсалар гуркираб ниш ураг шитоб,
Қайтадан яшарар ям-яшил япроқ.

Ва лекин қайтмайди менинг баҳорим,
Чарақлаб ёнмайди кўзим, нигоҳим.
Кўксимда ўйқ менинг оҳ ила зорим,
Ҳали ҳам бекиёс ҳаётим, боғим!

* * *

Шу оддий гавдамни баъзи-баъзида
Денгизу тоғлардан вазмин кўрганман.
Белларим қайишмай элнинг кўзида,
Билмадим, қандайин олиб юрганман?

Шу оддий гавдамни ўзимча баъзан
Титилган тивитдай енгил сезганман.
Билмадим, шамолда тўзиб кетмасдан
Эл аро қандайин омон кезганман?

* * *

Бировга дўқ уриб, зўрлик қилмадим,
Бировга бош эгиб, хўрлик кўрмадим.
Бировни тенг кўриб, фарёд урмадим,
Бировни камситиб, кулиб юрмадим.

Бу ҳоллар мен учун бегона!

Чидаб, жим турмадим кўрганда нуқсон,
Тиланиб олмадим обрў, шараф-шон,
Қийналсан қилмадим нолаю фифон,
Довдираф қолмадим қучса баҳт, эҳсон.
Яшадим ҳалол ва мардана.

Бировлар гоҳ мени аврамоқ бўлди,
Гоҳ кулиб, гоҳ алдаб товламоқ бўлди,
Ишлари туну кун жаврамоқ бўлди,
Бахтимни ғаш кўриб овламоқ бўлди,
Шунда ҳам эркимни бермадим.

Кўрдим мени умримнинг олтмиш баҳорин,
Биламан ҳаётнинг сиру асрорин:
Кимларга айтишни юракда борин,
Кимларнинг тинглашни оҳ ила зорин!
Бекорга олтмишга кирмадим.

ТҮРТИКЛАР

Мен она юрт тоғларининг бир тошиман,
Нурга тўлган бօғ-роғининг тенгдошиман.
Шивиrlаган япроғининг сирдошиман,
Шилдираган булоғининг мунгдошиман.

Майли, музлат иссиқ қонимни,
Қимир этмай қотай ёнингда.
Майли, ўтда ёндири жонимни,
Бир кафт кулдай ётай ёнингда!

Тилинг ханжар, фикринг қалқон бўлса ҳам,
Бошинг узра баҳтинг қуши қўнса ҳам,
Ғарибдирсан, бир ниғоринг бўлмаса,
Ғарибдирсан, дўсту ёринг бўлмаса!

Ариқ оқар суви тингунча,
Қилич чопар бели сингунча,
Чироқ ёнар пилик сўнгунча,
Мард курашар токи ўлгунча!

ПЛАТОН ВОРОНЬКО
(Украина)

* * *

Боққа тушди бомба гумбурлаб,
На гул қолди, на ўт, на дарахт.
Солдат қайтди урушдан терлаб,
Кўзларида ёниб нур ва баҳт.
Текислади бомба горини,
Парчаларин йиғди бир четга.
Тўнкаларни кавлаб, ўрнини —
Тайёрлади олма кўчатга.
Яна қайта яшнади гул, боғ,
Яна саличин дарахтлар бағри.
Яна тонгдан булбул вақти чоғ,
Кишиларнинг очилди баҳри.
Қўлларида даста-даста гул,
Дилларида қолмади армон.
Она тупроқ яшайди мангу
Тирик экан соҳиби даврон!

* * *

Емғир ёғиб, оғриди ярам,
Лекин, майли, қўйсин беармон.
Нурга тўлур буғдойзор далам,
Кетдик. Керак эмас соябон.
Майли, сувга ботсин оёғим,
Майли, санчиб, оғрисин ярам.
Фронтларда, билсанг, чирогим,
Кунлар бўлган бундан баттар ҳам:
Қон кечганмиз қўйнжни тўлдириб,
Уссин, деб тинч ҳосил баріқ уриб!

НАВИ ҲАЗРИЙ
(*Озарбайжон*)

БҮЛИШ

Дунёни бўлайлик, кел, ёр, иккимиз:
Дала сенга тушсин,
Тоғ менга қолсин.
Қолсин ер юзида қўша изимиз,
Қора менга тушсин,
Оқ сенга қолсин.

Ийларни қувлайлик ёзу куз каби,
Фасллар ёнма-ён ўтсин амрингга.
Бир ерда эканмиз қошу кўз каби,
Кўзлар сенга бўлсин,
Кўз ёши менга.

Кундузу кечани азиз сақлайлик,
Қуёш сенга бўлсин,
Ой менга қолсин.
Ўйноқи тошқиндан бирга оқайлик,
Денгиз сенга бўлсин,
Сой менга қолсин.

Иккимиз дунёга шерик баробар,
Бизсиз на қиши кулар
Ва наки баҳор.
Ҳаётда ҳар нарса бўлинса ҳам гар
Лекин бўлиб бўлмас
Бир севгимиз бор!

ПИМЕН ПАНЧЕНКО
(Белоруссия)

* * *

(Эрон шеърларидан)

Азизим, турналар қур-қурига боқ,
Биз ўсгали юртларга учиб боради.
Аарат устидаи, ана, ошароқ
Шимолга галалаб кўчиб боради.

Сен уни ҳар маҳал она юртингда
Тонг билан илк баҳор қарши олардинг.
Бу ерда ортидаи боқиб турдинг-да,
Қалбларинг зирқираб, оғир тин олдинг.

Уйингдан йироқсан, кўз етмас йироқ,
Ҳайқирмоқ истайсан юрак бўшатиб.
Турналар учади солиб аргимчоқ
Эзилган кўнглинига яна теш отиб.

Ориқада қолдилар Казбегу Эльбрус,
Юрагим сиқилар, кўзим йўлида.
Қаршилаб олади юртим Белорусъ,
Багрини кенг очиб илиқ кўлида.

Ҳеч маҳал юрагим ёнмаган шундай,
Ҳеч маҳал уларга рашқ қилмагандим.
Шу маҳал бўлдиму нақ йиғлагудай,
Улардан кўз олиб, ерга боқдим жим!

ТАНЭИЛА ЗУМАҚУЛОВА
(*Балқар шоираси*)

ЛИРИКА

* * *

Емгир ёғиб, ерга сингиб кетади,
Токи мендан илдиз баҳра олсин деб.
Буғдорой ўзин унта қурбон этади,
Оч-юпундан ажал йироқ бўлсин деб.

Яшнаб турган дов-даражтлар кесилиб,
Үтин бўлар майда-майда ва мақсад:
Ўзи ёниб, адо бўлиб ва тўзиб
Хоналарга баҳш этмоқлик ҳарорат.

Ўзгаларнинг кўз ёшини тиндиromoқ,
Ё дардига бўлмоқ истасанг малҳам,
Артист бўлиб ўйнамасдан, эй, шоир,
Аччиқ-аччиқ кўз ёши тўк ўзинг ҳам,
Юрагингни эзсин оғир дард-алам!

* * *

Қор бунчалик бўлмасди оппоқ
Боши узра гар тутмаса тоғ.

Тоғлар бунча сочмасди виқор
Ер кўксисда тутмаса бедор.
Ер айланмас, бўлмасди кўркам,
Елкасида тутмаса одам!

* * *

Сўз қадрини билмаган одам
Уни сочар бекорга ҳар дам.

Айтилган сўз қадрини ёлғиз
Ақли расо одам билади.
Шунинг учун у айтган ҳар сўз
Узидан сўнг янграб қолади.

* * *

Ҳеч путур етмайди музга совуқдан,
Иссикдан у эриб, ҳалок бўлади.
Номусу ақлга ўлим йўқ ўқдан,
Лекин у мақтодан заарар кўради,
Сохта шон-шарафдан побуд бўлади.

ОТА ОТАЖОН
(Туркменистан)

НИҲОЛ

Навбаҳорда ўтқаздим ниҳол,
Уч йил ундан узмадим кўзим.
Кўринг энди, қандай гўзал ҳол:
Оппоқ гулга ўрабди ўзин.

Лабларига қўйиб лабини
Асал сўрар ундан болари.
Қитиқлайди киши қалбини
Ҳавас билан боққанинг сари!

Меҳнатимнинг самараси бу,
Севинчларим бир олам-жаҳон!
Боларилар учади ғув-ғув.
Оппоқ гулга қўнади ҳамон.

Эҳ, заҳматкаш, яйра, уч, майли,
Майли, асал тўила уянгта.
Бари ўша ниҳол туфайли,
Шунинг ўзи зўр баҳтдир менга!

ЮРАГИМ БИЛАН СУҲБАТ

Нега сен, юрагим, ором билмайсан?
Ҳамиша бир ёққа ундан турасан.
Орзудан, ўйлашдан бир дам тинмайсан,
Нега сен батъизда хаёл сурасан?

Наҳотки, кенг кўксим сенга тор бўлса?
Наҳотки, букилди бардошинг тизи?
Наҳотки, ташвишга умриинг зор бўлса,
Жавоб бер, азизим, нима гап ўзи?

Таънали боқиш-ла сўзлади юрак:
— Бу ором мен учун нимага керак!
Оҳ, қани, қирларда жавлон урсайдим,
Уфқлар ошароқ кезиб юрсайдим!

Юр, сен ҳам, кенгликлар, сафар чорлайди,
Бас, етар, бир ерда муқим ўтирмоқ.
Йўқ, десанг, мен ўзим кетаман, майли,
Майли, сен қол бунда. ўртоқ!

ДАВИД КУГУЛЬТИНОВ
(Ҳалмоқ шоури)

УЧ ЛАВҲА

1

Зулму зулмат ҳаддан ошди бекиёс,
Амри фармон берди бир кун Чингизхон:
То ёнаркан кўқда кундуз бу қуёш,
Кулиб юрсин ҳар фуқаром шод-хандон!
Кимкий йиглаб, қиласар экан шикоят,
Жаллод олар унинг бошин бешафқат!

Куни билан кулиб юрди вилоят,
Мамнун эди ўз кашфидан Чингизхон,
Гўё юртда яратди у бир жанишат!..
Аммо ёниб юрагида дард-армон,
Фуқаролар кеч кириши чоғларди,
Кеч кирдими, ҳўнграб-ҳўнграб йигларди!

2

Сабабу сабабсиз бир ночор одам
Бир куни қуёшдан ўкиниб қолди.
Юзини тескари ўгириб олди,
Ичини тирнарди ногиҳоний гам.
Ҳасрату аламда умри ўтарди,
Қуёшнинг ўч олиш кунин кутарди.
Гар қуёш бу ишдан бўлса ҳам воқиф,
Ҳаммадек унга ҳам меҳрла боқиб,
Нурини бир лаҳза дариг тутмади.
Иситди эркалаб — четлаб ўтмади.
Қўрқарди: айбим-ла бегуноҳ одам
Бекорга чекмасин азият, алам!

Эй, дўстларим, баъзан мабодо
Қаттиқ сўзлаб ранжитган бўлсам,
Шум ииятда қилмадим асло.
Бу шундайин... ичаман қасам.
Баъзан менда шундайин гуноҳ
Содир бўлиб қолади ногоҳ.

Сизлар учун, бўлинг деб омон,
Довул кечдим, жангда тўқдим қон.
Бизнинг дўстлик синалган, маҳкам,
Бизнинг дўстлик елисни кўзлар...
Биронтангиз ранжитган бўлсам
Маъзур туting, эй, азиз дўстлар!

СУАН ЗЬЕУ
(Вьетнам)

ҚАЛБИНГДА БОРИНИНГ ҲАММАСИНИ АЙТ!

Юракдан ўртаниб севмоқлик — бу кам!
Кошкийди севгинг-ла кўнглим қондирсанг!
Кошкийди бир маҳал «севдим!» — деб айтган
Сўзингни ҳамиша тақрорлаб турсанг!

Юракдан ўртаниб севмоқлик — бу кам!
Севгини сақласанг қалбингда жим, тек
Ва орзу-ўйларинг кўрмасанг баҳам,
Чиройинг совуқдир демак, олмосдек!

Бугунги ҳақиқат эрта эҳтимол
Йўқотиб қўймеги мумкин кучини.
Лекин ишқ ҳамиша нағзирион, ниҳол,
Ҳамиша ишқ ўтар юрак бурчини!
Юракдан астойдил севмоқлик — бу кам!

Минг боро синовдан ўтказмоқ керак,
То бўлсин бу севги мангу беармон.
Боғида яйрасин қушу-капалак,
Кўнгилда қолмасин на сир, на гумон!

Кўнгилни тил эмас, кўзларинг айтсин,
Имо-ю ишоранг, қопларинг айтсин,
Кулгидан яшиаган юзларинг айтсин,
Кўксимга қўйилган бошларинг айтсин!

Лекин сен мудраган кўлдек сокин, жим,
Барига бефариқдек қарама ҳеч ҳам.
Наҳотки севгингда ёнган кишининг
Тақдиди сен учун барибир, эркам!

Юракдан астойдил севмоқлик — бу кам!

ЭИСАКУ ЕНЭДА
(Япония)

ОЛТИНЧИ АВГУСТ ҚУМИ

Қўрқаман шу қумга оёқ босмоқдан,
Гўё бу тирик жон ҳужайрасидир.
Қаранг-а, тириқдек кўчиб бир ёқдан,
Бир ёқса шивирлаб сўзлаб, кезадир...
Қаранг-а, ҳар қайси,
Ҳар бир донаси
Тинимсиз қўзгалиб,
Учид юради.
Қаранг-а, ҳар қайси,
Ҳар бир донаси
Йилтиллаб шуълалар сочиб туроди.
Ҳар қайси,
Ҳар бири яна бирлашиб,
Бир бутун вужуддек соя ташлайди,
Оҳ, шунда яна ҳам ёна бошлайди!
Қаранг-а, қўнғироқ янграган замон
Оёқса туради бари оҳиста.
Эшитган бўламан уларнинг аста
Инграган ноласин хаёлда шу он...

Қўрқаман шу қумга оёқ босмоқдан...
Оёғим остида қонга белангган,
Тириклар шаънига бир ибрат бўлган
Қумларнинг миқдори бесаноқ, тенгсиз,
Уларнинг ҳаёти мангу ва сўнгсиз!
Ҳа, шулар эмасми
Ернинг суюги,
Атомга айланган у уқаланиб?

Ҳар бири — қон юқи ернинг суюги,
Ҳа, шулар эмасми?
Бўлмайди таниб!
Қаранг-а, ҳар қайси,
Ҳар бир донасин
Нафаси димоқни нақ қуидиради!
Ҳар бири аланга учқуни каби
Чирсиллаб, йилтиллаб учиб туради.
Гўёки ҳар бири жон пайдо қилиб,
Бир куни оёққа туриб кетгудек.
Қаранг-а, бир-бирин қуchoқлаб олиб,
Бир дуо, орзу-ла юриб кетгудек.

Бу томон,
Бу атроф билар яхшироқ:
Қумларнинг тинчлигин ҳеч ким бузмайди!
Уларнинг ҳар бири ҳаётга муштоқ,
Аввалдек яшаш-у, ишни кўзлади.
Уларнинг ҳар бири олов қўзини
Осмонга тиксанча нажот излайди!

Қўрқаман шу қумга оёқ босмоқдан,
Ҳар бири тирик жон ҳужайрасидир.
Қаранг-а, тириқдек кўчиб бир ёқдан,
Бир ёққа шивирлаб, сўзлаб кезадир!..

САДАКО КУРИХАРА
(Япония)

УРУШ ИНВАЛИДЛАРИ

Йўл узра ўтирас бир неча одам,
Устида оқ халат,
Қўлсиз, оёқсиз.
Бўш енгин ел ўйнар,
Ўзи бир ҳолат,
Кўзлари боқади нурсиз-чироқсиз:
«Садақа қилингиз...»
«Лаънати уруш...»
Мабодо тиляниш сўзига ногоҳ
Илашиб қолдими коммунистик рух,
Йўловчи юзини терс буриб шу чоқ,
Назидан ўтади,
Гўёки улар
Юртига содикдир...
Аслида мажхурҳ!

Шу учун бечора бу инвалидлар
Кўлида йиглоқи садаф соз¹ билан,
Юракни ўртовчи муғ оғоз билан
Йўлларда тўпланиб,
Гоҳо маст-аласт,
Яраси зирқираб,
Сиёсатданмас,
Бевафо севгидан куйлашар фақат.
Император солдатин шудир қисмати!

¹ Аккордеон кўзда тутилади.

Бу гаріб кишилар муздек тошларга
Енишиб қолғандек құтмир этишмас...
Кесилган құл-оёқ,
Яра түшларда
Изғирин зарбидан туарар зирқироқ.
Уларнинг ёнидан резина шимиб,
Құлтиқлаб чиройли япон қизини,
Кайғидан қоқилиб-тутиб ўзини,
Бойвачча босқинчи — «Жиай»¹ ўтади.
Қиз эса елкасин қисиб, қаҳқаҳлаб,
Инглиз тилида сўз ҳам қотади...
«Эҳ, ифлос! — кетидан туфлар инвалид,—
Афсус, фронтта ҳам совға-ю салом
Юборган шу каби ўлимтик, палид!»
Император солдатин шудир қисмати!

Йўл узра ўтирад бир беча одам
Қўлсиз, оёқсиз...

¹ «Жиай» — АҚШ солдатининг номи.

ХАДЗИМЕ САТО
(Япония)

ҲАЁТ ЙЎЛИ

Тик кетган узун йўлак,
Чироқлар бедор.
Кўримсиз эшиклар тизилмиш қатор.
Йигирма иккинчи камерадир бу,
Үгрининг кўнглидек эшиги қора.
Мен бунга ташланган бир жинояткор.
Бир сотқин судъянинг ҳатто ҳукми бор!
Ажалим эшикда,
Кутиб туради.
Эрталаб жалладим олиб киради.
У мени дўстлардан жудо қиласди.
Баҳорим юлдузин кўқдан юлади.
Алвидо, қоядан оқиқан ирмоқлар,
Алвидо, соғ ҳаво,
Шифоли тоғлар!
Оғирдир сизлардан мангу айрилмоқ!
Қанчалик бу оғир бўлмасин, бироқ
Мен таслим бўлмайман,
Кутмайман шафқат.
Ҳаётим йўлидир курашмоқ фақат.
Тинчлик ва эрк учун бўлса гар керак,
Ҳамиша фидодир
Бу жон, бу юрак!

ИБРОҲИМ ЮСУПОВ
(Қорақалпогистон)

БУЛУТЛАР ТУНАГАН

Булутлар тунаган юксак тоғларнинг
Юзини қоплаган тумани бўлар.
Севгили кўзига қум сочган ёрининг
Кўнглида кудури, гумони бўлар.

Хар гулга бир қўймоқ булбулнинг кори,
Вафосиз бўлмоқлик нафснинг бозори.
Сел бўлиб айқирса тоғларнинг қори,
Йўлида сойларнинг тўғони бўлар.

Мұҳаббат Қримнинг ол гули эмас,
Қызларнинг ипакдек кокили эмас,
Йигитлик чоғининг шўх ели эмас,
Севгининг мангулик замони бўлар.

Жонини севгига фидо қилмаган,
Мард бўлиб, бурчини адo қилмаган,
Ёрини ардоқлаб сева билмаган
Хар йигит одамнинг ёмони бўлар!

Тоғларда чечак кўп ранг-баранг, кўркам,
Ҳаммасин бирма-бир терар қай одам!
Бизларга баҳт берган бу гўзал олам
Мусаффо севгининг замони бўлар.

1954, Кавказ

МУСА ФАЛИ
(Вашкирдистон)

УЛУФЕК

Чинорлар кўлкаси — кўчалар бўйлаб
Уззу кун айланиб юрдим мамнун, шод.
Ҳар босган одимим тариҳдан сўйлаб,
Самарқанд турарди қошимда кушод.

...Ўтмишни эслатиб юргандек дайдиб
Қадимий масжитга кечки ел кирди.
Ол шафақ яллиғи гумбаздан ўтиб
Кўхна бир нур каби ерга юз урди.

Чўнг Шоҳи-Зиндани кезганим замон
Фикримни чулғади ҳужра, йўлаги;
Кўзларим олдида бўлди намоён
Ў қора ўтмишнинг кичик бўлаги!

Атрофда яшнайди янги бир олам!
Бу пастак ҳужралар, кўримсиз дўкон
Гуноҳин кўлидан қадди бўлиб хам,
Гўёки ер узра чўккан бедармон!

Боқ, ана, қуёшга интилиб бир қуш
Пастликдан кўкларга отилди мағрур.
У кўм-кўк самога айтиб минг олқиши
Кўкларга чорлади инсонни масрур.

Аввал ҳам осмонга учгандир қушлар,
Ва лекин кетидан кўкка боқсан ким?
У маҳал жанг-жадал ва қон тўкишлар,
Бу маъсум тупроққа бўлганди ҳоким!

**Мардона Улутбек баридан кечиб,
Юлдузли осмонга тикди кўзини.
Юлдузлар сирини бирма-бир очиб,
Етти қат осмонда сезди ўзини!**

**Минг йиллар йўл босиб юлдузлар нури
Бу она тупроқقا етиб келгандек,
Асрларни ҳатлаган сиймонинг бири —
Башарий мунахжим Мирзо Улугбек.**

**Жийронлар кишнаши, бурғу ниноси,
Қалбига солса ҳам ҳаяжон, олов,
Юлдузлар оламин бўлиб фидоси,
Илмга йўл очди дадил, беаёв.**

**У ерда яшади осмонга чорлаб,
У яхши биларди осмон тилларин.
Эҳтимол шундандир юлдузни чоғлаб,
Осмонга учиши ер ўғилларин!**

ВАДИМ СИКОРСКИЙ

* * *

Ёдимда Тошкентнинг тиниқ осмони,
Осмонмас, ранго-ранг барча томони.

Ху, ана, минора — осмонга соқчи,
Қуёшни учи-ла илиб олмоқчи.

Қовунлар уюлган, хилма-хил ранги,
Бетида қирларнинг уҳфадек чанги.

Ариқда оқади кумуш ранг сувлар,
Сув эмас, ўйноқи кўзли оҳулар.

Үстидан самолёт ўтса ногихон,
Сояси тушади унга шу замон.

Осиё тонг билан ювди юзини,
Яшарив, навқирон кўрди ўзини!

МУНДАРИЖА

*M. Қўшжонов. Ижодий етуклик** 3

ШЕЪРЛАР

Шеърим ҳақида ўйлар	13
Ният	15
Қадаҳ	17
Кичик саргузашт	20
Таъна қилма	23
Ўрмондаги уй	24
Икки шеър	27
Йиглаётган қизга	27
Кулайтган қизга	27
Севги қаримас	28
Ёрнинг саволи	29
Мен ўлмаймач!	30
Мажнунтол	31
Гиёҳ	33
Дўстлик тарихи	34
Куй	35
Севиб қолсанг	36
Умр йўлдошимга	37
Мен йўлга чиқаман	38
О, она	39
Қорақумда	40
Ғамхўрлик	41
Ҳеч әсимда йўқ	42
Гул узмоқчи бўлсам	43
Оқ ўрик	44
Лола терган қиз	45
Сен таъна қиласан	46
Саҳро чечагининг армони	47

Қалбимни қайтар ўзимга	48
Үйинчи қиз	49
Сен қуёш бўлсанг	50
Қулупнай	51
Сени севдим	58
Чинор	55
Қўшини қиз	57
Ёр кетиб	58
Қайларда юрибсан, дўстим!	59
Садақайрагоч	61
Мевали дараҳт	62
Гомерни ўқиб	63
Бетон	64
Шоир орзуси	65
Кел, жоним, бўстонимга!	66
Софинганда	67
Ихтиёrim қўлингда	68
Юрагимнинг кўзи бор	69
Гулнинг изоҳи	70
Қўшнимнинг мушугига	71
Мен энди иқрорман	72
Йигитим азамат деб	73
Бироқ	74
Севгимга ишонсанг бас!	75
Иккимиз кезардик	76
Илк севгининг яраси	77
Ёр-ёр	78
Майли, бахтиёр бўл!	79
Шеърлар китобим ҳақида	80
Яшасин тинчлик, инсон ва кўклам!	81
Дўстимга деганим	83
Бу — ўша таниш ер	84
Дарёга ярашар ҳайқириб оқмоқ	86
Қаршимиздан сой чиққанда	87
Сопол товоқ	88
Сенга	89
Ешлик мадҳияси	90
Кеч кирди	92
Дўстимга жавоб	93
Қора кўзойнакли қизга	94
Ариққа боқиб	95
Дўстим кўплигидан ҳеч ажабланма	96
Мўъжиза	97

Сенинг байротинг	100
Сен баъзан	102
Ишқингда ёниб	103
Ўзим, онам ва шогирдларим ҳақида	104
Севгинг кўзингда	106
Ёшлик билан хайрлашув	107
Айвазовский фонтани	108
Қрим оқпоми	109
Кўктебел	111
Яхши қол, қора денгиз!	113
Шамол	115
Энди сен йиглайсан	116
Она ташвиши	118
Үғирланган юрак	121
Сөвги изтироби	123
Садоғат	124
Эшигинг тубида	125
Хат	126
Ҳали ҳам ўшасан	127
Кет дема!	128
Бешафқат тақдир	129
Сени эслатди	130
Шоир онти	131
Таъна тошлари	132
Шоир-машина ҳақида	133
«Еир шеър бағиша менга ҳам»	134
Шоирнинг ўлими	135
Шеър ҳақида	137
Диалог	138
Ииқилма!	139
Полвон	140
Замондошим монологи	141
То тирик экансан	143
Одам ва тупроқ	144
Октябрь шаънига	145
Хотин-қизлар мадхияси	148
Болалиқдан келдим	150
Эртанинг илинжи	151
Ҳақиқат йўлдадир	153
Бу сўқмоқ меники	154
Юлдузлар	155
Сөвги	156
Эшикка чоп	158

Бир даста гул билан қошингга чиқсам	159
Ҳидсиз гул	160
Сени излаб	161
Мўъжиза	162
Ҳақ сўз	163
Гугурт чўпи	164
Саждагоҳ	165
Зарра	166
Унутмадингми?	168
Қора кўзлар	170
Кўклам	171
Сен куласан	173
Қалбим мамнун уради	174
Самбит гул	175
Она тилим	176
Аниқлик	177
Эскидир олам	178
Вафосиз	179
Расм	180
Тош уй	181
Холис ниятим	182
Қалбининг боқ	185
Кулиб қувонтирип	186
Шайдо	187
Ҳар гулнинг ўз эгаси бор	188
Көл!	189
Одам бўлсанг	190
Севги йигиси	191
Чўққидаги ҳор	192
Қўёшни қувиб	193
Саъва	194
Тобут кетида	195
Минг кўзим бўлса	197
Золим севги	198
Сенинг мадҳинг*	200
Илҳомни кутмадим*	202
Кунлар — отилган ўқ*	203
Үйларим*	204
Сайёҳ меҳмон*	205
Нозли жонон*	208
Диалог*	209
Ижодкор*	210
Чўққилар*	212

Етилиш*	213
Ғунча*	214
Якун*	215
Дейдилар*	217
Шудринг*	218
Қиз қомати*	219
Сен ерсан, мен омоч, бағрингни ёриб*	220
Чүкү ва бургут*	221
Қайғудан түқилған күз ёши қора*	222
Она*	223
Армон*	224
Ишчи шарафига*	226
Каптар*	227
Оразу*	229
Бахтнинг ранги*	230
Қаймоқ*	230
Одамни ардоқланг*	232
Болалик*	233
Болтиқ соҳилида*	234
Тұғылғанман ёмон йүлиға*	235
Гар чанқасанғ гул барғида сув тутиб*	236
Қайғу ва шодлик*	237
Турна ўтар*	238
Трептов паркида*	239
Гуноқимдан ұтибсан...*	240
Афсона*	241
Дунё сири*	243
Юлдуз нурлари*	244
Бардош*	245
Ёлғизлик ҳақида*	246
Танбур сирлари*	248
Қаршымдаги тоққа*	250
Бедана*	251
Севгидан құрқардим*	253
Яна болалик ҳақида*	254
Севгининг талаби*	255
Дунёнинг күрки шунда...*	256
Ҳар одамнинг онгода құбш бордир...*	257
Наздимда*	258
Фақат мен әсингтта солдим*	259
Қани юр, азизим!*	260
Майли, хайр...*	261
Дарё бўлсанг...*	262

Ташвиш бўлмасин элда*	263
Ўзингдан ўзгани қилмасман ҳавас*	264
Чўққида муз кўриб...*	265
Аччиқ сўз*	266
Дарё ўзани*	267
Тонг манзараси*	268
Унутиш*	270
Ташвишли дунё...*	272
Қўёш оламда битта*	273
Кўл*	274
Кўмир қораси*	275
Сен таклиф қилмадинг*	276
Хотира чироги*	277
Ер ҳақида*	278
Кечиккан севги*	279
Оқ тонглар ҳаққи...*	281
Бахт ва баҳтсизлик*	282
Дон*	283
Бахт калити*	284
Инсонлигинг улуг...*	285
Ғафлатда қолма*	286
Мен дарё әмасман, ариқман*	287

ТУРКУМЛАР

«Жангчи блокноти»дан

Сенинг альбомигга	288
Гул . . . : . . .	288
Кўчат : . . .	289
Украин қизига	289
Қиличимни ол	289
Жангчи қабри	290
Поляк қизига	290
Мен тирик!	290
Илтимос	292
Умид узмадим	292
Жўғрофия ўқитувчимга	292
Энди билсан	293
Балки. . . .	293

Кавказ дафтары

Вальдага шошгандек..	294
Шаумян җайкали қаршисида.	295
Боку	297
Самад Бургунга	300
Жим туринг, ҳой еллар..	301
Отеллодек севолсам әдим...	302
Армани раққосаси	303
Тоққа чиқдим...	304
Кошки яна адашсам...	305
Эсадалик ханжар	306
Мұхаббат хиёбони	307
Тбилиси	308
Кура	310
Казбек	311
Тамара қалъаси.	312
Қиз җайкали	313
Хотира чашмаси	314
Арман куйи	315
Шалола қаршисида	316
Чу, саман йўргам.	317
Кавказ гўзали	319
Денгиз йўли	321
Тоғ бошида ёнарди лола	322
Бургут	323
Кўҳна қалъа	324
Чуст дўлпи	326
Кавказ баҳори	327
Сувингдан бир ҳўплаб кўрганми шоир	328
Билолмадим	329
Тоғларга боқиб...	330
Арагва қирғогида	331
Сенинг альбомингга	332
Яхши қолинг	333
Хотима	335

Мунай сөхиллари

Инамадир демеңчи бўлгандинг...	336
Ихни қел, она-ер!	337
Ирага	339
Чех қизига	341

Танк № 23	342
Бир сиқим тупроқ	344
Чех шишаси	346
Фучик	347
Номаълум солдат қабри	349
Ян Жижка қиличи	351
Дунайда тонг кутдим	352
Гуллар	353
Вена оқшоми	354
Хоин	355
Йўқолган қабр	357
Венанинг хайрлашуви	359
Мажор қизига деганим.	360
Будапешт ҳақида ўнта рубоий	361
Тангам йўғини қаёқдан билдинг?	363
Дунай қизи	364
Балиқ ови	365
Дарёга илтимос	367
Гуллар водийси	368
Сафардошим билан суҳбат	369
Ватаинга қайтиш	370
Софинганда	372

Одамлар ва обидалар

Турист	373
Гильза	374
Бухоро гўзали	376
Бухоро оқшоми	377
Ўлим минораси	378
Зарафшон	379
Янтоқ	381

Тўртликлар

ҲАЖВЛАР

Ношукур одам*	434
Бир савлатга*.	436
Эй, азоби жон!*	437
Ит*.	440

Ҳазил*	441
Қурбақа*	442
Хира пашша*	443
Устомон одам*	444
Стол — одам*	445
Чивин*	446
Соя ва ит*	447
Ҳасад*	448
Шоҳ асар»	450
Бўри эди, тулки бўлди...*	451
Қор ёққан кун*	452
Навбатма-навбат*	453
Тулки ва қуён*	454
Қогоз*	455

БОЛАЛАРГА

Бобонг йўли	456
Эркин чироқ ёқади	457
Бувижоним.	459
Аъло ўқи!	460
Онажоним, онажон!	462
Булутнинг армони	463
Валининг саволлари	465
Қушлар	467
Саёҳат қил, саёҳат	469
Узун соч	471
Бизнинг кўча	472
Қуёш, ўз жойингга чиқ!	474
Аҳмад савлат	475
Қалдирғоч	476
Қаламнинг ўқинчи	478
Қандим қани?	479
Ариқ	480
Перо ва Адҳам	482
Қалампир	483
Ёмғир	484
Үчирғич	485
Гўра	486

ТАРЖИМАЛАР

А. С. Пушкин

Хаёт сени алдаса агар	487
Чол	487
Ұзим ҳақимда	488
<i>Н. А. Некрасов</i>	
Йилдан-йилга тарк әтмоқда күч-құдрат,.	489
Нақадар дим! Чексиз узундир	489
<i>Г. Гейне</i>	
Майли, ерлар қорға күмисин,.	490
Гүзәл гул ошиғи дайди капалак	490
<i>М. Ю. Лермонтов</i>	
Йиглама, йиглама, йиглама, болам	491
<i>Р. Тагор</i>	
Она нидоси	492
<i>А. Мицкевич</i>	
М. га.	494
<i>Абдулла Тұқай</i>	
Бүрон	496
<i>Илья Чавчавадзе</i>	
Баҳор	497
<i>Воқиғ</i>	
Ғазаллар	498
<i>Леся Українка</i>	
Менинг йўлим	501
<i>А. А. Фет</i>	
Куз нақадар совуқ ва қургоқ	503
<i>В. В. Маяковский</i>	
Лекинчилар	504
<i>Хо Ши Мин</i>	
Элликка етмасдан баъзи бир одам	508
<i>Самад Вургун</i>	
Озарбайжон	509
<i>Г. Леонидзе</i>	
Гуржи сўзи	512
<i>А. Исаакян</i>	
Нафрату қасоснинг ўтли нафаси	515
<i>Жумагали Саин</i>	
Маст уйқуда	517
<i>Микоил Мушфик</i>	
Кийик	519

<i>Иоганнес Барбарус</i>	520
Эстон юраги	520
<i>Степан Шипачев</i>	521
Умр ва ўлим тўғрисида	521
<i>Шайхи Маннур</i>	522
Эдил оқшоми	522
<i>Маро Маркарян</i>	524
Топи	524
<i>Абдулла Тожибоев</i>	526
Олтмин ёшим шеърлари	526
Шу оддий гавдамни баъзи-баъзизда	526
<i>Платон Воронько</i>	529
Боққа тушди бомба гумбурлаб	529
Ёмғир ёғиб, оғриди ярам	529
<i>Наби Ҳазрий</i>	530
Бўлиш	530
<i>Пимен Панченко</i>	531
Азизим, турналар қур-қурига боқ	531
<i>Танзила Зўмақулова</i>	532
Лирика	532
<i>Ота Отажон</i>	534
Ниҳол	534
Юрагим билан сухбат	535
<i>Давид Кугультинов</i>	536
Уч лавҳа	536
<i>Суяк Зьеу</i>	538
Қўлбининг борининг ҳаммасини айт!	538
<i>Эйсақу Ёнэда</i>	540
Олтинчи август қуми	540
<i>Садако Курхара</i>	542
Үруш инвалидлари	542
<i>Хадзимэ Сато</i>	544
Ҳаёт ўйли	544
<i>Иброҳим Юсупов</i>	545
Булутлар тунаган	545
<i>Муса Гали</i>	546
Улуғбек	546
<i>Вадим Сикорский</i>	548
Ёдимда Тошкентнинг тиниқ осмони	548

Фафур Ғулом номидаги Адабиёт ва санъат нашриёти, 1978.,

На узбекском языке

Ш у х р а т

Избранные произведения в 3х томах, том I

ПОЭЗИЯ

Редактор *X. Мансурова*
Рассом *A. Богдасарян*
Расмлэр редактори *A. Бобров*
Техн. редактор *Э. Сайдов*
Корректор *Ш. Собирова*

ИБ № 470

Босмахонага берилди 16 III-78 й. Босини
га рухсат этилди 24/VII-78 й. Формати
 $84 \times 108 \frac{1}{3}$. Босма л. 17,5. Шартли босма
л. 29,4. Нашр л. 15,94 + 0,13 вкл. Тиражи
10000. Р 09260. Гафур Гулом номидаги
Адабийт ва санъат нашриёти. Тошкент,
Навоий кўчаси, 30. Шартнома
№ 191—77.

Ўзбекистон ССР Нашриётлар, полиграфия
ва китоб савдоси ишлари бўйича Давлат
комитетининг Тошкент «Матбуот» полигра-
фия ишлаб чикариши бирлашмасида №1-
когозга босилди. Тошкент, Навоий кўчаси,
30. 1978 йил. Зяказ № 1131. Баҳоси 2 с. 30т.